

**PALEMENE XI  
1991-1996**

**Afioga AFAMASAGA FATU VAILI**



**Itumalo Faaalalafaga:**

*Aana Alofi Nu.3*

**Filifilia:**

*7 Me 1991*

**Tofia ma Fofoga Fetalai:**

*7 Me 1991*

**Faatauto:**

*7 Me 1991*

**Uluai Lauga Faa-Fofoga**

**Fetalai:**

*7 Me 1991*

Ae ou te le'i nofoia le Nofoa e avea ma Fofoga Fetalai o le Fono Aoa, ou te fia momoli atu la'u faafetai tele i sui usufono uma o lenie Fono mamalu, ona o lenie mamalu ua outou faia mo a'u i le tuuina mai lea o a'u i lenie tulaga, ou te tautino atu i le Fono Aoa, o le pule a le Fofoga Fetalai e faamoemoe lea i le lagolago mai o sui usufono mamalu uma o le Fono Aoa. O le a ou taumafai i mea uma ina ia outou lagolago mai ma le finagalo malie.

Ou te faasilasila atu i le Fono Aoa, ua ou faamoemoe ina ia tuuina atu nei loa lava a'u i Lana Afioga Mamalu, O le Ao o le Malo e tusa ai ma Tulafono Tumau.

Ou te faamoemoe o le a matou malaga faatasi ma le na ia fatuina mai a'u ma le na faaluaina, faapea foi le tóatele o sui usufono mamalu e mananao ina ia tatou auai faatasi ai.

Ou te faasilasila atu o le a faataatia ese Galuega a le Fono Aoa, a'o le a sauni atu mo le malaga atu i Lana Afioga Mamalu, O le Ao o le Malo.

**Tofa AMIATU SIO**



**Itumalo Faaalalafaga:**

*Aana Alofi Nu.2*

**Filifilia:**

*22 Aperila 1991*

**Faatauto:**

*7 Me 1991*

**Lauga Faataupou:**

*24 Iuni 1991*

Faafetai mo le avanoa. Ou te manatu ua uma ona faleniu tofi tofi le laau ma ua fusifusi foi lapalapa o Malo ma moli laau i Foga'a aua le Atua ma Lona finagalo aua le faamoemoe e pei ona i ai le asō. E le mafai foi ona tatou asa ae tãpã pea le alofa ma le agalelei o lo tatou Matai, aua e moni a Tavita, "Ana le seanoa Ieova se mamananu ua fano ma faaumatia i tatou". I lenie la itula se'i avatu le leo o Leulumoega i nisi tulaga aua le faamoemoe e pei ona i ai le asō.

E muamua ona ou momoli atu le faafetai ma le faamalo i lau Afioga i le Palemia. O le tau a Alipia ma le Toaiva

ma le nuu lenie o Leulumoega, le Nofo-a-Too, Lalogafau ma le Usoga, e ao ona matou avatu le faamalo ma le fafetai ona ua pau lenie o le vaitaimi ua nofoia ai e le pou o le Faletuiaana. I la matou matau mai i le tapuai mai a Leulumoega, o lenie ua alu alu suaga a le vaatele ua tau ane le tofa ma le faautaga i le Afioga lea i le Aloalii, o le Aiga e tausi e Alipia ma le Toaiva ma le nuu lenie. E avatu le faamalo ma le faafetai i le Afioga i le Palemia. Fai mai nisi upu o le Afioga a le Atua, "Amuia le tagata ua tumu lana utu aua e pei o ū fanafana i ona lima fanau a taulelea". O le a le utu? O le utu, o se tasi lea o auupega e tuu i ai ū a le fitafita po'o le Taitaiu pe a oo ina sauni se taua. E iloagofie le Taitaiu toa ua tumu lana utu. O lona uiga a oo i le taimi e tau ai le taua, o le matau lena a Leulumoega ma le itu lenie. A lea ua nonofo mai, a lea e sasao mai le Palemene o ū ia na e saunoa e tau ai le taua lenie aua le tatou Faigamalo. Ou te manatu e leai lava se ū e faaletonu.

Ua malo faafetai i lau Afioga i le Palemia, amuia le tagata ua tumu lana utu aua e pei o ū fanafana i lona lima fanau a taulelea. O alo ia ma fanau a Samoa, se'i tulou tupu ma ee o le atunuu, o lea ua fai ma au auupega e tau ai le taua aua se manuia o le atunuu o Samoa mo a taeao. Matou te le selu atu aua o lena ua avatu le faamalo a Alipia ma le Toaiva lau Afioga i le Palemia ma le mamalu o lena Itu o le Malo i le Kapeneta ma le mamalu i sui usufono o itumalo o lo'o potopoto i lenie taeao. Ua malo fai o le faiva, ua malie le tausiliga a Malietoa ua malie le faalelegafulu a le aitu o Salevao ua le 'ole lea.

Lau Afioga i le Aloalii lau Afioga Afamasaga, ia avea lo'u leo e fai ma fofoga o le Matua ma le Toaiva ma Leulumoega e avatu ai le matou faamalo ma le faafetai i lau Afioga i lou tulai mai i le Nofoa. O lou tulai mai i le Nofoa, o Leulumoega lava lea.

Fai mai le tatalo a Tavita i le Atua – "Le Atua e, afai e moni aumai ni malala ola e faapipii i lo'u gutu ma lo'u laulaufaiva pe afai e moni". O le faamanuiaga foi lena a Alipia ma le Toaiva, ia aumai ni malala ola e faapipii i lou gutu ma lou laulaufaiva, ia faagaganaina oe aua le Maota ma le Nofoa o Samoa. O ou māmā na, ia tafe toto ou ala, ia ta tagata lau laau, ia au lou gafa ma ia manuia lou tulai mai.

Le mamalu e i sui usufono o le itumalo lenie o Aana, e ao lava ia te a'u ona ou avatu la'u faamalo, e amata mai i Falelatai i le Susuga i le Laaunafausia ua malo, Leiataua o le uluai pou o Malo, faafetai. Toleafoa Faafisi faamalo fai o le faiva, Matatumua Maimoaga, faafetai. Le Mamea o lena lava, faafetai. O le fautuaga a Leulumoega, omai tatou tau le taua, tatou te le'i omai i le Maota lenie e fai ai nisi tulaga. Poo i ina poo i inei, tatou o e opogi le Malo aua se manuia o le atunuu ma Samoa.

Lau Afioga i le Palemia, e le pei Leulumoega o Iuta le faalata, ou te ofo alofa e pei o le savali a le Agelu. O Leulumoega ma le itumalo lenie e lagolagoina lau Faigamalo. O la e faafofoga mai lo'u itumalo, e avatu upu na i le aso lenie ina ia silafia e lena Itu o le Maota faapea foi lenie Itu o le Maota, matou te le faalata i se

mea, ua matou omai i le Maota lenei o le Maota o le atunuu e saili ai Malo, a tatou maua le agaga faapena Aana, le itumalo ma faipule o le itumalo lenei ona tatou maua lea o le Malo aua se manuia o le atunuu ma Samoa. Le paia o le itumalo lenei, Alipia ma le Toaiva, i laua na faigata Polo ma Fautala, Salue ma Gatai, Tei o Sooaemalelagi, faletua ma tausii, alo ma fanau o le tatou nuu, e avatu la'u faamalo ma la'u fafetai i le tatou itumalo. E le'i umi se taimi na tatou mafuta ai ma le tagata lenei, ae e talitonu lo matou taofi ua aumai lo outou faatuatuaga ia te a'u. Alipia faafetai i lau Tofa le Matuanatogi. Lo tatou nuu i Nofolii, lo'u aiga Sa-Tuala, Taimalie, le Fofoga o le Vai ma le Falefa o le Ailaoa, o lena lava. Faamalo faafetai le alofa, faafetai lo outou manatu mai i lo'u tagata. Tanuvasa ma lo outou aiga Sa-Tanuvasa ma le mamalu o le Faleaana, ia e leai o lena tou te silafia. O a ni tulaga na tulai mai i le faiga palota lenei, Tanuvasa taofi le filemu, teu lo tatou nuu, aua ne'i i ai ni uiga e aliali mai. Afai ua fai le faiga palota ua aumai le finagalo o le nuu ma le itumalo ma ana fanau ia te a'u, o le a la le mea e te toe popole ai? O ai a'u nei? O lena e te silafia, o a'u o le Taimalie, o a'u o le Tanuvasa, o a'u o le Faleaana, o a'u foi o le tama a le elele, a'o le a saga fai lava la i fea? Tanuvasa, fai mai le Afioga a le Atua, "E faapei ona outou faia i se aupito itiiti ma faatauvaa, o a'u lava lea ua outou faia i ai". Tuu mai lou faatuatuaga i lou atalii, pe tasi pe lua ae tau ina faitau ane ai Mu ma Ve'a. E pei o le matou leo lea e pa'upa'u ae oo i Lepea aua se manuia o lo tatou nuu ma le itumalo.

Alo ma fanau a le itumalo lenei o loo feagai ma aoaoga i soo se atunuu, Samoa ma Niu Sila ma soo se atunuu e avatu la'u faamanuiga ia te outou, ia manuia lo outou alofaiva mo aoaoga. O le upu moni alo ma fanau a Leulumoega ma Nofolii, e a a'u nei ae a outou taeao. Ia tautuana ma outou o outou o loo i ai le manuia o le itumalo lenei. Aua ne'i tuulafoaiina outou e le Atua, a i ai ni outou mafatiaga tagi i le Atua, toaaga e tatalo ma faafeagai ma le Tusi Paia i taimi uma aua o i ina e manuia ai lo tatou itumalo.

E faamalie atu i lau Afioga i le Fofoga Fetalai, o aga lava a le itumalo nei e pei ona e silafia aua le feagai ai o Leulumoega ma le Saga Esee ma le Nofa-a-Too. Lau na Fafau ma le Usoga. O le tulaga lava o Leulumoega o le ua faalanu maaveave aua le paia o le tatou itumalo. Afai foi ua tele so'u leo i ia tulaga, ia o tulaga lava ia o pou o le Fale-Tuiaana lea ou te talanoa ai. Afai foi o le a se faafofoga mai a lau Afioga i le Palemia ma lena Itu o le tatou Maota, e faamalulu atu.

E ao ona faasolosolo malie alagamea aua lava tulaga o le aso ma le faamoemoe, aemaise le utaga a le tatou Malo ma le mamalu o le Palemene. Lau Afioga i le Fofoga Fetalai ma le mamalu o le Maota, o le a ou amata mai i auala.

E maeu foi le tulai mai o lenei tama talavou, faafetai. E le gata i le talavou ae e aulelei foi le alii. Ma e talitonu lava le taofi i soo se mea na te faia.

Lau Afioga i le alii Minisita o Galuega, o le auala lea i Leulumoega, ou te le tau fai atu aua ua ou vaai i le Tala o le Tupe, o loo i ai se seleni e faamoemoe mo le auala lea e alu atu i Leulumoega e tau i Safata. Ona pau lava lona, ua talepe talepe le auala ona outou omai lea i Sasae nei outou faamaepaepa atu ai ae e le tufa atu ni mata tioata poo ni mea vaai. Ua tele le faama'i ua pesi i le nuu, faama'i mata talu ai le pefu. E ui lava i lea faafetai i lau Afioga i le Minisita, ua vaai atu ua maua se vaegatupe e faagaioia ai le auala lea. Ua uma foi ona ou fai i lo'u itumalo, masalo o taeao tou te vaai ai i masini. Lau Afioga i le Minisita o Galuega, tautuana ma oe ia fai pea le galuega lea.

I la'u vaai i le faafitauli o auala, na o se manatu e avatu. Faamata e a pe a fai se tatou fua? Le fua foi lea e fua ai masini mamafa la e feoai i luga o auala? Aua e pei e tasi lea mafuaaga e mafua ai ona malepe auala ona o auala sa fua mo taavale laiti ae ua feoai ai masini mamafa ma masini lapopoa e le gafatia e auala. Atonu o le tasi lea mafuaaga e mafua ai ona malepe auala ma taetaei. Ae afai se tatou fua ona fua lea o taavale mamafa, taavale foi ia ua ova atu i le sefulu tone. A fua atonu o iina o le a faaititia ai lea faafitauli e pei o mea o lo o fai i o, ia ma totogi foi i ai ma se \$50 e ave lea tupe e faaagaga aua le faiga o auala.

Lau Afioga i le Minisita o Falemai. Ou te manatu e tasi foi lea Minisita talavou. O le Falemai lea i Leulumoega, ia o lena ua e silafia, ou te le tau toe fai atu la lau Afioga. Ae o le pa o le Falemai lea, o le tasi lea pa na faaleagaina e Ofa, e o o mai i le aso ua tumu totonu o le Falemai i meaituaolo ma taifau mai le nuu lea o Nofolii. Ia tautuana ma lau Afioga. E le gata i lea o le maota lea e afio ai le Fomai. Ou te le ma iloa pe moni le faaupuga na ou faalogo i ai e faapea sei uma ona teuteu le Falemai ona o o atu lea o le Fomai. Lau Afioga i le Minisita, o le tasi lea Falemai o lo o tulaga i le tulaga manuia, e le gata i le tulaga i le Malae Vaalele ao le motu tele ia Savaii; e le gata i lea ao tua i Leafaga ma Faleaseela ma le la itu aua e pei o le taulaga lea i aso la ua mavae, sa tau uma mai i ai auala sa fetaii solo i le atunuu i Leulumoega. O lea e talosaga atu i lau Afioga i le Minisita, ia tautuana ma oe le Falemai, e tele mea ua faaleagaina i le Falemai. O le talitonuga lava o le Tala lava o le Tupe e fai ai mea uma, ae o le matau i le Tala o le Tupe o lo o lava si seleni mo ia vaega.

Ao ou i ai pea i le Falemai, lau Afioga i le Minisita, sa ou o i ai i le aso ananafi i le Falemai, na ma feiloai ma le teine fomai pasi, e le atoa le 18 tausaga o le teine ae na fai mai ia te au o ia o le teine pasi. O le mea la e aliali mai na o le toalua i laua ma le teine e fesoasoani ia te ia. A tutupu ni pefea pe taia se pasi ma se loli aua o le aso Sa e tele le mamalu o le atunuu e feoai e tafafao, ia o le a faapefea la? Ae na fai mai lava le mamao o Apia ma Leulumoega, vagana ni vaalele e feoai ai. Ae o le upu moni e taunuu mai le gasegase e le au i Apia. Ou te talosaga i le ava ma le faaloalo, o le molimau a le tamaitai pasi ia te au, e tatau ona lua ni teine pasi, lua teine ia e taua o Nurse Aid ona manaia lea ma faigofie a

latou galuega. E le gata i lea lau Afioga, ia e leai se Fomai. O le molimau a le tamaitai pasi lea, ua faatusatusa mai i Motootua, fai mai a ia o le aso Gafua e tau mai i le aso Faraile, e leai lava se eseese ma Motootua. Ona o le latou mau a fua i le aofai o tagata m ai Faleasiu e tau i Vailuutai, ou te masalo o le sau lea mai Apia e tau i Toamua ma toe alu i Falefa. O lona uiga e toatele tele le population o Aana. O lea ou te talosaga atu ai ma le ava lava ma le faaaloalo i lau Afioga i le Minisita, ia tautuana ma oe lea vaega.

Ao ou i ai pea i le nuu lea o Leulumoega, lau Afioga i le Minisita o le MOT po o le Civil Aviation. Ona o tulaga e masani ai le nuu leni o Leulumoega, ia e peiseai e faataitai i ai amio o tagata, e o lava latou i amio e faifai malie e le soona faia ni a latou amio. O le Falesa o le matou Ekalesia Katoliko, na ou tei ananafi i lou vaai i ai o la e tutu ai moli faailoilo. Ona ou fai atu lea i le faifeau, o a la moli? Ae fai mai o le moli lea e faailoa atu ai i Ave Vaalele ma e e feoi i le ea ua lata ona tatou taunuu i le malae vaalele. Ona ou fai atu lea, aua e i ai lava taimi e faaletonu ai masini o vaalele computers ma mea faapena. Ae a faapefea la pe a alualu ae sese le Ave Vaalele o le Malae Vaalele lea? Ia o lona uiga ou te le fai atu le mea o le a i ai, ae o le Falesa ua fia tausaga o galulue ai nai o matou tuua, o lena e silafia e le mamalu o le Maota nei, ae a tutupu ni pefea, ae o le latou mau ua fia sefulu ni tausaga o faaoga e le Malo le Falesa o le nuu nei e tuu ai o latou moli faailoilo. Ia e pei lava ona ou tau atu o le nuu nei e ese foi lea nuu. Ae ui la i lea o le talosaga a le Sui, faamolemole lau Afioga i le Minisita e le tagisa Leulumoega. Ona pau lava le mea a matou maua sina \$100 i le vaiaso e totogi ai le ogaeleele lea ma le fale lea ua faatutu ai a outou masini matautia ia, ia ua lava lena e totogi ai le pili a le Afioga ia Patele ma Faifeau, pule lava pe faaopoopo i ai ma se i si \$200 ua lava lea.

Lau Afioga i le Minisita o Galuega, i le alu atu lea i Leulumoega e tau i Tanumalala ma Faleseela, ou te le tau atua le tele o le tamaoiga o le nuu leni na faaalu i lalo ae fai ai pou moli. O ulu, o fai, o koko, o le tala a toaina fai mai e eka le lautele na alu ese ae fai ai pou moli, ae o le mea e oo i ai e le o mu ai i latou. I luga i le aualatele, e sefulu aiga o lo o nonofo mau ai e le o toe nonofo i tai i le aai ae e le o mumu se moli, ou te le iloa pe aisea. E avatu ai le talosaga lau Afioga i le Minisita, se faamolemole ua matou moomia se fesoasoani, e le tele foi se transformer e faapipii ai. Ae ua uma foi ona ou logoina toeiina ia, o le taimi lava tou te vaai ai i le loli sauni se taumafataga, aua tou te faatamala, tausi le afaigaluega a le Malo.

Lau Afioga i le alii Minisita, o lo o i ai le vai eli e faapea na eli, eli, eli, maua le suavai ae e leai se mea o faia i ai. E pei lava ona ou fai atu, o Leulumoega ia e pule lava le Malo; a outou o atu lava e talepe uta, ae pau lava le mea ia faaoga le vai lea.

Lau Afioga i le Fofoga Fetalai, ua ou iloa e leai ni igoa o eleele e tasi lava le tau, ma o le a ou o o atu i se taimi o le aso nei ma ou faasino atu le ogaeleele o lo o i ai le vai

ma le foi o le a e faafesootaia. A le o lena foi ta tietie i ai, e manaia lena, ta o ta asiasi i ai i lou itumalo ma ou faasino atu ai mea uma ia ou te talanoa i ai ae faafetai lava i lau Afioga i le Minisita.

Lau Afioga i le Fofoga Fetalai ma le mamalu o le Maota, o le a ou sese mai i le nuu lea o Nofaalii, o lea lava e tumau lau tautalaga i lau Afioga i le Minisita o Galuega e faamalulu atu.

Masalo ua silafia e lau Afioga i le Minisita le faleaoga lea i Nuuasala i Vaialua, a e tu i le aualatele ma e tilotilo i gauta e te iloa atu le pou moli. O le pou muamua lena o le pou mulimuli foi lena, o iina e gata ai le moli. A ou vaai i le isi itu i Fasitoo-uta ma Fasitoo-tai, o lena foi, ua tau i lalo o fai ma lalo o koko moli. Ae o leni lava matou te nofonofo. Ia e leai atonu o lea faatoa aumai i luma o le Maota leni. Ae o le talosaga ma le ava ma le faaaloalo lau Afioga i le alii Minisita, e manaomia lau fesoasoani.

Ua matou see atu i le tulaga o Fanua ma Eleele. Lau Afioga i le alii Minisita, o se agaga e faamomoloto pe a e silasilla i ai, ua matou vaai i eleele po o tuamaota e faasino tonu i ai le nuu leni ae ua fai ma Siaopo ma Siasau. O le fanua lea i Agi, e talosaga atu i lau Afioga po o le a le tulaga o i ai le eleele lea? E i ai le manatu ma le ava lava, a silasila lau Afioga i le Minisita i le eleele lea ua avatu mo Nofaalii masalo o le mauga foi lea e iloa atu i le malae vaalele, a maimoa i le mauga lena, ia o lena. E alu atu lava i Nofaalii o i Fasitoo-tai galulue ai, ua le iloa pe aisea? Ae o leni e tuu eleele e faasino tonu i leni nuu, e moni o la sa faaoga e le Esetete Tausi, ae e matauina ua uma lea lisi. Lau Afioga i le Minisita, e talosaga atu ma le ava ae a pe a aumai le eleele lea, faafoi mai mea a Kaisara ia Kaisara, aumai le ogaeleele lea sei o matou o e fai ai ni o matou maumaga. Afai e leai, o lo o i ai le i si ogaeleele i gauta, le eleele lea sa i ai le togafai a Ausetalia, e tasi lea ogaeleele e leai se mea o faia ai e oo mai lava i le aso nei. Ou te le iloa po o le a le mea o faia ai. Ou te talosaga atu ai ma le ava ma le faaaloalo i lau Afioga, aumai leni ogaeleele mo le nuu o Nofaalii.

Faafetai lava i lau Afioga i le Fofoga Fetalai ma le mamalu o le Maota. Ae o le a sili atu la ona ou see ese ma le mea lea, ona o le a uma lou taimi. Lau Afioga i le Fofoga Fetalai ma le mamalu o le Maota, o le mataupu lea tau i Autalavou, Youth Development Council. O le matau a i tatou, ia, e leai e le tau fai atu, ae ua outou silafia lava o outou alo ma ni a matou fanau, ina ia faamanuiaina. A tatou silasila i le aofai o le atunuu leni o Samoa, ou te manatu, o le limasefulu pasene, o le autalavou lea, mai le tausaga e 18 e tau i le 30 tausaga, e leai ni galuega. E limasefulu pasene le aofai o tagata Samoa o le autalavou e amata atu i le 18 tausaga e oo atu i le 30 tausaga. O le 35 pasene o le va lea o i latou e leai ni a latou galuega.

Lau Afioga i le Fofoga Fetalai ma le mamalu o le Maota, e avatu se manatu vaivai i le Afioga i le Minisita ona o lo o i ai ni atiina ae e fuafuaina, ma o lou manatu foi e fia oo atu nei faamanuiaga ia Leulumoega ma

Nofoalii. I le tulaga lea o mea o Trade Centres lea e aoga ai le fanau i aoaoga faa-kamuta, aoga faasuisui, aoga faa-inisinia, ma a uma ituaiga aoga, o aoga uma nei e faaaogaina ai le autalavou lea, aua o le upu moni, a tutuli atu e o i uta, ae tatou toe fetau i le auala tele ua toe foi mai i le afa itula na tutuli ai. Ua augatata, ua paie o outou alo ma a tatou fanau e o i uta e toto le talo ma gagau le vao. O ni o outou alo ma ni a matou fanau, ua fiu tatou nei e faamalosi. O le a la le mea e le sui ai se isi auala? Sui se isi faiga, aumai e faaoga i le mea lea, o lea ou te talosaga atu ai ae fai i itumalo taitasi ni faleaoga faapea, e tusa lava pe 20 ni tamaiti e aoga ai, pe faaopopo i tafatafa o aoga faa-itumalo ma fai ai ni potu se lua pe tolu, e avatu i ai ma ni masini e faaoga ai le tama lea, ma faaoga i ai le vaega lea. Afai e oo i ai fai atu ua le mafaia, ia toe o i uta i le vao. Afai e fai atu ua mafai, ia e faapea lava. Ae ia fai ane le toalua, ua iloa fai le fale, ua iloa fai le pusa.

Lau Afioga i le Fofoga Fetalai ma le mamalu o le Maota, tasi lenei o atiina ae ou te le tau faamatala atu, o Faleaoga, o le manaia ma le matagofie. O le faleaoga o le itumalo lenei, ou te fai atu, i le taimi ua fano, o a lava mea e finagalo i ai le itumalo lenei, e taumafai lava Leulumoega. Ia, na ou aoga ai i le faleaoga lenei ao i Vailuutai, o le 19 ua galo foi ua leva aso, ae ou foi mai nei, ia o la e ua i Leulumoega. O alo ma fanau a Leulumoega, ua o i lalo o niu ma lalo o koko, ae faaavanoa faleaoga, aua alo ma fanau o le itumalo lenei. Ia, ou te le tau fai atu, matou te moomia se fesoasoani. Pe le o se mea e tatau ona outou fesoasoani mai ai i le faiga o le faleaoga? Matou te moomia lava se fesoasoani i lau Afioga i le Minisita. Ia, e leai foi se aoga e faaumiumi ai ae ua uma le taimi. O lea e avatu ai le faafetai ma le faamalo i lau Afioga i le Fofoga o le Fono, faapea foi Afioga i alii Minisita o le Maota, ae faasilisili ai i le Afioga i le alii Palemia. E le gata foi i lea, o le tapuaiga a le atunuu o Samoa. E le gata foi i lea, o lana Afioga i le Ao Mamalu o le tatou Malo, le Afioga i le Tapaau Faasisina, Malietoa Tanumafili II, ia o ou mama na, faapea foi lau Afioga i le Sui o le Fono a Sui Tofia, Mataafa, faamanuia le Atua i lau Afioga. Ia manuia le Maota nei, ae ola lo matou leo.

### Tofa Hon FAASOOTAULOA PATI



#### **Itumalo Faaalalafaga:**

*Gagaemauga Nu.2*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*25 Iuni 1991*

Lau Afioga i le Fofoga Fetalai, ua ou tulai atu e le o lou tulaga Minisita a ou te tulai atu o au o se Sui a Faipule fou aua se sao o lou itumalo. A o lei oo sau faamatalaga aua ni moomooga o lou itumalo, ae

muamua ona ou faafetaia le Atua, le Atua lea na ona filifilia lou Sui e auala i le palota a lou itumalo. O le Atua lea na filifilia lou Sui aua tofiga a le alii Palemia, o le Aua lea e ave i ai ou vaivaiga ma ou manaoga ina ia mafai ona ou seei mai i le Palemene o le Malo o Samoa i Sisifo. Faafetai i le Atua, faafetai i lou manatu mai, faafetai i lou tali mai, faafetai i lou faafogoga mai i le vaivai o lau auauna. Ia tau ia tumau pea lou viiga ma ia saga viia pea Oe i so o se mea e faia e auala i lau auauna. Faafetai i augatama, i latou o e na filifilia ina ia Faavae Samoa i le Atua, o le Atua mo Samoa.

I lenei lava afiafi na ia te au se lagona ou te faafetai ai i le Faavae lea o lo o faavae ai Samoa - Faavae i le Atua. O le tala a le Tusi, o Tusi Paia uma lava e mai le agaga o le Atua ia, e faapoto ai, e aoao ai, e faatonu ai, e aumai ai foi le amio filemu ma le amiotonu a le Atua. Ia viia la le Atua i ia mea uma ma ia tele pea sona agalelei aua le alofaiva o le Palemene o Samoa i Sisifo aua Samoa ma ona tagatanuu.

Ou te faatulou atu i lau Afioga a le Fofoga Fetalai, lau Afioga Afamasaga Fatu Vaili. O le a ou le taele i le tai sa pe ou te afua siisii i ou paia ma ou sa aua tulaga faalupelupeina i lau Afioga faapea foi lou Itumalo. Ou te faatulou atu i le paia i le Afioga i le alii Palemia, le paia i le Kapeneta, Afioga i alii Minisita faapea i alii eseese i Afioga i alii Faipule taitoatasi mo lenei Faiga Malo ua amatalia mo le isi tolu tausaga po o le lima tausaga. Ou te faatulou atu i le Afioga i le Ao Mamalu o le Malo, le Susuga i le Tapaau Faasisina, Susuga Malietoa Tanumafili II, e faapea foi le afio o le Sui o le Fono a Sui Tofia, lau Afioga Mataafa Faasumaleaui Puela Patu. O le paia i Tama ma o latou Aiga, o Aiga ma a latou Tama, ou te faatulou atu i le mamalu ia Tumua ma Pule, Ituau ma Alataua, Aiga i le Tai ma le Vaa o Fonoti. Ou te faatulou atu foi i le paia eseese o sui o le Fono, aemaise o le paia i ulu o Matagaluega eseese e pei ona tatou faatasi ai i lenei afiafi. Tau ina agalelei mai le Atua ma fesoasoani mai ina ia maua so latou malosi aua le faafoeina o latou Matagaluega taitasi o lo o latou galulue ai.

Ou te faafetai i lou itumalo, le paia i Aiga e lua, Maopu ma Sa Peseta ma Usoalii, Saleaula ma lana Faatufugaga, o Oe na pule, aemaise o Auauna a le Atua o lo o latou nono manu ma o latou talosiaina se manuia o le itumalo aemaise o le Malo o Samoa i Sisifo.

Ou te faatulou foi i le paia i le Palemene e pei ona tatou aofia nei mo le tatou sailiga manuia aua se manuia mo o tatou tagata. Ia tau ina faafogogaina e le Atua ia mea o lo o tatou fuafuaina ina ia manuia le tatou Fonotaga e auala mai lea i o tatou tagata.

O lenei itula ou te fia oo i mea o lo o faaletonu o lou itumalo. Ou te talitonu i lou itumalo pe afai o lo o faafogafoga mai, ou te le fia tautala i ai ou te talitonu o mea lava ia o lo o tautalagia e le tele o Faipule. O le mea muamua e pei ona ou tautala atu ai o le Auala. E pei ona ou faalogoina i nisi o taimi o fuafuaina e o e vaai le Afioga i le Minisita i nuu o lo o faapena ona latou fausia lelei auala. OU te talosagaina le Afioga i le alii



Minisita o le Matagaluega le auala o le matou nuu o Saleaula i Savaii, o lo o matua lelei le tausiga, e leai se mea o faaletonu. O lona lua o le auala o si ou itumalo o Salamumu, mai lava i le amataga o le fuafuaga o le faigamalo, mai lava i le alatele e tau i le aai e le i oo lava se ta i lea auala. Ou te talosagaina le Afioga i le Minisita sei vaavaai totoa i la lea vaega.

O lona lua o le Vai. I lou itumalo i Savaii ua leva ona talosagaina le Matagaluega o Vai, ona ua leva ona le toe i ai ni vai; o lo o faapena ona feaveai kalone e tau asu mai ai le vai i le Itu o Tane. Ua leai se vai i Saleaula i Savaii, e faapena foi i Salamumu. Ou te talosagaina le Afioga i le Minisita o lea Matagaluega ina ia alofagia ina ia vave ona foia lea faafitauli.

Ou te faafetai foi ile Minisita o Eletise, ona ou te iloa ua mumu le matou nuu i le eletise, e le gata i Salamumu ae faapena foi i Saleaula i Savaii. O le mea lena ou te talosagaina aiga ma nisi o vaega o lo o manomia le eletise, ou te talosagaina le Minisita a lea Matagaluega, ina ia alofagia le talosaga a si o matou nuu ina ia tofufusia lea vaega.

E faapena foi i le Matagaluega lea o Telefoni. E talosagaina lava e moomia e si o matou nuu i tua i Salamumu se telefoni ona e tu ese mai i le tele o alalafaga e pei ona i ai. E talosagaina le alii Minisita o telefoni ina ia faapena ona sei vaai totoa ane i si o matou nuu i Salamumu ia faapena foi i si o matou nuu i Saleaula i Savaii. Pe maua se telefoni ina ia faafaigofie ai ona felogonai o feau faavave e pei ona i ai. O le mea lea ou te faamalulu atu ai i le tele o nisi o mea o le faleaoga, e pei ona talosagaina le Ofisa o Aoga, le Minisita o Aoga, o lo o manaomia foi e le matou nuu i Savaii se fesoasoani mo faleaoga. E i ai foi le faaletonu o faleaoga talu mai lava le Ofa, ia o lo o faapena ona moomia se fesoasoani mai le Ofisa o Aoga i la lea Matagaluega.

O leni itula e le umi sau faamatalaga, e pei ona fai atu e fou lou Sui ia ae talitonu e le faamatafauloaina foi sau faamatalaga. Ae pau le mea ia a o faafogafoga mai si o matou itumalo, o a lava mea o lo o tatou moomia o mea lava ia o lo o talau atu e nisi o faipule. O lea foi ou te moomia ma ou talatalanoa i ai i alii Minisita ina ia faapea ona oo atu ia mea i le matou itumalo. E le umi sau faamatalaga, tau ina ia alofa mai le Atua, fesoasoani mai ina ia faamutaina leni mafutaga, o le a faapena ona tatou vaai foliga lelei o le Atua i ana faamanuiaga e auala mai i Sui Faipule e pei ona tatou i ai. Ia faamanuia le Atua i le Fofoga Fetalai, faamanuia le Atua i le Afioga i le alii Palemia faapea foi le Kapeneta, aemaise le Usufono i le mamalu o le Palemene. Soifua.

### Afioga FUATAGA IOANE ALAMA



#### **Itumalo Faaalalafaga:**

*Aleipata Itupa i Luga*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*25 Iuni 1991*

Lau Afioga i le Fofoga Fetalai, le Afioga i le Palemia ma lau Kapeneta i Afioga i alii Minisita. Le tapuaiga a Lana Afioga Mamalu O le Ao o le Malo, Susuga Malietoa Tanumafili II, le Sui o le Fono a Sui Tofia, Afioga i le Tuiatua, Afioga Mataafa Faasuaamaleaui Puela Patu. Le paia i le Palemene ua aofia nei o sui mamalu o Samoa i Sisifo. Le tapuaiga a Tumua ma Pule, Aiga i le Tai ma le Vaa o Fonoti. Susu o Auauna a le Atua o lo'o latou tauasuina le vai o le ola. Le Susuga i le Kovana o le Faigamalo a o tatou uso i Sasae.

E fia faatalofa atu foi i le mamalu i le tapuaiga a lo'u itumalo pele, Aleipata i le Itupa i Luga. Le susu foi o le Toeaina ma le Faletua aemaise Auauna a le Atua. E fia faamaise atu foi i nisi o aiga o lo'u itumalo o loo aafia i le valaau paia a le Atua i lenei aso. E faapa'i atu foi i lau Afioga i le Tuiatua Faanofonofo, Tofa i le Matua Tafua ma lena itu o le tatou pa ma la outou tapuaiga. Tapua'i maia ae se'i ou taumafai e fai se tatou sao aua faalagamae a le atunuu.

A'o le'i faia se faamatalaga e muamua lava ona ou momoli le faafetai i le Afioga i le Minisita o Tupe mo le sauniga o lenei Tala Faatatau o le Tupe Fuafuaina mo lenei Tausaga Faaletupe ua tatou savalia nei. Faafetai mo mea fou ua tuuina mai ai ma e tuuina atu ai se manatu i lenei taimi. A'o le'i amataina ni manatu, ou te lagolagoina atoatoa lenei Tala Faatatau o le Tupe.

E muamua ona ou amata mai i lou itumalo. E momoli atu le faafetai tele i lau Afioga i le Palemia ma le Faiga Malo ona o faamanuiaga ua taunuu atu i lenei itu o le motu o Upolu. O le mea muamua o le eletise, lona lua o vaipaipa. O leni tulaga sa i ai le vai o leni itumalo e afaina tele ona sa faamoemoe i le afi sa i ai i totonu o le Falemai. O lena afi e tele faafitauli e maua ai. E pe soo e i ai nisi aso e vaiaso pe masina foi e le o i ai se vai o leni itumalo ona ua faaletonu le pamu. Peitai ane ina ua taunuu atu le eletise po o ua sosoo iai le pamu, o lea e momoli atu le faafetai ona ua faamamaina le avega e manaomia o leni itumalo o le suavai. Peitai ane e faamoemoe i masini e fai ma gau ae lau Susuga i le Taitai o le Malo faapea le Malo, e pei ona ou talatalanoa atu i lau Susuga i le Minisita o Tupe; e manaomia lava pe mafai ona tai se matou vai pe a finagalo oulua ma Fatialofa i le puna o lo o i Lepa ona e malosi tele lea, ina ia toso mai ai se vai o leni itumalo ina ia le faamoemoe i luga o masini e fai ma faaletonu. E avea foi lena ma mea e avea ma faaloaloa i le va o Saleapaga ma

Lalomanu e le o nofoia ona o le faaletonu o vai. E momoli foi le faafetai ona o le falemai. Atonu ua faalogologo atu i talatalanoaga ma saunoaga a nisi sui o lo o faaletonu le tulaga o Falemai i o latou itumalo. Peitai ane o lenei itumalo o Aleipata Itupa i Luga faafetai atu o lo o sologa lelei ma o lo o manuia.

O le Auala. Faafetai mo le fuafuaga ua leva ona tau atonu ua lima pe sili atu tausaga na fuafua ma tautau pea le auala i Aleipata e amata atu i Falevao sei tau i Saleaamua. Faafetai atu ua gaoioia lenei faamoemoe ma ou te talitonu e ala ona faaletonu ona e sese le taimi na fai ai. Na laga tonu le galuega i le taimi o to timuga ua ala ai ona faaletonu ma aafia tele ma maumau taimi faigaluega ona o le malosi o timuga. O lenei la taimi ua leai ni timu seia oo ia Oketopa, o lea e fautua atu i lau Susuga i le Minisita o Galuega sei alofa e uunai le auala lea ina ia mafai ona faapuupuaina le malaga atu i Aleipata e matua mamao lava i le malaga i ai.

O lea e faafetai atu foi i nisi fuafuaga a le Malo e ui ina le o atoatoa i lenei taimi aua sa i ai le telefoni i Lalolamanu peitai ane na uma lava le Ofa e le i toe faaleleia ma e lei toe ola. O lea e faamolemole atu i le Susuga i le Minisita o lo o feagai ma lea vaega ina ia togafitia le telefoni ina ia mafai ona telefoni ma tau mai i Apia nei, faaoga e le lautele o le itumalo aemaise foi o tagata o lo o affio i Apia nei.

O galuega atiina ae i totonu o lenei itumalo, o galuega atiina ae a le atunuu. O lea ou te talosaga atu ai i le Malo le uafu. O le uafu lea o lo o fausia i Aleipata. Ua uma ona matou iloa o lea uafu afai e uma ona fausia e le se uafu mo Aleipata ae mo le Malo ona o lenei le itu o le a fai ma uafu faava-o-Malo e le gata i femalagaiga i le va o Upolu ma Tutuila ae o le a faapena foi ona tutai ai o ni vaa faila e pei ona fuafuaina. O lea sei alofa ane tautuana e tele lo tatou alamanuia pe afai e lelei ona faafouina ma toe faia lenei uafu ina ia aoga e lau atu ai a tatou faaeleleaga ma lau mai ai oloa mai Tutuila i lena itu o le mtou.

O le tasi tulaga e pei ona talsoaga atu ai o atiina ae a le tatou Malo, o se Malae Vaalele e pei ona faaogaina vaalele laiti i Aleipata i Tutuila. Atonu o lena tulaga e mafai ona pau ai le pasese ma faaoga tata ai taimi. Oe o le Malo o le a faaogaina le uafu i femalagaiga ma le tiute. O le tasi vaega e pei ona musumusu mai lou uso a faipule ia Letiu, o le Itupa i Lalo o lea itu o Aleipata o lo o faaletonu pea a latou vai paipa. O lea e faamolemole atu i lau Afioga i le Minisita o Galuega sei tagai ane i lena itu. O le tasi tulaga o atiina ae e manaomia e lenei itumalo mo le lelei o le itumalo, o le vaega lea o Turisi. Matou te mautinoa o le tasi lenei o vaega o le motu o lo o i ai ni mataaga ma ni taelega o le sami ma ni mea faapena o lo o fiafia i ai tagata tafafao mai. O lea e fia manaomia se tatou fesootaiga mo i matou ina ia mafai ona faaleleia vaega tou te finagalo ina ia mafai ona fai ai i nofoaga e tafafao ai e tafafao mai i nuu i fafo.

Sei fai atu se faamatalaga i le aotelega o le lauga e pei ona faataatia nei i luma o le Maota fono. Ua aliali mai i le lauga o le Tala Faatatau o le Tupe le manatu mamafa

o le Malo i le Ofisa o Aoga aemaise le Ofisa o le Falemai ma o lenei lava fuafuaga i so o se Malo ma so o se atunuu i le lalolagi, o le mea lea e sili ona ave iai le latou faamuamua, ia popoto o latou tagata ma ia ola soifua maloloina. O lea e momoli atu ai le faafetai i fuafuaga ua faia ina ia mafai ai ona faaleleia lea vaega. E le o po se lilo i le mamalu o le Maota, o nei vaega o le atunuu po o nei Departments e lua, e tele ina le maua mai ai ni tupe ae na o tupe alu. Peitai ane o a tatou fuafuaga na ma lo tatou lumanai lena ina ia mafai ona ola popoto a tatou fanau ma le malolosi aua fuafuaga a le tatou atunuu. E fiafia lou manatu e faitau atu i le lauga o lo o i ai se manatu o le Malo ma ua faatonuina le alii o pulea Tagata Faigaluega a le Malo, le Komesina ina ia ave i ai le faamuamua ma ia fai ni suesuega i le taimi nei lava ina ia suesue ai le ala ua le mafai ai ona nonofo mai o tatou tagata poto faapitoa e faia a tatou galuega e pei o fomai ma faiaoga ma isi lava matata o le Malo e feagai ma ia galuega. O lea e fautua atu ai sei alofa ma ia fai se fuafuaga i tagata faigaluega a le Malo ina ia mafai ona taofia e faia a tatou galuega i totonu lava o le tatou atunuu. Po o le a lava le atamai ma le poto o le tagata mai fafo, ou te lagona e sili atu lava ona faamalieleina taumafaiga a alo lava ma tamalii o le tatou atunuu. O se faamatalaga lena i le aoatetele o le Tala o le Tupe e pei ona faataatia mai. O le a ou faasolosolo atu loa i Matagaluega taitasi e pei ona faatulaga mai.

Lau Susuga i le Minisita o le Falemai, e momoli atu le faafetai tele ona o fuafuaga a le Malo e fesoasoani ai ma ave fua vailaau mo tagata e maua i mai e le toe tea ese ma latou i lenei olaga atoa; faapena foi i le ave fuaina o vai mo tagata ua sili atu o latou tausaga i le 65 faapea foi le fesoasoani a le malo ua fuafuaina mo tagata e le mafai ona togafiti o latou gasegase i totonu o Samoa nei ma avatu ai i nuu mamao. Ua tele le sao o le Malo mo le faaleleia o le soifua maloloina o le atunuu i lena tulaga. Pau lenei, e i ai se talsoaga e tuuina atu. O lo o aafia pea le au malolosi o le atunuu i mai i tau o a tatou vai ma tau o a tatou fualaau. Ua aliali mai o lo o i ai se 20% ua tuu atu i luga o le tau o vai, o lea a tuu atu i ai ma le lafoga i le GST e pei ona i ai nei, pe afai e fuafuaina e lavea ai i le taimi e faalauaiteleina ai lea tulaga ua mafatia tele ai lava le tatou atunuu. O lea e talosaga atu ai i lau Susuga i le alii Minisita o Falemai, sei e silasila totoa i lea mataupu. Pe mafai ona i ai se tulaga e fai ina ia faataugofie ia vai a tagata e pei ona i ai.

O le tulaga i le toalaiteiti o le afaigaluega o Fomai, o lena ua ou fai atu le faamatalaga muamua. E tuuina atu i le suesuega ua tuuina atu e le Malo i le Komesina o Galeuga a le Malo, po o le a se auala e mafai ai ona taofi a tatou Fomai. O le lima tausaga talu ai e sefulu ma ona tupu Fomai na iu mai i aoga fa-Fomai mai fafo. O e o lo o nonofo nei i totonu o le tatou Falemai e na o le toatolu. Ua toe foi uma le tele o alo o le atunuu e galulue i fafo. Na o se tala faatusa, o le totogi o se Fomai o se tama faatoa iu, faigaluega i le tausaga e tasi i Niu Sila e foi mai iinei ma galue ai i le tatou Falemai. E sii atu lona totogi sa i ai i Niu Sila i lo le totogi o se Fomai pito

maualuga o lo o galue ai nei i le Falemai. O le ala foi lea ua faatosina ai le toe foi e galulue i fafo ona o lea tulaga. E le fai atu ina ia sili totogi ia maualuga e pei ona i ai nuu i fafo, ae tuutuu atu i luga sina vaega atoa ma aiaiga o galuega ina ia mafai ai ona taofi mai e le gata i o tatou tagata Fomai po o Faiaoga, aemaise lava le vaega lea o le atunuu o lo o maua o latou tofi faapitoa i matata o lo o galulue ai. O lau la fautuaga i le tulaga e pei ona i ai le le lava o Fomai, muamua, ia faafeoloo totogi ma tuutuu atu i luga ma ia faaleleia o latou aiaiga o galuega. O lona lua, a o Minisita le Tofa ia Lavea na tuuina mai ai i le Ofisa o le Falemai, Ofisa o le Loia Sili aemaise le Ofisa o le PSC ina ia nofo ma taumafai e fai ni aiaiga ina ia mafai ai ona faafaigaluega i se part-time basis Fomai o Samoa o lo o tutoatasi nei ma fai o laotu Ofisa i totonu o Apia. Peitai ane e lei iu i se iuga lelei lea tulaga. Lau Susuga i le alii Minisita, e sili ona e silasila lelei i ai pe mafai ona fai lona faiga ina ia foia ai seisi vaega o le faalelava o Fomai.

Atonu e faapena foi i Faiaoga. E i ai nisi o maualuluga o latou poto faapitoa i faiaoga i nisi matata; pe mafai ona galulue i tulaga faapena part-time basis e fesoasoani i le utiuti o a tatou faiaoga. O le isi mea e sili ona taua, po o le a lava le mananaia ma le matagofie o le tu mai o le tatou Falemai ae a le lelei galuega i totonu e le manuia. O lea e taua tele le auina atu i fafo o alo o le atunuu ina ia aoaoina i le poto faapitoa ina ia foi mai ua mafai ona fai galuega ia e le o mafai ona fai i Samoa nei ma auina atu ai a tatou gasegase i fafo. O a ni masini tatou te aumaia ma faaoga i totonu o le Falemai, e le faapea e aumai ona soona faaogaina lea. Leai, e tatau ona alu seisi e aoao faalelei ina ia mafai ai ona faaogaina le poto faapitoa ina ia mafai ona faaogaina nei masini e aunoa ma le faaleagaina. O nei masini e taugata.

O se tasi tulaga e i ai pei ona talanoaina e nisi. Afai lava e sautuafia le matou tau atu e iloa ai iina le faamamafaina tele o nisi tulaga o lo o i ai le tatou galuega i totonu o le tatou Malo o Samoa i Sisifo. O le maintenance, o le taimi faatoa uma ona fausia le Falemai fou e fuafua atu lona teuga po o le maintenance e sili atu le tupe alu i le maintenance o le Falemai fou sa i ai i lo le Budget a le Health Department i le tausaga atoa. A outou tagai foi i ai i le tulaga o le Falemai o i ai nei, o lo o lala mai ai lava uamea i pito e fuafua ina ia toe faia e sosoo ai nisi Falemai. O le fautuaga foi a nsii o alii popoto mai fafo e sili le tuu ai pea o le fale Samoa e pei ona i ai le tulaga o i ai nei e faigofie lona tausiga. Lona lua o le tele o tama ma tina e sili atu le manao o latou e taotooto ai iina i le environment lea e pei ona i ai o tatou Maota ma Laoa i lo fale papalagi ma mea o i ai nei. O lea la ua ou vaai foi ua i ai nisi fuafuaga a le Malo ma ua fausia foi se tasi fale o fesoasoani mai Farani ia ua manaia. O le tulaga lona na ona fau tuu mai ia tatou ao le tulaga e i ai, e sili atu ona tatou suffer i lona maintenance. O le tulaga ua i ai nei le Falemai e pei ona outou silasila i ai e taei ma faaletonu faitotoa ma faamalama, o mea e sui ai e le taugofie, ma e le maua i Samoa. O lea ia faamatuu atu se manatu ia aua nei o

tatou naunau ina ia fausia ni fale tetele pei oni fale fogafale fia ma fale e pei ona i ai aua e le faigofie lona tausiga.

O se tasi tulaga i lau Afioga i le Minisita o le Falemai, e le ona o au o se Fomai faapitoa po o se Fomai tutoatasi ae e i ai foi se manatu e fia tau atu, o lo o i ai ni manatu i nisi o Minisita aemaise o Minisita o Falemai, pau lea o le tagata e faigaluega i totonu o le Malo e aafia i lana pule. Lau Afioga o Oe lea e vaai le soifua maloloina o Samoa i Sisifo, o lea la e tuuina atu ai ina ia tuuina ane se Fomai tutoatasi i totonu o lau Organisation Chart aua e le mafai ona atoatoa ni au lipoti faale-tausaga ma ni tulaga o ni mai lipotia ma mea faapena pe a le avatuina i ai ni a matou fuainumera ma lipoti atu i totonu o le Falemai i tulaga faapena.

O le tulaga e pei ona aliali mai nei le GST atonu o le tulaga foi lea na i ai atunuu i fafo. E pisa ma tetee i ai ae faigata ua oo mai lava ia tatou. E faapea atu i lo tatou Malo o le tulaga o le vaaiga o gasegase i atunuu i fafo e i ai gasegase e totogi e le Malo le afa ae totogi e le tagata le afa e pei o le vaaiga o tamaiti. O lau Afioga foi sa e alaala i Niu Sila i le tele o tausaga. E faapena foi i tina maitaga e totogi e le Malo le afa ae totogi e le tagata le afa.

O le isi tulaga e i ai o lo o i ai le fesoasoani a le Malo mo aoga tutoatasi (private school). O galuega uma nei e tau mai i le pepa o galuega mo le soifua lelei o tagata. E faapena foi la le tulaga i Fomai ia ma Falemai faapitoa, o le aoga o le pisinisi, o le pisinisi a le tagata o lo o faia le aoga. E le fai atu ina ia taumafai e fesoasoani mai ia matou pisinisi ae pe mafai ona fesoasoani mai i le tuuina mai o nisi meafaigaluega e manaomia i totonu o galuega e tautua ai le atunuu. O se tasi tulaga i le Falemai, ua aliali mai e pei ona faalogo atu i saunoaga ma fetalaiiga i le faaletonu o Falemai i tua. O fuafuaga e pei ona ou iloina e au, o Tuasivi e pau mai i le lua Fomai i taimi o matou i ai maotu i Savaii 30 tausaga talu ai, e toatolu matou sa galulue ai i Tuasivi. O le taimi lona ao toalaiteiti le aofai ae na matou lagona lava le tele o galuega na matou faia. E mafai la i le taimi nei i le tulaga o i ai lona vaega o le motu; e faapena foi i Leulumoega. A lelei ona tali le Falemai lea i Leulumoega e talia le loaloa o le Alofi o Aana aemaise lona itu o Aana, ia toalua ni Fomai e i ai, e tatau lava ona faaitiiti galuega a Fomai pei o Motootua. E faapena foi Falemai na faia e Sapani pei o Sataua, o le manatu lona e tuuina atu i tafatafa o lau Susuga.

O le Ofisa o Aoga. Lau Afioga i le Minisita o Aoga, o le tulaga lava lona.

Ua uma ona tagi atu i le leai o ni faiaoga, o lea e tatau ona utagia foi ina ia faaleleia totogi o Faiaoga ina ia mafai ai ona latou nonofo pea i totonu o le tatou atunuu. E i ai foi le manatu i le tulaga mafatia o i ai Samoa College. Ua aliali mai le lipoti i le tupe, o lo o tele le tupe ua tuuina atu i aoga i tua. O le taimi tonu lea ua tatau ona faamaoti ai le tatou tagatagai a le Malo i taimi ua agai atu tamaiti i o latou aoga i luga ina ia mafai e tamaiti ona o atu i Iunivesite. Ua aliali mai o le taimi

tonu lea ua manaomia ai le fesoasoani ae ua agaigai atu ina faaletonu le tulaga o aoga.

Ua manatu atu foi i le Ofisa o Faatoaga ua tuuina atu ai le tele o le vaega tupe ina ia faaleleia le Ofisa o Faatoaga. E vaivai lava le mafaufau ona o le tulaga ua i ai nei le tatou Ofisa o Faatoaga. E faaletonu i le tele o a latou research e fai ae aliali mai lava e le o umi ae le o aoga le taimi. Ua aliali mai ua fuafuaina e faafofoaina ia ma nisi tulaga faapena. Ua i ai le manatu sa i ai foi ia na lau mai e faapea aua le fofoga taumafa o le atunuu. Ua leai se mea ua le aoga uma lenei polokalame. O tulaga faapena e le tatau ona fuafua tatou te faia ia tulaga ae le o faia le mafuaaga e ala ai ona short a tatou ia. Ia fai mai ni a tatou tulafaono ina ia taofia ai le faia o nei mea pei o le taina o le pinelo. Ta le taimi ua faanoa le gatala o la e fanau tamai ia ae o atu tatou aumai; e faapena foi le palaia, faapena foi le tele o ia ia e maua i le sami. E tatau ona faatapulaa le tulaga mo le faaogaina e tatou o ia o le sami ina ia mafai ona lapopoa ona mafai a lea ona fuafua mo le tatou faaogaina.

Ia avea ia lenei taimi e avatu ai le faafetai tele i le Afioga i le Palemia ma le Kapeneta aemaise le mamalu o le Fono. O nai manatu e na o na faataatia atu e fai i ai se fuafuaga. E faapea foi le faafetai atu i lau Afioga i le Fofoga o le Fono mo le faapaleplae ma ia foai atu le tofamamao ma le utaga ina ia maua e lau Afioga le onosai aua le faafoeina o le fonotaga mamalu o le Malo o Samoa i Sisifo. Soifua.

### Afioga GAINA TINO



#### **Itumalo Faaalalafaga:**

*Gagaifomauga Nu.1*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*25 Iuni 1991*

Ia avea ia lenei taimi ma lenei avanoa e faatalofa atu ai i lau Afioga i le Fofoga Fetalai, lau Afioga i le alii Palemia ma lau Kapeneta, sui mamalu o lenei Palemene, aemaise lau Afioga i le Taitai o le Itu Agai, lau Afioga Vaai, lau Susuga i le Failautusi ma lo outou Ofisa. Aemaise le tapuaiga i le Ao Mamalu le tatou Malo, Susuga i le Tapaa Faasisina, Sui Ao, le Sui Tofia le Afioga ia Mataafa Patu Puela, Afioga i le alii Faamasino Sili.

Ou te talitonu e tatou te fia oo i paia o si o tatou atunuu ma le tapuaiga a Samoa. Ae paga le utituti o le taimi ma le avanoa, ae ou te talitonu e paia lava ma mamalu Sa ma Faiga o Samoa e tumau lava e oo lava i le faavavau.

Ia avea ia lenei taimi ma lenei foi avanoa e momoli atu ai le agaga faafetai tele ma le fia faatalofa atu ai foi i si ou itumalo pele ma lana tapuaiga, i le afio o e na faasaosao, paia i Aiga, e tusa ai ma le Tulafale lau Tofa Lavea, Leatipouniu ma le Faasau, le mamalu tele ia te oe

Safotu, aemaise foi lau tausiga i le Vaatele i upu o le Itu ma le Tootoo o Finao.

Ou te fia faatalofa atu foi i le itupa o tina i faletua ma tausiga ma saosao, aemaise foi le malosi o le tatou nuu, le aumaga o le Lilomaiaava. Fia faafetai faapitoa i le Auaifaluga paia a le Atua o lo o tapuai mai i si o tatou itumalo.

Lau Afioga i le Fofoga Fetalai, e amuli ona aveatu lea o ni nai manatu pe tau ane ai le filiga o la outou tofa paia. E muamua ona fia faafetaia lau Afioga i le alii Palemia ma lau Kapeneta i le Nofoaiga ua mavae atu, ona e maitau atu e tele lava ni galuga lelei sa outou faia i lenei vaitau. E faafetai atu ai i lau Afioga i le alii Palemia, aemaise le Afioga i alii Minisita sa nofoia foi i lenei vaitaimi ua tuana'i atu. E maitau atu o lenei faatoa oo atu lea o le moliuila i lenei itumalo, e le gata i lea o ni fesoasoani i tulaga o vaitaumafa ma vaitaele, faafetai tele mo le fesoasoani.

E fia faafetai atu i lau Afioga i le alii Palemia ona ua mafai ona faatauina le itupa o tina. Aua o u te talitonu o se taimi muamua lenei faatoa amanaia ai le itupa lenei o Tina e pei ona i ai se latou aso faapitoa i aso taitasi o le tausiga. Aua a fua atu i taimi i le itupa lea o tina, ou te talitonu o le tasi lenei itupa e pito i sili ona tele so latou sao i totonu o le tatou atunuu. I le tulaga o le gaosiga o mea taulima, ia po o matuauu foi po o le au seepapa po o le aufale-lalaga. Aua a fuafua atu i ai o le tulaga lea i le gaosiga o ietoga. O lo o avatu i atunuu i fafo e i ai Amerika, Ausetalia, Niu Sila, Hawaii faapena ai foi ma Amerika Samoa, ae o lo o maua mai ai a tatou tupe e tele, aua ou te talitonu o le tasi lenei alagatupe tele po o se sao, po o se Foreign o lo o aumai i atunuu i fafo, aua e talitonu lau Afioga ma le mamalu o la outou Kapeneta e auala atu i lau Afioga i le Nofoa, i lau vaavaai atu ma le matau atu i lenei vaitaimi, e le o toe tutusa le tamaoiga o lo o i ai nei si o tatou atunuu. Ae i lau vaavaai ma lau tilotilo o le tele o se vaega tupe po o le income, o lo o aumaia lea i fafo i nisi o alo ma fanau po o tamalii foi ma failauga, o le tasi lea vaega tupe tele o le tatou Malo ou te talitonu o lo o maua mai fafo.

Ou te talitonu foi la i lau Afioga i le Palemia, a vaavaai i ai i le tulaga foi lea o Tusifolau o e o lo o malaga mai fafo, e faanoanoa lava i se isi itu, e pei ona faatu mai lau Afioga ma le agaga faaaloalo, ua fai a si faigata tele ua le tutusa le tulaga lea. Aua o i tatou nei, e pei ona silafia lau Afioga i le Fofoga Fetalai, ia a malaga i fafo e \$5 lava le tax.

A o Tusifolau nei o tagata mai fafo, ia a uia loa e i latou nei i fafo ae ou te talitonu, o tagata Samoa lava. Atonu foi e ala foi ona fia sitiseni nei tagata o se fia maua o se manuia. A o tupe uma la nei e aumai i fafo, a o le tausiga la lea e pei foi ona aumai ai se faasea a nisi foi o le atunuu o lo o aumai i atunuu i fafo, e \$20 pei ona silafia e lenei Maota.

Ona fautuaina lea o lau Afioga e a pe a sei toe silasila totoa ane i lea itu pe tuutuu ifo i lalo pe faatutusa uma foi. O le talsoaga lea ma le agaga faaaloalo i lau Afioga i le alii Palemia, sei silasila totoa ane i ai i lea vaega aua



ou te talitonu, ia e pei ona avatu se manatu o le tele o sao o lo o aumai i fafo, o le tele foi o nisi o le mamalu o le atunuu o lo o papaaoo ma alaala i atunuu i fafo.

Ona ou sse atu lea i le Matagaluega o Falemeli. Lau Afioga i le alii Minisita, ou te talitonu e fou lau Afioga i le tulai mai i le tofi. Ou te talitonu o le tasi lenei o falemeli lau Afioga e, o le itumalo lenei o Gagaifomauga Nu.1 ma le Nu.3, o lea e afio mai Sifuiva ma le Afioga ia Polataivao. Ua tulaga faaletonu lava Falemeli nei ua le o toe tulaga i le mea sa i ai muamua. Ae talosagaina lau Afioga ma le agaga faaloalo, e a pe a toe silasila ane, e moomia le see mai i le tulaga foi e pei ona i ai o le District Post Office. Aua o le taimi nei lau Afioga o lo o i ai nei le meli lenei i se vaega o le fale o lenei aiga, ae na o le \$7 tala ma sene o lo o vaai ai lenei meli i le lua vaiaso. Silasila foi e sefululua nuu tetele i totonu o lenei itumalo. O lea la ou te talosaga ai lau afioga ma le agaga faaloalo, e toe moomia le toe faia o se falemeli, o la e silafia e Sifuiva ma le Afoga ia Polataivao, fale nei o lo o i ai nei i lou fale, sa faaogaina e le Bank o Western Samoa, e le o toe faaogaina i le taimi nei. Afai e i ai se taimi e maua ai se avanoa i lau Afioga e malaga atu ai ma silasila i ai, pe a talafegai foi ma lau Afioga, e manaia pe ana avatu i ai le falemeli lenei o le matou itumalo ma avatu i ai e faasalalau ni avanoa e ave i ai tagata faigaluega i le Aso Gafua e oo i le Aso Faraiile, se telefoni ma ni pusa meli, ia ma tatala ai foi ma mea ia o tupe faapoloaiina a le itumalo. O le fautuaga lea ma le agaga faaloalo i lau Afioga i le alii Minisita, faatasi ai ma le telefoni a lenei itumalo. E pei foi ona saunoa nisi o Sui mamalu, talosagaina le tulaga o mea tau telefoni, o se mea pito i sili ona aoga ma le tulaga o mea tau telefoni, o se mea pito i sili ona aoga ma taua. E oo mai i le taimi nei e le i lelei lava le telefoni lenei, lau Afioga e. Sa ou talosaga lava i le taimi lea a o tulai mai le Afioga ia Tanuvasa a o le i faia le Faiga Palota, e oo mai i le aso lau Afioga e, e le i lelei lava. A vili atu e lagona lelei lava le talanoa atu iinei, a o le faalavelave e le lagona le talanoa mai o tagata mai Savaii. O lea la e talosaga atu ai ma le agaga faaloalo i lau Afioga i le alii Minisita, sei silasila totoa ane i lea vaega.

Ona ou see atu ai lea i le, ona o lea ou te vaai atu e le o nofoia mai le nofoa a le Minisita o Aoga, Ofisa o Galuega. Lau Afioga a le alii Minisita, ou te talitonu o oe foi o se Minisita e fou mai i lea tulaga. E momoli atu le faafetai tele i lau Afioga i le Minisita o Galuega, ona talu ai o auala nei a si o matou itumalo, e pei ona oo atu i ai nisi o asiasiga a nisi o Komiti, ia e tele lava le faaletonu sa i ai, o le faifaiaga o le faiga o lenei auala. E le mailoa i ai se faiga ma ni aiaiga i le Konekalate lea sa faia le auala, ae faafetai atu i lau Afioga o lea ua oo atu foi i Savaii, ou te alu atu nei i le Aso Toonai ua vaiaa foi le tulaga ua i ai ma le tele o le suiga ua i ai nei; ua oo atu i Saleaula le teuga ma le faaleleiga o le auala. E ui lava foi ona o se galuega laitiiti e le i faataina la, se isi vaega aua tele foi se suiga ua i ai. E ui lava i lea masalo e tele se isi suiga fou o lo o i ai, e pei ona saunoa nisi o Sui mamalu, po o ua aveesea foi le Kamupani lea, tagata

inisinia nei sa mafua ai ona fai o nei auala. E sao foi le finagalo o nisi o Sui mamalu, e mana'o lava i le lelei ma le umi. Ia ae paga le leva lava ona pologa mai o lenei itumalo, ia faafetai atu i lea vaega.

O tulaga i mea o pamu vai lau Afioga e, o vaipaipa, ia e i ai le vaitaimi e le susua mai ai vaipaipa nei i falemai o le matou itumalo. Ua oo atu foi nisi o tagata o le Ofisa nei o le aupamuvai e sailiili le tulaga e fai ai mea nei o pamu. Lau Afioga o lo o i ai la se vaega o le fanua vaega eleele o lenei nuu, ua uma ona faalelei ma silasila i ai ia nisi o lenei Ofisa e maua ai le suavai lea. E oo mai i le taimi nei e le i ai lava se pamu. O lea e talosagaina lau Afioga e moomia se pamuvai nei e faia, ona talu ai pei ona avatu se talsoaga o le falemai o le itumalo, aemaise foi fale o nai aiga taitoatasi, o loo manaomia le fofo, vaeane le faafogafoga mai o Samoa ma le paia o lenei Maota, e moomia ai le tulaga lenei o vaipaipa.

O le tulaga lea i le auala foi nei lau Afioga e, e pei ona oo atu nisi o le Ofisa nei o Turisi, e moomia tele le faaleleia o auala nei i se tasi o Mataaga taua tele o lo o i gauta atu o lenei nuu, o i i la i le Mata o le Afi. E tele nisi o Turisi ma tagata e asiasi atu e fia maimoa ma fia silasila i ai, ia a o i tonu lava e i ai le vaega lea lau Afioga. O i tonu lava e tau o le Matavanu. Lau Afioga e talosaga atu ma le agaga faaloalo, e moomia le fia faaleleia o le auala lea mo lea Mataaga, pei ona oo atu i ai nisi o le Ofisa o le au-Turisi ma asiasi lea vaega, faatasi ai la ma le auala lena i faatoaga a nisi lava o lenei nuu. O le talosaga lea ma le agaga faaloalo. O le tulaga lava lea i mea tau auala, a i ai se taimi ona e tali mai lea i ai, a o lea ou te tilotilo atu i le faatulagana mai ma le fuafuaga a le Malo i le faiga lea o auala i Savaii, i le SR1 seia oo atu i le SR3, po o ua malamalama la i ai i le mea e aumai ai vaegatupe ia e faatino ai lea vaega. Ae ou te fia malamalama lau Afioga, o le SR4 po o auala o lenei itumalo o le Itu o Tane, po o fea e faatupe mai ai auala nei o lenei itumalo, ma le faaloalo i lau Afioga.

Ona ou see atu lea i le Ofisa o Faatoaga. Lau Afioga i le alii Minisita, ia ou te talitonu e fou foi lau Afioga i le Matagaluega, aua o le Afioga ia Pule sa na tauavea mai lenei Matagaluega i le taimi ua tuanai atu. E tele nisi o Sui mamalu sa lauga i ai i le tulaga lea i le taugata tele o mea nei o vailaau fanavao, faatasi ai ma le vailaau lea e pepe ai le anufe. E a pe a i ai se faiga lelei po o se fesoasoani a lau Matagaluega e foia lenei faafitauli po o lenei faamai ua tulai mai i si o tatou atunuu, i le anufe? Aua ua lipoti mai le suesuega a le Ofisa o Faatoaga lea sa faasalalau mai i Tala o le Vaifanua i le vaiaso na tea atu nei. E tusa ma le 95% faatoaga a lenei motu o Savaii ua faatamaia e le anufe. Lau Afioga i le Minisita e a pe a sei silasila totoa ane i ai lau Afioga sei fai se fesoasoani i lea tulaga. E manaia foi pe a o atu nisi o lo outou ofisa sei asiasia Faatoaga nei ma fai i ai se galuega alofa po o se galuega fesoasoani i ai, ae fai fua aua le tologiina aua ua taugata tele. Aua o lenei vaitaimi masalo e le iloa se vaitaimi e toe, ae o le a oge ai le

atunuu pe afai na pau lea o se mea o lo o vaavaai atu o lo o maua ai se tupe a si o tatou atunuu.

Aua o le tamaoaiga lea sa faamoemoe nei i le popo ma le koko e pei ona silafia e lau Afioga ma le paia o lenei Maota. Ia ua tulaga faaletonu lava le tamaoaiga ma mea faamaoemoe ai lo tatou atunuu, ia aemaise lava lenei motu o Savaii aua o le popo ma le koko sa faamoemoe tele i ai le tamaoaiga e maua mai ai ni nai seleni. Ia o le talosaga lea ma le agaga faaaloalo i lau Afioga i lenei itu.

Ona ou see ane ai lea i le isi itu, ona ou see ifo lea i le tulaga o mea nei o Vaalele Sivili. Lau Afioga, ou te manatua e le o mamao atu nei pe tusa o le tasi le masina le faigamalaga a le tatou vaalele tele lea o le Polenisia lea e masani ona malaga i Niu Sila ma Ausetalia, sa i ai se faaletonu sa tupu mai ai, oo i le Aso Gafua ua le faataunuina lea malaga. Ona faasalalau mai lea i le Aso Gafua i le mamalu o si o tatou atunuu, o le a faataunuina lava lea malaga i le aso Lua. Ua usu atu nai tagata, o le aso tonu lea na sau ma le part lea o le vaalele ia paga le vaai ma le faanoanoa. Ia leaga o lea e le o nofo mai le isi sui mamalu le Afioga lea ia Leniu o maua lea e molimauina lea faamatalaga. O le mea la e faaumiumi ai se faamatalaga, e le i oo foi se malaga i lena aso Lua, na momoe ai lava nai tagata ii i le malae Vaalele. Ae ou te lagona ua mafu a latou umu vaeatu le faafogafoga mai a Samoa ma le paia o le Palemene. Ia e momoe ai lava o nei tagata, o le mamao o nisi na malaga mai i Savaii, ma nisi e malaga mai i nuu i tua, faatoa faataunuina lenei malaga i le Aso Lulu i le 11.30.

Lau Afioga e le mafai ea ona i ai se isi fuafuaga i se isi kamupani vaalele, o le a saga tuu lava ma lenei feagaiga ma le kamupani valele lenei o le ANZ ae o lo o tigaina ai lava ma mafatia si o tatou atunuu. Ia ae matau atu o lenei lava e fai lava le feagaiga lena pe le i uma ea le 10 tausaga sa fai mai ai. Ae ou te iloina faapea a i ai se tulaga faaletonu i le vaalele lea a tatou, ona aumai lea o se vaalele a le kamupani lenei na te tauaveina malaga nei. Ia e pei o le mea lea e talosaga atu ai ma le agaga faaaloalo i lau Afioga, sei silasila totoa ane i lea vaega pe afai e te le i silafiaina. Ia faatasi ai foi ma le Kamupani Vaalele lea o le Hawaiian Air; tasi lenei Kamupani Vaalele e delay lava ia i vaiaso uma, vaiaso uma, e leai a popole foi lele. O vaalele nei o lea ou te maitauina e aumai e lenei kamupani e malaga mai lea i Samoa o vaalele leaga ia a le Kamupani Vaalele lea e aumai i si o tatou atunuu. Aua foi a tuu i o e feoai i o i atunuu la, e le fia o ai ni tagata aua foi e leaga. O vaalele lelei a ia a le kamupani lea o le Hawaiian Air o la e tuu i o e fai ai le latou faatauvaga, aua e tele ia le mau Kamupani Vaalele i atunuu la. Ae i lau Afioga, fai se isi fuafuaga, ae manaia foi pe aumai se isi kamupani foi lele e i ai le United Airline, o le Western Airline ia ma nisi Kamupani Vaalele tetele na e fai ai nisi fesuiiga tetele aua o lea o le a saga faapea ai lava le tulaga o le faapologa o si o tatou atunuu i lea vaega.

Ou te manatua se isi Usugafono a nisi sui mamalu sa matou i ai sa matou malaga faatasi mai ai ma se sui, le

Afioga lea ia Tauialo Palepoi; pe toe 10 minute, ae toe faapea mai le pailate, o le a toe foi le vaalele ua i ai se mea ua faaletonu. Ia o le mea lea lau Afioga e, e ala ai ona avatu se fautuaga, pe le mafai ona toe silasila totoa ane i ai lau Afioga, i se isi Kamupani Vaalele e tauaveina lea tulaga, e toalua ma lenei kamupani aua ua le uma ai lava le aumai o nei vaalele leaga, toe itiiti tupu ai se faalavelave ona toatele lea o nisi o le tatou atunuu e lavevea.

O tulaga ia i le vaega lea i lau Matagaluega o le Fisheries. Ou te vaavaai ma le agaga faanoanoa pe a vaai atu i le Tala o le Tupe, o vaa fagota ia e faatau mai e fagotaina le tatou ogasami, po o gataifale o si o tatou atunuu, o lea ou te tilotilo atu nei o le tau lea e i ai e \$2 afe tala Amerika e laisene ai nei vaa. Tusa pe \$4 afe tala Samoa, ae tasi le tausaga.

A silasila lau Afioga, masalo e tasi le aso e fagota ai lenei vaa, o lana tupe e maua e masalo e ova atu ma le selau ma ona tupu afe i le fagotaga lea e tasi. Ae ou te vaavaai atu e laitiiti tele lava lenei tupe o lo o totoigiina ai le laisene a nei vaa fagota ua faatagaina mai e fagotaina le tatou ogasami.

Ou te fautuaina la lau Afioga sei tilotilo ane i lenei vaega pe ua talafeagai, aua e i ai a lou manatu e le taitai ona fetau lenei fa afe tala Samoa e tuuina atu i nei vaa fagota. Aua e le gata i lea o vaa foi nei o lea latou te faaleagaina nisi o pole fagota i nisi afioaga i tua, ia ae tele foi tupe a le tatou Malo o lea e alu i le fausiaina o nei pole fagota.

E le gata i lea e sili ai pe a faapea e toe taofi ae faaoga pea si o tatou vaa foi lea o le Nafanua, e alu e toe tapue mai e tele ai tupe e maua a si o tatou Malo. O le talosaga lea ma le agaga faaaloalo i lau Afioga sei silasila ane i ai. Afai e le o lena, ia toe siisii i luga po o le 20 afe po o le 50 afe ina ia tele se tupe e maua mai ai a le tatou Malo.

Ona ou see atu lea i le Ofisa lea, o le Matagaluega a Leoleo. Ou te masalo e le o toe tele se faamatalaga i lea Ofisa aua e tele nisi o sui mamalu na saunoa ma lagolagoina foi le Matagaluega talu ai pei ona silafia o le tasi lea o Matagaluega e tigaina tele, a o latou totogi e le fetau. Aemaise foi le faauluuluga o lenei Matagaluega po o le Komesina, pe a vaavaai atu i le Tala o le Tupe lea e faatulaga mai ai lou totogi, ia faapea foi ma le aufaigaluega a lenei Matagaluega.

E le gata i lea lau Afioga, pei o lau Afioga o lea e i ai lea Matagaluega. O le Motu lea i Savaii e leai se latou loli lea sa talosagaina e avatu e faaogaina e Tuasivi. O lea la e talosagaina lau Afioga i lea vaega. E le gata i lea o le Ofisa o Leoleo lea i si o matou itumalo lea i Fagamalo, na faaleagaina mai lava lea fale ia Ofa e oo mai i le taimi nei e le i faaleleia. O lea e talosaga atu ai ma le faaaloalo e manaomia se fesoasoani i lea tulaga.

O aufaigaluega a le Malo; ou te masalo, ma ou te faafetai ai foi i nisi taimi i Faauluuluga taitasi o le tatou Malo, aua e talitonu lava e toatele lava nisi o sui e galulue ma le faamaoni, a o nisi foi e galulue ma le le faamaoni. Ae ou maitauina lea ma le vaavaai ma le

agaga faanoanoa tele, o lo o tele ni matagaluega o lo o manaomia le tulaga foi lele i le tulaga lava i mea tau tupe i le siitaga o latou totogi. A o lau vaavaai i le tele o Matagaluega i le soona faia ma le faatautala o taavale.

E pei o isi Matagaluega e leai ni a latou taavale, o la foi e talosaga mai e manaomia ni latou taavale. A o le tele o nisi o Matagaluega i lau vaavaai i ai o lena tou te silafia o le tele o taavale la e feoai ai; ua le gata i Ulu o Matagaluega ua tofu ma taavale, faasolo ifo i lalo i isi tagata faigaluega a manava ua tolu ma le taavale e o ai i o latou aiga. O le fesili pe faamata e le o le tasi lea o alagatupe tele a le tatou Malo o lo o alu ai i pau ia ma suauu?

Ia e le gata i lea, o le tele foi o nisi o taavale e lavevea, e o inupia ma lavevea ai nei taavale. O lea la e talosagaina ai lau Afioga, sei silasila totoa ane i lea vaega pe le o le tasi lea o vaega tupe tele a le tatou Malo e faasaoina mai ai i le tulaga lea o mea tau taavale e alu ai.

O tulaga foi nei i tagata ua litaea ia o lea ou te tilotilo atu e 50 tausaga ona litaea lea i se Matagaluega. Lau Afioga i le alii Palemia e a pe a toe silasila ane i lea tulaga, aua ou te talitonu o isi ua litaea ua toe aami e aumai e toe faafaigaluega. Ae o lenei foi vaitaimi, i tulaga nei o Faamasinoga, ua toe aami nisi o tamalii ma failauga aua e i ai le mau e masani ai le tatou atunuu, a matua le tagata o le faasolosolo foi lena ole matua tele o le tofa ma le faautaga loloto.

O le mea la lea lau Afioga i le Fofoga Fetalai, pe le toe siisii atu i luga pe o le 60 tausaga ona fai lea o le tulaga lena e pei ona i ai e faalitea ai se tagata mai se Matagaluega.

Ona ou see atu lea i le Soifua Maloloina. Lau Afioga i le alii Minisita, ana e le tilotilo mai ua galo oe. Talitonu o oe le isi e fou mai ae faamolemole sei e silasila ane i le Falemai o lenei itumalo, e le gata i lea o le fale e nofo ai le teine fomai.

Ia o le a faaauau atu i le Soifua Maloloina, talu ai toe lua mainute. Sei silasila ane lau Afioga i le Minisita i le Falemai o lenei itumalo ua manaomia le toe faafouina, e manaomia nisi o tioata ua pupu, ma le fale o teine fomai. Faatasi ai ma le toe faamumu i le paoa lea ua i ai nei a le tatou Malo.

Faatasi ai la lau Afioga sei e silasila i lenei motu i Savaii e pei ona saunoa nisi o sui e tasi lava le fomai. Ia lau Afioga, ia o lea ua tulai mai tonu lava o oe. O le Falemai, sue atu nisi fomai tetele i Savaii, ae avatu nisi fomai i le tatou itumalo o le Itu o Tane, ona avatu lea tuu i o i Satoalepai ae malolo outou ma Faasoo ma Leota.

Ona ou see atu lea lau Afioga i le Ofisa o Aoga, o lea ua matau atu o lea faatoa afio mai le Afioga i le Minisita. Lau Afioga i le Tamaitai Minisita o le Ofisa o Aoaoga, masalo a silasila lau Afioga i le aoga lenei a Vaipouli College i Savaii e tasi lenei aoga e vaai ai ma le faanoanoa. E tasi foi le Kolisi a si o tatou Malo i Savaii. Lau Afioga e moomia ni pasi e felauai ai nai tamaiti aoga. O le taimi lenei o loli la e feaveaiina tamaiti, toetiiti a tupu se faalavelave e le gata i lea a oo i aso

timuga e susu nai tamaiti aua e leai se fale o le loli. E faapena foi la i aso pefu, e vaai foi la ma le agaga faanoanoa. O lea e talosagaina ai lau Afioga, sei avatu ni pasi ia, aua o pasi ia o pasi tuai mai le fesoasoani a Siapani aua ua leaga pasi ia. Faatasi ai ma le toe faaleleia o Faleaoga nei e toe valiina uma lava ma fai nisi o mea o faaletonu, nisi o potu ua pala. Ia o le talosaga atu lea ma le agaga faaaloalo i lau Afioga. Ia talu ai lau Afioga i le Fofoga Fetalai ona o lea e tau matau atu o lea ua e toe fai mai ua uma lou taimi, ia o au ou te usitai tele i le faatonuga a le Nofoa.

Ia ona ou faafeai atu ai lea i lau Afioga, ia maua pea lau tofa paia aua lou taitaiina o le Maota o Samoa. Ia manuia foi lau Afioga i le alii Palemia ma la outou Kapeneta faapea foi lau Afioga i le Aloalii le Taitai o le Itu Agai, faapea foi le tapuaiga o sui mamalu o lenei Palemene aemaise le tapuaiga a Samoa o lo o faafogafoga mai. Ia aemaise le tapuaiga a si ou itumalo pele. Faafetai tele.

### Afioga LENIU TOFAEONO AVAMAGALO



#### **Itumalo Faaalaalafaga:**

*Vaimauga Sasae*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*15 Iuni 1992*

Lau Afioga i le Fofoga Fetalai, e momoli atu le faafetai mo le avanoa ua e tuuina mai mo lenei sui. E faapea foi ona ou faapai atu i le paia ma le mamalu o le aofia, lau Afioga i le Sui Palemia, le Kapeneta aemaise foi le paia o lau Afioga i le Taitai o le Itu Agai ma le mamalu o le Palemene o Samoa. E le tuua foi ia te au se fia faapai atu i le tapuaiga a Lan Afioga Mamalu O Le Ao o le Malo, Afioga i le Sui o le Fono o Sui Tofia, paia ia Tumua ma Pule, Ituau ma Alataua, Aiga i le Tai ma le Vaa o Fonoti.

Ae tainane foi o tatou uso i Sasae i le paia i le Faleagafulu ia Sua ma Vaifanua, Fofu ma Aitulagi, Ituau ma Alataua, Saole ma le Launiu na Saelua, e faapea foi tama a le Manua, Faatui ma Tootoo o Faleula ma upu i le Manuatele ae tainane foi le paia o le aufaigaluega paia a le Atua, o loo talafaauto ma nono manu aua Samoa ma lana Faigamalo. Ae le tuua foi ia te au le tatou ava fatafata ona e ui lava ina taotu o faatasi i le sa o Samoa ma Afioga i Tama-a-Aiga, e le mafai ai ona tuua ia te au ae avatu pea lau faamalo ma lau faatulou atu i lau Afioga i le Tuiatua Tupua Tamasese, aemaise foi le Afioga ia Tuimalealiifano o loo tatou i ai faatasi i le vaa o Samoa.

O lenei taeao ma le tatou aso i le tulai mai o le Tala Autu o le Tupe, aemaise o le Tala Faaopoopo Lona Tolu o Tupe, a tele se galuega e faia e tagata ma le mamafatu ae a lelei ma matagofie, e tele foi upu ma tala e fai i ai. Ae peitai o lenei Maota o le autu lena o le o galuega

leaga e fai, e avatu i ai fuatuaga a le Maota. E le uma ai i lenei Maota upu e fai i galuega e faale-lelei. E muamua lava ona ou faafetai atu i le galuega lelei sa faia e le Manu Samoa talu ai nei i le Aso Toonai. E momoli atu lau faafetai tele i le Manu Samoa tulou le paia o le Maota, sa ma talanoa ananafi ma lou toalua i Amerika ua oo atu tala sa faasalalau i nusipepa ua manumalo le Manu Samoa ia Toga. E meemee ai le agaga ona ua salalau vave i le lalolagi atoa tala o le Manu Samoa. E momoli atu ai foi lau faafetai tele i le Afioga i le Minisita o Taaloga, ua sili atu lou tulai mai i lenei lua tausaga ua tautaua ai Samoa i au galuega lelei e pei ona avatu lau faatomuaga, o glauaga lelei e le uma i ai tala, e talanoa ai Samoa, e talanoa ai foi le lalolagi atoa. E le gata foi i lea, o le Peresetene o le Iuni Lakapi a Samoa, e momoli le faafetai a le matou Itumalo i la outou fuafuaga ma le tofamamao sa outou faia o lea ua atiina ae ai Samoa. Ou te tautala ona o se tasi o alo o le matou Itumalo, lea na sikoa lona lua i le Aso Toonai. O le mea lea ua matua sili ai lou fiafia tele, e ui lava ina le faaauauina le taaloga ae na matua lelei lana taalo i le amataga seia oo mai ina maua le sikoa lona lua, ua matua selau pasene Vaimauga Sasae. O lea e momoli atu ai le faafetai tele a le Itumalo o le Vaimauga i le Iuni Lakapi, faapea le Afioga i le Minisita o Taaloga mo le galuega lelei na fai, ua aliali ai Samoa i lena week-end ua tea atu, ou te fia faapai atu foi i le matou Itumalo, o nei meaane ua ou alu loa ae lei oo atu i lou Itumalo.

E momoli atu lau faafetai tele i galuega lelei sa faia e le Malo mo lo matou Itumalo. Sa ou lauga i le aso 17 o Tesema i le tausaga talu ai i le Fono i lo matou auala e amata atu i Moataa e oo atu i Saoluafata. o lea e le o afio mai le afioga i le sui usufono o loo ma lavea tele i le auala. E ui o lea, ou te faafetai ona o le auala lea tuai na fai, ou te fai atu afai o le faiga lea ua fai ai nei, o se faiga ese lea. E momoli atu ai lau faafetai i le kamupani. O loo i ai le Inspector lea o loo i ai nei, o Rod Hans le igoa o le alii lea, o ia lea o loo ia vaaia le galuega lea. E pei o le faiga o auala i fafo ua grading lelei a le palapala by lawyers ua fai lelei, e muamua lola e suesue lelei e le alii lea a le pasia e toe lola foi, e uma toe alu atu le isi layer lona lua faapea ma lona tolu. E tusa ma le futu le mea e alu agai i lalo ona faia lea o layer ia e tolu seiloga e pasi le tagata lea i layer ia e tolu, ona faatoa faataina lea o le auala. O lea e momoli atu ai lau faafetai tele i le faiga o le auala lea e ui ina tuai, o loo toe i ai sina tupe e toe tuu atu i ai a le Malo, ou te fai atu o le isi 20 tausaga i le 30 tausaga. o le tausaga e 1950 sa faia ai e Samoa o latou auala. Ou te manatua le tagata lenei o Safeanoa, o ia lea sa na faataina le auala e amata atu i Apia i le taulaga e oo lava i tua, o isi foi i Savaii ae ou te fai atu na fai i le tausaga e 1950, ae faatoa sui le auala i le tausaga 1978. O nei tausaga e tele sa matua lelei le auala, o le SPDC lea na faia le auala i le 1978 e oo mai nei i le va lea ou te fai atu o se kamupani sili ona fai mea leaga lea. E oo atu i le lalolagi atoa atoa SPDC, o le vaega lea o loo i ai nei Cameron Ireland lea o loo faia nei le galuega ou te fai atu e selau pasene, ao le SPDC lea ua tataua ona sui le

igoa SPDC Samoa. E tataua ona tuu i ai le Cameron and Ireland, tuu i ai e faaigoa ai pea uma le galuega aua o le Kamupani lelei e tauleleia ao le SPDC o le Kamupani sili lea oan fai mea leaga i le lalolagi, aveese lea igoa.

Ua matou oo atu i auala laupapa e pei ona i ai le auala laupapa o loo i Lauili, e 34 loa itula o timu ua sauni uma Lauili i le tafe. O lea ua matua matagofie le auala laupapa lea, faafetai i le Dominion na ou talosaga i ai ina ua uma le afa, faamolemole toe tuu se lua mita ia toe faamauualuga ai le auala laupapa ma na faia lava. O lea ua i ai nei le auala laupapa ua matagofie, ua iloa foi e Lauili e leai se mea e toe tupu mai ai i totonu o Lauili. Ona ou oo mai ai lea i le isi auala laupapa lea na i ai, sa toe taumafai foi e le Kamupani lava lenei o le Cameron Ireland le toe faasaoga o le vai, aua sa matua pio lava le vai ao le taimi nei ua toe alu lava i le mea na i ai le auala laupapa muamua. O le isi mea o le matou nuu i le tausaga e 1928 sa talosagaina avatu ni eleele o Lauili e fai ai le auala lea, ao le a fai e taligalu. A mafaufau i nei tausaga e tele ua sili atu i le 60 tausaga o pelopelo lava e le Malo le matou nuu, e oo mai foi i lenei vaitaimi e le i faia se taligalu. Ua tusa ma le 12 mita ua aveesea o matou eleele mai le sami oan o le le faia o se taligalu lelei ma ua tulai ai auala o le Malo o loo i ai nei i uta o eleele o le matou nuu. Na matou talosagaina le Afioga Mataafa Fiamé Mulinu II, sa talia lelei fai mai o le a fai i le 1975 ae peitai ua tuumalo le alii ae ua le faia i le 1975, e oo mai nei foi i le Afioga ia Tupuola, talosaga ai foi, Afioga Vaai, na talosaga atu ai foi, e oo mai foi ia Tofilau o talosaga ai foi, na talosaga ai foi le Afioga ia Tupua Tamasese Lealofi IV. O upu lava e fai le auala ma fai le taligalu, e oo mai nei ia Tofilau ua fai mai o le a fai i le tausaga lea na tea nei, ae peitai ona ua oso le afa lea la o loo gata ai nei. O lea la ou te toe faamanatu atu ai i lau Afioga i le Sui Palemia ina ia alofa ifo ia muamua fai lo matou taligalu pea uma lelei galuega o le afa. Ia e alofa i lo maotu nuu e laitiiti le vaimea ao le mauga atoa, o lea e momoli atu ai le faafetai tele i lenei taimi i lau Afioga i le Sui Palemia masalo o le a e faia vave aua o lou faletua o le Lauili.

Ua ou oo mai ai lea i lo matou nuu lea o Letogo o se nuu lava e laitiiti o loo i ai o latou eleele o loo maua mai i le WSTEC. Sa ou fai atu i ai, faafefea o outou eleele, ae fai mai Letogo o lenei lava e totogi Leniu o matou eleele, matou te le iloa poo fea e alu ai tupe ao lenei lava e totogi o matou eleele. Sa matou i ai i le Aso Sa i le vaiaso talu ai i le matou nuu sa matou fonofa faatasi ai ma Letogo, ua talosaga mai Letogo faamolemole Leniu ma le nuu o Lauili toe tuu mai lava o matou laueleele sei o matou galueaiina ua matou fefefe e le iloa le taimi e fai mai ai le Malo e aveese matou ona toe aveese foi lea. O le mea lea ua tataua ona faamotu uma mea ia, ao le toe uu e le Malo o nei mea ua leai se mea o le a lelei ai ae na o le pologa o nai o matou nuu i le totogi o nei eleele ae leiloa e le o ni o latou eleele moni. O lea e talosaga atu ai afai foi o lau afioga foi o le Taitaifono o Eleele ia taumafai ifo la i nei eleele. E le gata i lea o le isi vaega lea o le matou nuu o Vailele ma Letogo o loo ua nonofo



ai ma fao ai le NPF, o le NPF lea e leai lava se isi e fai nuu i o matou nuu. Ua i ai lou agaga ma le matou itumalo afai lava e toe fia alu se isi i le mea lea, ia avatu lelei lana talosaga i lo matou nuu ona o lo matou itumalo, ona o le a avea ma tagata o le itumalo, ao le alu atu a nofo. Ua toalua tagata ua feoti ai i le va o tagata nei e ese mai lo matou itumalo, o le mea lea o le tagata lava e malie e fia nofo i le nuu lea o Vailele, Letogo ma le itumalo o Vaimauga Sasae, ona ioe ai lea, ae a le ioe aua nei faatagaina e le NPF ona faatau se elele i lea mea. O le isi lenei talosaga aua o tagata ia ole a fai foi ma leaga i le va o tagatanuu aemaise o lo matou itumalo. O Fagalii lea o loo tulai mai ai le auala lava lea, faafetai o le auala lea ua pasi nei i Fagalii, manaia taligalu o Fagalii, lelei foi le fuafuaga o le aufaigaluega o le auala i Fagalii. O le Malae Tapolo lea na ou siamupini ai i lenei tausaga, ia outou alofagia faatoa taua lava lea o le Palemene ua siamupini se isi. E tolusefulu tausaga ua faatoa iloa e lenei Maota ua faatoa siamupini se isi mai totonu o le Maota i le taaloga lenei o le tapolo. E lelei le ta a Toi, ae a oo loa i le taimi o le taaloga faapea ua oso le mai ua le mafai ona ta, ao le ta lelei tele. O le ta a Patu tasi lenei tagata o le matua ta lelei tele ae mau le isi taimi e alu atu ai e faauu, e le fiafia ona ou iloa foi lea ua misa ma le ava ua le lelei ai nei lana ta. O le Minisita lea o Sala Vaimili II o se tagata ta masau tele ae ona o le manao i le masau ae alu i tua le polo. O le alii lea e tele lana fesoasoani i lo matou malae tapolo, o lea ou te talosagaina ai Fiamē le Minisita o Taaloga poo i ai se isi vaegatupe e fesoasoani i le faiga o lea malae? Ou te fai atu ia outou nei faipule fia ola umi ia outou o e ta polo e maua ai le malosi.

O le a ou oo atu la i le Ofisa o FAatoaga, o lauga uma i le vaiaso na tea nei o loo fuamoa lava le Ofisa lea i lau faalogo mai i tua. Ia talofa i le Afioga i le Minisita o Jack Netzler, ua fetai lava ma puapuaga ua faalogo atu lava o loo alualu i ai le ita o sui usufono ae ou te faafetai ia Jack. O Fepuari i le tausaga nei na amata ai ona ou alu e fai lau atiina ae i lou maumauga ona ou sau ai lea faatau atu lau fanavao aemaise lava le vailaau lea e fana ai lau faatoaga, ona ou alu atu lea fana lau eka e tasi ma toto loa i ai le 10,000 tiapula i le eka e tasi. O le tau o le vailaau e \$85.90, o lou asiasi pea i lou maumaga masalo poo le masina lea e amata ai ona faaoga. Ona ou vaavaai lea, afia o le a fafai nei lou maumaga lea e 100 talo e matua sikuea lelei ai lau vailaau na faatau ao le 9,900 talo o lau profit lenei sei vaavaai la i ai i le sikuea o le tagata fai faatoaga ma le tupe tele o le a maua mai i le vailaau e \$85.90. O loo ou faalogo pea o loo taumuimui i le taugata o mea, taugata o le vailaau lea, ou te fai atu a muimui ae le alu e fai na te le iloa le sikuea o lea mea. o lea Siaki faafetai tele, faafetai i lo outou faleoloa lea, o le faleoloa lea ua maua ai fao, ua maua ai mea o meaai a moa, meaai a puua ma meaai a pato. Ae a alu atu e te faatau ai e te toe manatu i le moa lea, e tatau ona e alu ma le meaai a moa, e toe alu atu toe vaai atu i le meaai e aai ai puua, e te alu atu foi ave. E pei o le upu a le alii Minisita o le Soifua Maloloina, ia fafaga matuamoa e

lima a le tagata. Ua ou faalogo ia Siaki e faapea a fafaga ai loa moa e 24 itula i le aso e 24 foi fuamoa. A faatau la fuamoa ia ua lua taseni o lona uiga ua \$12.00 e maua mai i le 24 itula. O lea faafetai tele i lau Afioga i le alii Minisita.

O le mea lea o loo feoai ai nei nai tagata Samoa o loo faapea mai o loo aisi, aisi, aisi, e leai, o le mea lea ou te talitonu ai au e leai lava se Samoa o loo fia ai. Ua ta vaai atu nei ia Samoa i le tele o meaai, e leai foi se Samoa ua oti i le fia ai. Ao fafo i autnuu i fafo o le matua feoti o tagata i le fia aai. O le tele o fafo i teine tai sefulu iva tausaga agai i luga o teine auelei, e tutu mai i maga-ala ma latou saina mai e tusi ai le upu, “please work for food”. Ua manao na o le meaai ae faigaluega ia te oe. O le mea la lenei tafefe pe ana i o uma faipule e piki uma tagata ia e ave e faafaigaluega, ao iinei ou te fai atu e leai se isi e fia ai, ua tele meaai i Samoa ma ou te fai atu ai au i lenei taimi aua tusa nei i le ono i le fitu masina talu ona fai le afa, ua matua toe mau foi Samoa. E momoli atu le faafetai tele i le Ofisa o Faatoaga mo le faia o galuega o maumaga.

O le Ofisa lenei o Pulenuu o loo i ai toa, o taitai o le Komiti o Pulenuu, o lenei ua outou tagai mai i le Afioga ia Tuimaseve. O ia lenei o le Taitaifono o Savaii, o le afioga ia Samau, o le taitaifono lea o Upolu. E fai sina ou faanoanoa i tagata nei, o ni tagata ou te iloa o ni fitafita tau ua tofia e le Palemia e faia galuega. Ua ou faalogo i le afioga ia Tuimaseve ua le mafai ona alu i luga i Savaii ua le sao taavale, ou te fai atu Tuimaseve aua e te mafaufau i le taitaiu o le taua, e muamua lava poo le a le matua, e alu lava e tu mai le mauga sei o atu tagata. O atu tagata ina ia maua ai le malosi aua poo le a le vaivai o le tagata lea e i lalo ae vaai atu loa ua tu mai le tagata lea i le mauga e alu lava ma taumafai i ai. O lea la Tuimaseve e faamalie atu i lau taavale, aua e te tagi taavale, e alofa i le Malo o lenei ua i ale fita i tuga a le Malo i tupe ua faaogaina ai taavale a le Malo.

Ua maea palega auau le taliga o le sua i lau Afioga i le Fofoga Fetala aemaise foi o le paia o le Maota o Fono a Samoa, aemaise foi Ulu o Matagaluega o galuega a le Malo ua tatou i ai faatasi i lenei aso.

O le a ou soso atu loa i le Ofisa o Tupe i le Tala Autu ma le Tala Faaopoopo Lona Tolu o Tupe. E momoli atu le faafetai ona o le tele o lenei tupe ua fuafuaina e le Malo mo lenei tausaga mo galuega e tusa ma le \$200miliona. A ou fuafuaina la le \$200miliona lenei i le aofai o tagata Samoa e 160,000 ona ou faapea lea poo le \$1,200 a le tagata soifua e toatasi. O se tupe tele lea i lou agaga ma lou mafaufau atu i le Tala o Tupe i lenei tausaga. E momoli atu ai le faafetai tele e le gata i lea o le faafetai ona o matata uma o galuega a Samoa i le latou taumafaiga ona atiina ae le Malo o Samoa aemaise foi ou te faafetai ona o Matagaluega o loo sili ona tele le tupe e maua ai le Tiute. Faafetai i lau afioga i le Faatonu Sili e \$84miliona le tupe ua tulai mai mo le gaioiga o lenei tausaga, aemaise foi o lafoga. Lau afioga i le Faatonu Sili o Lafoga, e momoli atu le faafetai tele i lau Susuga Fesili, e \$31miliona le tupe ua fuafuaina e aoina i lenei

tausaga aemaise foi o le Falemeli i le Susuga ia Petaia o le Faatonu Sili, e momoli atu lau faafetai. Ia outou alolofa ia ao uma mai tupe ia a le Malo e galueaiina ai le Malo.

O le tupe lenei ua fuafuaina e le Malo mo galuega uma e momoli ai le faafetai ona ua lava i lou lava lea manatu ua matua lava ma totoe tupe ae a faapea lava o le a alualu lelei masalo o le a manuia se atiina ae o Samoa i lenei tausaga e oo atu i le tausaga e 1993.

E momoli foi lau faafetai ona o galuega tetele ua faia i totonu o le taulaga i Vaimauga i Sisifo, o fale tetele ia e lua iinei, sa asiasi mai nai au uo mai Amerika nei i aso o le sisigafua, sa matou ui atu ai i tafatafa. O le latou upu ia te au, Leniu e ese le matagofie o fale ia o le a tulai mai i totonu o le atunuu o Samoa, ua pei lava o Amerika le manaia tele o fale, o tulaga i luga o le sami, ae e le gata i lea o galuega tetele o le a faia ai a le Malo. Ua uma ona ou faamatalaina i ai le fale lea o le Central Bank o le Malo o Samoa lea ua tulai. O le tausaga talu ai sa tatou talanoaina ai lenei fale tele, o lea ua tatou vaai atu ua tino mai, ua tatou vaai i luga ua amata ona alu i luga i le tauluga o le fale, masalo e le taumate o le tausaga nei ae faamanuiaina ma amata ai loa galuega. E faapea foi le fale tele o loo i tala atu, e momoli atu ai le faafetai tele i le Malo ona o ia fale tetele o le a tulai mai i totonu o le Malo o Samoa o le a alu atu i fafo tala o lenei Malo.

O le taulaga i Apia o loo tulai mai na o auala o loo faaletonu. E tataua lava ona muamua fai o tatou auala, o le tele foi o sui usufono o Savaii o loo i totonu o le Vaimauga ae a lauga e lauga agai i Savaii ae le lauga agai i totonu o le taulaga o loo nonofo ma alaala ai, sai fai muamua le taulaga i Apia ona lauga ai lea agai Savaii, tatou te lauga uma i Savaii ae tatou te alolofa uma ia Savaii. O lea ia tatou alolofa i le taulaga i Apia ina ia faamatagofie i le vaai a tagata e omai i fafo. Ou te talosaga atu ai ia te outou sui usufono o Savaii ia tatou o faatasi i le mea o loo outou alaala ai, e leai tou te le o i Savaii e faaoga le tupe lea e sili ai o outou totogi ia matou. Ua ou faalogo e ova atu i le \$5,000 le tupe e sili atu ai outou totogi i totogi o Upolu, e na o Vaai lava lea ou te faalogo atu e saunoa mai e i Savaii lava i week-end uma, ao outou e fememeai lava iinei ma lauga i Savaii i ia faalogo mai ai le itumalo ina ia maua le palota, e le o se mea tonu lena. O i Savaii e fai outou itumalo ma o outou aiga, o le mea sili i le tagata o le alu i lona aiga.

Faafetai lava i lau Afioga, a ita le sui usufono o lona uiga e tiga, e tiga foi ia Upolu le tele o outou totogi, ae faaoga le tele o outou totogi e o ai i vaa o le Malo e toe maua mai ai le tupe a le Malo. E faafetai atu o lea tatou te i luga lava o polokiki, e le faapea o lea lava e iloa le mea tonu ae a o i polokiki e peiseai o mea ia e tosina ai loto o tagata e vaai i le tagata lea ma le tagata lea, pe fia le mea o loo alu i ai ae pe alu i Savaii, ia o le a ou alu ese loa ma lenei mataupu.

E momoli atu lau faafetai i le Failautusi o le Tupe aemaise le Komiti o le Tupe sa filifilia latou te iloilo ina mataupu tau tupe. Ua tatou vaai nei i molimau sa aumaia e i latou e tusa e 31 mai totonu lava o Matagaluega. O

lea ua latou ioeina ma latou iloa le matagofie ma le lelei o le Tala o le Tupe.

E momoli atu lau faafetai Pule, masalo o loo e saunia nei i se Minisita o Minisita ia e fa. E momoli atu le faafetai tele i le galuega tele i le po ma le ao, sa galulue ai le Komiti i le latou lipoti sa fai, ua matua matagofie, aemaise ai i latou sa molimau, ua ou vaai i ai o Taitai lava o le Malo sa molimauina lenei Tala o le Tupe ma fesiligia e le Mokiti ma ua talitonu lou agaga ou te ioeina le lipoti matagofie a le afioga i le Taitaifono ma le Komiti mamalu o Tupe a le Malo o Samoa.

E faafetai atu i lau Afioga tuimaseve masalo lava o oe lena e te fiafia ia te au, ae e faia le mea lea ua ou fai atu ai. Ia e alu e te tu mai i le tumutumu o le mauga ae sei o atu tagata i luga e fai galuega, malo faafetai.

Ona ou oo mai lea i le Soifua Maloloina, faafetai atu i galuega lelei ua ou vaai atu i lau uo tapolo o Sua, faamalo atu faafetai i galuega lelei uma. Ona pau lava le mea ou te fia talosaga atu ai, o loo i ai tama Fomai ua matutua lava o loo tiute i le po ma le ao, ma sa galulue mai lava ia Fomai ao pulea Samoa e Niu Sila ma e oo mai lava i lenei taimi o loo galulue lava i ni totogi e matua le manuia, ae tataua ona faaleleia totogi o nai Fomai matutua o loo galulue i totonu o le Falemai, poo le 1.00 poo le 2.00 i le po e alu atu ai i le Falemai o tuu mai lava Fomai o loo latou tausia ma faia o latou tiute.

E i ai se aso o le vaiaso lea na tea nei na ou tutu ai i luma o le Falemai lea o Farani e fai, o loo i ai container e 11 e i ai, ua ou vaai ua tatala le isi container. Na ou vaai atu i le afaigaluega lenei o avetaavale nei e tumu i le mea lea, ua laga atu ua tofu mea mea ma ave tuu i le taavale. O mea ia e le o ni mea fou, o mea lelei foi i lau vaai, o mea e aoga ai totonu o le tatou Falemai i Samoa. E tusa poo le tolu itula o ou nofonofo ma tilotilo i ai na ou vaaia pea le amioga lea a le afaigaluega avetaavale. O avetaavale foi ia a le Falemai ua tulai mai e \$43,000 tupe ua faaaluina i le faaleagaina o taavale i le tausaga talu ai. O lea e momoli atu ai le agaga e fia fesoasoani atu, sei taumafai avetaavale a le Falemai sei fesoasoani i le Malo, tausii lelei taavale aua o le vaega sili lea ona tele le tupe e faaagaga mo le Falemai, e sili atu i le \$80,000 le tupe e faagaioia ai taavale a le Falemai. O lea ou te talosagaina ai lau Afioga i le Faatonu Sili ina ia e lagolagoina lenei mataupu.

O le vaega lenei o Faamasinoga, lau Afioga i le Minisita ia e alofagia lo tatou Ofisa o Faamasinoga. O faamasinoga ia e fai i tua ua fai sina faale lelei ole potu lea e fai ai faamasinoga i tua mai o le Fale Faamasino Maua. O loo eleelea, o fafo latou e le teua, ae alofa lau Afioga ona o le nofoaga o loo omai i ai le atunuu ina ia matagofie, e le gata i lea o tagata e omai mai atunuu i fafo i Faamasinoga e faalogologo ao loo faaletonu ai le vaega o loo i ai le Faamasinoga Maulalo i tua.

E momoli atu foi lau faafetai i le aumai o lenei Tulafono i totonu o le atunuu, o le Tulafono o le Ofisa o Faamasinoga o loo tatou sauni atu nei i ai mo se taimi o i luma. O se tulaga lenei o le a tulai mai, e momoli atu ai

le faafetai tele i lau Afioga i le Minisita o Faamasinoga. Ou te manatu ua tatau foi ona lava lau lauga.

Lau Afioga i le Fofoga Fetalai, ou te faamalo atu i le taitaia o le Fono ao lea foi e ee le mamalu o Samoa. Lau Afioga i le Sui Palemia, ia e alofagia o ou mama na i le tauaveina o lenei taimi o loo toese ai lo tatou tama o le Taitai o Samoa, ia alofa le Atua i le tatou Fono atoa aemaise o le paia ma le mamalu o Ulu o Matagaluega o galuega a Samoa, ia outou manuia. E leai se mea o faaletonu a outou ia te au, ua 100% outou uma lava i lou asiasi atu. E masani ona ou asiasi atu i Ofisa o Faatonu Sili o Galuega, fealualuai lava, e ese le laumata fiafia o Faatonu Sili e leai se isi e faaletonu mai i le latou vaai mai i tagata o le atunuu. Ia manuia le Fono i lenei aso ma ia soifua.

### Afioga LESA FARANI POSALA MANUA



#### **Itumalo Faaalaalafaga:**

*Safata*

#### **Filifilia:**

*24 Aokuso 1992*

#### **Faatauto:**

*16 Tesema 1992*

#### **Lauga Faataupou:**

*6 Iulai 1993*

Faafetai i lau Afioga i le Fofoga Fetalai mo le avanoa.

Ona o le taua o lenei Tulafono Tau Faaofi i lenei itumalo o Safata, o lea ua ou manatu ai e faataatia tulaga o le lauga faalauaitele mo sui usufono fou, a'o le a fai atu so'u manatu e tetee ai pe lagolago foi i lenei Tulafono Tau Faaofi o lo'o taatia nei i luga o le Laulau a Fono.

Ua ou tulai atu ma le faaloalo tele lava e fai se manatu faaopoopo e lagolago ai i le saunoaga matagofie a le Minisita o Galuega, faapea foi ma le Lipoti po'o le Tulafono Tau Faaofi o lo'o taatia nei i luga o le Laulau a Fono. A'o le'i faaalua la so'u taofi, ou te faapai atu i lo'u Itumalo pele o Safata i le paia o Aiga Sa-Tunumafono o le Aiga Malosi, o le paia i le Falefa o le Ulugatagifa ma le latou Faasuaga, faapea foi le mamalu ia Taulauniu ma le Aitutagata, ae tainane foi le mamalu i le Alataua ma le Nofo a Tula ia Safata. E avea lenei taimi ou te avatu ai se faafetai mo le faaloalo maualuga e ala lea i lo outou tofia o a'u e avea ma se tasi o outou sui usufono mo Nofoa e lua o i totonu o le Maota Fono o le Malo Tutoatasi o Samoa i Sisifo - faafetai, faafetai lava.

E avea foi lenei avanoa e faafetai atu ai i le Malo i lau Afioga i le Palemia ma le mamalu o lau Kapeneta, faapea foi le mamalu o sui usufono eseese mai Itumalo taitasi, ona o lo outou lagolagoina o lenei Tofi mo se Nofoa e lua ai Nofoa mo lenei Itumalo o Safata. E momomo lo'u loto ona o le fita o le ala na uia. O lea ua outou silasila mai i le Tofi ma le galuega sa outou tausasa mai i tausaga ua mavae. O lea e avatu ai le faafetai ona ua taunuu a outou galuega ma le manuia, faafetai.

O le Tulafono Tau Faaofi ua taatia nei i luga o le Laulau a Fono, sa ou suesue totoa i ai ma sa i ai nai fesili

e faapea foi ma nai manatu e fia fautuaina ai le Malo o lo'o taitaiina nei lo tatou Atunuu. O fesili la nei, po'o lenei Tulafono Tau Faaofi o le a manuia atili ai Samoa atoa ae le na o se vaega? Ua ala ona ou fesili faapenei lau Afioga i le Fofoga Fetalai ona o tulaga nei, talu ona aumai le vaipaipa o lenei Itumalo o Safata i totonu o le vaavaaiga a le Malo, ua tulai mai le tele o faaletonu ma sa tele vaitaimi sa le ola ai nei vaipaipa ma sa tele foi taimi sa ola ai, ae le malosi ona tulei atu le suavai i isi afioaga. O le faataitaiga po'o le pine faamau o lea faamatalaga, o le afioaga lea o Saanapu e pei ona saunoa mai le Afioga i le Gafatasi i lana saunoaga, e tele le faaletonu o lo'o i ai i le afioaga lenei, ona o le vaipaipa o lenei afioaga e toso mai i Safaatoa. E pamu mai i Safaatoa ona pasi atu ai lea i Lefaga, Salamumu faatoa oo atu ai i le siusiu o lenei laina i Saanapu. O le taimi e oo atu ai le suavai i Saanapu, ua le talafeagai ona ua le malosi ma ua le mafai ona faaogaina. O le tulaga lea e i ai e pei ona saunoa le Gafatasi, o le tele o taimi o lo'o savavali ai nei tagata i le vai lea o loo i le va o Lotofaga ma le afioaga o Sataoa. O lenei tulaga e tulai mai ai se manatu e le talafeagai ona lagolagoina le Tulafono Tau Faaofi i le vaega lea faa-Itumalo. O le tulaga la i le afioaga o Saanapu o lo'o manaomia se fesoasoani mai lau Afioga i le Minisita o Galuega. E le o oe foi o se isi o oe lava o le Saanapu mao'io'i i le paia ia Anapu ma le Toalima. Ia tautuana ma lau Afioga o lea ou te vaai atu ua tusitusi lau peni, se'i faamaumau ane ai le tulaga lea i le suavai o Saanapu - faafetai lava.

O nai fesili i le Tulafono Tau Faaofi ua taatia nei, e faafesili atu ai i lau Afioga o lo'o faauluulu i ai lenei Tulafono Tau Faaofi. Ae a pe a faaopoopo atu i ai ma le ala-paipa o vai leaga i luga ina ia malamalama ai le mamalu o le atunuu po'o i latou foi e omai e fai suesuega o lenei Tulafono Tau Faaofi. I le tulaga o le Tulafono Tau Faaofi lenei, e le o se Tulafono Tau Faaofi na o vaipaipa e taumamafa ai le mamalu o le atunuu, a'o vaipaipa e taumamafa ai le atunuu ma ala-paipa o vai leaga.

O le Fuaiupu 8 e talosagaina ai le Malo pe le mafai ona faaopoopo i ai ma se faaupuga faapea, o lenei tupe e tuuina mai e fesoasoani ai mo galuega e faatonuina e le Malo. E le toe totogia e le Malo i le Malo ona ou te talitonu i le amataga o lenei Tulafono Tau Faaofi po'o le faatinoina o lenei Tulafono Tau Faaofi, o le a utiuti foi le seleni e tuuina atu i lenei Matagaluega ma o le a tulai mai ai se faaletonu. O lona uiga o le a sii foi i luga le tau o le gutu paipa mai le \$48 i se isi tau ina ia mafai ai ona totogi se aitalafu e faatino ai fuafuaga a le Malo. Na o se fautuaga ae le fai a'i, aua i lalo o le fuaiupu 22 ina ia sagatonu ai pe ogatasi ai le Tulafono Tau Faaofi o lo'o taatia nei i Faauluuluga o Matagaluega. E faapea so'u manatu, ae a pe a faapea e tofia e le Board of Directors, aua a le finagalo i ai le Kapeneta e le pasia. O le mea lea na o le talatalanoa atu ai i lea tulaga e pei ona faaopoopo i ai i le fuaiupu lea ina ia sagatonu ai ma tulaga masani a le Malo.





Tulafono mo i matou i tua. O le taimi nei ou te talosaga atu ma le loto maualalo ma le vaivai, ae taatia maia le vaipaipa o lenei Itumalo sai taumafai atu e foia ai le faafitauli o loo i ai nei, ua oo mai toeaia e faamolemole mai ina ia taatia atu ia le vaipaipa. O lenei vaipaipa sa faataatia lava e le Itumalo o Safata. Ona aumai ai lea o le isi vaega i le Malo, ae taatia ai lava le vaega lea i Sataoa. O le taimi nei, ua silasila atu nei le Itumalo ma ua latou vaavaai atu e manuia pe a taatia lava le vaipaipa o le Itumalo latou te vaiaia. E pei o le tulaga lea ua iloa nei le lelei o le vaipaipa i Safata. O lau fautuaga lena, faataatia le Tulafono o loo i ai nei e faaogaina i le afioaga lea i Apia. E i ai lo tatou uafu foi lea i Aleipata, atonu o le a i ai se taimi o le a faataulagaina ai lea tulaga ma faalelei atili ai.

O le tatalo lena i lau Afioga a le Fofoga Fetalai ina ia tuu maia le vaipaipa o lenei Itumalo, tatou feutagai, fai se tatou faufauga faatasi, tatou mai i le faatasi i le faaiuga ona maua lea o se manatu lelei mo se mea e faatino lelei ai le vaipaipa o lenei Itumalo ina ia manuia ai. E le gata i le Itumalo o Safata a ia manuia ai foi nisi o Itumalo lautele o le atunuu o Samoa i Sisifo. O se manatu puupuu lea mo le tatou Fono i lenei taeao. Faafetai.

### Afioga MASOE FILISI



#### **Itumalo Faalaalafaga:**

*Vaisigano Nu.1*

#### **Filifilia:**

*5 Oketopa 1993*

#### **Faatauto:**

*30 Novema 1993*

#### **Lauga Faataupou:**

*14 Iuni 1994*

Lau Afioga i le Fofoga Fetalai, e muamua ona ou faafetai i le Tama oi le lagi ona o lenei aso ua mafai ai ona tatou faatasi ma lau Afioga faapea le Afioga i le Palemia ma le mamalu o le Palemene. Ae avea ia au e fai ma sui o lou Itumalo o Vaisigano Nu.1, e auina atu ai sa matou faamanuiaga i Lana Afioga Mamalu O Le Ao o le Malo faapea ma Sui o le Fono a Sui Tofia.

Ua ou tulai atu ona o lou fia avatu o se maantu e fuafua faatatau i le Tala Faatatau Autu o le Tupe 1994/1995. O itu e faamamafa i ai lau tautalaga o le tulaga saosaoa o le pagatia ua oo i ai nei le tamaoiga e faatuputupulaia le fita ua feagai ma tagata lautele e tau faafetai i le sii o le tau o le soifuaga atoa ai ma le manaomia o ni faiga faavae e talafeagai fuafua lelei mo se tamaoiga solosolo lelei ma le manuia o tagata. I le soifuaga masani o lo tatou atunuu e masani ai lava ona tapa tagata lautele e tauave avega mamafa e le ese foi ma le tulaga i le taimi nei, ae peitai o le tulai mai o le faafitauli i lenei taimi, e faailoga fesili pea pea ua mafua i se a ona faaauau lenei faiga faavae ua faaee atu i ai se vaega mamafa o lafoga i tagata matitiva ma tagata faifaatoaga aemaise o le taimi nei ua matua faaleagaina atoa alamanuia sa ola ai ma

soifua ai tagata i nuu i tua. O se mea faanoanoa tele ona o le faamai lea o loo maua ai le talo ua faapea foi ona o le lava a tatou suesuega i le afaina o lo tatou atunuu ma ona tagata i lenei faamai. E pei lava ona tatou vaiaia i totonu o le 12 masina ua tuana i le maoae o le afaina o le atunuu talu le lega, ona ua motusia ai atoa ma alamanuia sa maua e tagata ona o le talo e faatau atu i fafo faapea ma talo e faatau iinei. Ua avea lea ma mea ua le maua ai se tupe mo mea e mananao ai ma ua oo lava ia maua e tagata se olaga le fiafia. Ua atili mamafatu le avega ian ua faapoopo i ai le VAGST, o le lafoga lea. O mala faanatura ua tuana atoa ai ma tulaga le manuia o le tamaoiga i le mamalu o Samoa i lo tatou tala faasolopito ona o le masii mai o le mamalu o tupe ma tamalii ma faaululuga o afioaga ua fia momoli atu ai se mau talu ai le afaina o le atunuu i le tamaoiga. Sa tatou molimauina foi lata mai nei se vaega faamomolito i o tatou tala faasolopito o le mea moni e oo lava i alii ma faipule ua latou lagona foi le mafatia o se vaega ua le talafeagai. E ui lava ina i ai ni faamanuiaga itiiti i le tausaga e 1993.

E sala le tulaga ae faapea lava lou manatu sa i ai se avanoa ona o au o se tagata e fou iinei, aua e fai foi sina umi o lau tautalaga, o lea la e fai ma ou pupula i manatu faamaumau ou te manatua ai se vaega e fai atu. E ui lava ina i ai nai faamanuiaga itiiti i le tausaga e 1993, ae a fua i valoaga mo le lumanai, e maeu le faapopoleina o le loto i le tamaoiga o Samoa. O lenei feau o loo momoli manino mai i le saunoaga a le afioga i le Minisita mo le Tala Faatatau o le Tupe lea o loo faapea mai, e tulaga leaga le faatau atu i fafo ma o le pau maualalo o le tupe e maua mai o le a siisii pea i luga le tau o le soifuaga. O tupe teu faaagaga ua televave ona faaitiiti, ua faaitiiti foi ma tupe faameaalofa mai o tatou aiga i fafo, ae le gata i lea ua atili le fetai ai le paleni o feafaatauaiga. E i ai se talitonuga e faapea o nei tulaga faaletonu ua mafua ona o le faamai talo poo le lega, ae peitai o loo i ai pea se isi talitonuga e faapea o se tasi mafuaaga o lenei faafitauli, ona o le le fuafua lelei i le faiga o le faavae tau le tamaoiga atoa ma faiga a le Malo i le soona faaalu o le fuafua tatau o tupe a le Malo.

Lau Afioga i le Fofoga Fetalai, sa ou faapea sa e vaai mai i le itu o loo ou taumafai atu ai, ae ui o lea ou te usiusitai. O le a taofi ai foi i lau lauga e i ai lava le auala e sau ai lau lauga ona o lou itumalo o loo faafofoga mai, ae le malamalama i le faa-Peretania.

### Afioga Hon MAFASOLIA PAPU



**Itumalo Faaalalafaga:**

*Falealupo*

**Filifilia:**

*22 Aperila 1991*

**Faatauto:**

*7 Me 1991*

**Lauga Faataupou:**

*24 Iuni 1991*

Faafetai atu mo le avanoa lau Afioga i le Fofoga Fetalai. Ae muamua ona ou sii le faafetai ma le viiga i lo tatou Atua ona ua Ia taitai mai lou soifua lau Afioga i le Fofoga Fetalai, aemaise le Afioga i le alii Palemia ma le mamalu o le Kapeneta ma le mamalu o Sui Usufono. Ae le gata foi i lea o Ulu o Matagaluega ma le Aufaigaluega ua mafai ai ona tatou toe potopoto i le Maota i Tiafau nei. Faafetai foi i le Atua aua ana le seanoa lona alofa atonu e le mafai ona ou tu atu i o outou luma i lenei aso, ua mafai ai ona maua le avanoa e avea ai ma Sui faipule mai le itumalo Falealupo, ua mafai ai ona oo mai ma tatou faatasi ai i lenei Maota Fono.

Ae faatulou atu i lau Afioga a le Fofoga Fetalai, lau Afioga Afamasaga o le matua o Usoalii, faapea foi lau afioga i le Tootoalii, lau Afioga Tofilau Eti Alesana, le Palemia o Samoa i Sisifo. Ae le gata foi i lea o Minisita o le Kapeneta, o le Afioga i le Taitai o le Itu Agai, lau Afioga i le Aloalii, lau afioga i le Sui Fofoga Fetalai, lau Afioga i le Tapaau Faasisina, ae le gata i lea o Sui mamalu o le Maota lenei. E ao foi ona ou pai atu i le tapuaiga a si o tatou atunuu, i le afio o le Afioga i le Ao Mamalu o le Malo o Samoa i Sisifo, lau Susuga Malietoa Tanumafili II, le afio i le afioga i le Fono a Sui Tofia, lau Afioga Mataafa Faasuamaleaui Puela Patu. Ia o le paia lava lea i Aiga ma a latou Tama, o Tama foi ma o latou Aiga, Pule ma Tumua, Ituau ma Alataua, Aiga i le Tai ma le Vaa o Fonoti. E le faagaloina ai foi le tapuaiga a o tatou uso i Amerika Samoa, le afio o le afioga i le alii Kovana ma lana faiga malo. O le paia lava lea ia Sua ma le Vaifanua, Fofu ma Aitulagi, Saole ma Saleaumua ma le Launiu na saelua, Tootoo o le Faleula ma le Tama a le Manuatele. Ae le gata foi i lea o le tapuaiga o lo o nono manu aua le tau atiina ae o le Malo o si o tatou atunuu o Samoa. Malo le tapuai.

Ia o lenei taimi ou te faapai atu ai se leo i si ou itumalo pele o Falealupo. Faafetai i lou itumalo o Falealupo, o le paia lava lea ia Auvaa, o oe o le Tupu Faanofonofu, paia i Alo o Sina ma le Aiga Sa Seumanutafa, Aiga Sa Amituanai, Aiga Sa Aeau, lau Afioga i le Maopu, le afio ia te oe le Matua, lau Afioga Lamusitele, le mamalu i le tou toafa ma Silialaei aemaise le mamalu o le tatou itumalo. E le faagaloina i le mafaufau Auauna a le Atua i lo tatou itumalo o lo o nofo tapuai ma tatalo aua se manuia o si o tatou nuu aemaise le itumalo ma lo tatou atunuu. E le gata foi i lea o faletua ma tausii, saoa, ma le malosii o le tatou itumalo. O le au palota uma foi luasefulu tasi o lo o alaala i totonu o Falealupo ia

aemaise foi le salalau ai i le tafafa o Samoa, faafetai, faafetai i le tou pule ua to mai, e pei ona ou taua i le taimi ua fano, faafetai i le alofa o le Atua. Faafetai foi ia i latou e lei palota mai ia te au. Ui i lea tasi lava le moomooga o lo tatou itumalo, tasi se manatu faagalogalo ia tulaga, tatou alo i luma aua se manuia o si o tatou nuu. O si o tatou nuu foi e le pei o isi itumalo e tai lima tai ono nuu, ia a o i tatou ia na o le tasi lava e na o Falealupo, o se nuu faigofie foi. O lea itumalo e, tapuai mai, o lea se manatu e mafai a la outou auauna, pe tasi pe lua ni upu ia ona pau lava o lo outou Sui e fou.

Ia lau Afioga i le Palemia, lau Afioga i le Minisita o Tupe, o le Tala o le Tupe ua faataatia nei i luma o le Maota, e avatu lau faafetai ma le faamalo e tusa ma le Tala ua e tuuina mai. Ia atonu e tele ni manatu ma mea ua lagalaga i totonu o le Tala o le Tupe ua pai atu i ai le tele o Sui o lenei Maota. Ae ou te lagona sei tulituli pea muamua atiina ae o lea e taumafai i totonu o si ou lava itumalo. E i ai se taimi ia ona ou taumafai lea o se manatu vaivai aua lava le Tala o le Tupe. Le mamalu i lau Afioga i le alii Palemia e ui atu i lau Afioga i le Fofoga Fetalai, ua silafia foi e lau Afioga i le Fofoga Fetalai ma le mamalu o lenei Maota i le afai talu ai o Ofa. Atonu o le alaafaga lenei e pito sili ona pagatia o Falealupo. Ona aisea? E pei foi ona silafia e le Afioga i le alii Palemia ma le Susuga lona ia Siaki, sa latou felelei atu i lea vaitaimi i helicopter ma tu laueleele ai i lea vaega. E tau ina latou manatua le tele o le faaletonu na oo i ai Falealupo, e silafia lelei lava e le Afioga ia Siaki aua o ia o le Falealupo sa ma talatalanoa o le a tele fesoasoani o le a avatu i Falealupo. Ia o lea la e faafetai ai i ni fesoasoani na maua mai i Malo mai fafo atonu na ui atu i luga o le Malo. E muamua lava o le falemai, o le falemai sa i ai i Falealupo, sa fausia lava i Falealupo. Ia lau Afioga i le Fofoga o le Fono ma le mamalu o le Palemene, ua matua leai lava se falemai, se mea manu e fano atu ai lava ma mai latou faatasi ai ma le teine fomai. Ua maua mai se fesoasoani ou te faafetai atu ai i le Faalapotopotoga lea o le Leppers Trust mai Niu Sila, sa aumai ai se tupe e tusa ma le \$25,000 ma ua uma nei ona fausia se falemai fou faatasi ai foi ma ni fesoasoani na avatu i kalapu o le Rotary, e faafetai atu foi i le kalapu a le Rotary na latou faatinoina ia totoga o le fale e i ai moega, o le valiina faapena foi ma le faiga o le tile o le falemai. Ae tasi lava le mea ua tupu, o se Fomai lau Afioga i le Minisita, ua ono nei masina talu ona uma ona fausia le falemai. E le gata i se Fomai lau Afioga i le Minisita, a o ni vai, e fia maua atu lava ni vai i lenei vaitaimi e talitali ai se Fomai. E toatele le au gasegase, e pei lava ona silafia e lau Afioga i le alii Minisita ona o oe foi o le Savaii, le mamao o Falealupo i tai ma ua tele foi ni tulaga faaletonu mai le matou alaafaga o Falealupo talu ai le mamao ese ma le Falemai tele i Sataua po o Tuasivi ona o le leai o ni vaillau. O lea la e talosaga atu ai ma le faaaloalo e ui atu i lau Afioga i le Fofoga Fetalai, i lau Afioga i le Minisita o le Soifua Maloloina, se Fomai faamolemole atoa ai ma ni vaillau. E le gata foi i lea a o se taavale, se taavale e feaveai ai ia

mai, pe fealuai ai foi se Fomai o le a finagalo lau Afioga e tuu atu mo la matou Falemai. Ona faasolo mai ai lea i le falemai o i Sataua, i totonu lava o lou itumalo o Asau. Faafetai ua maua se faamatalaga e faapea o le masina fou o le a oo atu ai se Fomai mai le Malo o Ausetalia. Ou te faapea atu ai i lau Afioga i le Minisita o Falemai ua maua e faapea e tolu tausaga lea e faapea o le a nofo ai le Fomai, o se Fomai mai le AVA mai Ausetalia, e faafetai atu ai.

Ona oo mai ai lea i le Minisita o Galuega lau Tofa Leafa, atonu foi e sao ai le saunoaga i lau Afioga i le Minisita. Sa faaalua foi i le nofoaiga talu ai e moni lava e te le i Minisita, ae o galuega sa faia e lau Afioga i le alii Minisita ua faamalo faafetai i le atiinaeina o le tatou atunuu. O lea foi la e faapai atu i lau afioga e le masalosalo le agaga po o se manatu aua e silafia lelei e lau Afioga o taua sa ta aoga ma vasega faatasi i Malisi, o lea la e faafiafiaina ia foi le mafaufau aua e le faagaloina ia mafutaga, o lea ua tatou toe faatasi iinei, faafetai i le Atua.

Lau Afioga i le Minisita o Galuega, faafetai atu mo le vaipaipa o Falealupo ua faatino mai nei. O lo o maua mai ai foi i le Tala o le Tupe o le tau atiinaeina o le tupe e \$30,000 ua faaavanoa mo lenei vaipaipa. Atonu la lau Afioga, o lea atiinae mai le Malo o Ausetalia e i ai nei vai e lua ua uma ona eliina, faatasi ai ma paipa ua oo atu i le Itumalo. E le gata i lea o le pamuvai e i ai le pamu lea e tasi na faaleagaina i le taimi o Ofa. O le pamu foi vaeane lau afioga, na faaleagaina sa i lalo o le pamu le vai atonu la o eleele ma palapala ua poloka ai le pamu. O lea la pamu sa aumaia i le Ofisa o Galuega e faapea e lipea ina ia faaleleia. E oo mai i le aso nei lau Afioga e lei oo atu lava. Faamolemole lau Afioga sei silasila ane po o fea ua oo i ai le pamu lea. E pei ona ou fai atu o lo o lelei pea le pamu i le isi vai lea na eli ae o le isi vai ua leai se pamu. O lea sei sialsila ane lau afioga i lea vaega.

E le gata la i lea e faafesili atu i lau afioga i le \$30,000 lea, pe e uma ai le faatinoina o le vaipaipa lea mo Falealupo i le alu i tai faapena ona sosoo le pamu aua ua uma ona fai fale o afi e faaoga mo pamu o le vai. Ae e fesili atu lau Afioga pe faamata e uma ai le vaipaipa lea. O le i si itu e fesili atu ai i lau Afioga i le Minisita, o lau vaai i paipa o paipa foi ia uamea, o vai foi e pei ona i ai i le matou itumalo e faasualua vaeane le paia o le Maota. Faamata e le o o i le tualga lea na taua e se tasi Sui i le mea lea o le elea o totonu o paipa, ae pe e tau o lenei taimi e faaalu ai ae e i ai se i si fuafuaga mo le lumanai i se i si fuafuaga i paipa ia PVC e pei o paipa na e aoga i vai ia. O le isi lenei tulaga ua o o i ai le itumalo ua maua i suesuega a Fomai o le itumalo lea faatasi ai ma isi itumalo ua tau maua i ai le faamai ua tau lavea totoga o tagata ae ai o vai. Ou te le iloa la po o le a le faamai ae o tulaga faapena e ao ona puipuia le soifua maloloina o tagata ona o le suavai.

Ona ou oo mai lea i le Minisita o Galuega lava. O auala e pei ona silafia faafetai o lo o maua i le Tala o le Tupe o lo o i ai se vaegatupe e \$20 miliona e faaauau ai

galuega. Lau Afioga i le Fofoga Fetalai, o le auala sa fausia faatopetope i le matou itumalo ina ua latalata i le palota, na uma loa le palota ua le o toe faia. E faafesili atu i lau Afioga sei alofa faaauau ina ia faauma lea auala. Ua mafatia foi le itumalo i le pefu ma nisi vaega e pei ona taua e Patu e pei o foliga o le masina le omoomo, ae atonu e feoloolo le omoomo o le masina i le omoomo o lo o i ai nei. E talosaga atu ai i lau Afioga i le Minisita, sei faauma lea auala agai i le aai i Falealupo tai. E le gata i lea o le faaupuga na avatu e faata faatasi ai lava. O lea e i ai se talosaga e ala atu i lau Afioga, ia faaumaina ma faataina lea auala. Aua e moni lava o se nuu ma se itumalo e ui ina i le taufaasiusiuga o Savaii e tau galo ai, ae faafetai o lea ua tau manatu atu le tatou Malo i le tau atiinaeina o si o matou itumalo.

O le i si tulaga sa avatu faatasi ai i lea vaitaimi o le Eletise lau Afioga i le Minisita, e lafo atu i ou tafatafa ona o se mea ua moomia tele ma o se tulaga foi e faatalitali mai i ai ua fia o o atu i tagata o si o matou itumalo e fia vaai i moli uila, ua le lava mu moli fagu, ae o lea faafetai aua o lenei ua i ai le fuafuaga, e talitonu foi ua i ai lau fuafuaga i lea vaega.

O le isi vaega lau Afioga o Taligalu. Atonu e utiuti lau faasoasoa e tusa ma le tupe ua faaavanoaina mo taligalu. E pei ona ou fai atu o le alalafaga lea sa aupito i sili ona tigaina ia Ofa, o lea e talosaga atu ai i taligalu. E le gata i Falealupo ae faasolo mai ai i Sataua, Vaisala, Auala ma Asau. Atonu a o o atu foi lau Afioga i ai ma e tagai i ai, o le matua faaletonu lava pe a tei ua toe oso mai se isi galu. E o o foi i le vaitaimi nei, e tiga lava sina tamai sousou o le vasa e afatia lava. E talsoaga atu ai i lau Afioga e ala atu i le Fofoga Fetalai, sei tagai ane i le matou taligalu.

O le Malae Vaalele. Atonu e pei ona taua e le Sui mai Vaisigano Nu.2 le taua o le malae vaalele i le matou itumalo. Atonu foi o lenei mataupu sa talatalanoa foi i ai i le nofoaiga talu ai, ma ua malie atoatoa lenei ituamlo o Falealupo e faatu ai se malae vaalele. I lau vaavaai atu i le Tala o le Tupe, paga lea e leai se fuafuaga o i ai i se malae vaalele i le matou itumalo na faaleagaina le malae vaalele sa i ai i le afa o Ofa. Sa talatalanoa foi ma e faapitoa i lea matata i le fauina o Malae Vaalele, atonu e i ai se manatu lau Afioga i le Minisita, e le tele lava pe na o se \$300,000 se malae vaalele e tai pei o le malae vaalele lea i Maota, aua e pei ona taua e le Sui le aoga tele o le malae vaalele i le matou itumalo i tagata tafafao, ae e le gata i lea o pisinisi o lo o fai ai iina. Pe i ai nisi e lavevea pe mamai faafuasei. E le gata i lea o le feoaiga aua e mamao foi matou i Salelologa, ae a i ai se vaalele ua faigofie lava. E ui lava foi i le mativa o le itumalo ae taumafai lava e lele i le vaalele ina ia vave taunuu mai i Apia. E le gata i le aoga ae o mea tau tagata tafafao mai lau Afioga i le Minisita.

Atonu la ua toe lua minute e lei taitai uma se manatu. Ae ona pau lea o se mea ua maua i le Tala o le Tupe, o le \$266,000 o lo o i ai mo le vaega lea o tagata tafafao mai. Atonu o lea tupe e faagaga mo le Matagaluega lea. E i ai se manatu e le taitai lava i le atiinae o le atunuu ua

leva ona taumafai mai. E ao ona tatou silasila ma tagai i nisi auala e taumafai ai le atinae o le tatou atunuu. O le tasi lea auala ou te lagona, a finagalo le alii Palemia ma le Malo tatou sailiili i Tagata Tafafao mai. E tele atunuu e pei o Rarotoga ma Fiti ma nisi o atunuu ua agai lava i luga, e tai pei lava o tatou e tua i faatoaga ma mea faapea, ae o lea ua tatou vaai atu i le ata o fua o faatoaga e agai i lalo e le agai i luga. O le popo foi ma le koko ua le lelei foi. Le Malo, tatou tagai i lea itu taua.

Ona o le taimi ua utiuti ae o lo o i ai nai mea o totoe, e fia fesili atu i le \$2,700,000 lea lau Afioga i le Minisita o le faamanuiaga mo tagata matutua, e faafetai atu i lea tulaga. Ona pau lava lea o le mea, pe ua i ai se fuafuaga ia suia i le 60 tausaga e pei o le mea o i ai nei i le 65 tausaga. E tuuina atu ai le talosaga e tuu ane loa i le 60 tausaga ina ia tatou felagolagomai i mea faapenei ae aveese le 65 tausaga.

O lenei taimi ona ua uma le taimi e faafetai atu ai i lau Afioga i le Fofoga Fetalai, e faafetai atu foi i lau Afioga i le Palemia ma le Kapeneta, ia alofa le Atua ma fesoasoani atu i le tauaveina o lou tofi. Lau Afioga ma le mamalu o Sui Usufono, ia maua pea lo tatou galulue felagolagomai i manatu faaalua, e le gata foi i lea o si o tatou atunuu. Lou itumalo o Falealupo, ua malo faafetai tapuai ia manuia Samoa ma lau faafofoga mai.

### Afioga MATAIA VISESIO EUROPA



#### **Itumalo Faalalafaga:**

*Faleata Sasae*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*24 Iuni 1991*

Lau Afioga i le Fofoga Fetalai, lau Afioga i le matua o le Usoalii. Afio foi lau Afioga i le Palemia, ia aemaise foi Sui mamalu o le Kapeneta, Sui mamalu o itumalo taitoatasi o si o tatou atunuu nei. Alaala foi ma papa aao le mamalu i Ulu o Matagaluega o si o tatou atunuu. E le faagaloina le tautua maualuga o tamalii ma failauga o lo o tautuaina le Maota nei. Le tapuaiga mamalu a si o tatou atunuu, le afio i lau Afioga i le Tapaau Faasisina, lau Susuga Malietoa, Le Ao Mamalu o si o tatou atunuu, afio foi lau Afioga i le Sui o le Fono a Sui Tofia, lau Afioga Mataafa Faasuamaleaui Puela Patu, le afifio ma papa aao o Tama ma o latou Aiga faapea foi Aiga ma a latou Tama. Samoa e o ou sa e le avea, o paia ma mamalu mai le vavau e oo lava i le faavavau. E le faagaloina foi le tapuaiga paia i Auauna a le Atua. Faafeai faanono manu, faafetai tapuai mai ia sao ma uli taualumaga o le Palemene o Samoa i Sisifo atoa ma le manuia o si o tatou atunuu. Malo fai o le faiva.

Si ou itumalo o Faleata i Sasae, ia le afio o lau Afioga a le Tupufia, lau Afioga Faumuina, le mamalu i le Usoalii

faapea Tamapaa, le mamalu ia te oe le Saofaiga faapea le Tauaitu, alaala foi lau Tofa Nuu, Leatinuu ma le mamalu i le lua aiga. Lou nuu e o Vaimoso, le afio o lau Afioga a le Matua, lau Afioga Patauave, alaala foi o oulua tama o le nuu, lau Tofa Manuleleua ma lau Tofa Une, mamalu o le Nofo tama, tainane le Matua, le Malae, ia aemaise nai lua aiga faapelepele. Le mamalu e, ma le paia maualuga o faafeagaiga taulagi o lou itumalo, ae le gata i lea o le tapuaiga i nuu e fia ma le lasilasi o lo o aafia i si o tatou itumalo, i Tupu ma Ee, ia faapea foi faletua, tausi o saoa, aemaise ai le malosi o si o tatou itumalo faapea paulo ma gafa.

Ae ou te le i sagai atu e avatu se tatou sao, aua upufai o si o tatou atunuu ua outou filifilia ai au, e ou te faapea atu, tulou la outou faafofogaaga, malo le fai o le faiva i le filifiliga o au nei, pau o lea ia ogatasi le futia ma le umele i outou finagalo, ia taunuu ia so outou faamoemoe ma sou manatu, aua le faalalagamae o si o tatou atunuu. Ia tapuai maia, o le a se manatu vaivai ua mafaia e la outou auauna, ia faatofa malie ma faautaga malie, pau lava foi o mafauaiga ua foaiina mai e le Agaga Sa o le Atua, e fai ai so tatou sao. Pau o lenei, e sau malama, e le o le uluai fonotaga lenei, ioe, masalo pe lima foi nisi tausaga o tatou faapenei ai lava, e le mailoa i ai i le tofamamao lava a le Afioga i le alii Palemia ma le Kapeneta, ia pe sui mai i le tolu i le sefulu tausaga. E faafetai atu i lau Afioga i le Fofoga Fetalai, faafetai mo lenei avanoa maualuga.

E muamua ona ou avatu malu i Puega nei sasi se faamatalaga a Mataia, ave valeina ai lou nei tagata. E muamua lava ona ou fia asa muamua i sau faamatalaga si o tatou Maota nei. I le matau atu a matou Sui fou, aemaise lava au nei, ia e fai lava sina ou faanoanoa. O matou aemaise lava au e fou mai i le Palemene, ua fai foi si matamuli ua sosola foi manatu, ua oo mai foi le le fia i ai e avea ma Sui o le Palemene. O le upu patino, pe a faapenei le felautoai o le mamalu o Sui, sa i ai i lou talitonuga, leai e fesili Mulimai ia Muamai. O e na afifio ma mua mai foi i Malae nei, ua avea outou ma Taitai, o Tama o le atunuu. Ia paga lea, o le lona lua nei o tatou Tauaofiaga, amata mai lava i le Aso Faraile e oo mai lava i le aso, ou te manumanu ai lava au i le mamalu o Sui mamalu o le Palemene, i le faafogafoga mai a Samoa. O tatou, o lou gutu ma le afi, e le tau aoaia e Laupua Tamafaiga, e fai ma faataitaiga o le la e faafogafoga mai le atunuu, aemaise ai feoi o suli o suafa o tatou umia. Talofa i le latou faafogafoga mai, ioe. Ma e amata mai i le 62 ina ua Tutoatasi si o tatou atunuu seia oo mai lava i le aso lau Afioga, i le tulai mai o le Tamaaiga e taitaia si o tatou atunuu ma toeaiina sa i ai, o lona foi e afio mai le Tootoalii, ia faasao mai lava e le Afioga i le Tootoalii ua avea nei ma tama o le atunuu, ta te le i faalogo lava i se Samoa tulou, o talanoa i tua. Se o le Palemene ua piopio tele tagata, ioe, o le Palemene ua le amio sao tagata, ua le faamaoni. E pei e sa i le fofoga o tagata Samoa, ona faalumaluma i le Palemene o le latou atunuu. A o le a le mea ua tulai mai nei? E pei ua fai mai ni tala malie i nisi, ua fai mai ni



faleaitu a nisi, pei ua fai fai mai i le Maota nei. Ia e moi ua laalaa i luma le soifuaga, ua ese lenei vaitau ma le tau amataga mai o le atinae mai o le tatou Palemene; ae pau lava le fautuaga, sei seu silasila, sei mama le sausu. Po o le a ni o tatou faaletonu le le malie o le tasi i le isi, sei alolofa, leai natia i fatualavai se tatou le malie i o tatou uso. E leai se aoga tatou te taulagi ai lenei faaupuga ia tatou fealofani, tatou feoeoeai, ia tatou alolofa o le tasi i le isi, lagolago le Malo, ae le tino. E le o faaupuga, ae o le faatinoina o le fealofani e taua lena. Ou te talitonu foi e ono mamasagia ai tatou i le va ma le atunuu i lenei tulaga ua aliali mai. O muagagana a outou toeaiina, a sala tai tonu uta, ia faapea ona tatou faapalepaleai aua le mamalu o le Palemene, nei aveesea ai le manuia o si o tatou atunuu.

Lau Afioga i le Palemia, e le natia na e amia mai au, na ou oo atu ta talanoa. O au foi e le o se tagata e luma ma tua, e pei lava foi ona faafofoga i ai i sau faamatalaga. O a ni mea lelei ua faatu mai e le Malo e manuia ai le atunuu, o lau lagolago lena. Ma e le luma foi ma tua Mataia. O le isi mea e faanoanoa ai le agaga, o tatou ua taua o Taitai o le atunuu. Sei silasila mai lau Afioga i le Fofoga Fetalai, ia leai a ma nisi o lenei Itu, ao tatou ua tuu i ai le faatuatuaga a le atunuu, pe fia faafogafoga i se saunoaga a se Sui pe leai, leai o le tatou faiva tatou te faamaopopo i se mea, tatou felagolagomai. Ou te faatu atu lava e au, tasi lenei tulaga na mafua ai ona filifilia ai tatou e tatou itumalo, sa i ai le latou faatuatuaga faapea lau Afioga, o tatou e auai uma lava i so o se Fonotaga, pe tetele totogi pe leai, o tatou ua ave ma Sui o tatou itumalo. E faapea atu ai se fautuaga aemaise ai lau Afioga i le alii Palemia, pe a tusa ai, ua tataua ona fai se tatou api tauvalaau, ioe, se tauvalaauga a le mamalu o le Palemene, vagana ai lava ia faanoi ua tataua ai, o le faanoi mai o le gasegase po o le malaga i fafo. O tatou uma lava e tofu ma faalavelave, ae tuu uma ia tulaga e faigata o le Fono a le atunuu, e 47 Sui filifilia o le atunuu. Aisea ua le 200 ai e taua? O le mea lea lau Afioga i le Fofoga Fetalai, ua tataua ona fai se isi vaifofo e tuu ai le mea lenei, a le fia fonu a Pai ua alu, ioe. Vagana ai lava le ua malaga i fafo, po o le ua gasegase. A o tulaga uma faapenei ia ta te vaai ma le faanoanoa, ma le faaloalo lava i le mamalu o le Palemene.

Lau Afioga i le Palemia e ala atu i lau Afioga i le Fofoga Fetalai, se alofa ane po o fea le tuaoi o Vaimauga ma Faleata i Sasae? Ua tataua ona faa-tulafonoina ma le faaloalo lava. E oo lava foi ina maua ai se isi feupuaiga i le va, e ui lava ina faapea o matou o Tuamasaga, ua tataua ona faamaioio lelei le tuaoi o le Vaimauga ma Faleata, ua tau oo i nisi tulaga ua faasinoina aao nisi. O le mea e malie ai lau Afioga a le Fofoga Fetalai, se ua solomua, ou te le tau atua, ua solomua i isi o lo o afiio ese atu i Faleata ma Vaimauga, ona omai fai mai o le tou tuaoi lea. Ae ua le tuu maia le mataupu e fitoitonu ia i matou ma le Vaimauga, aemaise lau Afioga i le alii Palemia, sei alofa lau Afioga sei sailiili ane ma faia se tulafono e faamautu ai le tuaoi o Vaimauga ma Faleata, faamolemole.

O le Tala o le Tupe, ia malie foi le finagalo o lau Afioga a le Minisita o Tupe e pei ona faitio nisi o Sui, e laitiiti le tupe. O le mataupu o lau saunoaga na ou puea, o lo o faapea mai ua fetau lava le Tala o le Tupe o le tausaga o lo o faagasolo nei. Ia ou te manatu ta fefe i nisi o Matagaluega o lo o faasoaso le tupe, e mafua mai i le tulaga lea o le lava o le tupe. Ou te talitonu e le o lava le faaso; ana lava le faaso ou te talitonu lava e le oo i ia tulaga. Ou te talitonu foi, ma ou popole, pe faamata o fetau le faaogaina o tupe ma le finagalo sa fuafuaina ai, ia nisi ia o Matagaluega. Ia o tulaga na lau afioga e te alofa ane sei toe silasila i ai. O le isi tulaga e pei ona molimoli mai e le Lipoti a le Komiti o mea tau tupe a le tatou Palemene nei, ia o lo o ave valeina mai ai tulou, se Lipoti a le Suetusi Sili, e uiga i le talanoaina e tataua ona aumai faaalii Minisita, mai le 1981 i le 1990, e lei faataatiaina i luma o le mamalu o le Palemene se Lipoti o faamatalaga o Tupe Maua ma Tupe Alu a le Malo mai le Ofisa o Tupe. Ia e pei lava foi ona ta faalogologo mai i ai i le tele o faitioga, o nei mea uma e lagolago i le liuliuga i le tofa le faautautaga o le mamalu o le Palemene, pe a talanoaina le tatou Tala o le Tupe i lea tausaga i lea tausaga.

Faafetai i lau Afioga a le Fofoga Fetalai. E muamua lava ona ave le Viiga i le Auta aemaise ai Ieova le Silisiliese ona ua toe faafoisia mai i lagi ma ma le soifua laulelei le Afioga i le tatou Taitai le Afioga i le alii Palemia aemaise ai foi i Sui mamalu o le tatou atunuu. E faaauu atu ai lava sau faamatalaga ma le faaloalo lava e uiga i mea nei o Kamupani mai fafo. I lou lava manatu i ai, e leai lava se eseese o kamupani nei ma le vasega o le mamalu i Fomai, ma le mamalu o Loia, ma le mamalu o Tausi Tusi. Ua ala ona ou taua le vaega lea, taua lava o le utiuti ma le le lava o le mamalu ia tatou fomai ua mafua ai ona tatou faatagisia nisi o fomai mai fafo. Ia te au lava ia ma lou faaloalo, e le taitai fetau le sau fua o se Kamupani mai fafo i le galue iinei aua o tupe a le tatou atunuu o lo o aafia ai. E taua i lau faamatalaga ia Kamupani nei e fau auala, Kamupani fau fale, kamupani tusi ata. E pei o lo o fai ma a latou tali pupuni lau Afioga le faamuamua o a tatou kamupani i Samoa nei a o latou o lo o latou seleselea le tele o le sosia lea e maua i totonu o le tatou atunuu nei. Ou te le mailoa i ai, amata mai i le au faufale, ua tele nisi o alo ma fanau ua lava le tomai i lea matata. Ou te manatuaina pea le fausia o le maota lea o Ioane Viliamu, sa fausia lava e se kamupani e taitai e se tasi o alo o le tatou atunuu. E fai foi o le talosaga i kamupani mai fafo e o mai e fausia o tatou fale iinei, le fausia o ala tetele, ae ou te talitonu lava au ua lava le atamai ma le potu ua i alo ma fanau o Samoa e tauaveina ai ia matata, ma a tusa ai ma le finagalo o le Afioga i le alii Palemia ma le mamalu i le Kapeneta, ia e leai. O manatu fai vavale lava e lafo atu iina, pe tau ane ai le tofa ma le faautautaga. E leai o a outou Afioga o lo o taitaia lo tatou Malo i lenei vaitau.

Ona tau mai lea o sau tautalaga i mea nei o lafoga a le aufai faatoaga. Ioe, e maimau pe ana faapea e le fai

lafoga ia le aufaifaatoaga, ae le aveina tupe na maua mai i a latou faatoaga e toe atiina ae ai nisi o atiina ae e ese mai faatoaga. Ae paga lea, e maua mai tupe ona maua lea i nisi o mea e ese mai nai lo faatoaga. O le mea la ua tupu ai ia ua faateleina ia tupe ua maua e manuia ai ia nai ia foi uso atoa ma le mamalu o le atunuu ae tatau lava ona faalaugatasia ia le mamalu o le atunuu i nei mea o lafoga. Ma lou faaaloalo lava e le faapea e ese auala e feoai ai ia le mamalu o le aufai faatoaga ese le eletise, ese le vaipaipa, ese ia tulaga faapena e i ai le soifua maloloina. E leai, e tutusa pau lava i tatou uma i lena tulaga. O a ni tupe e maua e le aufai faatoaga a o le faamanuiaga e tasi tatou te selesese uma i ai. O le mea lea le mamalu e o le Afioga i le alii Palemia ma le Kapeneta, ua leva tele ona tuusaunoa le mamalu i le aufaifaatoaga i lea tulaga, ae ua tatau ona faalaugatasia le mamalu o le atunuu i le tatou lafo lafoga faatasi.

Ona oo mai lea o sau faamatalaga i fale maliu nei e taua, e pei foi na taua e se tasi o Sui. E pei e le logo lelei lea faamatalaga lau Afioga e faapea o le fale aisa, tulou. E pei ua mamafa tele talu ai ona ua lava foi le tomai ua i ai i nei ona po e faaaogaina ai nisi o vailaau e aunoa ma le tuuina o le mamalu o i latou ua maliliu i totonu o nei mea, tulou o ni fale aisa. E pei ua ese foi le vaitau sa tatau ai ona faaaoga lea upu; a o le vaitaimi nei ua ese foi le laasaga ua tatou i ai lau Afioga a le Fofoga Fetalai, ua tatau ona toe suia ia tulaga. Ia amata mea le Malo i le faaogaina o togafitiga faaonapo nei mo e maliliu, i le faaaogaina o vailaau e pei ona faaaogaina i le tele o nisi o fale maliu, tulou o lo o i totonu o Samoa nei.

Ona oo mai lea o sau faamatalaga i mea nei o palota. E manaia lava le faitio i nisi foi o Sui i futia ua sola e uiga i mea nei o palota, Ioe. Ia lau Afioga e a le Palemia e auala atu i le Afioga i le Fofoga Fetalai, o au ou te vaai ma le alofa i e na molia ae le faamaonia ni solitulafono. Ou te talitonu foi e faapea uma lava i tatou. O le fautuaga a au nei sei toe sui ia le Tulafono o Palota, ae matua faamamafa ia faasalaga, a sese pe le faamaonia tuuaiga, a le avea i le falepuipui ia fia ni afe o tala e faasala ai. O tulaga faapea a mamafa lau Afioga i le alii Palemia ona fefe lea o tagata e fai ni tuuaiga le faamaonia. Silasila i le mea na tulai mai nei i nisi o Afioga i alii Faipule, ia ta te ma i ai aua e faapena uma lava i tatou. O le nofonofu lava o lea ua lotoleagaina ta ita, tei ua molimoli mai taita i le Tulafono ae le faamaonia, ae ua tauvalea ai le igoa, le suafa, Ioe se la ua momoli Mataia e Pai i mea nei o faatosina, ae iloa mulimuli ane e le faamaonia. O le mea lea lau Afioga a le Palemia e auala atu i lau Afioga a le Fofoga Fetalai, ua tatau ona matua faamalosia le faamamafaina o le faasalaga ia i latou e maua mulimuli ane e tuuaiina pepelo nisi i soliga-tulafono faapenei. E le gata foi la i lea, lau Afioga aua nei faoa le ta pe faagau le malie se tasi, e leai o le puipuga lava o Sui mamalu o le Palemene. Ia te au lau Afioga i le alii Palemia ma le Kapeneta e auala atu i le Afioga i le Fofoga Fetalai, ou te talitonu a faapea ia tatou tautasi i le mamalu o le Palemene lenei, ona i ai lea o se manatu pe a tusa ai ma

o outou finagalo se a faamaonia se solitulafono a se tasi ua filifilia mai iinei, faasala lau Afioga pe tasi se nofoaiga e aua nei avea ai ma Sui filifilia o le Palemene. Afai foi e fai soo tulou, ia aua nei toe aoga lona tagata tulou e toe avea ma se sui tauva mo le Nofoa o le Palemene. E ala ona ou faapea atu e le faapea e faapito augafa leo i se isi, e leai o le puipiga o le mamalu o Sui o le Palemene e pei o le mea na saunoa i ai se tasi o Sui; e leaga le faatosina ma nisi auala faapena, a o lea e mafua ia i tatou ona tatou faitulafono atu i le mamalu o le atunuu. O si au talosaga lea pe afai e tusa ai ma lou finagalo lau Afioga i le alii Palemia.

O sui faaopoopo o itumalo. Ioe. Lau Afioga Tofilau o le Tama o le atunuu faapea foi le mamalu o Sui o le Palemene, afai ua silafia loa lava ua tatau ona fai suiga i ia tulaga, se aumai se tulafono e sui ai. E lelei le silafia ma fai i o tatu taimi, i lo le fiu i nisi tausaga o muamua e taumafai nei tulaga. Afai ua silafia e lau Afioga ma le mamalu o le Kapeneta ua tatau ia tulaga, ia e tuu e a, faaaauu. E faapea foi i Minisita o le Kapeneta. E pei lava ona e saunoa lau Afioga i le Palemia, e au i le fagota e au i le tauola, ioe, tatou te le ma silafia. E eseese suiga e le faapea e tumau ai pea ia se isi i se tofiga. E le aoga foi ona fai o tatou tiute ma tatou galuega, ae o i ai ni tulaga o faaletonu ai, o mamafa se avega o tauaveina e se tasi ae mama se isi. E tatau foi ona tatou silasila totoa, ua 29 nei o tausaga o le tatou Malo Tutoatasi, afai ua tatau ona sui Minisita, sui ma lou faaaloalo lava.

Ona oo mai ai lea o lau faamatalaga i mea ia i tau o oloa, e i ai mea faufale, mea foi nei e tau o hardware tulou, ae paga lea lau Afioga i le Fofoga Fetalai ma le mamalu o le Malo, se ua puipuia uma tatou i le tau o oloa i mea nei o meaai taumafa, ae leai ma se puipuga o tatou i mea ia o hardware. E le faapea ta te alu atu o pipii mai i se faleoloa se tau, o le tau lea o le fasipaipa lea o le mea lea o le mea lea. E pei ua tafili saunoa ai le mamalu o le atunuu, sei alofa ane lau Afioga i le Minisita o fitoitonu i ai lea mataupu, sei fai i ai se fuafuaga, o lea foi o le a toe tasi ia lafoga ma tulaga faapena, ia ae tailo i ai iina tulaga o le a toe faaopoopo atu foi le isi avega i luga o le atunuu, ae leiloa po o tele se faasaoga i le tau o mea faapea pe a silasila totoa i ai le mamalu o le Komiti Faatino o le Tau o Oloa, e faasaoina mai i tagata taitoatasi o si o tatou atunuu nei pe a fai ni a latou faatau.

Ona oo mai lea o sau faamatalaga i nisi o le mamalu o le aufai Nusipepa o lo o oo mai i totonu iinei e fia pueina ni ata o le Maota nei. Faamolemole lau Afioga i le Fofoga Fetalai ma le mamalu o le Palemene, se pei ua tatou toe eueu ese lava o tatou tagata. E lelei pe ana faapea o nisi mai fafo, o lea e omai e fia pue ni ata o le Palemene nei. A o tatou lava tagata, o tagata e tua i ai le saunoaga ma fetalaiiga, e le logo lelei ia te au le faasinoina esea, e sa le mea lea ona outou faia, ioe. O alo ma fanau o tatou uma. E avatu ai se fautuaga e tatau ona tuusaunoa, ia faalogo pea ia le o lo o taitaiina le tatou Ofisa nei o lo o tautuaina le taotu Maota, pe a fia

pue ni latou ata ma ni tulaga uma faapena i totonu o le Maota nei. O nai mafauauga ia laiti, e faapena foi tupe ia tatou te maua mai i faatauga a e o lo o tafafao mai fafo, ma tupe o lo o aumai i le mamalu o le atunu o e o lo o tafafao mai iinei, tupe totino. Pe faamata o maua leleii faamaumauga a le tatou atunuu ia tupe, aua ou te talitonu e le o maua lelei, e le o maua lelei e le Malo tupe e tatau ona mauaina, tupe ia e maua mai e i ai tupe Amerika, tupe Ausetalai, tupe Niu Sila, tupe Fiti ma Toga, o lo o aumaia i nisi o lo o tafafao maimoa mai iinei i Samoa pe a asi mai foi i Samoa nei. Pe faamata o le a se faiga e mafai ai, aua tasi ia fesoasoani tele i le Malo; ae o le mea e leaga ai o tupe a le Malo. Ae paga lea, e toe faaoga e nisi e lau mai ai oloa, ae e le o maua tonu e le Malo ma ona tagata ia faamatalaga o ia tupe. E tatau ona fai i ai se fuafuaga i se tulafono, ina ia faamamafaina ia le aoina o ia tupe.

Faafetai i lau Afioga ma le mamalu o le Fono, e usitai foi lou sui pe afai ua uma lou taimi. Ia maua pea le tofa i lau Afioga aua le tautauga o le tatou Fonotaga. E le gata i lea ia maua foi le tofa i le Afioga i le Palemia aua le taitaiina o le tatou atunuu; maua foi le Tofa i alii Minisita e lagolagosua atu i lau Afioga i le Palemia aua le taitaiina o le tatou Malo, le tofa ma le faautautaga i Sui mamalu o le Malo, aemaise ai o le faamanuiaga a le Atua i le tapuaiga a Samoa atoa, faapea i tatou uma. Ia manuia le tatou Fono.

### Afioga PALUSALUE FAAPO II



#### **Itumalo Faaalaalafaga:**

*Safata*

#### **Filifilia:**

*14 Me 1996*

#### **Faatauto:**

*16 Me 1996*

#### **Lauga Faataupou:**

*18 Iuni 1996*

Ua faafetai lava mo le avanoa lau Afioga i le Fofoga Fetalai, ua matau atu ua maea saunoaga a le Minisita ma o le ala ou tulai atu foi lea e fai sina sao o lenei Itumalo. Sa ou manatu foi e fatoa lauga nanei i le taimi e manava ai galuega, ae ua matau atu ua leai se isi o le la itu. Atonu la a maea loa lau lauga ona pasia loa lea o le Tala o le Tupe.

E muamua ona ou faatulou atu i lau Afioga i le Fofoga Fetalai aemaise foi le Afioga i le Sui Palemia ma le mamalu o le Kapeneta. E faatulou atu foi i le la itu lau Afioga i le Tama-a-Aiga le Taitai o le Itu Agai e ui ina le o alaala mai ae faatulou atu pea i lau Afioga aemaise o sui mamalu o le Palemene. E faatulou atu foi i Ulu o Matagaluega aemaise o Ulu o Faalapotopotoga tumaoti a le Malo. E le gata foi i lea o le tapuaiga a Aiga ma Tama, Tama foi ma o latou Aiga, o le mamalu ia Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina le tapuaiga a le aufaigaluega paia a le Atua o loo nono manu aua se manuia o lo tatou Malo. E

le gata foi i lea o le tapuaiga a o tatou uso i Amerika Samoa i le mamalu o le Faleagafulu, o upu ia Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu na Saelua faapea upu ia Faatui ma tama a le Manuatele. O paia ia o Samoa e tumau e oo i le faavavau. O le a vili tonu le ifi a maina ma fana tonu se matalalaga i lou Itumalo pele o Safata i le tapuaiga a le Aiga Malosi, o le paia ia Sa Tunumafono ma le Faauluuluga, faapea paia i Tapaau na Tausi e le Alataua, le mamalu ia Taulauniu ma le Aitu Tagata ma le nofo a Tula ia Safata. E avea ai lenei taimi e faapai atu ai foi i le tapuaiga a le aufaigaluega paia a le Atua i Ekalesia e fia i lo tatou Itumalo. Ua faamalo le soifua, ua faamalo le lagi e mama. E faafetaia ai pea le alofa o le Atua ua tatou aulia mai ai lenei aso fou aemaise foi o le faamoemoega o le tauaofia o le Fono Aoaofaitulafono. E le i mamao atu foi le Faiga Palota, atonu o le taimi talafeagai i lenei e momoli atu ai sau faamalo ma se faafetai faale-auau a le auauna e tusa ai ma lo outou faatuatuaga o lea ua outou toe filifilia mai ai lou sui usufono aua so tatou sao i Upufai o Malo. Ua faafetai tele i e na lagolagoina Au ma i latou foi na le i lagolagoina Au. O le agaga maualuga ia tatou galulue faatasi. O i latou na le lagolagoina Au, ona o le aia tatau lava ma le silafia. O lea ua maea le Palota, o le agaga maualuga lavaia tatou galulue faatasi. Ua faafetai foi ua filifilia mai le Afioga ia Leota, e ui ina eseese itu o loo ma i ai ao le agaga maualuga lava ia o ma soosoo tauau aua se manuia o lo tatou Itumalo. Atonu foi e sau se aso ona susu mai lea iinei e galulue faatasi ai aua lava se manuia o le tatou Itumalo. Ua faafetai tele i lo tatou Itumalo e tusa ai ma le faaiuga o le Palota. E ui lava ona e le i masuiga malie ae ou te talitonu e aumai lava le tali mai le Atua. Ua faafetai foi ma faamalo i le Afioga ia Pule ua leva ona nofoia le Nofoa o le Itumalo, ua faafetai mo mea uma. Ua faafetai foi i taimi sa tautua ai e ala i Upufai o Malo. O le talosaga ia tatou galulue faatasi aua se manuia o lo tatou Itumalo. O lenei taimi lau Afioga i le Fofoga Fetalai, e tatau lava oan avatu se sao o lou Itumalo e tusa ai o le Tala o le Tupe ua opea i luma o le Maota Fono.

E muamua ona momoli lau faafetai tele lava i lau Afioga i le Minisita o Tupe aemaise foi o le Ofisa o Tupe i le Susuga i le Failautusi ma le aufaigaluega e tusa ai ma le Tala manino ua taatia nei i luma o le Laulau-a-Fono faapea foi le saunoaga manino a le Afioga i le Minisita. E fiafia lava le agaga o lou nei sui usufono ona o se ata manino e tusa ai ma le tamaoiga o lo tatou atunuu. O le faaitaiga o le faatuputupulaia pea lea o le tamaoiga o lo tatou atunuu. Ua tusa ma le 7% ua faatuputupulaia ai mai le tausaga ua mavae, o lea e faaalua ai le alualu i luma o lo tatou Malo. E ui lava ina tele faitioga e le gata i Nusipepa ma leitio ao lea lava ua aumai le ata manino i le alualu i luma o le atinae o lo tatou Malo e ala i le atiae ma le tuputupu ae i le 7%. O le faaaliga e tusa ai ma fuainumera o le a faasolo lava i luma peafai eleai ni faafitauli e pei o afa fulifao. O lea e momoli atu ai le faafetai tele i lau afioga i le Minisita e tusa o le faaaliga

manino ua i luma nei o le Laulau aFono. E le gata i lea o lefaatuputupulaia pea o letamaoiga e ala i a tatou oloa e aveina i fafo. E ui lava ina faaletonu le talo ona o le lega ae peitai ane o loo i ai nisi o oloa ua sui tulaga i le talo ua agai aii luma a tatou oloa elauina i fafo.

To Turisi, ua malo faafetai ona o le agai pea i luma o turisi e asiasi mai i lo tatou Malo. E pei ona silafia o turisi ona pau lava lea o le toomaga o lo tatou atunuu pe afai e faaletonu fua o faatoaga. E tele foi atinae fou e pei o Sinalei i Siumu, ua matagofie lea atiina ae fou ona o le lagolago a le Ofisa o Turisi male tatou Malo. E momoli atu ai le faafetai i lo tatou Malo ma le Minisita, o lea foi ua faaali mai ai le fesiitaiga o le tau o le soifuaga.

O le fua o le popo ua faamalo faafetai i ia atiina ae. O le upu moni lava ua le taitai lava le popo e faamali ai le manaogao atunuu i fafo. Faafetai atu i lau Afioga i le Minisita lau Susuga Joe Keil ma nisi o le atunuu o loo faia atiina ae o le popo ma le lauina atu i fafo ona ua matagofie ai ma lelei a tatou oloa e lauina atu i fafo.

Ua faafetai tele i leTala o le Tupe e tusa o le saunoaga manino a le Afioga i le Mniisita o Tupe, ona o le faamalieleina lea o le anava a lenei Itu faa-Upufai i le ave o le faamuamua i aoaoga. E pei ona faaalua ua 37% le seleni ua faaopoopo i le tupe talu ai i le Matagaluega o Aoga, ae ua faaopoopo le 18% i le Matagaluega o le Soifua Maloloina. O le faaaliga lea o le ave o le faamuamua aua o le Paeiga talu ai sa tele foi faitioga mai lena itu aemaise o lo tatou atunuu ona o le ave o le faamuamua i isi atiina ae ma mea e fai. Ae peitai ane i lenei Paeiga ua faamalo i le Malo ona ua ave le faamuamua i le Soifua Maloloina ma Aoga. E ui lava ina taatia mai i le Tala o Tupe aitalafu a le Malo ua \$389milion, e moni lava e leai lava se aitalafu e lelei aua e taugata tulaga uma faapea. E ao foi ona tatou matauina le tatau ona tatou nono tupe mai fafo aua lo tatou atunuu. O le faaaliga o le tatau ona tatou nono mai fafo, o foliga vaaia o le tatou atiina ae i le taulaga aemaise o le eletise, suavai ma auala. O mea uma faapea e le mafai ona tatou nonofo iinei ma faaputupu ni tupe faataunuu ai fuafuaga a le Malo. Peitai ane ona o le fesoasoani mai o lo tatou uso mai fafo lea ua matagofie ai atiina ae poo le infrastructure o le tatou Malo. Atonu o le mafuaaga foi lea ua faia mai ai iinei le fono a atunuu ole European Union ma le ACP i lo tatou Atunuu poo le a le taumafai a le Minisita ma lo tatou Malo ina ia aumaia fonotaga tetele faapenei. O lea e momoli atu ai le faamalo ma le faafetai. E ui lava i nei mau aitalafu ae ou te talitonu o lea ua tulai mai ata lelei e pei oan talisapaia e taunuu ma fafo mo le fonotaga o le a tauaofia nei. E le gata i lea o le Art Festival foi lea ua sauni atu i ai i tatou mo Setema. O foliga vaaia lava lea o le agai i luma o le atiina ae o lo tatou atunuu. O faamanuiaga tetele lava e maua mai e lo tatou atunuu mai nei fonotaga e mo le foreign exchange aemaise foi o le faalauiloaina atili o lo tatou atunuu. Ua faamalo faafetai i lo tatou Malo i nei fuafuaga uma o le a faalauiloa ai, aemaise o le a faigofie ai ona aumai fesoasoani a atunuu i fafo mo le atiaeina o lo tatou Malo. E tatau ai la ona tatou mitamia i le

matagofie ua i ai nei le atiaeina o le atunuu ma tatou te fiafia ai e galulue faatasi aua lava le alualu i luma o le atiaeina o lo tatou atunuu.

O le Ofisa o Aoga o lea e pei ona tauai le tele o saunoaga a sui usufono aemaise foi lou nei sui usufono i le faafetai ma le faamalo i seleni ma le tupe ua faataatia mo le atiaeina ae o aoga. E pei lava ona malie i saunoaga o le atiina ae e sili lava lenei o le atunuu o a lava isi mau atiina ae o le atinae sili lava lea o alo ma fanau o lo tatou atunuu.

O fautuaga a lou nei Itumalo, o mea muamua e tatau ona faaleleia o le siitia o totogi o le aufaigaluega aua e ui i isi tulaga uma ae a lelei le tau o a latou galuega o le a lelei foi le aoaona o alo ma fanau a lo tatou atunuu. e le gata i lea o nuu i tua, o lea e taumafai matua e aumai i Apia. Aisea? O lea e masalosalo faapea e lelei faiaoga i Apia nei, ou te tautino atu e sili atu faiaoga i tua. E le gata i lea e tasi se vasega i Apia nei poo le 70 tamaiti i se faiaogae tasi, ao tua na o le tai toa luasefulu ma le tai toatolu. Ona pau lava le itu lea ia faaleleia ai ia lelei totogi o faiaoga.

O le isi fautuaga a lou nei Itumalo i le Ofisa o Aoga, ia tatou taumafai ia aua nei misi le asiasi pea i le faatinoina o galuega. Aua a vaaia mai lava le Ulu Aoga ma faiaoga o loo le misi le asiasi atu a lau Afioga i le Minisita ma le Ofisa, o le a lelei foi ona faataunuuina a latou galuega.

Faafetai mo le avanoa i lau Afioga i le Fofoga Fetalai, faafetai foi i le Atua ua toe taitaiina mai lo outou soifua ma lo tatou ola, sa faia se malologa. Ou te talitonu ua maua se faasiliga malosi aua le faaauauina o le galuega. Lau Afioga i le Fofoga Fetalai, ou te faamaantu atu e 15 ou minute ae ui i lea ou te usitaia lava lau faatonuga. Na gata mai sau faamatalaga i le taimi ua fano i aoaoga i lau Afioga i le Minisita mo Aoga, ae sili pe a faataatia atonu ou te toe liliu i ai i se taimi ina nei tei ua le lava lou taimi. E ao loa ona ou faapai atu i mea e fia faaleleia o lou Itumalo i Safata.

Lau Afioga i le Fofoga Fetalai, e ala atu i le Nofoa i lau Afioga i le Minisita o Galuega, atonu o lenei mataupu e le o se mataupu fou; o le taligalu lea i Sataoa. Ua ma feiloai soo ma le Afioga i le Minisita. Ou te talitonu o lea ua saunoa mai o le masina fou lava o le a faataunuuina ai le taligalu i Sataoa. E pei ona silafia o loo faalogologo mai lou Itumalo ma le nuu lenei o Sataoa. A oo nei ina sua le tai e pei lava ona silafia e pei lava o loo nonofo i le sami. O isi lava taimi e togi i fafo le afa e fagota ai i le malosi tele o le sami. E talosaga atu ai ma le agaga faaloalo i lau Afioga i le Minisita, o lea o le a sauni ma maua foi maa. Na ona avatu lava o masini fou e pei o le ta feiloaiga. O le nuu lenei o Sataoa ma Lotofaga e pei ona silafia e tele ina aia tele i le sami ma ua tele ina agai ma alaala i tuamaota o nuu ona o le vave tele o le aia i le sami. O le faitau aofai sa faia e le Ofisa o Faamaumaga e toatele atu i latou o loo nonofo i uta i lo tai, peitai o le auala o loo faaogaina e tau lava o le auala galue. Ou te tautino atu ma le agaga faaloalo lau Afioga i le Fofoga Fetalai, e tatau lava ona faaleleia nei auala e le Malo. O auala ia e i uta i Sataoa ma



Lotofaga aua ua toatele le mamalu o nei nuu ma alaafaga ua nonofo i uta. O le \$4,000 lea o loo avatu nei i le polokalame lea o auala galue, e le o taitai ona lava mo le faaleleia o nei auala. Ou te talosagaina ai lau Afioga i le Minisita ina ia faataina ma faaleleia auala nei aua o le toatele o nuu ua nonofo i uta i le mea e le o oo atu i ai le sami. O le auala lea i Tafitoala e pei ona ta feiloai ai i le Paeaiga foi ua mavae sa taumafai atu ai. Ou te talitonu lava o le Paeiaga lenei e fai ai ma faata ai lea auala aua e le atoa le kilomita o le alu i tai ma masalo na o le tasi se maiala pe a, ou te talitonu o lea ua faataatia le anava foi a le HRPP ina ia faataina uma auala ia ina ia soo ai Samoa ae lei uma lenei Paeaiga.

I lau Afioga lava i le Minisita mo Galuega, o le vai lea i le alu atu i Lotofaga seia paia Mulivai, e tele lava ina le sua. Na tufa atu pili i le tausaga nei lava, o nisi o nei pili e tei lava ua avatu i aiga ae oo mai lava i le taimi na avatu ai nei pili e lei sua lava paipa o le afioaga. E talosagaina ai lau Afioga i le Minisita ina ia faaleleia le faatanoa lea i uta i Tafitoala. Ou te talitonu a lelei le faatanoa lea ua foia loa lea faafitauli i le alu atu lea i Lotofaga e oo atu i Mulivai. O le taimi nei e leai se faatanoa na o le paipa lava o loo i ai e faasau ai le vai. Ou te talitonu foi o le a fiafia tagata e totogi le pili pe afai e sua le suavai i taimi uma. Faafetai tele lava i lau Afioga i le Minisita ma le Matagaluega o le Vai e tusa ai ma le vai o Saanapu i le alu atu i Salamumu i Saanapu. Ua faafetai tele lava ua maea lea tausaga ma le amataga o lenei tausaga, ua taoto lelei ma ua tele ina maea le paipa lea ae i ai taimi e tele ina le sua ai. Masalo a feita Salamumu ona le avatua lea o se suavai i Saanapu. E talosagaina le Matagaluega ina ia mataituina lea tulaga ina ia faaleleia. E leai se aoga o le fai o le pamu vai ma ofe ma tulaga uma faapea sa gapatia ai lo tatou Malo ae tele ina le suasua.

O le tulaga i le auala laupapa i Lotofaga pei ona silafia tasi lenei o auala laupapa ua leva ona taumafai mai i Paeaiga ua tuana'i, o lea foi ua amata atu lenei Paeaiga. Ou te talosaga atu i lau Afioga aua o lea ua ou maua tala o le a fai le konekarate ina ia faasima le auala laupapa lea i Lotofaga. O le taimi nei, na ona fonofono ai ona o le faatalitali ai mo se tupe poo se tender foi e faagaoioia ai le auala laupapa lea i Lotofaga.

Lau Afioga i le Minisita o Falemeli ma Uaealesi, o lea e pei ona matauina o loo gata le telefoni i Falealili faasolo atu ai i Aleipata ao loo nofo pouliuli pea lenei Itumalo poo le a le tulaga o loo i ai le telefoni i le faasolo mai lea i Safata ma Lefaga e sau agai iinei. E talosagaina lau Afioga e lelei lava i le taimi e te saunoa ai pe tali foi i saunoaga a sui usufono ua maoti mai lea tulaga i telefoni. Ao tulaga uma lava lau Afioga i le Fofoga FETalai, e momoli atu le faafetai tele a lou nei sui usufono e tusa ai ma galuega fai a le Malo aua le atiaeina o lou Itumalo o Safata i lenei Paeaiga ua mavae atu, i auala ta, moli o auala ma le vaipaipa ua faamalo faafetai. O le agaga o le faafetai e le faaitiitia i lau Tofa Leafa, ua se tai taliga foi i le tauanau ma tuitui atu pea i lau Afioga. Ua faamalo faafetai i le tele o talosaga a lenei

Itumalo ua faataunuina ae ona pau lenei o mea o loo fia faaleleia ona uma loa lea o le tagitagi ma tuitui atu i lau Afioga aemaise lava o le taligalu i Sataoa mo le fia faaleleia. O itu ia i lou Itumalo ina nei uma lou taimi ae le i faamaoti atu.

Ua toe oo mai lau faamatalaga i le tulaga i aoaoga e pei ona taua i le itula ua mavae. E momoli le faafetai tele i le Malo ona o le faamuamua ua ave i le tulaga tau aoaoga aemaise lava o le taumafaiga ina ia faaleleia faleaoga e faaoga aua le aoaoina o alo ma fanau aemaise o le tulaga i malae taalo o aoga. E avea foi lenei avanoa e momoli atu ai le faafetai i le afioga i le Minisita o Galuega, ona ua maea ona faaleleia le malae o le aoga lea i Sataoa ua matagofie. Ua faafetai tele lava mo le fesoasonai ma e talitonu lava le faamoemoe o le a faapea foi i nisi malae o aoga o lenei Itumalo ona faasolosolo atu ai lava lea faapena. Ua faamalo faafetai i lau Tofa Leafa, e tusa ai ma le talosaga na avatu aua le malae lea e avea ma malae taalo o lenei Itumalo. O le tulaga i le faleaoga o Samoa College, atonu ua uma atu foi lea Paeaiga amata lenei tausaga o lenei foi o le a uma e le i faaleleia lava le faleaoga lea o le Kolisi o Smoa. Ou te talitonu o loo i ai fuafuaga a le Ofisa o Aoga aemaise foi o le Malo mo le faaleleia o lea faleaoga ae lagona lava le faanoanoa o lou nei sui usufono ona o lea ua faagaoioi le Iunivesite o Samoa ae le o lelei lava le faleaoga lea. O le faleaoga lea e fafaga atu ai alo ma fanau mo le tatou Iunivesite ae na ona faamanatu atu lava o lea foi ua uma lenei tausaga o Iuni lenei, Iulai, Tesema ae leai lava se mea ua faagaoioia mo le faleaoga lenei o le Kolisi o Samoa.

O le falemai o lea ua mautu le faamoemoe o le Malo e ave lefaamuamua i faleaoga ma falemai. E ui lava ina laitiiti e le tutusa le tupe ua faatagaina i aoga ma falemai na o le 18% lea ua faaopoopo i le budget o le 1996/1997 mo le falemai. Ou te talitonu lava o loo iina le uta o faimeia i le Malo aua lava le faaleleia o tulaga tau falemai. O tulaga masani lava atonu o lenei e iina totogi ma equipments asemaise lava o le maintain ina o le falemai o Motootua. E toatele foi nisi sui ua sausaunoa i ai ona o le palapala aemaise o le lelei ona vaaia o ia tulaga uma ou te talitonu o loo i ai le faamoemoe o le Malo ina ia faaleleia ia tulaga. E le gata foi i lea i lauga foi a sui usufono i Paeaiga talu ai, sa taua ai le pisapisao tele o le falemai. Ou te toe faamanatu atu foi nei tulaga i le pisapisao e le gata i totonu lava o le flemai ao fale foi o loo faafesagai ma le falemai ia fai i ai se fuafuaga a le Malo.

Ona ou oo mai lea i le Matagaluega o Faamasinoga. Ua maituina o lea ua uma ona renovate isi tulaga o le faaleleia o le Fale Faamasino tuai, ua faateia au ina ua ou oo atu i luga i le fale aluga ou te tautino atu lava e le taitai ona saogalemu nofoaga o loo faigaluega ai tupu foi ma tamalii o alo ma fanau. Ae savali ai i luga i le falealuga lea ou te fai atu ai lava toetiiti lava pau pe gau atu se laupapa. O mea ia e tatau lava ona ave i ai le faamuamua i le mea o loo faigaluega ai aemaise o le faatinoga o galuega a lenei Matagaluega taua o le tatou

Malo. Ia taatia nisi tulaga o le le saogalemu le falealuga ina nei tei ua tupu ai se faaletonu e tuuaia lava lo tatou Malo.

O le isi tulaga o le Ofisa lea o Pepa Fanau. Atonu ua maea atu le palota o le isi ofi taimi o le ae o aoga ae na maitauina lava sina uumi o laina na iu lava ina avatu le Ofisa o Leoleo e faasoasoina le agai i totonu i le faiga o pepa fanau. Ou te talitonu e le o se galeuga faigofie le foia o lea faafitauli ou te talitonu lava a computerise le faiga o tatou pepa fanau e taugata lava computers ae ou te talitonu lava e leai se isi faiga e tataua ona fai ai ina ia foia ai lenei faafitauli. E le gata i lea o records ma faamaumauga ona o le le lelei ona teu o a tatou faamaumauga i le tulaga lea i pepa fanau. Ua faamalo i lea Matagaluega ona o galuegalelei aemaise foi o le vaaia o le agaga fiafia i nisi o alo ma fanau ua foi mai atunuu mamao ua faigaluega alo ma fanau ua foi mai atunuu mamao ua faigaluega ai i le Ofisa lea o Faamasinoga. Na pau lava le talosaga ina ia tagai lelei i ai lau Afioga i le Minisita mo totogi o nei graduates nei tei ua faatalitali ai se isi mea e agai i ai. E le mafai ona alualu i luma a tatou Matagaluega pe a tatou le vaaia lelei nei foi alo ma fanau ua iu mai ma le manuia taumafaiga i atunuu mamao ina ia tutumau ai i Matagaluega ua i ai aua lava le tautuaina o le tatou Malo. Faamalo mo mea uma lava i lenei Matagaluega, na pau lava lea o le faletonu ona o le le saogalemu o le fale o loo faigaluega ai.


Ona ou oo mai lea i le Matagaluega o Felauaiga, lau Afioga i le Minisita atonu e fou lou tulai mai i le tulaga lea ae o loo ou faalogo i le tulaga i le Civil Aviation i le Airport Authority i le malae vaalele. O loo tau fai se solo tetele ona o le faaletonu o totogi.....

Faafetai mo le Afioga i le sui Fofoga Fetalai ona o le lafo ina ia faaopoopoina ni minute aua le faamaeaina o lau lauga. E leai o lea ua uma o lea o le a ou taumafai atu ina ia maea i totonu o le 2 minute. Lau Afioga i le Minisita o Femalagaiga lau Susug Joe Keil, sei e silasila totoa ane i totonu o nai uso foi o loo galulue i le faatonutonuina o vaalele poo Air Traffic Controllers. O lau afioga foi sa galue ai i le tele o tausaga i le faapailate, o lena e silafia e lau Afioga le tulaga e tataua ona i ai, ua leva foi ona taumafai mai totogi aemaise foi lau Afioga i le Minisita, o navigational aids e tele ina le lelei tulaga uma mo le saogalemu o femalagaina a vaalele. E talosaga atu ai ina ia silasila totoa i ai lau Afioga aemaise foi tulaga i e o loo faigaluega mo le faaleleia o nei masini aua lava le saogalemu o le feoaiga o le mamalu o le atunuu aemaise o tatou malo gasolo mai. E manaomia nisi e ave e aoga lelei ina ia foia ai faafitauli e faaletonu soo i equipments poo navigational aids, e faaoga e vaalele mo le saogalemu.

O lau mataupu mulimuli lava lea faafetai mo le Yazaki Samoa i galuega uma lava. E tasi a le mea lea ae ou te lei nofo i lalo lau Afioga i le Fofoga Fetalai, o le paka lea e i luma ifo o le Yazaki i tua, a ui mai i le taimi e manava ai galuega ou te tautino atu e atoa le itula faatoa mafai ona kolosia le itu lea ona o le tele o pasi ma taavale. Ou

te talosagaina lau Afioga i le Minisita o Galuega ina ia faia lelei se mea e paka lelei ai pasi ma tulaga uma ina ia foia ai lea faafitauli. E le nao au e ui mai ai i o, e toatele lava le mamalu o le atunuu e alaala i uta i Siusega faasolo atu i Aleisa, o loo afio ai foi le Afioga ia Gaina ma le Afioga Leota Lu. E faauma atu ai lau lauga, ia manuia le Fono. Faafetai.

### Afioga PAU SALEAULA FALEATUA



#### **Itumalo Faaalalafaga:**

*Faasaleleaga Nu.2*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*24 Iuni 1991*

Lau Afioga i le Nofoa, lau Afioga i le Fofoga Fetalai le Matua o le Usoalii, aemaise lau Afioga i le Palemia, Afioga i Minisita o le Kapeneta faapea foi le Afioga i le Aloalii, le Taitai o le Itu Agai, Afioga i Alii Faipule o sui usufono o le Fono o maaola ua filifilia e le Atua aua Samoa ma lona Malo.

Ae ou te le'i tautala i se manatu, e muamua ona ou fia paia Tiasa ma faafesootai le taiao ma faasolo le muniao i le paia tele i le tapuaiga a Samoa. Lau Afioga i le Ao Mamalu o le Malo, Susuga i le Malietoa o le na faalogo i ai Samoa. Lau Afioga Mataafa Faasuamleau, Sui o le Fono a Sui Tofia. Le paia tele i Tama ma o latou Aiga, Aiga foi ma a latou Tama. Tumua ma Pule, Aiga i le Tai ma le Vaa o Fonoti ae faapea foi Faleupolu Tofia o Samoa. E faapea foi le tapuaiga mamalu i le Motu i Sasae. Lau Afioga i le Kovana ma le Sui Kovana. Afioga i le Peresetene ma le Maota o le Senate. Afioga i le Fofoga Fetalai ma Afioga i alii Faipule o le Maota o Sui, o le paia lava lea ia Sua ma le Vaifanua, Fofu ma Aitulagi, Ituau ma Alataua le Maoputasi, Saole ma Saleaumua ma le Launiu na Saelua.

E faapea foi le afio o alii Tootoo o le Faleula ma upu i le Manuatele. E le faagaloina foi le tapuaiga mamau i auauna a le Atua o matai o le Lagi, o lo o latou tatalo faatauana i le Atua mo se manuia o Samoa ma lana faiga Malo. E le ma faagaloina foi le faamoemoe i le tapuaiga mamalu o lou itumalo o Faasaleleaga Nu.2, i le afio o le Aiga Sa Malietoa, e faapea foi le Usoalii le Sao na lua ia Mago ma Luasiufanua. E faapea foi le afioga o Leilua ma le Toalima, afio Sa Alalatoa ma le Matua o Alalatoa. Susu alo Malietoa, alalatai foi Lauana pule Tuilagi ma Namulauulu, alalatai le Aimale, alalatai foi le Maopu Tufuga ma le Paia ia te oe Safotulafai.

Avea ia lenei taimi e molimoli atu ai lau faafetai tele i le paia maualuga o le tatou itumalo, ona o le tofa na liliu ma le faautautaga loloto, ua outou filifilia ai la outou auauna aua so tatou sao mo Manuvao mo upu fai o loo tatou Malo. E vaivai le auauna ae faamoemoe i le agaga o le Atua i la outou tapuaiga e mafai ai ona faatino se

manatu ma se lagona mo se manuia au i luma o lo tatou itumalo. Faafetai foi i faletua ma tausi, Sao aumaga ma Sao tamaitai le paia tele i le tatou itumalo i le 21 o e na filifilia lou nei sui ina ia faia ma sui o le tatou itumalo i totonu o le Maota Fono o lo tatou Malo Tutoatasi. Ia tapuai maia ma le manuia, o le a ou taumafai pe tasi pe lua e pei ona maua i saunoaga a nisi o sui. Afai tatou te oo atu i le lima tausaga e pei ona taua e nisi sui o le a faapena ona faasoasoa atu ai i aso taitasi o fonotaga nisi o manatu ona o le taimi ua utiuti.

E muamua ona ou faafetai atu i lau Afioga i le alii Palemia ma lau Kapeneta tuai, e lagona e faigata ma fita le galuega sa outou faia i le tolu tausaga ua tuanai. Aua o le tolu tausaga e le o se taimi umi, ae malo le faatoatoa, malo le lototele, malo lo outou silasila alofa i le atunuu. E ui a ina e le o tino mai ni si galuega, aua e le mafai ona faataunuu uma ni mea i se taimi e tasi. Aua o lo outou finagalo faataatia lea ua faatinoina mai foi e le Afioga i le alii Minisita o Tupe, i le Tala ootoo o le Tupe mo lenei tausaga. O lea e momoli atu ai le faafetai tele ma lau faamalo.

Ona ou manatua ai lea o se tala i se auuso e toalua na malaga i le itu i Sisifo o Samoa, i le la sailiga Malo. Na malaga, malaga lenei auuso, ua la vaaia se nuu e ufitia atoa i le ao paepae. Ona faapea lea o le tama matua i le tama laititi, a e aotea loaloa le Motu. Ona faapea lea o le tama laititi, Ta afe ia i ai. Ona afe lea i ai o le aualii, na momoe i le po, e feala ae i le taeao talofa e leai ni tagata soifua na o saualii e nonofo i le Mtou lea. Ona faapea lea o le tama matua i le tama laititi, "Sau la ia, alu e nofo mai i le isi itu o le motu o le a ou nofo atu i le isi itu o le motu. A oo nanei ona ta sauni lea tatou te tau ma aitu. Ona faapnea lea ona fai. E oo atu i le taeao ua manumalo alii nei e toalua. Ona faapea atu lea o le tama matua i le tama laititi. Maui laia o se fua Maui, a maui, maui o aitu ua o.

Lau Afioga i le alii Palemia ma le Kapeneta aemaise le Palemene o Samoa i Sisifo i taimi ua tuanai, e tele atu sa outou faafeagai. O le faalavelave o nuu i la outou galuega, o isi na aitu. O le faalavelave o nisi o alii Faipule i taumafaiga lelei sa taumafai i ai, o isi na aitu. O le aso mua se fuamaui. A maui, maui o aitu ua o. O le ala faapea lea o Tavita i lana molimau i lana Salamo e 103. "Lou Agaga e, ia faamanu atu ia Ieova, o mea uma foi o i totonu ia te au ia faamanu atu i lona Suafa Paia. Aisea? Aua o le na faamalievina o ouotu manao i mea lelei. Ia matou te le selu atu, pe matou te viivii atu. E matou te le viivii foi i le Tootoalii, ae matou lulu i ponaivi, tulou o le upu e to ia te au. Ae o le faamalo ma le faafetai ona o la outou galuega fita ua silafia e le Atua. Faafetai foi i Afioga i alii Faipule sa tau lagalaga i mea lelei e manuia ai lo tatou atunuu.

O le mataupu ou te fia talanoaina muamua i totonu o le matou itumalo, o le tulaga lea tau eleele o le matou nuu o Safotulafai ma le itumalo o Faasaleleaga. Sa ou sailiilia ma le totoa i totonu o le Ofisa o Eleele ma Siosiomaga, o le latou faaaliga e fapea. I le 1830 na taunuu ai alii Faifeau muamua Misionare i Samoa, o i na

amata ai ona oia eleele o Samoa. I le taimi lea e 12000 sikuea maila eleele o Samoa i Sisifo (1,200qm) i Upolu ma Savaii, Manono ma Apolima. I le 1864 na amata ai ona fai le faatau tui sa faaigoaina o le Land Rush ua faatautui ia fanua o le tatou atunuu. Ia talofa ai o le po valea o Samoa i lea taimi ae manatu foi i nei alii faifeau, ai na o mai foi e ati afi ae o mai foi nomasi. O le 1889 faatoa fai ai le mea e igoa o le Berlin Treaty po o le Land Commission sa toe suesueina ai uma eleele o Samoa.

Na uma le fonotaga lea ona toe faafoi lea o le 80 ma le afa pasene o eleele o Samoa e taua o Eleele o le Atunuu, po o Eleele Faale-aganuu. A o le 19 ma le afa pasene sa taua o eleele umia saoloto, ma o le taimi la lona na alu uma ai le tele o eleele o Safotulafai ma le itumalo Faasaleleaga. Atonu o le taimi lea na faasalaina ai se tasi o toa o le matou nuu po o lo matou itumalo lea sa faatafea faatasi ma nisi o le mamalu o toa o le atunuu, sa faatafea i Saipani.

E pei o ni sailiiliga maeaea o lo o i ai nei, e 17,000 eka faanua o Safotulafai o lo o uumia nei e le Malo. O le tatalo e faapea le mamalu e o le Palemene o Samoa i Sisifo, afai o se tulaga e moni lea tulaga, ona o se sala a se tama o lo matou itumalo. Ou te matua lagona le faanoanoa, aua e fua i luma, fua i tua e le soona toa foi le tama o lenei nuu. O lona ola ma lona malosia sa foaina e saili ai le Malo lenei ua tatou oaoa ai nei ma tatou see ai i Maaomalie. Ae o lenei lava e oo mai i lenei vaitau, ou te lagona o le isi lea nuu e tau o le matua o Puleono o Salafai, vaeatu le faafofoga mai o Pule i Salafai. Ia ae ou te lagona e na o le 800 pe 900 eka o lo o soifua ai nei Safotulafai. Ae o le 17,000 o eka o lo o umia e le Malo. O le mea lea e tatalo atu ai i lo outou Paia, ia outou alofagia lenei vaitau ma lenei Paeaiga sei faamatuu mai uma fanua o Safotulafai. Ua tupu Safotulafai pe lima afe ma ona tupu tagata o lo o soifua ai, ae leai se mea e tua i ai. Ae ole tulaga o le soifuaga faa-Samoa e pei ona tusia i le Faavae Nu.101 o lo o i ai eleele faavae o le tatou atunuu. O eleele uma e tau Samoa e lavea lea i le aganuu. Ae o le tulaga o lo o i ai nei, ia o le tofa liuliu ma le faautautaga loloto ia Safotulafai talofa, e tua i le papa ae lumafale i le moana, e pei o lea upu faamuagagana. Ona ua aveva uma e lo tatou Malo o matou eleele e leai se mea e tua i ai alo ma fanua o lo matou itumalo.

O le mea lea, le mamalu o le Palemene ua matou tatalo atu, aua o lea ua tutu mai i le foe lau Afioga i le Minisita o Eleele lau Tofa Faasootauloa, o le isi a upu a le Tusi Paia. "O uo mo aso ao le uso mo aso vale." O le taimi tonu lenei e faamatuu uma mai ai eleele o Safotulafai faitalia ai le Malo.

O le tulaga lona lua, o tulaga o auala ma vaipaipa, ua galo ia te au ona momoli atu le faafetai tele ona o le eletise ua oo i si o matou nuu o Tapueleele. E ui lava ina e le i maea lau Afioga i le Minisita o Galuega, ua toe laititi lava ni nai pou ona soo lea o lo matou nuu i uta i Tapueleele. E momoli atu le faafetai e tusa o lea tulaga. Ua leva ona faaolomaaui mai nisi o ou uso sa muamua mai ia te au ona o le vai o lenei nuu. A silasila i ai le

mamalu o le Palemene, se talofa, o le vai e sili ona matautia aua a tafe le alia, vaeatu lo outou mamalu ma le faafofogaaga a Samoa ona maua ai lea o nai vaivai e toa i le papa ia o vai na e faaoga. Afai e tolu vaiaso, fa vaiaso e le toe i ai ni timu ia ona tatalo lea i le Atua e toe aumai se timu, aua a leai se timu ona leai lea o se mea e soifua ai.

Ae o lo o i ai nei le vai sa vili i le tausaga 1972 sa ou talatalanoa i alii papalagi sa viliina lea vai, ma o le molimau a le nuu lea o Tapueleele e fai si malosi o le vai lena o lo o iina. E le na o Tapueleele foi o lo o i ai iina, e i ai ma aoga e i ai Vaiola faapea foi ia Logoipulotu e faitau afe tamaiti aoga o lo o i ai. Ae o le tulaga mafatia o lo o i ai e leai se suavai e mafai ona soifua ai lea foi vaega o le matou nuu. Ona faapea atu lea o le talosaga i lau Afioga ile Minisita o Galuega, o le faatalauala atu lea a lenei ituamlo, e oo foi i tai i le matou nuu tele i tai, e faapena e tai tolu aso e leai se vai. Ia o lena foi sa taua e nisi o afioga o lenei itumalo le faaletonu o le vai o lo matou falemai, ae o lo o i ai le vai lelei o lo o i gauta o le nuu lea o Faga pe toe valu a ni nai pou uila oo le eletise, e mafai ona faasua mai ai le falemai ma tai i lo matou nuu tai ae le taulia ai pea uta e pei ona ou taua i le taimi muamua.

O le Minisita o Falemai. Lau Afioga i le Minsita o Falemai, ia atonu o lea ua uma ona saunoa atu nisi o Afioga i alii Faipule o le itumalo o Faasalelelaga, i le tulaga e sili ona matautia o lo o i ai nei le falemai i Tuasivi. Atonu a ou faigoaina lea falemai tulou lava le faafofogaaga a Samoa ma le mamalu o lenei Palemene, e ao ona ou faaigoaina faapea, o le mafutaga matusia. Aua pe feoloolo se gasegase e oo loa i ai, ia ua sauniuni loa e feiloai ma lona alii. Aua o le mea moni ou te tau atu i lau Afioga, le tulaga o mea e taoto ai mai e sili ona le manuia foi. E oo foi i fomaini, ia o lea na molimau se isi ou uso ia te au e tasi le fomaini o lo o i ai, ia ae o le fomaini foi ua litaea. O lona uiga la afai e gasegase se isi o lou itumalo po o se isi lava o Puleono i Salafai ia o se tama foi ua matua. O lona uiga e oo mai le fesoasoani ia te au i se isi taimi ua oo mai le faamanavaga o a ta galuega ma ta malaga sao loa i le lagi.

O le mea lea lau Afioga i le Minisita o Falemai, sei e alofagia. Ina ua uma ona fai le maliliega faatasi a Tumua ma Pule i le faiga o le tatou Malo, e tasi le agaga sa i ai ia tutusa ona fai le tatou Malo. Afai ua fai le falemai tele iinei i Motootua, fai se isi falemai tele i Tuasivi. O le tama o le aiga nei na foaiina le elele lea o lo o i ai le Falemai i le Malo o le faamoemoe ina ia manuia ia le Faasaleleaga ma Puleono i Salafai. O le tatou motu iinei Upolu, e ui lava ina mamao i tua nisi o afioga ae taumafai mai lava le taavale ma oo mai. Ia ae afai o se gasegase ua tigaina i Salafai ae le aoga i ai se togafiti, o le mea moni lau Afioga ou te tau atu aumai i le vaa ua sili atu ona tigaina le gasegase. O le mea lea ou te matua tatalo atu ai i lau Afioga, ina ia tautuana se falemai lelei mo Faasaleleaga ia aemise foi o matou uso uma i Puleono Salafai. E pei ona avatu se manatu faapea i lau Afioga e a pea faataitai tasi ona fai ese se isi itu o le

Falemai ona sii ai lea o pili i luga e pei o falemai ia i fafo. Ae tuu i ai ni masini ma aumai ni fomaini faapitoa latou te faagaioia lea itu o le falemai. Ou te lagona lau Afioga o le isi lea vaega o le a taofiofia ai tupe lea o le a faaalua e lo tatou Malo, e auina ai nisi o gasegase i atunuu i fafo. Aua afai e le manuia iinei o le tulaga lea ua i ai e auina i fafo ia gasegase. Ae a faapena ona vaelua se isi itu o le tatou falemai ae fai ai se tulaga faapena tuu i ai pili, po o a ituaiga pili e pei o Niu Sila ma atunuu i fafo, e lelei foi ona fai faapena. Ou te fai atu i lau Afioga i le alii Minisita, e leai se isi e le sulu i le itu lena, pe taugata, ae o le mea e taua i le soifuaga. O soo se tagata o le soifua ia maua, ia maua foi le fesoasoani ma ia ola, o le a ave ifo foi lo tatou atunuu ma o tatou tagata soifua, ma le nuu o le Atua ua fiu foi le Atua e fai i ai mea lelei i ai ia ae muimui lava. O le mea la lea lau Afioga e sili ona tuu i luga le pili o se isi vaega o le falemai e aumai i ai ni fomaini faapitoa ma ni masini faapitoa. A le mafai e le isi itu o le falemai lea o le a i ai mai i le totogi taugofie ona ave lea i le itu taugata lea e pei ona taua. Ona faapena foi lea ona fesoasoani mai nisi o tatou alo ma fanau o lo o i fafo i le auina mai o ni tupe e fesoasoani i gasegase o le a taoto i le tatou falemai.

Lau Afioga i le Minisita o Aoga, e i ai le talosaga a lenei itumalo. O lea ua vaaia i totonu o le Tala o le Tupe, ua le avatua i ai so matou manatu aua o lea ua tautuauega lo matou o mai ia ae ua uma ona tusia le Tala o le Tupe. Ae matou te le fia talanoa la i ai i sese so matou manatu, ina nei ave ma lape o le tautalaga. Ae na o sau fautuaga, tau ina taatia atu i lumamea ina ia fai i ai se fuafuaga lelei mo le lumanai. O lea ua i ai nei fuafuaga mo faleaoga. O le talosaga atu a si o matou foi nuu o Safotulafai aemaise foi o Faasaleleaga ia ma nisi o afioga o le motu tele i Salafai; e a pe a avatu uma la tatou tupe lea sei fai muamua ai matou faleaoga i Savaii ona faatoa fai mulimuli ai lea o Upolu nei. Aua o iinei o lea e lalata i Kamupani e tele ai mea e mafai ona faatau e fai ai a outou faleaoga. Ae avatu le vaega tupe lea pe miliona ea ma ona tupu sei faatulaga lelei muamua ai Savaii.

Lau Afioga i le Minisita o Vaalele Sivili, o au e le malamalama pea e oo mai i le aso i le Terminal po o le Fale Vaalele lea o lo o i totonu nei o le Malae Vaalele i Faleolo. Ona o lea ou te vaaia pea, o lo o faia uma e le Polenisia galuega mo isi vaalele. Sa ou fesiligia le pule o le Samoa Ea pe fia se tupe o ona totogiina, ae fai mai e \$70.00 le malaga e tasi. A fika atu la, afai e sefulu malaga i le aso ia ua \$700.00 le totogi agai i le Polenisia. Sa ou suesueina foi le kamupani vaalele a le Hawaiian Air e \$2,000 tala Amerika lea o lo o totogia i le Polenisia. O le mea la lea e fesili atu ai i lau Afioga, e i ai se taimi e te saunoa mai ai ma faamalalama mai po o i ai se vaega tupe a le tatou Malo. Aua sa ta manatu lava ina ua fau lenei fale e omai lava vaalele ia, ma omai foi nisi kamupani Vaalele mai fafo ma latou lisiina lea o so o se vaega o lenei fale, e maua mai ai se tupe e fesoasoani i le tatou Malo. E le gata i lea e faaopoopoina nisi o tagata faigaluega e faaifigaluegaina



i nei Kamupani. O le tulaga la lea ou te fia fesili atu ai i le tulaga o lo o i ai nei le tatou Fale Vaalele.

O vaa a lalo o le matou motu i Salafai, e talosaga atu i lau Afioga i le Minisita, e ese le faanoanoa o le agaga pe a faalogologo atu i nisi o aso ou te malaga mai ai i Salafai. E fai lava si maemae o alii auvaa. O se isi upu e faigofie ona faamalamalamaina ai le gagana, ua fai lava si le migao, vaeatu le faafofogaaga a Samoa. E fai si inaina laitiiti o e o lo o galulue i luga o vaa. A e faafofoga i nisi o upu e lafo i tama matutua o le atunuu e memei foi le taofi pe a faalogologo i ia tulaga. O le mea lea lau Afioga faamolemole sei lapatai le alii pule o i ai ina ia faatonuina a latou tagata faigaluega ina ia lelei le faafoeina ma le faafeoaiga o si o matou motu o Salafai. Ona o lau Afioga o lea o lo o i ai pea i totonu o le Minisita foi o Faatoaga. Ou te talosagaina ai lau Afioga ona o le faamai lea ua i totonu o le atunuu lea ua lavea ai esi ma fai, mea tau fruits. Tele o nisi o nei mea faapena i si o tatou atunuu. I totonu o le Lunaite Setete, e le mafai ona soona faatagaina e so o se Setete o Amerika se mago e aumai i le Setete lea o Hawaii, ona o lo o aumai e le mago lena le anufe laititi mo le fruit flies e mafai ona faatamaia ai mea tau fruits. O le tulaga ua oo mai ai le tulaga lea iinei i Samoa, o le talitonuga o mago ia e aumai i Honolulu e le i silafia lelei e tatou lenei tulaga. Ae o lea ua tau atu i lau Afioga e sili ona taofia soo se ituaiga mea faapena e i ai fala ai, soo se fruits mai Hawaii, ia taofia o lo o maua i ituaiga faamai na. Sa aoaoina ai au i se isi taimi i Honolulu ao ou i ai i le faamai lena. Afai e te fia silasila i ai, ona aumai lea o se microscope aumai se mago mai Honolulu, ona e silasila lea i ai e sili ona tele le faaletonu o i ai. E tumu atoa a le tino o le mago i anufe, ae a vaaia i o tatou mata, e pei a o ni alavalava foi lele o le mago pula.

O le tulaga i tatou maketi e auina i ai a tatou mea mo atunuu i fafo i lona tamaoaga o le tatou atunuu, e i ai talo ma isi mea faapena. Sa ou i ai i le isi vaitaimi i Amerika, ae o atu nisi o alii e saili ni a tatou maketi. O le mea moni ou te tau atu i le paia o lenei Palemene e ala ona le manuia a tatou mea o lo o auina atu i fafo, ona e masani ona o atu nisi o lo tatou atunuu ou te le agaga tele foi i ia uso o le atunuu sa malaga atu, ae o atu saili atu sa latou maketi ae tuu maketi sa o atu e saili. O le mea lena sa tele ai le gau o le tatou Mlao i le taimi ua tuanai. Sa ou iloa lelei le mea na avatu i ai talo ia, aua e auina talo ia, o ou tafao i San Francisco i lena vaitau. Ia o le la ua fau ai fale o isi aiga ia talu ai le le ui sao i Kamupani tetele e mafai ona latou faafoeina le auina atu o a tatou talo. O so o se Setete lava o Amerika o lo o i ai le latou Tulafono. I totonu o le Agriculture o lo o i ai a latou Tulafono e mafai ona tatou uia faava o Malo i so o se Setete o lo o tele ai se aofaiga o tagata Samoa, ina ia mafai ona auina atu i ai a tatou talo po o nisi lava mea e mafai ona auina e le tatou atunuu, ina ia faatauina mo le auina mai o seleni mo le taumafaiga o atiina ae o le atunuu.

O le Ofisa o Leoleo i si o matou motu i Salafai, o le isi lea Ofisa e sili ona leaga. E talosaga atu i lau Afioga i le

alii Palemia ua manaomia le toe faaleleia o le tatou Ofisa. E alofa foi i nai alii Leoleo, o ita nei e lua tausaga o ou i ai i totonu o le tulaga lea i Amerika Samoa. E fai lava si faigata pe a le lelei mea e fai ai le tiute; e le gata foi i lea o tualga o le puipuiga o le soifua o alii Leoleo. O le mea moni ou te tau atu i le mamalu o lenei Palemene, o Susuga i alii Leoleo o isi foi tagata soifua e pei o lo tatou paia ma le mamalu o lo o ee nei. E lagona foi e latou le popole i nisi o taimi. I taimi a o ou galue ai i le tulaga lea i totonu o Amerika Samoa, sa faaogaina mea tau teargas, o handcuffs sa i ai foi ma laau malosi laiti, vaeatu lo otuou paia ma lo outou mamalu. E lagona lava lo ta mafanafana pe a tupu mai se faalavelave aua o lea e atoatoa uma mea e puipuia ai lo ta ola.

Ae o le tulaga o lea e i ai nei le mamalu o le tatou atunuu aemaise le Ofisa o Leoleo, ia na o lo ta alofa i nai alii e o mai ma saunoa mai e faafilemu se tulaga faapena. Ae tatau ona i ai ni nai teargas pe afai e sa le laau malosi. Ae a pe a i ai ni nai pouvai ina ia puipuia ai lo latou soifua lelei, ma maua ai le faamalosi o le tatou Tulafono

Sa ou faalogologo i le lauga a se tasi o faifeau ona ou manatua ai lea o saafiafiga a le alii o Solomona e faapea a leai se faaaliga e faasalalauina i le nuu. O le tulaga sa faamamafa e le alii faifeau, o le le faamamaluina o le tatou Aso Sa, ona o le tulaga i Mulinuu nei, o lo o faia ai inuga ava e fai ai taelega ma fagotaga. Ona faapea lea o le saunoaga a le alii faifeau, e sili ona palapala lo tatou atunuu. Ae a amio solia ma amio tausafia, e sili atu nai lo le mama o Samoa, ae tumu i amio mataga tulou lo outou paia ma lo outou mamalu.

E lua ni ekalesia sa taua e lenei faifeau i le ma talanoa i lenei vaitaimi. O le Ekalesia a Keriso lea e vali paepae o latou Falesa, ma le Ekalesia a Satani lea e i le falesa faapena o le ekalesia lena i Samoa nei. Ona fai mai lea o le alii Faifeau, ai o le manatu o le tatou atunuu e saili ai sa tatou tupe, ae o le ekalesia e faalagolago i le Malo ma le tatou atunuu. O le mea lea fai mai le upu a lea alii e ao ona silasila totoa le Palemene o Samoa i Sisifo ina ia faatauina le Aso Sa aua nei toe i ai ni tafaoga faapea ma soli le Aso Sa a ia tatou toe foi i le mea sa sau ai le tatou atunuu i aso anamua. Ia silasila foi i lenei fale e faigofie ia tioata ia i le taimi sa agi mai ai le Ofa, ae aveese le tualuga o le fale, ae o le tualuga e sili ona faigata ona aveese. Atonu ai o Mulinuu tonu lea e lauga ai le Susuga i le Faifeau ma o iinei o lo o fai ai Tulafono a le tatou Malo. Atonu o le mea lea na saafi ai le tamaitai o Taufau ia ao le tali. Ia tatou tatalia lupe o pupula. Toe saafi foi fai mai tatou tatalia lupe o mau.

O le fesili o le a le aoga o le maua o le tatou Tamaoaga i ia tulaga faapea ae maumau ai le mamalu ma le paia o le tatou atunuu. O le a le aoga tatou te tatalia ai lupe o mau ae sili ona aveese ai le tatou aganuu sa tatou tiu ai ma o tatou fiafia ai i aso e tele? O le tulaga lea i lau Afioga i le Fofoga Fetalai, e tele nisi o mataupu ou te fia talatalanoa i ai. Ae o le faatonuga a lau Afioga, o lea o

le a taumafai ai e faapuupuu nisi o mataupu e tuuina atu i luma o lau Afioga ma le Fono mamalu.

Ia o le tulaga i le Ofisa o le Customs; o le tulaga o lo o i ai nei i le tele o le mau mea o lo o aumaia i totonu o lo tatou atunuu. Vailaau oona e i ai marijana ma mea tau drugs. O le mea moni e tau atu e le o lava le aoaoina o Susuga i alii o le Ofisa o le Customs o lo o i ai nei mo le tulaga lea. O le mea lea e talosagaina ai foi lau Afioga i le alii Minisita ia auina i fafo ni alii o le tatou Ofisa ole Customs ina ia aoaoina lelei mo le sailiga o tulaga ia faapea e pei ona oo mai vailaau oona ia i totonu o lo tatou atunuu e ono faaleotnu ai lo tatou atunuu.

Ia ma le faaalalo i lau Afioga i le Fofoga Fetalai o nai au upu mulimuli, ia alofa le Atua foaiina le tofa paia i lau Afioga e faafoeina ai le fono a le tatou atunuu. Moegaluaga o faamanuiaga ma mea paia a le Atua, i lau Afioga a le alii Palemia e taitaiina ai Samoa i le amiotonu ma le faamaoni ina ia tusa ai ma le finagalo o lo tatou Matai. Ia maua la outou tofa le paia o le Kapeneta, maua foi le tofa i Afioga i alii Faipule maua lo outou soifua lelei aua upu fai o lo tatou Malo. Ia manuteleina le tapuaiaga a Samoa i lenei po manuia foi le tapuaiga a si ou itumalo pele o Faasaleleaga Nu.2, faapea auauna a le Atua. Ia manuia lenei po, Soifua.

### Afioga Hon SALA VAIMILI II UILI I



**Itumalo Faaalalafaga:**

*Gagaemauga Nu.1*

**Filifilia:**

*22 Aperila 1991*

**Faatauto:**

*7 Me 1991*

**Lauga Faataupou:**

*28 Iuni 1991*

Lau Afioga i le Taitaifono o le Komiti ma le mamalu o le Komiti, poo lau Afioga i le Fofoga Fetalai ma le mamalu o le Maota, a'o le'i tuuina atu se faamalamalamaga i fesili e pei ona tuuina mai e le Afioga i le sui usufono ia Fuataga, ae avea ia lenei avanoa e fai atu ai se faamatalaga ona o lo'u lava sui usufono e fou, ae le mafai foi ona faagaloina le tulaga e pei ona lautogia ai lo'u tagata i se taimi ua mavae e lo matou itumalo.

O le mea muamua e le mafai ona faagaloina ia te a'u le itumalo sa ou auauna ai talu ai, ma e ao pea ona ou faafetai atu i ai. Le mamalu e i afioaga o Laulii, Letogo, Fagalii ma Vailele, e pei lava o upu masani, e le mafai ona faagaloina lo outou agalelei ma lo outou agaalofoa, e lele lava le toloa ae maau i le vai. O lenei lava ua outou tuu mai a'u e fai lo'u loto, ma ou te talitonu o loo outou tapuai mai aua e le uma lava le fai aso o le Atua.


E le gata foi i lea lau Afioga i le Fofoga Fetalai ma le mamalu o le Maota, ou te fia avea foi lenei avanoa ua maua i luga, ou te fia tulai atu ma le agaga faafetai e avatu le agaga faafetai i le paia ia Tuala ma Sala ma lo la Maopu, ma le paia aua Sa Tuala ma tulaga o Aiga ma le mamalu ia Tevaga ma le Vaifale ma le Faleupolu o

Tofiga. E le gata i lea ou te fia avea foi lenei avanoa e avatu ai lau faafetai i lau Afioga i le Palemia, lau Afioga Tofilau Eti Alesana, lau Afioga i le Palemia aemaise lenei Maota, i lenei tofiga taua e le mafai ona faagaloina e lou nei tagata i lenei avanoa. E le gata foi i lena ao lei tuuina atu le tali o le tulaga i le matou Matagaluega ou te fia avatu aloaia foi le faafetai i le Afioga ia Auallitia Pinati, o le sa tauaveina lenei nofoa i le taimi ua mavae.

O lona lua, e le mafai foi ona faaititia ia te au le agaga faafetai i lau Afioga Polataivao, sa e tu mai i le tofi i lena vaitaimi ou te manatua foi e pei o le toasefulu lava lenei na faamalolo e Iesu, e toatasi lava na toe foi e momoli le faafetai. E le gata la i lau faafetai i le Vaimauga Sasae i le latou faaeaea ae tatau foi ona momoli lau faafetai i le Gagaemauga Nu. 1, faatasi ai ma le Palemia ma le mamalu o lenei Maota, aemaise lau Afioga le sa tauavea lenei Matagaluega, e le asa lava le faiva ma le maumau. E potu foi le tautai ae se lana atu i ama.

E le gata foi i lea lau Afioga, ae ou te lei see mai e tali le fesili e ao foi ona avea lenei avanoa e avatu ai le faamalo ma le faafetai i lau Afioga Afamasaga, o lau Afioga i le Matua o Usoalii, na matematea Malo. Ou te talitonu e faafetai i lenei tofiga taua, ae le gata i lea o lau Tofa Mase Toia, i le tauveaina mai o le tatou Faiga Filifiliga aua le filifiliga a Samoa i le Faiga Palota, sa ou vaai i le mamafatu o le avega sa e tauamoina atoa ai ma lenei Matagaluega. Ae amuia oe ma lou tulai mai i faamaumauga a le atunuu ua e mafai ona e tauavea se galuega, ua le gata i le tatou Pelepesite, ao le faafoeina

### Tofa SAMAU TIMANI



**Itumalo Faaalalafaga:**

*Vaimauga Sisifo*

**Filifilia:**

*22 Aperila 1991*

**Faatauto:**

*7 Me 1991*

**Lauga Faataupou:**

*24 Iuni 1991*

Faafetai atu i lau Afioga i le Fofoga Fetalai mo le avanoa. Ia avea ia lenei taimi e avatu ai lau faamalo ma lau faafetai i le paia o le Palemene o le Malo o Samoa, le paia o lau Afioga i le Tai'ai lau Afioga i le alii Palemia, le paia i Aiga a Minisita ma le mamalu tele i le Palemene. E ui foi i fevesiaiga i lenei taeao, ia o lena e faamasino Samoa. I le tapuaiga mamalu i le Ao o le Malo, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. E faapea foi ona faamalo atu i le tapuaiga i le paia i Auauna a le Atua i Fatafaitaulaga e fia. Faamalo tatalo aua se manuia mo Samoa a taeao. E faapea foi ona ou faamalo atu ma ou faafetai atu i lou itumalo o Vaimauga i Sisifo ina ua mafai ona outou filifilia o au nei e fai mo outou Sui e toalua ma le Afioga ia Patu e fai ma Sui o le tatou Itumalo.

O ou paia ma ou Sa ma ou faiga, e le o ni Paia fou, o Paia lava ia mai le vavau seia oo lava i le faavavau. Ae ona o le manumanu i le taimi, e puupuu le avanoa. O lea ou te faapea atu ai, o le a ou agai atu loa mo ni manatu mo le Fonotaga a Samoa.

Ou te maituina afai ua tuuina le faamuamua i le Ofisa o Faatoaga, Vaomatua ma Faigafaiva i le Tala o le Tupe, e faamalo atu i lau Afioga i le alii Minisita. Ae ou te talitonu ona pau lea o le Alamanuia o i taotu e maua ai a tatou oloa e auina atu i fafo e maua ai a tatou tupe maua. Ae ou te vaavaai atu i le Matagaluega lenei e utiuti le Tala i le Tupe. Sei silasila foi, e pei ona taua e nisi o Sui ia le pagatia o le atunuu i lenei vaitaimi ona o iniseti, o anufe, sei tulou le faafofogaaga a Samoa. Ona pau lenei o le tatou alamanuia o le talo, ua lata mai se tupe feololo ua tatou maua aua o le popo ma le koko, ia o lena ua tou silafia le faaleagaina o le atunuu e le afa. O iina na faaletonu ai a tatou atiina ae i le taimi lea. Ae ou te talitonu afai e lava se tatou faamuamua i ni aoaoga e faatuina i totonu o le tatou lava atunu mo alo o le atunuu ua iu mai fafo ina ia faia ni a latou suesuega aua nei faafitauli o lo o tulai mai pea. A o ou i ai i le Ofisa o Faatoaga, o lenei vaitaimi ma lenei vaitau, ua fai lava si taugata tele o vailaau e taumafai ai a tatou faatoaga. E pei ona laga foi e nisi o Sui, e leai ni vailaau e togafiti ai anufe. Ae ou te talitonu o lo o i ai vailaau, o au foi o se tasi o tagata faifaatoaga. A malosi la tatou taumafai ma lagolago i le Ofisa o Faatoaga e tataua ona faaoga, ona pau lava si ona pona i lenei vaitaimi ona ua fai lava si taugata tele o vailaau. E fautuaina ai le Minisita o lo o faafeagai ma lea vaega pe mafai ona tuutuu ifo i lalo e mafai ai e tagata taitoatasi o le atunuu, o tagata e faalelava le tamaoiga sei mafai ona faatauina vailaau ma masini e faaogaina e la lea vaega e taumafai e togafitia ai a tatou faatoaga.

Ona ou see mai lea i le Ofisa o Faasalalau. E maituina e lou nei tootoo, e leai se Tala o le Tupe e totogi ai se sui lagolago o lenei Matagaluega i se tasi o Sui Lagolago i le Alii Faatonu Sili. E tele lona aoga, e i ai taimi e toesea ai le Faatonu Sili a o lo o i ai lona Sui Lagolago.

Ona ou see mai lea i le Ofisa o le Tiute. Ou te maitau atu e na o le \$399,585 le tupe faamoemoeina mo lenei Matagaluega. A o lo o fuafua le Malo e fia maua mai le \$71.7 miliona mai i lenei Matagaluega. E fautuaina ina ia saga faaleleia atili lenei vaega e faigofie ai ona aua nei faaosoosoina le Matagaluega e tusa ai ma o latou tiute a o lo o taumafai e aoaoina mai ia tupe a le atunuu. Ou te lagolagoina foi le \$700.00 mo le ava malosi.

Ona ou see mai ai lea i le Ofisa o Leoleo. Lau Afioga i le Minisita o Leoleo ma Falepuipui, ou te talosagaina lava ina ia toe faapoopoina le Ofisa o Leoleo ma Falepuipui. O le taimi lenei e na o le 359 le aofaiga atoa o alii Leoleo atoa ai foi ma tamaitai. O le tasi lenei o faafitauli o lo o tulai mai pea i le atunuu, o se taimi ua faasea i le Oifsa o Leoleo le tuai ona faagaioioi o talosaga a le atunuu ma faalavelave e tutupu mai. O le faaiuga o Mati i le tausaga nei na ou alu ese ai ma le Oifsa o

Leoleo sa avea ai au ma Taitai, sa ou matua lagona le faigata i le le lava o alii ma tamaitai Leoleo. E leai ni a tatou Army, leai ni a tatu Navy po o a nisi vaega uma i le puipuiga i le saogalemu, e tataua ona fesoasoani le Ofisa o Leoleo e pei o atunuu i fafo. O lea lau Afioga i le alii Minisita, ou te fautuaina ina ia maua se 500 o leoleo e puipuia le saogalemu o si o tatou atunuu. Silasila foi o le 1972, sa i ai se fuafuaga e faapea pe a faatusatusa atu i le aofai o le atunuu, e 900 ia tagata soifua o le atunuu e mafai ona puipui e le leoleo e toatasi. Ou te talitonu o lo o faatuputupulaia pea le faapoopoga i le numera i le atunuu. Ou te faapea atu ai atonu o le taimi lenei atonu po o le 1200 se vaega o lo o mafai ona tausii e le leoleo e toatasi. E fautuaina lau Afioga i le Minisita o Leoleo ma Falepuipui ina ia toe siitia totogi o leoleo. Silasila foi, e leai ni ovataimi o leoleo e galulue ai, a umi na e galue i le Ofisa o Leoleo i le po ma le ao ona avane lea o se aso e faapoopo e te malolo ai. O le ala lea ou te fautuaina ai, aua a malolo la le vaega lea a o ai a faia isi galuega o la ua uma ona tuu i ai i le leoleo. E fautuaina foi lau Afioga ina ia faia ni aiaiga lelei a le Malo sei puipui ai soifua o alii ma tamaitai leoleo. E pei lava ona outou silafia ua tele nisi ua faaiuina soifua ona o le faataunuina o lo latou tiute. E leai se vaega maoti o le Tulafono i la lea tulaga sei tau ai, vagana ia Tau mo Faalavelave Faafuasei o lo o laugatasia ai tagata uma o le atunuu. E fautuaina ai lau Afioga i le Minisita o Leoleo ma Falepuipui.

Ona ou soso mai ai lea i le Ofisa o le Soifua Maloloina. Lau Afioga i le Minisita o le Soifua Maloloina o lou tulai mai e fou lou tulai mai e tele faafitauli. E faafetai atu foi i le Afioga i le alii Minisita, o le sa tulai mai ai i le tausaga ua mavae. Ae ou te faapenei atu e pei ona saunoa ai se isi Sui, e le faia e le Minisita ni galuega o lo o faaletonu, o Ulu o Matagaluega e fautuaina le mamalu o lenei Maota, o tatou le isi vaega tele o lo o faatuatua. A faapefea ona fai e Ulu o Matagaluega o fea tupe o le a aumai? Ae muamua ona tatou o mai iinei, fefinau ai iinei i le Tala o le Tpe ua tuai. A faapefea ona faagaioioi e Ulu o Matagaluega lenei galuega? O lea le mamalu e, o lena e maua mai e isi Sui o le a tatou faigaluega po ona o le taumafai ona o le Tala o le Tupe ina ia gaioioi, faagaioioi Matagaluega a le Malo.

Lau Afioga i le Minisita o Galuega, e fou lou Sui i le Maota. O le matou itumalo foi e le o se itumalo e tagisa, ae ou te faapeanei atu o lau vaavaai, e amata atu i Matautu, Vaiala, Moataa faasolo atu ai i Fagalii. E talosagaina ma le agaga vaivai, ia e alofagia taligalu o si o matou itumalo. O le afa na fai nei o se mea ina a matautia, ua oo mai le sami i nisi o maota ma laoa o lenei itumalo, aemaise lava le nuu lenei o Vaiala, toetoe ina a oso i totonu, na oo lava i le Malumalu o le Atua i nisi vaega. Ou te talosagaina ai lava ma le agaga vaivai alofa i le taligalu o si o matou itumalo o lea e tu matafaga. E talosagaina foi lau Afioga i le Minisita o Galuega sei e silasila totoa ane. Afai ua i ai ni fuafuaga a le Malo i nai auala o si o matou itumalo, e le tele foi ni auala. O le ala lea i Magiagi e mafatia lava, e fautuaina

ai lau Afioga i le Minisita o Galuega, faasolosolo atu lea i auala o si o matou pitonuu iina i Papauta ma Vailima. Ou te toe fautuaina foi lau Afioga i le Minisita ae silasila totoa i le nuu lea o Vaiala ma Matautu-uta, sina tafe lava laitiiti o le vai, ua leiloa po o fea a sosola i ai e oo foi i taavale. Pe a pe a faaoo atu i ai le polokalame lea ua ou vaai atu i ai ii, o i i Taufusi ma Fugalei e manaia lava, i mea o autu sima foi nei, sei faaleleia ai la lea vaega. Ou te talosaga atu ai ma le faaaloalo lava i lau Afioga i le alii Minisita.

Ona ou soso mai ai lea i le Ofisa o Lafoga, ua ou matua lagolagoina lava le Tala o le Tupe. Atonu o le tausaga lenei i le maitau atu, o se tausaga lenei ua sili atu ai le tupe ua tusa ma le \$222.7 miliona. Ae ou te lagona, e alualu foi e le lava lava. Aua foi e i ai lava faalavelave faafuasei e tutulalai mai i taimi faafuasei i faalavelave faafuasei. Ona taumafai atu lea o Ulu o Matagaluega i le fia faaleleia o ia vaega, a o le faalavelave sei faatali foi sei toe faia se isi vaega. O lea le mamalu e, a faaumiumi a tatou finauga e maimau ai lo tatou taimi, ae fai a tatou galuega aua se manuia o Samoa mo a taeao. Ia o nai motugaafa lena i lenei taimi ina nei tei ua umi le lauga a Samau, e toe fai atu foi nisi manatu i se isi taimi. Ia manuia le Fono.

### Tofa TAMALA UILISONE



#### **Itumalo Faaalalafaga:**

*Palauli Sisifo*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*25 Iuni 1991*

E a uliuli sau se itula molimolioo atu se motugaafa po o se manatu o lenei itumalo o Palauli i Sisifo i le Tala o le Tupe ua faataatia nei i lumamea i le Laulau a Fono a Tumua ma Pule.

Lau Afioga i le Fofoga Fetalai, lau Afioga i le alii Plemia ma lau Kapeneta, le mamalu lasilasi o le Palemene i sui ua filifilia e itumalo taitasi. O le paia ma le mamalu i Ulu o Matagaluega o le Malo, le mamalu o le Afaigaluega o le Maota, aemaise le Paia ma le mamalu o le lautele o le atunuu.

O lau lauga muamua lenei i le Palemene, o le mea lea ou te tulai atu ai i le agaga faaaloalo, faatasi ai ma le faaeteete ina nei sala le gagana e faigata e a isi e faalele, ae a isi e maitau. O el mea lea ou te faapoi ai nei le vaiula e pei o le fetalaiga i le Falepunaoa ma ou faapea atu. Tulouna Samoa o le ia e auugata, ou te toto ai nei le niu i tuaoi ma ati le pa i le va tapuia ma le Afaigaluega Paia o le Sakalameka ma le upu. Ou te tapui atu le tapu o Tupu, aua le faasouga o Ao na Tafaifa i le eetai o Aiga o Tupu, Aiga o Nofo, Aiga o Papa, tulou. Ae ua matemate lima le saga pausisi aua mamalu sauoo i le Falefa o Tumua ma Pule Ono i Salafai. O

Tulati ma Tulatoa ma le Nofloatula i Faleupolu Tofia, Salemuliaga ma Faleata, Safune ma Taulauniu. A matuu le tuu ia te oe Saleutogipoe le na limamatua i ai tofiga a Malietoa.

E le faagaloina ai lou itumalo pele o Palauli i Sisifo, i le affio o aiga ma le Afioga i Tapaau ma Gagaemalae, ma Salemuliaga, Tuato ma Tolovaa, aemaise lau tautalaga Faiumu. Ua susu foi auuuna a le Atua o e o lo o nonoina manu i lagi aua lou itumalo ma Samoa mo nei ma ie lua. O paia na ma mamalu sauoo o lou itumalo. Ae avea ia lenei avanoa e momoli atu ai lau faafetai ma lau faamalo i lou itumalo pele, ona o le filifilia o lou nei tagata faatauavaa e avea ma o outou sui ia Samoa ma lana Faiga-Malo. Ia tapuai maia ma le manuia ae sei taumafai atu la outou auuuna e molimoli oo so tatou sao ia Manuvao, aua ua taatia nei i paga faatia o faiai fagotaga a manusina, o le a sasaa nei i lumamea i le Laulau a Fono a Tumua ma Pule. O le a vevete le afi ia tofi le manu ma si ana ia, aua Samoa ma lana tapuaiga, ia alo ia i ou faiva manaia o le tapuai aua o le tasi lea anava tausi a Samoa mai anamua lava.

Lou itumalo e aua lava nei galo ia te oe tae o i Atua i lou filo toatasi ai nei o Tavita lava au le uii ia Iese. O se ugapepe, o se vavae muiitiiti lava, e manuia faiva e tapuaia. A ou tomanatu i taga a le aiga i le itulagi lea i sisifo ona ou tatalo lea. A to ni manu lou itumalo e, ta te fia lafoina oe i le moemoe o Tumua, e pei ona faia Tumua i Maauga ma Nuuasala. Ou te manatu o le agaga o Sui Usufono uma o lenei Palemene ia manuia Samoa atoa. Ia le faapito manu ia tasi, a ia faasalafa le manuia aua le atunuu atoa.

Lau Afioga i le alii Palemia ma le Malo, e pule pea oe i le togotogo ma le tuputupu, o le mutaaga foi ma le salasalaga, ae le aoaia e le Matapia le Manaia. O le tatalo a le itumalo o Palauli i Sisifo ia laugatasia Samoa atoa i faamanuiaga a lana faiga Malo. O se manatu muamua, e agai atu i le Tala o le Tupe, e manatu le sui o Palauli i Sisifo, e le lava le taimi e galulue ai le faiga-Malo, e mamafatu le avega, ae talitonu a usui le taimi o se faiga-Malo e pei o le pale o atunuu malolosi, e tai fa i le tai lima tausaga.

Ou te fia talanoa atu i le Matagaluega o Faatoaga. Ou te manatu ua le o toe i ai se malosiaga o le popo ma le koko talu mai ona uma le afa o Ofa. Masalo ua na o le talo ma le taamu ma le fai ua faapea ona galueaina e le lautele o le atunuu i le taimi lenei. Ae o se vaaiga faanoanoa e pei ona saunoa i ai le tele o sui mamalu o lenei Maota, i nei manu faalafua o anufe, ua aina uma lau faapena i tiapula sei oo lava ile aano o le talo, tulou. O le mea e popole ai lou nei sui nei uma ona faatamaia a tatou faatoaga ae liliu mai nei manu ia tatou aina tatou. E fautuaina lau Afioga i le alii Minisita e taumafai e faavavevae se togafiti mo lenei faafitauli.

O le Matagaluega o Galuega. E le tagisa lo matou itumalo ae manaomia o matou auala galue o le lumani o le tamaoaiga. Ou te talitonu o Palauli Sisifo la e taatia ai le elele lelei, ae paga lea e le o mafai ona galuegaina le tele o elele ona o le lelele o auala galue.



## Saunoaga Faataupou a Sui Usufono 1961-2011

Ona ou soso ane lea i vaipaipa o le matou nuu lea ii i Taga faapea foi Foalalo. O lo o i ai nai vai e alu i le pamu. Ia o le nuu lea o Taga ua faaletonu lo latou afi suauu e pamu ai i luga le latou vai, pe maua sina fesoasoani i le Malo pe leai.

O auala tetele o le Malo e maitauina i le tele o auala tele aemaise i le taulaga nei i Apia, o lo o i ai nai konekarate laiti o lo o latou faia le galuega lea o le faatutumuina o omoomo pe a timuga. Ia ae maitauina ma le faanoanoa, a faatumu nei ae timuga taeao ona toe foi a lea i le omo tuai, e talosaga ai lau Afioga i le alii Minisita, pe sii pe a faataatia nei kamupani ae sefesepe nai a tatou tupe na sei faata ai pe a faata atoa auala.

O le isi mataupu mo le matou itumalo, ou te manatu ua uma ona logoina atu e le Afioga i le Minisita o Falemeli nai moli foi ia mo le auala. Ia e maitauina le tele o itumalo toetiiti tai tolu i pou moli o fai ai moli, ae o lenei itumalo e le i i ai ni matauila i luga o pou moli i le auala.

E avea foi lenei avanoa e momoli atu ai lau fafetai i lau Afioga i le alii Palemia ma le Malo, aemaise lau Afioga i le alii Minisita o Falemeli, mo le Falemeli fou ua fausia nei mo lo matou itumalo, ui ina e le i faatotogaina uma i ni totoga e ono taua ai o se falemeli, e faatasi ai ma se telefoni. Ia e na ona faamanatu atu ai i lou uso lena o Toi ua uma ona saunoa mai o le a fai telefoni; ia masalo po o lea masina po o le tausaga foi lea o le a sau. Ia ma ni nai pusa meli e le tofu o matou itumalo ma pusa meli i pusa meli la na avatu muamua.

O le Ofisa o Aoga, masalo o le matou itumalo ou te matau atu ua uma ona fausia le tele o faleaoga o nuu, ae sei vagana ai le faleaoga o Gagaemalae ae o lea e maua atu, o lea e i ai le miliona lea e faataatia aua foi faleaoga ua faaletonu i le Ofa. Ia e aveatu ai le talosaga vaivai pe avatu ai se fesoasoani i si nuu lena, e faatasi ai la ma maotu nei ina ia tutusa pea le tatou tufatufaga; matou te mananao i ni matou tusi aoga, o tusi a la na ta aoga mai ai o lea foi ua ta matua o ta vaai i ai o tusi a la, pe maua atu ni nai tusi fou pei o le tele o tusi ia e aoga ai le tele o le motu i Upolu nei. O le isi mea, ua ou matauina i le Tala o le Tupe ma le saunoaga a le alii Minisita o Tupe, o le a faamalasia ia aoga mo le atunuu atoa. Ae paga lea e faafesili atu i le malo po o le a se faiga a le malo agai i le va o faiaoga. O lea foi na tatou faafofoga anapo i le tusi a se tasi o tamaitiiti aoga o le Kolisi o Samoa, nei o lo taua mai i le Tala o le Tupe o le a faamalasia aoga mo le atunuu atoa, ae le o faia e le Malo se faiga mo faiaoga o i latou ia e ala mai ai le aoga mo le fanau.

Ona ou soso mai ai lea i le Ofisa o Palemia. O le Ofisa foi lea o tatou i Tuasivi. Lau Afioga i le alii Palemia, ua maitauina ua le o toe mafai nei ona faia ni tusi folau po o ni pepa malaga i Tuasivi. Ae pe sa manaia a se vaitaimi pe lua tausaga sa faafaigofie e le gata i le femalagaiga, aemaise i le tele o le pasese po o tupe alu a le matou motu o Salafai.

Ona ou oo mai lea i le Faiga Palota. O lenei lava mataupu e ao ona ou faapea atu pe a sui le tatou

Tulafono ae faataga le faatosina, ma le fai soo o nei faamasinoga ma aliali mai ai nisi taga tupe ma na mea le talafeagai.

Ona ou soso mai ai lea i le Ofisa o Felauaiga o le kamupani vaa a le Malo. I le tulaga ua i ai nei e taitasi malaga a vaa. O se tali na ou maua ina ua ou fesili i le Auvaa, ua faia lea fuafuaga e le kamupnai vaa, ina ia aua nei toe togiina ovataimi o le auvaa. Ona ou toe fesili lea pe aisea. Ae fai mai ua gau le kamupani vaa, ou te le talitonu i le upu lea fai mai ua gau le kamupani vaa. O le kamupnai vaa masalo e lua taavale papae la e i ai sipi mananaia toetiiti maua le tai valu sefulu ma ona tupu le tau o le taavale e tasi, o lo o feoi ai le pule ma le pule lua pe a ia faatasi ai ma taavale foi nei e tau o le double-cab foi ia e tai fa faitotoa. Ia pei o se manatu na, faatasi ai ma nisi o konekarate ua faia i totonu o lenei kamupani mo le lauina o le afaigaluega ua aveesea ai taavale a le kamupani sa faaoga, ae ua faaoga ai taavale a tagata o lo o faigaluega ai i totonu o kamupani. O se molimau na ou maua ae le faamaonia e tai \$7,000 e maua e le taavale e tasi i le masina ea po o le lua masina. E pei o mafuaaga na ou te le lagolagoina ai se faaupuga faapea ua gau le kamupani vaa. O le isi itu o le kamupani vaa o le tatou Malo ae ua aafia tele femalagaiga, aemaise i matou nei e malaga i le tatou motu, lau Afioga i le Palemia, ua fai si afaina tele o matou ona ua tele ina le avea a matou taavale ona o le taitasi o malaga a vaa.

Ona ou soso mai lea i le Ofisa o Tiute, masalo e le o po se lilo i le mamalu o le Palemene. O au ou te le o faia ia mea ona faapea o au sa ou faigaluega i le Ofisa o Tiute. Ae na ou alu ese ma le Ofisa o Tiute, e 13 tausaga o ou i ai, ae na o le \$6,000 a le tupe lea ua oo i ai le tele o lou totogi. Ae a fua i le Tala o le Tupe ma le tupe lea ua maua, ua mafai ona aoina e le Ofisa o le Tiute, \$71,740,000.00. O lona uiga a fua i ai i pasene (%) o le afa o tupe maua a le tatou Malo o lo o faapena ona faamaopoopoina ma aoina e le Ofisa o Tiute. O le mea lea lau Afioga i le Minisita o Tupe, o oe foi o le Minisita o Tiute, sei silasila i totogi o le Afaigaluega e fai lava si faaletonu aua e talitonu lou nei taofi, e totogi le tagata i fua o lana galuega, e fua i le tele o le tupe e maua mai ai.

O lona lua, o avanoa mo aoga i fafo. Faafetai mo le Afioga ia Pau. Ioe, ua ou taua lea tulaga ona o le tasi lenei Matagaluega e aupito sili ona taua mo le puipuiga o le saogalemu i mea tau vailaau ona, o i latou o tagata muamua ia e feagai ma tagata femalagaai mai fafo. Ae fautuaina ai le Malo, ou te talitonu o le tele o avanoa e tatau ona malaga ai alii Ofisa o le Tiute, ia ua faapena ona malaga ai nisi o le Ofisa o le Va i Fafo (Foreign Affairs). Sa tutupu mai na mea i le vaitaimi o ou faigaluega sa ou faalogo i ai, o avanoa sa aumai e malaga atu ai alii o le Ofisa o le Tiute, ia ae ua malaga ai alii o le Ofisa o le Foreign Affairs ona o atu lea o le aualii ave alauni ae o tafafao, e le ano i latou i lea tulaga. Ae o se aoga e aupito sili ona taua na aoga mo alii Ofisa o le Tiute.

Ona ou oo mai lea i le Ofisa o le Tupe, ia masalo ua uma ona taua e nisi o Sui, Komesina o Atiina ae mo

itumalo. E faafesili atu ai pe le alagatau ona faataatia ese nei komesina ma le tele o tupe alu. O soo se atunuu e tau Atiina ae e faaitiiti tupe alu, ae faateleina tupe maua, pei o le tasi lea auala e avatu ai se fautuaga. Ou te talitonu e mafai ona tauave e le tofi Pulenuu tiute o le komesina o atiina ae ua faatulai mai nei. Ae le gata i lea o le filifilia o lenei tofi, e fesiligia ai le amiotonu, aua ai sei iloga e fai se palota, aua o le palota itumalo taitasi i se tagata e tatau ona komesina mo nuu ma itumalo.

O lona lua o le pamu penisini mo le matou Motu i Salafai. Ia e maitau atu e na o le alo o le Afioga i le alii Palemia o lo o i ai le pamu ii i Lalomalava, o Salelologa ua leai se pamu. O au ou te malaga mai i o i Salailua ma Taga, ia ona ou toe sue lea ua le lava le penisini o lau taavale, ona toe sue lea o le penisini ou te alu ai i Lalomalava e faatumui ai lau taavale. Ae o lenei e tutu pamu penisini i Salelologa ae le faaogaina. Ou te talosaga atu ai i lau Afioga i le alii Minisita po o le a se fuafuaga ua i ai i ia pamu penisini, ua fai foi si pologa o le matou motu i Salafai.

Faafetai i lau Afioga i le Fofoga o le Fono i le avanoa. Lau Afioga i le Minisita o Tupe, e manatu le sui o lenei itumalo e afuafua i le Tala o le Tupe, e tatau ona faataatia tupe alu a le Malo e ala lea i le faaitiitia taavale e soona faaogaina e Matagaluega aua e vaavaai atu foi i le Tala o le Tupe i Matagaluega eseese, e tele naua tupe o faaaluina i penisini ma suauu taavale a Matagaluega eseese. E fautuaina ai lau Afioga i le Minisita i Tupe ma le Malo e tatau ona faataatia lea vaega ina ia faaitiitia ai nisi o tupe a le Malo.

E le gata i lea e maitauina i lenei lava Tala o le Tupe, ua fuafuaina e le Malo nisi o Tulafono faaopoopo i luga o oloa mai fafo GST, ae talitonu lou nei sui ou te talosaga atu i le Malo, pe a ua lava le Tiute, ae aveese le GST; aua afai e toe tuuina i ai le GST o lona uiga e toe i ai le isi lafoga faaopoopo e atili ai ona faaopoopo le avega i tagata totogi lafoga. Aua o nei lava lafoga o lafoga lava e toe totogi e tagata o le tatou atunuu. O le mafaufau lena e avatu ai se fuafuaga ona o le tatou atunuu o le atunuu tau atia'e, ae e matau atu i le Tala o le Tupe e silia tupe faaalu i lo tupe maua mai. E le aoga foi ona tatou faalagolago i tupe mai fafo e i ai nogatupe i lalo i tuutuuga mama, aua e talitonu lou nei Sui e amata atu nei e o o i le lumanai e atiati lemu atu e tupe totogi nei mo nogatupe le tatou foreign exchange ma faapena ona tatou toe saili tupe ai i le lumanai aua a tatou lava atiina ae.

Ona ou oo atu ai lea i le Ofisa o le Soifua Maloloina. Lau Afioga i le Fofoga Fetalai, o totonu lava o lenei itumalo e lua ni falemai o i ai, o le falemai i Fomalalo ma le falemai i Taga. E pei lava ona talosagaina e le tele o Sui mamalu lenei lava faafitauli i falemai, e faapena foi ona ou talosaga atu e fia maua ni Fomai i lenei lava itumalo, aua e le gata i le itumalo o Palauli i Sisifo, ae o lo o faapena foi ona faaogaina e le itumalo o Salega lenei lava falemai.

Ona ou faaiu ane ai lea i le Ofisa o Leoleo ma Faamasinoga ma Falepuipui. Ua tele saunoaga a Sui

mamalu o le Maota i le faatauaina o le galuega a alii Leoleo. E faapena foi lou nei Sui, ae e matauina ma le faanoanoa le faaletonu o lo o i ai totogi o nai alii Leoleo. O lona lua o se falepuipui mo tupulaga talavou. O le tasi lenei mataupu e sili ona taua ia te au, ona e taua ia te au tupulaga talavou o le atunuu lenei.

Sa ou faalogologo i se tasi faamasinoga sa faia i le Faamasinoga Sili na sei mavae atu nei, sa faia ai lana faaiuga i se tasi o alo o le tatou atunuu sa faasalaina ona o le lima tagovale. Ona faapea lea ona aumaia ai ma fautuaga a le alii Faamasino Sili, e alagata i le Malo ona faia se Fale Puipui mo tupulaga talavou, ona e manumanu i tupulaga o le atunuu aua e le tatau ona tuufaatasia ma nisi o pagota matutua o lo o faasalaina i Tafaigata. Lau Afioga i le Palemia ma le Malo, o nai manatu na o lenei itumalo o Palauli i Sisifo, faatasi ai ma faamanuiga a lenei itumalo i la outou nofoaiga. Ia faamanuia foi le Atua i lau Afioga i le Fofoga Fetalai ina ia faia ma le amiotonu au faaiuga e ala lea i le taumafaiga o a tatou Fonotaga.

Ia soifua lau Afioga i le alii Palemia ma le Kapeneta, aemaise Sui mamalu uma o lenei Palemene ma Ulu o Matagaluega a le Malo ae ola le Sui o Palauli i Sisifo.

### Afioga TOFILAU TAUVAGA



#### **Itumalo Faaalalafaga:**

*Faasaleleaga Nu.1*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*24 Iuni 1991*

Faafetai lava i lau Afioga i le Fofoga Fetalai ma le mamalu o le Maota, e faafetai atu i lenei avanoa ua tuu mai e mafai ai foi ona maua se avanoa e faalogoina ai se leo o lenei itumalo e tusa ai ma le Tala o le Tupe e pei ona tuuina mai.

Ou te matauina foi o lo'o tele ina faapa'i atu le tele o sui usufono o itumalo i o latou itumalo, o lea la e tatau ai foi ona ou faapea atu, ou te faatalofa aloaia atu i lo tatou itumalo Faasaleleaga Nu.1, ma e talu ai ona o le taimi e puupuu ae e le o utuva lava ona tatou feiloai pea. Ae ou te masalo e sili ona ou faaoga lelei lenei taimi ou te momoli ai sou sao i le tulaga o Upufai i le faamoemoe mo lenei Tala Faataupu o le Tupe. O le tulaga la e i ai e faapea le faamoemoe atonu e le uma le tulaga o faamoemoe e fia laulauina i luma o le Faigamalo i le tatou itumalo, ae ou te manatu e faapea a fai se faaaliga ae e le uma, ou te lagona o lea e tele le taimi o lo o totoe i lenei tolu tausaga e faalaulauina ai nei mea i luma o le Malo.

O la'u tautalaga la i lenei taeao, ou te muamua ona ou momoli atu ni mataupu e ao ona ou tuu i ai le faamuamua i mea o lo o sili ona e moomia aua lo tatou nonofo ai i lo tatou itumalo ma lo tatou nuu.

O le a muamua la ona ou tautala i le Afioga i le alii Minisita o Falemai, o la'u tautalaga e faapitoa lea i le Falemai lea i Tuasivi. Masalo o le Falemai lea e le o lilo i le tatou atunuu na fausia e le itumalo o Faasaleleaga pe a ma se 20 ma ona tupu tausaga talu ai, ona tuuina atu lea o lenei Falemai e faameaalofa atu i le Malo. Atonu o le faamoemoe maualuga ina ia fesoasoani i le atunuu i lona tau atiina ae i lona taimi o le faaletonu. Ae e le gata foi i lea o le faamoemoe o tuua ma matua o le itumalo ina ia faaaauu ma tausia lea Falemai i se tulaga e sili ona lelei e le Malo ao faagasolo ona galuega atiina ae. Atonu e le o po se lilo i le tatou atunuu, masalo o le Falemai lenei o Tuasivi, o le Falemai lona lua lenei lona taua i le atunuu. Masalo so o se tagata lava vaeane le faafogafoga mai a le atunuu i le motu ia Salafai, e faaleotnu loa se mea i lona soifua maloloina e muamua ona fuafua i le maota lea i Tuasivi ona faatoa fuafua ai lea i Motootua nei. I se taimi la ao lumanai le faiga palota lea faatoa uma nei, sa ou sii se gasegase o se tina o lou nuu i le Falemai, sa ou matauina o se po e lagilagia. O lau matau i ai i lenei Falemai sa tuuina atu ai e le itumalo i le Malo, i lau matamata i ai ina ua uma le faiga palota ina ua faamanuiaina au sei ou toe siaki pe ua fai se galuega i ai. O lau upu moni sei tulou foi le Maota ua elea ua pala, ua taei tioata, ua toulou i lalo ua pala lava ua le mafai ona lelei pea, ua matua eleelea le fale, e pei o se fale e le foliga o se Falemai, ua apogalevelevea luga, e le valia e leai se mea ua faia i ai, ae o lea e tausii ai mai. Sa ou tu ma ou faapea, se pe e faapefea ona faafoe nei ituaiga galuega ae po o ai foi e faia ia ituaiga galuega. Ou te ofo foi i se le vaai i ai i le tulaga lea o lo o i ai le Falemai.

Ou te tautala foi i tulaga i fale e faaoga e mai o upu tuusao, faleese. O le matua le mafai ona faaoga. O le tele o mai e o atu i ai o tagata ua matutua, aua e seasea ona mamai tagata talavou vagana ai tina ma tagata matutua. Ou te le iloa pe faapefea ona faaoga e i latou ia, ae ua le mafai ona faaogaina. A tuu nei foi la i tua i le tulaga lautele o le Falemai lava ia, e tele le mamalu o le atunuu o lo o autovaa atu i ai, e leai se sauniga a i latou o lo o vaai le Matagaluega i le tulaga lea i fale e sili ona moomia e tagata matutua. Faatamala ona faapea lea po o ai e tuuai i ai lenei leaga. Ia ou te talitonu e le sau le Afioga i le alii Minisita e fai nei mea, e tataua ona ou tuuaia i le Ulu o le Matagaluega ma i latou o lo o vaai ia galuega. Aua a ou vaavaai ifo i le Tala o le Tupe lea e tuu mai nei, e matua maoae tupe o lo o manaomia e le Matagaluega lea o Falemai. E tataua la ona latou silasila totoa i ai. Ailoga lava e a e uma ai se tupe o vaegatupe ia e tuu atu i ai i le Falemai lea? Ave i ai sina mea e teuteu ai ma faamama ma faafoliga mai o se Falemai, matua faatamala. O le mea e sili ona leaga ou te tau atu i lenei Maota, e iila ma lamolemole ma momosi fale e nonofo ai alii Fomai, ae e leai ni Fomai o i ai ma o se mea e matua tataua ma lelei lea tulaga, ae ua matua tataua foi la ona faapea ona teuteu ma faaiila ma Falemai aemaise le tulaga o lo o tausii ai mai.

O se taimi ona ou faafetai atu lea i le alii Minisita ma ou te talosaga atu lava i le alii Minisita sei alofa sei tagai ane lava i ia tulaga aua ua o atu mai, ua le mafai i nei tulaga ona ua alu i le alii Minisita lea e tulai mai ai nei ona ua mafai ona ia talia lau talosaga o le a faaleleia nisi vaega. Ae ui e le o matua atoatoa mea sa ou talsoaga atu ai, ae ou te talitonu o le Afioga i le alii Minisita o le tagata galue sei silasila totoa, faasino i nei tagata e taitaia le Matagaluega, e na ona nofonofo i nei tulaga o tofi maualuluga e leai se vaai, leai se mea o faia i ai i lea vaega. Sa ou fai atu la i le tasi o tagata nei Executive lea e i Tuasivi, po o le a le tulaga e le mafai ai ona ia faia mea ia. Ae fai mai le tali a lea alii, o mea uma lava o le matou Ofisa e faia uma mai lava i Apaia, ua fiu le mea e talosaga atu i ai. A manatu lava e fai ua fai ae a le manatu lava i ai e le faia e le faia. Ou te masalo e fai fai ona sau lea o le Minisita ona tagai lea i ai i fale nei. Ae ou te masalo ua fia tausaga, ae ou te ofo foi i le Faatonu Sili ma tagata o lo o vaai lenei galuega, ae masalo e le i vaai i ai atonu e leai se fiafia e fia vaai i ai.

O lau talosaga la i le Minisita ma lenei Matagaluega, sei outou matua tagai i ai ma fai le galuega, aua le tuua i lenei Minisita aua e le sau le Minisita e fai aua o lo o i ai lava i latou e fitoitonu i ai le faia o lea galuega.

O le i si itu ou te faasilasila atu i lau Afioga i le Minisita, o le Faleoti lea i Tuasivi. O le Faleoti lea vaeatu le paia o le Fono, o lea e i totonu o le Falemai i le fale la e i lalo. E i ai nisi o gasegase la e i ai e pei e toto maualuga, ae o le tele foi o nisi o gasegase e pei e teitei vale ma faafefefe aua e le lelei le nonofo i lalo ae nofo i luga le tagata la ua oti nei tei ua toto maualuga ai se i si ma faafuaseia ai lona soifua. O le mea la ou te talosaga atu ai lau Afioga i le Minisita ma le mamalu o le Matagaluega, ae a pe a sei sii ese le fale lea, fai se i si fale. Atonu e le tele se fale e tataua ona tuuese ai le tulaga lea ma tuu lelei ai o tatou tagata ua maliliu ae faavagavaga le fale lea e tua atu i ai mai ma e e gasegase i le motu i Salafai. O lau talosaga lona e tuu atu i lau Afioga i le alii Minisita.

O lau talosaga mulimuli, talu ai ona o lau Afioga o lo o e tulai mai i le motu i Savaii, ia e le faapea foi o le a faapitoa na o Savaii. Ae ona o lau Afioga o lea e tulai mai i le tofi ia fai sou maa faamanatu i Savaii, fai so tatou Falemai fou, faafou se i si falemai ma toe fau ia lelei. Ia manuia lou seei i le tofi.

O le Ofisa o Femalagaiga. Ua ou taua lea tulaga ona o tagata Savaii o tagata malaga i aso uma aso uma. Ma o se tasi lea o tulaga ua matua faigata i tagata uma. Ua matua faigata lava i le tulaga lea e faafeagai ai i femalagaiga. O se taimi lata mai nei sa matou talosaga atu i lau Afioga i le Minisita, ae a pe a usu mai le vaa i Savaii lea o le Lady Samoa, aua e le tataua ona usu atu iinei i lo matou lea taofi aua e leai ni mea e avatua iinei i Savaii; na o mea e lau mai i Savaii iinei. O le tele la o taimi matou te talitonu a malaga mai le vaa mai Savaii e sau ma le uta tele o mea e aumai i le motu i Apia nei, ae a foi atu ua maua tagata e tataua ona o atu i Savaii ona faaoga tonu lea o le alu a le vaa. O le taimi lenei i le

aso Gafua ou te matua tau atu e na o le tolu loli la le e i le Uafu ma nai taavale laiti, pe na o le toafa nai tagata o la e malaga ai nei. Sa ou moemoe atu nei ma ou vaai i ai i le taeao, e le o se upu lava la e faatalapelo ona fai lenei upu. E le o fetau i le matou vaai i le alu atu o le vaa iinei, e tatau ona sau le vaa i le taeao ona alu atu ai lea iinei ma ia faaaogaina lelei.

O lona lua, o au o se tagata ua 50 nei ou tausaga ma o totonu o lenei 50 tausaga ou te femalagaai lava i le va o Savaii ma Upolu, ma ou te matauina pea le mea lenei. Ou te nofo ma ou vaavaai pea i ai i aso uma ou te alu atu ai e faalalava solo tagata o le matou motu i le Uafu i po uma po uma. O se mea matautia lea i lau vaai ia po o se sala foi a le motu i Salafai i le momoe i luga o le Uafu, o i si pe taunuu i o i le 6.00 i le afiafi ona moe ai lava lea faagaulua leai se mea e maua ai se mea e tatau ai, e moe ai lava i le Uafu i le po atoa e faatalitali le alu a le vaa i le taeao. O lau la talosag ou te faapa atu i le Minisita lea o lo o feagai ai, o le a le mea e ala ai ona le alu se vaa i Salafai i le po? E i ai se mea o faaletonu e ala ai ona le alu? O la e i ai moli o le ava, o le service lea e tatau ona matua faaleleia ma o le tulaga lea e tatau ona auauna atu ai le tatou Malo i ona tagata. Afai e te moe ou te talitonu e te matua lagona ma ou te talitonu foi pe ua e faia faalua, ae ua ou faia soo lea mea sei tulou i o i le Uafu i Mulifanua ma talitali ai, ia a talitali ua le alu le vaa i le 8.00 ae faatoa alu po o le 9.00, ia o le tulaga lena e i ai. O le mea lea ou te matua talosaga atu ai ona o le motu lea, o le tasi lea o mea sa matua fautua mai ai lou itumalo ia te au, Tofilau, a e alu ia tautuana ma oe le mea lea. Lau Afioga ua ou lagona le mea ua o latou fai mai ai, alu le vaa i Savaii i le po taumafai po o le a se auala.

Sa ou maua se avanoa ou te fesili ai i le tagata o lo o taitaia galuega po o le a le tulaga i moli o le ava. Fai mai a ia e taugata tele moli o le ava, ae peitai la o le a i ai se fesoasoani o le a vave ona fai i se taimi nei. O lea la ua ou manatu ai ona o lea o le a fai e tusa o se faaaliga a lea alii Ofisa, e talosaga atu ai i lau Afioga i le Minisita o lo o faafeagai ma lenei Matagaluega, ua tatau ona alu se malaga i Savaii i le po poo le 7.00 po o le 8.00 i le po, ona talafeagai ai lea mo tagata i Savaii.

O le Ofisa o Galuega. O lo o ou matauina le tulaga i le matou itumalo, ou te le feiloai tele ae ou te matauina i le sau lea agai i Salelologa, o se auala matautia lea auala o le aso ua lelei o le aso ua leaga. Ou te matauina le telle o loli nei o lo o i ai nei, aua o lo o tagi mai pea lenei Matagaluega i le tele o tupe na te manaomia, ae ou te vaai atu atonu tasi nei o tupe o lo o faaoga sese pe e le o lelei ona faaoga. Ou te matauina i nisi aso e fa ni loli e tutu faatasi ma uta iliili, ona togitogi uma lea e nei tagata pe toafa pe tolima tagata i luga o le loli, ona togileleia i luga o le auala ona faasolosolo ai lava lea, toetiiti uma le aso o loli nei e fa e le oo i Salelologa. O le tele lava o nisi aso e le oo i Salelologa ae fa loli. Ou te vaai atu la i ai e matua le talafeagai. O lea ou te matauina ai ua tele tagata faigaluega, ua tele meafaigaluega, ua soona hire ae e le o manaomia. Ou te talitonu lau Afioga i le alii

Minisita o le a e silasila totoa i ai, aua o le agaga o lo o i ai le tatou Malo ia faaitiitia le tupe alu i mea faapenei. O le i si lenei itu ou te fia taua i lau Matagaluega, e tele nisi mea ae ona pau nei o mea e lua ou te fia faamanatu atu, o le galuega lea e fai i uta i Lalomalava o lo o eli ai le vai. Ou te masalo o le galuega lenei toetiiti alu le tausaga o fai le galuega lea, e le i ai se mea ua fua mai o le galuega lea po o le a le mea o fai i ai? Ou te masalo e tele le tupe o lo o alu i le galuega lea, ae toetiiti atoa le tausaga ae e leai se mea o faia ai o lo o faapea o le vai e fesoasoani e faaleleia ai le alu o le vai i Tuasivi. Ia tuu atu ia i ou aao e faavasega ane ai lea mataupu.

O le Ofisa o le Palemia, ona sa maua se avanoa ou te fesili ai i le o lo o Ulu i lenei Matagaluega, pe aisea le mea ua ala ai ona lua lomiga o le Nusipepa lea o le Savaii? Aisea ua ala ai ona fai le Nusipepa palagi ma fai le nusipepa lea Samoa. Ona fai mai lea e faatau le Nusipepa lea Faapapalagi ae tufa mai le Nusipepa Samoa. E foliga mai la e taua tele le Nusipepa papalagi lea. Sa ou fesili atu foi la i ai ae faapea mai le tali o le Nusipepa lea o lo o taumafai e faailoa atu ai i atunuu i fafo le tulaga o le atunuu. O le a le mea o le a faailoa ai ae e le faailoa atu foi i o tatou tagata? O lou talitonuga afai tatou te taumafai e faailoa atu mea e tutupu iinei e ao foi ona malamalama uma i ai tagata Samoa, ae e le o le fai faapea o le Nusipepa e pei e na ona oleole mai ai tagata o le tatou atunuu ae ese se i si mea o aveese atu i fafo. Faamalamlama lelei mea uma o lo o alu i fafo i Nusipepa. O lou la talitonuga o le a saga tele nei tupe e alu i le lolomiina o le faa-Samoa ma le faa-Palagi e faailoa mai ai mea ia o lo o manao e faalauiloa atu i tagata. Afai foi aua sa fai mai le alii o lo o i ai Faamasinoga o Fanua ma Suafa o lo o faasalalau ai. Ia fai ese se mea e faasalalau mai ai Faamasinoga latou aua e le faapea o na faamasinoga o le a sau faasauatoa pe a pe o nisi foi taimi ia sau i se lomiga faapitoa a le Savali.

Sa ou maua foi se avanoa ou te fesili ai i le o lo o taitai i le Matagaluega lenei o le Faamaisinoga o Fanua ma Suafa. O lenei le Ofisa ua matua i ai le tatou atunuu i ana faaiuga. E ui lava ona o la e sao le faaiuga, ae a oo loa ina o ta faiaina ia ua ta manatu ua sese ona fai se mea. Ma e ao ona tatou pola puipui i ai i ni mea e tatau ona malu ai ana galuega ia aua nei masalomia pe faia e se i si se mea e le talafeagai. Sa ou fesili i ai i le Ulu o le Matagaluega po o le a le tulaga o lo o iloilo ai le iuga o le faamasinoga pe a uma ona iloilo e le Faamasinoga lenei Mataupu. O le faaaliga a le o lo o taulaumua i le Matagaluega o lo o faapea mai e faamuamua ona iloilo faaiuga a alii Faamasino Sinia, ona faasolosolo atu ai lava lea i alii Faamasino amata faapea ma alii Faamasino faatonu. I lou lava talitonuga, a faapea ona fai, e ono oo ina lima taitaiina ai alii Faamasino amata ma Faatonu i le manatu o alii Faamasino Sinia. E pei e faigata ona toe faaali atu se manatu o le Faamasino amata e ese mai i le mai o le a fia poto sona manatu. Tulou o le upu tuu sao, e faapea se agaga e oo i le alii Faatonu. O le isi itu e ono lei maua se faaiuga a lea alii Faamasino, ae ioe atu i le iuga o le faamasinoga lea ua ave e le Alii Sinia. Ua



faapea ua autasi atu alii o le faamasinoga i lana faaiuga ae leai o lo o i ai faamasino ia e lei malamalama i le iuga o le mataupu. O isi faamasino ia e lei mau tulaga tonu le tulaga o a latou faaiuga. O lou la taofi e faapea, ou te fautuaina ai le faamasinoga ma le o lo o taitaiina lea matagaluega. E tatau ona muamua ona fai faaiuga a alii Faatonu, faasolo atu ai i Faamasino amata ona faatoa oo atu ai lea i alii Faamasino Sinia. A le o lea e tatau ona tusi lelei iuga a alii Faamasino ona tuu lea i le o lo o taitaiina ona faavasega lea e ia le iuga.

Ua ou oo mai i le Ofisa lea o Falemeli, i le Afioga i le alii Minisita o Falemeli. O le tasi le telefoni lea e i Salelologa ao lena telefoni e autovaa matou uma nei mai Fusi Safotulafai po o Sapapalii i Salelologa o lo o autovaa uma i Salelologa. Ae ou te fai atu faapena, e le mau taavale uma matou i Savaii. E i ai taimi e savali mai i lenei umi faaloaloa vale e taumafai e fai le telefoni. O lea ou te fautuaina ai lau Afioga ina ia fai se telefoni i lo matou nuu. Ia fai se telefoni i le ogatotonu o Salelologa, Salelavalu, Iva ma fai se telefoni i Lalomalava ma faapena i lo matou nuu ae o le tuli lava o lenei umi, o lea ou te talosaga atu e alofa lau Afioga sei silasila ane i lea vaega.

O lona lua sa talosaga mai le toatele o le itumalo ia te au, peiseai e faigata ona maua so latou avanoa ia Tofilau matua, a ua o mai ia te au, Tofilau malie lou finagalo, avatu se talosaga e a pe a fai se Falemeli fou i le mea o lo o i ai tagata. O le tatou falemeli lea e i ai i uta i le mea e le o i ai ni tagata. A timu pe la e taumafai lava e o i uta i le Falemeli i uta; ae a pe a aumai le tatou falemeli e latalata mai i le Maketi i Salelologa. O se mea iina ina ia o atu tagata o i ai, e faigofie ai ona o atu tagata fai a latou galuega ma o. O le toatele foi o tagata latou te faaagaina le Falemeli o tagata ua matutua, o lo o fai a latou telefoni i a latou fanau mo se fesoasoani i mea o tutupu i Samoa nei. O le talosaga lea e taatia atu i le Afioga i le Minisita o Falemeli.

O le Ofisa o Aoga. Pau le mea ou te fia faailoa atu i le Minisita o Aoga, i nei ituaiga tamaiti aoga ua toetiiti uma aoga ae tupu ai se faalavelave, le faalavelave foi lea e pei o le fai o se toalua, sei tulou le mamalu o le Maota. O se teine po o se tama ua faapena, e oo loa i lea tulaga ua uma sao lava le aoga i le tulaga lena. O le tele o tupe a matua ua alu i le aoga i le tele o tausaga ae leai se mea o afaina i le mafauafau o le tagata lenei.

Ou te faafetai atu i lau Afioga i le Fofoga Fetalai ma le mamalu o le Maota, atonu ua avea lau lauga ua avea ma mea ua faaluafesasi ai le Maota, ae e leai se lagona faapena ia te au. O lou agaga lea e i ai sei tau faamaea atu nai mea laiti ia e faataatia atu i luma o le faiga Malo mo lou itumalo, ma e le o toe umi foi lau lauga.

O le mataupu lea sa ou laga i le tulaga lea i tama aoga ma teine aoga ua toetoe lava uma le aoga ae toe faaletonu loa, pe ua fai se aiga po o se tulaga faapena, ona uma lelei ai lava lea iina o lona tulaga aoga ua le toe faaagaina ua fai se toalua. O le itu lena o lea ou te fai atu ai sei silasila totoa i ai, e le o afaina lea tagata e le faapea o afaina ai se mea o lona mafauafau, leai. O lona

mafauafau lena e ono aoga ia Samoa i le lumanai, ae ona pau lava se mea e i ai ua o o i le tala o le natura lava o le olaga ae e le faapea o le a aveesea ai lona tulaga tau aoga.

O lona lua o itu ou te fia taua ai le Ofisa lea o Aoga, o se tala sa ou faalogo ai i le Uaealesi lea mai Niu Sila, sa taua ai o Samoa o lo o aupito toatele ai tagata e le iloa ona tusingisi po o le a lava le tulaga faapena. O se tulaga lea e matua maasiasi ai le tatou taofi ona o se tala o la ua mamulu atu i fafo, ua malele le ava a Leausa i fafo o Samoa le atunuu sili lea ona toatele ai tagata e le iloa tusingisi. Ou te le iloa la po o le a le tulaga i nei tupe e tele o lo o tuu atu i le Matagaluega pe afai e faapea se tulaga o lo o i ai nei. E maasiasi ai e o lo o taitaiina lenei galuega ma maasiasi uma ai lava tatou, ona manatu lea sei silasila totoa i ai lau Afioga i le tamaitai Minisita. Ua ou le iloa nei po o le a se togafiti e mafai ona fai i ai ma toe suia ai le faasalalau lea ina ia faapea ai o Samoa o le atunuu e toatele tagata e iloa tusingisi o lo o i ai, ae ona pau le mea lea ua matau mai fafo, o le atunuu lea o lo o toatele ai tagata e le iloa tusingisi.

Lau Afioga i le Fofoga Fetalai ou te faafetai atu i lenei taimi, le paia o le Palemene. Ou te faapea atu ai i lau Afioga i le Palemia ma le faiga Malo ia fai se Falemai mo matou i Tuasivi. E faaiu atu ai au upu ia manuia lava lenei fonotaga, ia manuia lau Afioga o lo o faafoeina lenei Fonotaga ina ia maua ai se 'ai mo Samoa i le lumanai.

### Afioga TOLEAFOA FAAFISI



#### **Itumalo Faaalalafaga:**

*Aana Alofi Nu.1*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*24 Iuni 1991*

Lau afioga i le Fofoga o le Fono, faafetai mo le avanoa. Ia taatia ia i mauga o ao le paia sautua lasi o Samoa, le paia le popo ma tia le vavau ma utuga taufa ma Mulivai fetaitai, lagi loulou Samoa. Susu lau Susuga a le Tapaau Faasisina, lau Susuga a le Malietoa. Ia afio foi lau afioga a le Fono a Sui Tofia, lau Afioga Mataafa. Ia o le paia lava lea i Aiga o Tupu ma Aiga o Nofu ma Aiga o Papa, o Tama foi ma o latou Aiga o Tupu ma Aiga ma o latou Tama faapea foi le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ia e faapa foi o tatou uso i Sasae aua Sua ma le Vaifanua o Fofu ma Aitulagi, Saole ma Saleaumua ma le launiu na saelua; ia o Faleagafulu ma Faatui o le Motu ia o Tama a le Manua ma Tootoo o le Faleula. Liliu mai i Maota nei le afio o lau afioga i le Fofoga o le Fono, afio lau afioga i le alii Palemia le Taitai o le Malo, ia afio foi le mamalu o le Kapeneta ia faapea foi ia Sui mamalu o itumalo taitasi. Ia o le paia maualuga foi lea aua le afio o le Alii

Faamasino Sili, susu foi le Susuga i le Loia Sili ia fapea foi Ulu o Matagaluega taitasi a le Malo ia aemaise o Ulu o Kamupani ma Faalapotopotoga, aemaise le Aufaigaluega Paia a le Atua o lo o latou tauasuina le Vai o le Ola aua se lumanai manuia o Samoa.

Ae ou te le i taumafai e avatu se vaega o le sao o lenei itumalo aua upufai o Malo e muamua lava ona ou pai i si ou itumalo. Ou te momoli atu le faamalo ma le faafetai i lou itumalo o Aana Alofi Nu.1, i le paia o le afio o Aiga e tolu, afio foi le Tamaaitu ma le Maugafa o Alo o Tamalelagi, alaalatai le mamalu ia te oe le Faletolu ma fuaifale. Ia tuutuu atu foi i le la itu atu aua le itu i sisifo o le tatou itumalo, le afio o Satuala aua Aiono ma Leupepe, o Sua foi ma le Taauso, le mamalu i le Falefitu ma le nofo a ituaiga, lau tofa i le tuua ma le matua ia Tauauvea. E faapea foi i le Aufaigaluega paia a le Atua i totonu o lou itumalo, le paia maualuga i tina matutua ma tama matutua ae tainane foi le mamalu i le luasefulu tasi o e sa lagolagoina lou Sui e avea ai au ma Sui a Faipule i totonu o lenei itumalo o Aana Alofi Nu.1. Ia eetai maia ma se manuia i sa outou tapuaiga ae sei taumafai atu se sao ia aua upufai o Malo.

Lau Afioga i le Fofoga o le Fono e tolu ni vaega tetele o lo o agai i ai le vaega tau atiina ae o lo o aumai i totonu o le Tala o le Tupe. O mea tau Auala, o Vai paipa ma Eletise. Ou te talitonu a ou fesilisili i le vaitaimi o Ofa po o a ni meatotino a le Malo sa sili ona faaleagaina, o le tali o lea fesili o mea ia e pei ona ou tau atu, - o auala, o le vai paipa ma le eletise. Pe a ou toe tilotilo mai ai nei la i le Tala o le Tupe ina ua tuuina mai nei le Tala Faatatau Autu o le Tupe ua faamamafaina ai le atiinae o mea nei e tolu. Ona ou manatu lea o se mea ua alagatatau, ua tataua ona faaleleia atoatoa, aua a faaletonu o tatou auala, ia o lea lava e pei ona tele i ai saunoaga ma finagalo faaalua o alii faipule o le Palemene. O lo o tatou taumafai e uunai atili le aufai faatoaga latou te gagaua le vao. Afai e faaletonu o tatou auala ia tasi lea o itu e sili ona augata ai le tagata faifaatoaga. E mafua ona ou taua lea itu ma molimauina ona o au foi o le isi tagata faifaatoaga. Po o le a se tele o sau galuega na fai i le atiinaeina o sau faatoaga, popo, koko, niu, fai, talo, ae a le lelei le auala e le sao atu se taavale i le mea o lo o mafai ona aumai ai fua o le faatoaga, ia o le a matua pagatia le faifaatoaga. Ia ona ou manatu lea e ao ina ave i ai le faamuamua, aua o lea e maua i saunoaga ma le faamoemoe maualuga o le Malo tatou te faalagolago i fua o le laueleele o le lumanai manuia foi lea o Samoa. Ae afai tatou te faatamala i le tapenaga muamua o mea e ao ona tautua ai le Malo i tulaga o fua o le laueleele, ia ou te talitonu e le mafai ona taunuu le tatou faamoemoe.

O le Vai paipa, a le sua le vai paipa ia ua matelaina le mamalu o le atunuu aua e sili atu le fia inu i lo le fiaai vaeatu le mamalu o le Palemene. O le vai paipa e aoga i le tagata soifua, e aoga foi i tagata faifaatoaga aua e i ai le taimi o mugala ae mafai ona togafiti le faiga o le faatoaga. E le gata i meatoto a ua faapea foi i le lafu manu. Ou te talitonu ua tataua ma onomea le faamuamua o lea ua aumai i le Tala o le Tupe i mea ia e pei na ou tau

atu. O le eletise o le tasi foi lea itu taua e ao ina ave i ai le faamuamua aua, ou te faafetaia lava le taumafaiga i le taimi faatoa tuana'i le Ofa aua e le o po se lilo, e pei Upolu ma Savaii o ni motu tuufua i le taimi ina ua uma atu Ofa e leai se moli na mumu ai. Ae peitai e ofo foi le taofi i le vave ona faafoe lea tulaga. E ui lava la ina e le i atoatoa ona lelei ae ou te manatu e ao ona faaleleia atili aua afai e alu ma motusia le tatou eletise ia o le a le mafai ona galueaina ia fale gaosimea, o le a avea foi ma faafitauli i Ofisa o Matagaluega taitasi e le gata i aoaoga ae faapea foi Matagaluega a le Malo ma Kamupani. Ia e le gata foi lena a o le Aufaipisinisi taitasi male mamalu o le atunuu i a latou fuafuaga fai, a oo ina motusia soo le eletise ia o le a tele foi le afaina o le a mafai ona fetaii ma i tatou. Ona ou manatu lea ua alagatatau ona ave le faamuamua a le Malo i le mea tau eletise.

Ou te fia talanoa i mea tau Eleele. O le elelee lea e i gauta o le afioaga lenei o Fasitoo ma le nuu lenei o Faleasiu, o la e faafofoga mai lou itumalo, atonu foi o lea e faafofoga mai le alii Minisita o lo o avea ma Taitaifono i le Komiti o Mea Tau Eleele, ia po o le vaega foi lea e tau o le Land Corporation. Ua matua faamalieina lava lou taofi ina ua ta feiloai ina ua e saunoa mai e avatu le faamuamua i afioaga o o latou ogatotonu ia e taoto ai elelee nei. O le mea e talosaga atu ai i lau afioga, ia le gata i le avatu o le faamuamua, ae ia i ai sina tau mama pe afai o mea tau seleni o lo o tau saili e le Malo e tau foia ai nisi o faafitauli. Aua nei pei o le elelee lea sa maua ona lisi atu ii i Tafaigata ia ua oo lava i le tai \$100.00 po o le \$200.00 i le eka e tasi e lisi atu ai. Ae ou te talosaga atu ma le agaga faaaloalo e matua to le pulou i lau afioga pe a faamatuu atu i le \$25.00 i le eka. Ia po o le avatu foi po o le a se isi faiga e fai ai, auā o lau afioga o lo o i ai le tomai faapitua i mea tau tupe, ia o le a faatuatua atu i lau afioga e to le pulou i lau Afioga pe a faapea e faatino lea faamoemoe.

E talu ai ona ua ou see ese ma le eletise ae o lea ua ou toe manatu le isi mataupu lenei. O pamu vai lea e ola ai nei o matou vai paipa i Faleasiu ma Fasitoo ou te talitonu e anoanoai ni seleni a le Malo o lo o alu ai i mea o diesel lena e alu ai le pamu. Ia a o le pamu o mea o afi diesel na e faaoga ai. O le pamu lea i Faleasiu e toe lava ina faaola o la ua i ai le eletise, e pasia ai le eletise i luga o le pamu. Ae ou te lagona o lo o fai ma i ai ni faaletonu i le pamu lena o lo o fai ma leaga ni parts o le pamu, ou te iloa afai e faaoga le eletise e faaola ai o le a manuia lava Faleasiu latou ia. E faapena foi i le nuu lenei o Fasitoo, masalo pe toe tolu ni nai pou moli ona oo tonu lava lea i le pamu lea ia ona faaola foi lea. Ou te talitonu e aoga le fautuaga ma le fai atu e faasaoina ai foi le tele o nisi seleni a le Malo e alu i le utu, utu, o le pamu. Ua faamalieina lou taofi i le saunoaga a le alii Palemia, o le mea lena o le a avatu i ai le faamuamua, o le a faa-eletise pamu na Toleafoa. Ou te matua momoli le faafetai i lau afioga i le alii Palemia, ae na ona toe faamanatu atu i lau afioga i le alii Palemia ma le mamalu o le Kapeneta, ia e aoga foi lo matou fautuatu atu i lo

outou maualuga e faasao ai foi nisi seleni a le Malo ia ona o i tatou e utiuti ia le tulaga tau tupe.

Lau afioga ou te fia talanoa ma fia taua le faleaoga lea o lou itumalo na saunoa foi i ai se tasi o sui mamalu o le itumalo lenei, talu ai ona o lea ua le o toe i ai se Samaria Agalelei ae sa faapea e ave i ai se fesoasoani a le Samaria Agalelei. Ui o lea e talitonu le faamoemoe afai e tasi se talosaga lua ia te au talosaga, pe saunoa foi nisi e aafia faleaoga lea o le itumalo o Aana ia mausali ma malosia e fagufagu pea i lau afioga i le alii Palemia e ala atu i lau Afioga i le Fofoga Fetalai ma le Kapeneta ma le Minisita o Aoga, sina fesoasoani mo le faleaoga o le itumalo lenei aua e le gata e le o maua lelei po o fea e fai ai, ae o lona faatupeina aua o lo o matau pea i saunoaga i totonu o le Maota lenei ma tala mai fafo e faapea o Samoa e tele ai le au le iloa tusitusi. Ou te talitonu a lelei ona tapena le itu tau aoga, o le a le pine ona tulai mai e foia lena faafitauli.

O le Falemai, sa taua foi e nisi o sui le Falemai o matou i Leulumoega, ia e sao. O nei i le afiafi na ou alu ai i le tuua atu o le tatou Fono nei ina ua ta le 2.00, sa ou alu i le falemai ma ou fesili po o i ai se fomai. O le tali e leai se fomai, ai pe na o le Aso Gafua ea po o le Aso Lulu e alu atu ai le fomai. E faafetai foi aua ai po o silafia e le Ofisa o le Soifua Maloloina ona pau lea o le aso e mamai ai le itumalo. Ae faapefea la le Aso Lua seia oo i le Aso Sa? Ona ou talosaga atu ai lea ina ia i ai se fomai ona talu ai, o le a se faalavelave e tupu i le Malae Vaalele o le fesoataiga lava le falemai lea i Leulumoega. O le a foi se faalavelave e ono tupu mai i le va o Upollu ma Savaii i le femalagaiga o vaa, o le sulufaiga lava o le falemai lea i Leulumoega. Ona ou manatu lea, le Malo lau Afioga i le alii Palemia ma le Kapeneta, se alolofa ia avatu i ai la outou faamuamua i le falemai lenei, vaai se fomai agavaa e avatu i ai, ae ona e agavaa uma lava fomai, ae o se fomai foi lea e vae mama vaeatu foi le paia maualuga o alii Fomai, se fomai e mafai ona vaai tiute na e le gata i le itumalo ao le tausiga o le Malae Vaalele i mea e tutupu ma aliai mai, ae faapea foi i le va o Upolu ma Savaii i femalagaiga o vaa. O le talosaga lea ma le agaga faaaloalo.

O Telefoni. Ua pagatia lava le itumalo i telefoni ae e ui i lea pagatia, ua vaai se agaga fiafia le galuega o la ua faataatia nei ma fuafuaga fai a le Malo, o la ua uma ona fausia nei le pa, o lea na ou alu nei ma tilotilo ua uma ona galueaina e le afaigaluega ma fausia le tulaga o telefoni faaonapo nei e vili sao mai lava i le mea e manao i ai. Aua o le mea lea e tupu i a matou telefoni e le ma e tau atu, a malie lava le talitelefoni e tali atu lata telefoni e mafai lava ona ta talanoa mai i ai; ae a telefoni mai lava o la e tofafa i fafo le talitelefoni ma le afaigaluega ona faapena lava lea ona leai. Ia ona vave foi lea ona malaga mai i Apia e faataunuu le telefoni ae ua leai ai se aoga na fai ai lata telefoni aua o la lava e totogi le rent o le telefoni. E ui la i ia faafitauli, ae ua taoto le ata o Tauleleia ua taoto foi le ata o Maluafiti i fuafuaga fai a le Malo aua le latou polokalame faataatia, ua ou iloa o le a vave ona tutusa Apia nei ma Fasitoo-uta

ma Faleasiu ma i si alaafaga na. Ae e le gata i lea e le faapito i le itumalo ae e aafia ai ma le Tuamasaga aua o lea e aafia ai uma i le polokalame lea.

O le Matagaluega o Leoleo ma Falepuipui. O le tasi lenei o Matagaluega e sili ona momomo i ai le faamoemoe. O le uiga o lea faaupuga, o lo o galulue e leai ni o latou ovataimi. E i ai le manatu aua o lo o taua e tele ina aafia le soifua o alii Leoleo ona o le faatinoina lava o le Tulafono aua o Savali o le Filemu latou te faataunuuina le Tulafono ma latou taasisia le filemu. E anoanoai faafitauli o lo o faafeagai ma le Ofisa o Leoleo, e le gata i o latou totogi ae faapea foi o latou soifua i faalavelave e tutupu ma aliali mai i le galuega.

Ou te talosaga atu i lau afioga ma le mamalu i le Malo, pe e le mafai ona totogi e le Malo pe faainisiua ola ma soifua o nai alii Leoleo i le faataunuuina o o latou tiute aua o le mea moni a aafia le soifuaga o Leoleo e tele faafitauli o le a ono aliali mai, e aafia ai le toalua vaeatu le paia o le Fono, aafia ai ma le fanau aua o fanau lava e faalagolago i le tausiga ma le tautua a le Leoleo i le aganuu ma le faaSamoa o le a tele le aafiaga, ae o se tulaga faapena e maua atu ai se fesoasoani e tusa ma le latou tautua i le atunuu. E na ona avatu o se taofi e taatia i lumamea i le Laulau a Fono, ae e tuu atu pea i fuafuaga fai a le Malo.

Ou te fia talanoa i le Ofisa o Leoleo i le Malae Vaalele. O le tasi lenei Ofisa e tele ina sulufai i ai le itumalo o Aana. Ae o le faalavelave e tupu, a e alu atu i ai e tau atu i ai se faalavelave ua tupu po o se misa, ia o lona uiga e te alu e tau saili se taavale e aumai ai le Ofisa o Leoleo, a le o lona ua nonofo e faatali se pasi e omai ai. E taunuu mai i le mea o lo o fai ai le misa ua feoti tagata vaeatu le paia maualuga. Ae o lau vaai i le Ofisa lea e fai si tele o le vaega o tagata o lo o latou puipuia. I le feagai ai foi ma le puipuia o le Malae Vaalele ma le saogalemua, e tatau ona i ai se taavale, ina nei sese lau matau ae ua fai si tele o tausaga o ou matauina le Ofisa o Leoleo i Faleolo. O lea ou te talosaga atu ai ma le faaaloalo pe e le mafai ona maua se taavale e lagolagosua i le latou galuega. O le mataupu lea e uiga i le Ofisa o Leoleo ma Falepuipui.

O le aso Toonai sa ou i Savaii. E i ai foi nai faaaloaloga a si aiga na i ai e pei o lou malaga atu pe lima ea nai lalaga na ou sau ma au, ae ua ou tei i le fai mai o le tama la e i le Uafu ou te alu e totogi le \$5 o toga ia e lima e afisi mai. Ona tei lava lea ua ou fesilisili, oi e totogi foi ia mea? Ona fai mai lea ioe e totogi. Ou fai atu, a faapefea le pusa masi lele e 5 pauna o lona uiga e totogi foi? Ae fai mai ioe e \$2 foi. O au ua fia si ou tei, ona ou fai atu lea, tago laia i le pusa masi lea e ave ma oe, o le mea foi lena o le mea na maua fua mai aua ai foi o le a toe totogi atu i le i si \$2.

Lau Afioga i le Palemia ma le mamalu o le Maota, o se mea sao e tatau ona taumafai e faasikuea le tulaga lea, ae e i ai lava itu e faasikuea ai. Ae e le faapea o le a fai faapea, ia e matua mafatia le mea o lo o tulai mai. Afai lava o si loomatua po o si toaina e na o le 5 pauna pusa masi o sona faasoa i Savaii, o lona uiga ua tutusa lava le

tau o le 5 pauna pusa masi lea ma le \$2 lea o le a totogi. Ona ou manatu ai lea sei alofa lau Afioga o lo o feagai ma lea Matagaluega sei e silasila totoa i ai. E i ai le mea na musumusu mai le isi alii ia te au ma fai mai; vaai se taavale o taavale ia e tuu i ai au toga na e 5 ma lau pusa masi. Ou te talitonu e mafai ona fai e le i si tagata o la e masani i le ave loli po o le ave pikiapu, vaeatu le mamalu o le Fono, ae o si toeaia ma si loomatua lea e malaga mai i Upolu ma toe malaga atu i Savaii, ia o lena. Ua outou silafia foi lenei vaiatau i le atunuu ma le mea o lo o i ai lo outou soifuaga ma lo tatou ola, ia o le upu masani. E ioe le ave-taavale pe a vaai mai o le teineitiiti lea e fai atu po o le tamaitiiti foi lea e mafai ona fetau i la lima, ae o le toeaia po o le loomatua, ia e leai, ou te alu i Apia. Ae vaai atu o le loli lava lena na muamua mai i totonu o le vaa. Ou te talosaga atu e au i le tauola e au i le fagota.

O le va o Upolu ma Tutuila, ua faapena foi ona matauina le faafitauli o lo o tulai mai ai. E ioe lou taofi i le tulaga o le tau faasikueaina o tupe alu i vaa, ae a ou fuafua i ai i le mea lea ua i ai, ia e muliga foi le fuaina o uta a le vaalele i le fuaina o uta e alu ai i Tutuila i le mea lea, e sili atu le tele o le tupe e alu i le totogiina o taga talo i le vaa i lo le tele o le tupe e faatau ai le taga talo, ae ou te fuafuaina ua tatou toe nonofo lava tatou ma toe tuu mai le avega i o tatou tauau, pe la ea o sau se papalagi mai Amerika ave se taga talo i Tutuila. E leai, o tatou lava lea e aafia ai. E tusi mai le aiga mai Tutuila, se alofa o ouotu na e lelei maumaga aumai ni taga talo se lima o le faaipoipoga a le teine lea. Ona pau la na o ni faaoso tatou te o ma i tatou, ona tatou toe o mai lea iinei ia ua sili ai ona faapea, e leai, taatia leaga e taugata.

Ou te talosaga atru ma le agaga faaloalo sei silasila totoa lau Afioga i le alii Minisita i ia vaega e pei ona avatu ai le fautuaga.

Ona o lea lava o lo o i ai i luga i mea tau felauaiga, ua ou manatua o au ou te i ai i totonu o le Sosaiete lea e taua o le Soasiete a le Aufai pasi ma le Aufai taavale, o lo o aumai pea le latou fautuaga ia te au, se Toleafoa sei faaoo atu pea so tatou leo i le Malo. E ui lava ina ou iloa e le o se mea a le itumalo na palotaina au, ae ona o lo o aafia ai foi le matou itumalo i nisi o le Aufai taavale. Ua mafua ona ou taua lea vaega le Malo i lau afioga i le alii Palemia e ala atu i le Nofoa, ona pau lenei o le atunuu e leai ni a latou taavale e feaveai ai tamaiti aoga, ai lava na o tatou lava. Ae o le tautua lea e tautua ai le mamalu o le atunuu e ala i pasi ma taxi, o se tautua ogaoga, o se tautua aoga. Ou te talitonu lava au e matua aoga. Aua a outou silasila i le itu i Sisifo ma Sasae ma le mamalu lautele, a le femalagaai pasi i se taeao ua le aoga tamaiti, ua le faigaluega le i si, o lona uiga ua taofia le vaegatupe a le aiga i lea aso ma lea aso talu ai ona ua le sau le tama o le aiga po o le tina ole aiga e faigaluega ona ua leai se pasi. Ona ou manatu lea, o le a le mea e le silasila totoa ai le Malo i le atunuu?

O le i si itu e sili ona faigata, e pei ona fai atu o le atunuu lenei e faamuamua i finagalo le alofa. O la ua tumu nei le pasi ae vaai atu i le tina matua ma le tama

matua o lo o fia malaga i tua ae toe pau lea o le pasi. O le mea ua tulai mai e lua mea, po o le falepuipui po o le tusi o le ova po o le ave o le tama ma le tina lea. O lona uiga afai e te le avea le tama ma le tina lea, ia ua leai se aoga o lau galuega fai lea. Ona pule lava lea o oe i lou loto ma faapea, ia ave pea ia atonu o la e i gauta Leoleo atonu o le Leoleo foi ia e fai ona matua. O le mea ua tupu e le tuuaina le Ofisa o Leoleo aua o la e faataunuu i lana amiotonu lona tiute. A o le mea ua fai ua avea le faataunuuina o le tiute e tusa ma lana tautua e leai se uso, leai se tuafafine, leai se alofa ua fai ai foi lana galuega e aunoa ma le loto alofa, e le pei o le alofa lea e alofa ai le avetaavale i lona tama ma lona tina. O le mea la ua tulai mai ma le mamalu o le Maota afai e fa Leoleo i le auala e faafa foi ona molia le ave-pasi. O lona uiga pau lenei o le atunuu ua faafa ona fasioti i le agasala a le tagata. E popoe le taofi ae pau o lea taatia i tafatafa o le Laulau a Fono sei tou alolofa i le mamalu o le Atunuu i ia foi ona vaega. E tagi tui ae leai se leo e leiloa pe faapefea ona faaoo mai i outou luma s o latou leo, ae atonu o lenei foi avanoa lelei e avatu ai i lo outou maualuga le leo o lo o tagi mai ala o le atunuu, aua o tupu ma ee o le atunuu o lo o faipisinisi i mea tau pasi. E oo foi i taxi ua maua tulaga o fonotaga ua maua foi tala ua uma ona pasia taxi ma van ia o lea foi ua faataatia e fesili atu ae toe moomia se toe teuteuga o le Tulafono. Ae a silasila i ai lau afioga ma le mamalu o le Malo pe a tatou faagasolo i atunuu i fafo e itiiti lava mea o tumutumu ai tagata i lea itu ma lea itu o soo se tafa o le soifuaga lenei e i ai lava ma taxi iina. E aoga i soo se tafa o le soifuaga lenei e i ai lava ma taxi iina. E aoga i soo se se mea e malaga ai le atunuu aemaise lava tatou, taatia ia atunuu i fafo aua o lo o latou faia ae lelei auala ao tatou, tatou te le o faia ae o auala ua sili ona faigata. E le mafai e le taxi lea e i ai e maualalo ona alu e momoli si loomatua ma si toeaia e fia o i tua e asi si a la tama pe ave se faafailelegatama.

Ia faafetai lava o lo o faafofoga mai lou itumalo e anoanoai mea ia ua ou avatu ae fua lava i le taimi. A faapea lava e le uma i lenei taimi e anoanoai taimi mo le lumanai ae talosia ia, ia atoa le lima tausaga o lenei nofoaiga, ia ona uma lelei a lea o mea a le tatou itumalo ona ave aua le faafofogaaga a le Palemia ma le Kapeneta. O le a ou taumafa i le mea e gata mai ai le malosia ia o le a faapea ona faapau ai ona ua faamuta le taimi.

Ou te manatu e tatau ona silasila totota le Malo i femalagaiga ina ia fai se Tulafono e teuteu ai taxi van ae faatino loa lea vaega. E le gata i lea o taxi van ma double-cab, pick-up ou te faalogo ua pasia ae toe o lona teuteuga lena, ae mafua ona ou taua lea vaega ina ia faaleleia atili femalagaiga. E pei foi o le alu i Savaii na o vaa sa femalagaai ai tagata ae o lea foi ua i ai vaa e feaveai ai taavale e faapena foi le itu lea ua tatau ona faaleleia. E tatau ona fai taxi van e feoai ai tagata aua o tatou e malaga lava le tagata ma si ana afifi vae atu le maualuga o le Fono. O le maketi fou leai se taxi stand o i ai ae o le mea o lo o molimauna ae a outou silasila



totoa i ai i atunuu i fafo pau lea o le maketi i se atunuu e leai se taxi stand. Ae silasila foi e le faapea e sau le tagata e faatau le ato talo e tasi ona sau lea e sue le pikiapu e alu ai; a le o le pasi o le taxi ae o le mea lea ua i ai ua fai ma stand o pikiapu e sue ai a latou tupe. E moi o lo o ia le Tulafono e faapitoa mo taavale a le Aufaifaatoaga ae seasea tupu se mea faapena. Ou te talosaga atu ia alolofa mo le faaleleia atili o lea tautua i le atunuu alolofa fai se taxi stand i le Maketi Fou ina ia tautua atili ai i le mamalu o le atunuu.

O le popo ma le koko e pei ona silafia e tatau ona faaleleia le tau o le popo ma le koko ae o lenei vaitaimi talu ona matagia tatou ia Ofa o lea ua mafua ai ona leai se koko e vaivai foi le popo ae o le mea lava e ao ona faalelei, aua e tumau i le fia sefulu tausaga o fai e le pei o le talo ma le fai. Ia e tatau ona sii totogi o faipule o le mea moni lava, e tau atu ma le amiotonu e uma le tatou taimi e le sikuea tatou mea i le faiga lea e fai ai, e oo mai lava i le taimi nei, leaga le mea e faigata. O le mea sili ua ou tofo foi au ia i ai, e tatau ona sii totogi o Faipule, aua tulaga i fuafuaga fai a le itumalo. Aua o mea uma lava o ai e gasegase o ai e fia alu i Niu Sila, o ai e fia alu i fea, o mea uma a ua tietie i luga o le faipule, ae le lava tupe e fai ai, e le o ni tupe la mo faipule a o tupe mo le itumalo.

Ona o lea ua faamuta lou taimi, lou itumalo e anoanoai mea ia e le i avatua, ae ou te talitonu o le a malie afenoa la outou tofa ma finagalo, ia e umi taualumaga a le fonotaga e toe maua se isi avanoa i le lumanai. Faamalo faafetai i le tou tapuaiga a Aana Alofi Numera 1, ia Faleasiu ma Fasitoo, malo le tapuai. Ia faafetai i lau afioga i le Fofoga Fono, faafetai i le alii Palemia ma lana Kapeneta, manuia Sui mamalu, manuia le Failautusi ae matou malolo.

### Afioga TOOMALATAI LAUVAI II



#### **Itumalo Faaalaalafaga:**

*Aleipata Itupa i Luga*

#### **Filifilia:**

*18 Ianuari 1995*

#### **Faatauto:**

*30 Me 1995*

#### **Lauga Faataupou:**

*16 Iuni 1995*

Ou te muai pai atu muamua i le paia o le Laulau i lau Afioga i le Fofoga Fetalai. Faafetai ma faamalo i le faapalepale i le Fonotaga a le Palemene, ua tatou aulia ai lona tolu lenei o aso o le Fonotaga i le lagi e mama i lau Afioga i le Fofoga Fetalai faapea foi le Afioga i le Palemia, afioga i alii Minisita faapea foi le Palemene o Samoa i Sisifo. Ua ou fialia lava ina ua tuuina mai le avanoa e tusa ai o le filifiliga a lenei Itumalo ua avea ai lou nei sui ma o latou sui e faaauuina tiute ma faiva o le Afioga i le Tuiatua Faanofonofu, le Tofa ia Fuataga Ioane Alama. O le manuia foi o loo liligi ifo pea i taimi uma e auala mai i le

alofa tunoa o le Atua. E faapena ona i ai se lagona faafetai o lou nei sui a faipule i le taulaga osi o lenei taeao fou e pei ona molimoli atu e le Fofoga o le Fono.

Ou te muai saua le va e pei o le faiva o aigofie aua e faigata ou paia oooo ma ou mamalu Samoa, tulou, tulou, tulouna ia le ee taputapu i Lana Afioga Mamalu O Le Ao o le Malo Tutoatasi o Samoa i Sisifo, lau Afioga i le Tapaau Faasisina, lau Susuga i le Malietoa Tanumafili II e faalogo i ai Samoa. Ou te faatulou atu foi i le paia o lou Sa nofoatolu i le afifio o Afioga i Sui Tofia, le afio o le Tama a Aiga lau Afioga i le Tuiatua Mataafa Faafuamaleaui Puela Patu II ma lau masiofo, le afio o le Tama a Aiga lau Afioga i le Tuiaana Tuimalealiifano Vaaletonu sualauvi II ma le masiofo, le afio o lau Afioga i le Aloalii lau Afioga Vaai Kolone ma lau masiofo.

E faatulou atu foi i le afio o lau afioga i le Faamasinoga o Fanua ma Suafa o Samoa. E ao foi ona faatulou atu i le nofo tatalo tapuai a Taitai o Ekalesia Kerisiano i le afaigaluega talai o le Talalelei o loo faafaletulua i afioga ma alaafaga i Samoa atoa.

Lau Afioga i le Fofoga Fetalai, lau Afioga Afamasaga Fatu Vaili, le afio o lau Afioga i le Palemia, lau Afioga Tofilau Eti Alesana, le afifio o Afioga i Minisita o le Kapeneta.

Afio le Taitai o le Itu Agai lau Afioga tuiatua Tupua Tamasese Efi, lau Afioga i le Sui Fofoga Fetalai, Afioga Toleafoa Faafisi, le afifio o afioga i alii faipule o le Palemene o Samoa i sisifo. O le paia lava lea i Aiga ma a latou Tama, o Tama foi ma o latou Aiga, Tumua ma Pule, Ituau ma Alataua, Aiga i le Tai ma le Vaa o Fonoti, ae tainane le tapuaiga i le afio o le Maoputasi faapea foi le afio o le Faatuiolemotu, le Laau-na-amotasi ma le mamalu ia Sua ma le Vaifanua, Fofu ma Aitulagi, Saole ma le Launiunasa lua, Tama a le Manuatele ma Tootoo o le Faleula ma Saleaamua.

O le a le sopoloa ia te au le faamalo i Faauluuluga uma o Matagaluega a le Malo ma Kamupani o loo galulue i Samoa, tagata faigaluega i le Malo, Kamupani ma Ekalesia, faifaatoaga, faifaiva ma soo se faipisinisi, aua o lo outou afu sisina i le lagolago ma le faatinoina o soo se alamanuia o fia atiina ae mo le lelei o tagata Samoa ma lona Tutoatasi nei ma a taeao. Ia taoto ia ou paia i falamatu ma mapu ane i Niafane ma le taula i malolo e pei o le Fetalai i le Manualesagalala. Ou te ofo alofa atu ma le agaga maualalo lava ua faamalo toa, ua malo tau, ua malo foi le tauasa.

Lau Afioga i le Palemia ma le Faigamalo o loo tu nei i Matagiolo, le mamalu maualuga i le Itu Agai ma afioga i sui a faipule o loo tutoatasi. O se aotelega o le lagona o lou nei sui a faipule o atiina ae sa fuafuaina ma faataotooto i lea vaitau ma lea vaitaimi ina ua faagasolo mai lo tatou Malo Tutoatasi i le tausaga e 1995. O le a se silasila a a outou afioga i le fita ma le afutoto o auga-totoa o le Palemene ua lagomau mai tia-sa, o loo patipati aao mai pea o latou agaga. Aisea? aua o lea lava e folau i manu le Sa o le Atunuu. E ui lava e tuu i lalo le la i nisi aso sei mataitu le tau pe lagilagia pe lagi lelei. E mai fea le folau i lagima? Ia le paia e o le Palemene, e maua mai

i la outou tofa liuliu ma lau faautautaga loloto. Na maua mai i lau tofa le moe ma lau utga ua uma ona faapaiaina. Na maua mai tulivae o le aufai tatalo. E ao lava ona ou toe faapea atu, le Palemene e, ua faamalo le toa, malo le tau, malo lava le tauasa. O a uma lava fuafuaga tuutuu mamao i ana faiga faavae sa faataotooto ma outou soalaupuleina i le agaga e manuia ai tagata lautele o Samoa. O galuega fai tino vaaia na, ua molimauina se agaga lelei na fausia ai. E faapena foi se naunautaiga i finagalo o Taitai o le atunuu ina ia Tutoatasi Samoa i ona Upufai. Afai foi tatou te fesili pe mai fea le alofa ma le lagolago mai o Malo alolofa o le Lalolagi i fafo, ou te ioe ina ua latou matua talitonuina le galulue punouai o le Malo ma ona tagata lava ia i le taumafaiga o lo tatou Malo. O lena ua mafai ai ona tuutuu mai o latou tauau malolosi e lagolago atu ia outou taumafaiga aemaise atiina ae mo le manatu lautele o tagatanuu uma. Ua aveia ia Malo o ni uo mamae a Samoa.

O nisi nei o atiina ae ua iloga mai ai se faaleleia atili o ala tetele ma taligalu. E lei oo lau lauga i le mataupu, ae pei ou te faamalulu atu i le paia o le Nofoa ma le Palemene, e talitonu lou faamoemoe o le Malo o Samoa e Faavae i le Atua.

O ala galue, o eletise, falegaosi oloa, Ofisa o le Malo, vai taumafa, vai taele, vaitafe, sami, falemai, aai, nofoaga o maimoaga, aoga, malae taalo mo taaloga, telefoni, televise, uaealesi, faatoaga, maketi, faigafaiva, femalagaiga, pasi, vaalele, taavale laiti, faalapopotoga, masini ma faletalimalo atoa ma nisi atiina ae ua le maua e lou sui a faipule. Ou te matua talitonu o loo faaleleia atili auauai e fuafua i lo tatou malosia ua gafatia ai e lou Malo Tutoatasi.

E ao foi ona ou oo atu i lou Itumalo i le tapuaiga ona o lenei avanoa taua. Ou te faatulouna i le tapuaiga mamalu a lou Itumalo o Aleipata Itupa i Luga. Tulouna Malaefono, le Laoa i Matautunaaai e Afio ai le Tuiatua Faanofonofu, le Tofa i le Matua o Fuataga, le paia o le Laoa i Matautunaaai, ua motusia le ulatifa, ua le nofoia le nofoa o Tavita, ua fai i lagi le folauga, ua tuua le Malo e le Afioga i le faipule e le Tofa fuataga Ioane Alama i le aso 16 Novema 1994. Ua maliliu toa ua maumau ai auupega o le taua. O le afio o le Falefia o Alii, Afio le Maopu o le Tuiatua, tulouna le Faletolu ma suafa, alaalatai le Toafa o Tootoo ma le Igoa Matua faapea upu ia Saleaamua. Tulouna foi le paia o le Maota i Lalotoa ma Ulutaotogia e afio ai le Tama a le Malo. Susu ai le Sagapolutele ma le Matua ia Falanaipupu, le Taofia a Taiiai ma le mamalu ia Saoluafata. Tulouna le afio o Alaalamalae, tulouna le Afio o le Sao Fetalai, Afio le Puepuemai o le alo o le Tuiatua, Afio le Falelima o aliio Tuoalemoso, alaalatai le Matua o Tuoalemoso ma Saleleaalii. OU te faatulouna i faletua ma tausii o saoa ma tamaitai, alo o aumaga ma taulelea ma tupulaga o tama ma teine o lo ta Itumalo.

Ou te faatulou atu foi i lea itu o le Itumalo o Aleipata Itupa i Lalo i le afio o le Tuiatua Faanofonofu, le tapuaiga ia Tafua ma le masiofo. O le paia i le Alaalamalae, le Alii o le Itu ma le Tane o le Itu ae

tainane upu ia Saleaamua, Pulenatatai i Lalovi ma Malaefono. O le Afio lava lea o le Tuiatua le Afioga ia Mataafa i le Maota i Leaanapapa ma upu ia Amaile, ae tainane foi le afioga i le alii faipule le Tofa Letiu Tamatoa o loo ma vaavaalua aua Upufai o le Malo. O le a faataalolo ia paia mamamalu i Maota ma Malaefono ae ou te manatua tama na autovaa mai i lenei Maota, le Afioga i le Tama a le Malo o Sagapolutele Pose. O ia o se faipule o le 1961 e oo i le 1963, le Tofa ia Tiatia, le Tofa ia Taua Latu Lome ae faapea foi le Tofa i le Matua ia Fuataga Ioane Alama i le 1991 e oo i le 1994. Ou te talitonu o lenei taeao fou ma tulaga ua i ai le sailiga tofa i le Maota, ou te faapea atu ai lau Afioga i le fofoga Fetalai, le mamalu i le Palemia ma le Kapeneta. E pei ona ou tuuina atu se lisi ona o mafuaaga ina ia maua se fesoasoani mo lou Itumalo. Ua lelei auala, lelei vai, lelei falemai, lelei aoga, lelei le eletise, lelei taumafa, faigafaiva ma faatoaga, lelei pisinisi, lelei le televise, lelei le telefoni. O nisi Itumalo ua atoa lelei nei manaoga, o lenei lava Itumalo o Aleipata Itupa i Luga, e ui ina ua puupuu lou taimi ou te nofoia ai le Nofoa o le Itumalo ae oute tatalo atu ma le loto maualalo i lau Afioga i le Palemia ma le Kapeneta. O lea ua i ai le faamoemoe mo auala e pei ona i ai le tofa liuliu. Faafetai tele ua aafia se isi vaega o Aleipata Itupa i Lalo i le faataina a ua matou sauni nei e talia le faataina o le alatele o Aleipata Itupa i Luga e tau i Lepa ma Lotofaga. E momoli atu ai le faafetai tele mo ia vaega uma.

E i ai nai itu e pei ona ou tau atu, na taua foi e nisi sui le vai taumafa. Ua maua le suavai ae e lei matua manuia lelei. Lau Afioga i le Minisita o loo fitoitonu ma lea matafaioi, o le talosaga atu a le sui e pei ona silafia mai le 1984 e oo mai i lenei tausaga, o loo faatalitali pea le suavai i nisi taimi. E le atoa le 24 itula e ola ai le paipa. O nisi o loo galulue i tane i le afioga i Satitoa ma le afioga i lalomanu. Lau Afioga i le Minisita, sa feagai lou nuu ma le Sinoti a le Metotisi i le aso 6 ma le 7 o lenei masina. Ua ou tei i le fai mai o le Failautusi o le Matagaluega, Faipule ua le sua le vai. Sa ou oso loa e malaga i le taavale i Satitoa, ou te oo atu ua usu le alii e vaaia le vai e vaai ana manu papalagi sei tulou. Na ou toe foi i Lalomanau o le faaaliga a le o loo tiute ai na faaola le vai i le 5.00 i le taeao ae toe ta le 7.30 i le taeao e lei maua lava se suavai. Lau Afioga i le Fofoga Fetalai, na ona faamanatu atu ma talosaga atu, se i toe silasila i le aufaigaluega o loo galulue ai.

O auala o lea ua taua mai afa tetele lau Afioga i le Minisita, e tolu moli sa i totonu o lenei nuu o Vailoa. E lua Ulutogia, e oo mai i lenei taimi ua leai se moli i Ulutogia i lumafale o le fale o le faifeau EFKS ma le afioga i le tama a le Malo ia Sagapolutele ona sa faaleagaina e le afa. O Vailoa o loo tasi le moli o loo ola nei, nao le moli i lumafale o le fale o le faifeau Metotisi ae ua leai lo matou pitonuu. E i ai le faamoemoe e pei ona talosaga atu, o loo fai mamago le va o le isi moli ona ua tele i le isi pito ae pogisa atoa le isi vaega, sei silasila ane i ai i lea itu.

## Saunoaga Faataupou a Sui Usufono 1961-2011

O le auala o loo alu i lo matou faleaoga o loo i ai matai o loo nonofo ai ma e molimauina e le afioga i le Minisita, ua leai se moli i le faleaoga. E faaeteete foi i le po mo tamaiti aoga atoa ai ma nei aiga. E talosagaina ni nai pou se tolu ona o loo i ai matai e toafa o lenei nuu o loo nofoia le ala galue i tafatafa o le faleaoga e fia maua ai ni pou se tolu e fesooteai ai lea vaega i nai tagata soifua o lenei Itumalo.

O le Minisita o Aoga, faamolemole e i ai nai fetuugaiga, e talitonu foi o loo i ai fuafuaga faataotooto a le Minisita o Aoga i api e tufa atu mo aoga. ua tele se vaegatupe e alu i aoga ona ua taugata taavale e hire e faiaoga e avatu ai tusi aoga a tamaiti mai le Ofisa. E talosagaina ae a pe a toe silasila ane pe le tatau ona fai se taavale mo le Ofisa o Aoga, se loli ina ia kiliva atu ai meaaoga. Ua tele ina aumai e matua, e le gata i pili o loo totogi ae toe fai foi saogatupe i lea vaega e totogi ai pikiapu e avatu ai api aoga a nuu taitasi. O lea e talosaga atu ai pe i ai se tofa ae toe fuafua ina ia maua se faamamaavega. O pepa o suega, ou te manatua o lenei Itumalo o aleipata e aofia ai itupa e lua, na ou sau e aumai pepa a le Form II e oo i le Form V, le Tausaga 8 e oo i le Tausaga 11 ae lolomi atu i le Ofisa e \$444 sa ou totogi ma aveva pea ona ou te fiafia ia alu aoga le tupe o pli o tamaiti ina ia potole atalii ma atamai le afafine, sei toe silasila ane le Minisita ma le Matagaluega i nei tulaga ina ia maua se fesoasoani ina ia faafiagofie ai aoga a fanau mo le lumanai.

E momoli lau faafetai i le afioga i le Minisita o Faatoaga. Ou te talitonu ua atiina ae Itumalo aemaise o Itumalo sa vaivai i meatoto ae ua taua lava galuega ua faia e le Matagaluega ona o fautuaga a lau Afioga i le Minisita ua manuia ai. Ua tele le fai, ua tele le taamu, o mea uma ua i ai ua faaoga e tagata uma ma ua galulue.

O lea foi e faafogafoga mai lou Itumalo o lea ua i ai le tau o auala e tai \$4,000. Ua faafetai tele mo le faamoemoe o le Malo e faafiafia ai nuu taitasi ma galulue malosi lau Afioga Polataivao, ua faafetai tele mo le tau atiina ae faapea foi le Komiti o Pulenuu, e taua lava ia i matou. O le tasi lenei nuu sa interview, fai mai e fiu e sue le auala galue o le nuu lenei o Vailoa i Aleipata. Ae faafetai i le Taitaifono ma le Komiti ua foi mai ma le tala ua sili atu le auala galue o Vailoa i Aleipata i lo auala uma. Ua faafetai tele ua maua se fesoasoani ae ua sili ona taua le malolosi o tagata soifua e galulue ma atiina ae, o lea auala e tusa ma le lima maila ae ua lua maila ua uma ona faamama, o loo auauai pea ona o lea ua fiafia o le a maua se tupe e fesoasoani ai mo galuega.

O le Televisi ma Telefoni, ua faafetai tele i lau Afioga i le Minisita. Ia alofagia, o lea lava e faalogologo mai Aleipata, atonu o lea o le a oo atu le auala ta mai Lalomanu e oo i Tiavea, o le a faaleleia ai fuafuaga uma mo nei Itumalo. E talitonu lava pe tuai, ae ia taunuu i se manuia. O le lagona lea faale-sui usufono, ou te talitonu ai i galuega i lenei tausaga, ua faamalo faafetai. ua lelei taligalu ma mea uma i le tulaga i apia atonu o le a faaleleia atoa le atunuu ina ia tumau ai le talitonuga o le

atunuu i le Faigamalo o loo i ai nei o le a maua ai se manuia o tagata lautele.

o le tasi itu o le Minisita o Faamasinoga, ua silafia e le Maota le fale mo Faamasinoga. Na ou galue mai le Ofisa o Faamasinoga e mata mai i le 1968 e oo mai i le 1993 e lei faia le fale Faamasino. Atonu ua uma ona faataotooto fuafuaga mo le faatinoina, ae toe faamanatu atu e le sui ia alofagia e fai lo tatou fale Faamasino. Ua maea le Fale Faamasino i le motu tele i Salafai, faafetai. A faapena foi Upolu, o le mea taua lena. O nisi talitonuga o le sui i le Ofisa o Faamasinoga o Fanua ma Suafa, o loo fai sina telegese o le faafeiloai a le Ofisa o le Resitala mo nai tagata e omai mo a latou mataupu. E pei o le afa o le iva e foi le Safata ma le Aleipata ua o pasi ae lei faia lana mataupu. Ae a pe a tuutuu mai i luma i le afa o le valu ae sei maua le avanoa mo nai tama ma tina e sulufai mai mo a altou mataupu i lo tatou Ofisa o Fanua ma Suafa.

Faafetai mo minute ua tuuina mai mo le sui usufono fou. O le auala i lo matou falemai, e te silafia lau Afioga i le Minisita o le Soifua Maloloina, ia alofagia le auala ua matua leaga tele, o le tasi lea itu ua mafatia tele ai gasegase e oo atu i le falemai ua vaivai lava le soifua o le mai tigaina.

O lona lua, ou te talosagaina lau Afioga i le Minisita, e leai se doctor o i ai ua na o nai teine tausimai pasi, a tupu le faalavelave e mamao tele Motootua. O lea e talosaga atu ai ina ia alofagia le falemai o Aleipata ina ia faaleleia ma lona auala, ua leva ona talosaga mai e faata i le taimi ao soifua le afioga i le alii faipule. Sa avatu foi le tali ia matou o le a faata ae ou te iloa ua tuufaatasi, sei fai ia i le taimi e tasi o le a sili foi ona lelei lea mo matou.

O le telefoni, ua galo lau Afioga i le Minisita. O le faipule lenei e nofo i Aleipata, e leai sona fale i apia nei, ou te nofo pea i lou aiga ma ou tausavali mai. Ou te talosagaina, o loo i ai le telefoni i Lalomanu i le fale Komiti, e le aoga mo matou, e oo atu i o matou nuu ae sau le tali, e gogolo le telefoni e le lagona se mea ona tau saili lea i uaealesi a Leoleo e faafesooteai ai le tatou taulaga ma Ofisa e tatau ona maua atu ai se fesoasoani. E talosaga atu, ia faia ni telefoni, ia aua nei faia na o le faipule leaga e faapea ai lou Itumalo o le a tuli lava le ai o le faipule ae talosaga atu i lau Afioga i le Minisita, pe maua ni nai telefoni se tolu e tuu mo faifeau, le Susuga i le toaina o le EFKS i Lalomanu, Ulutogia ma Vailoa ona o atu lea i ai o nuu e fesooteai e maua mai ai ma o ia telefoni e faafaigofie aua e totogi e aulotu ae faigofie e maua mai ai le fesoasoani ae sili ona maua le fesoasoani mo tagata lautele o le Itumalo.

E taliotnu le sui ua faamalieina i se lauga ona o ni mafuaaga ua talosagaina ai ina ia faatino ni fesoasonai lelei mo lenei Itumalo i le tau atiina ae ma sauni e faaleleia mea uma e usitai i afioga i alii Minisita e tusa ai o le faamoemoe.

Lau Afioga i le Minisita, e pei ona ou taua ma ou faalogo ua i ai le malae taalo faava o Malo na taua i saunoaga a nisi o sui usufono ananafi. O lou sui usufono ia faamau ane, o Aleipata le isi malae faava o Malo, e

taua tele. Sa i ai le malae taalo na faia i le polokalame a le Malo sa faia e tasi i Savaii, tasi i Upolu, o Aleipata i Saleaamua i Vaisulu. E oo mai i le aso, e le i maea ona fai le malae lea ma o le ala foi lea ou te molimauina ai, o le alu atu i aleipata ma le Itumalo o Lepa ma Lotofaga, e tasi lava le eleele taua o lea e i Aleipata ona o le tele, e leai se soata, e leai nisi mea e tele, o le mea o loo i ai le faleaoga o le Itumalo, ou te talitonu lava pe a tusa ai ma le finagalo o le Malo, faataatia atu le talosaga a le faipule. E tatau ma onomea i Vaisulu i Aleipata e sili atu e le uma, leai se niu leai se laau, na o le palapala lava o loo i ai ma le fia faaleleia faamalosi. E pei o le agaga lea i lou sui ou te faaali atu ai ona ou te lei amataina le tofi o le tofa i le Matua e pei ona ou taumafai mai e faaaauu e tusa ai ma le finagalo o le Atua, o le tia e le seu. E faamoemoe e lafo atu i luma o le Malo ni fanoga o Itumalo, afai o i ai nisi itu ua galo ia te au, o le a i ai pea se avanoa e aumai e pei ona ou taua i lau lauga faalauaitele. O le Tala o le Tupe, ou te matua taliaina, faafetai i le Taitaifono ma le Komiti o Tupe ua i ai i luga o le Laulau a Fono. Ua tele fuafuaga mo le faaleleia o lo tatou Malo ma ou te lagolagoina ai le Tala o le Tupe e tusa ai o lona faataoto mai mo lenei tausaga e 1995 e oo i le 1996.

Ia manuteleina le Fonotaga a le Palemene. Soifua.

### Afioga TOOMATA LEOTA ROPATI



#### **Itumalo Faaalaalafaga:**

*Salega*

#### **Filifilia:**

*3 Mati 1992*

#### **Faatauto:**

*13 Mati 1992*

#### **Lauga Faataupou:**

*16 Iuni 1992*

Ua faafetai atu i lau Afioga i le Fofoga Fetalai mo lenei avanoa taua ua tuuina mai e faaoo atu ai se manatu poo se sao o lenei Itumalo o Salega.

Ou te auai faatasi ma lau Afioga i le talosaga sa muai siitia i le taeao ua sola ona o ni manu o le atunuu e ala atu lea i le sailiga tofa mai totonu o lenei Maota. Ou te le mafai lava ona aapa i le lau ae galo ia te a'u lo'u piitaga i le au. I le paia o lenei Maota seia oo atu i paia o le atunuu i le afio o lau Afioga Mamalu O Le Ao o le Malo o Samoa i Sisifo, lau Afioga i le Tapaau Faasisina, Susuga Malietoa Tanumafili II, le paia o le afio o lau Afioga i le Sui o le Fono a Sui Tofia, Afioga Mataafa Faasuamaleaui Puela Patu, le paia i Tama a Aiga, Aiga ma a latou Tama, le paia i lau Afioga i le Sui Palemia ma le Kapeneta, le Fofoga Fetalai ma le mamalu o lenei Palemene.

O le paia i lau Afioga i le Taitai o le Itu Agai, le mamalu o Samoa ia Tumua ma Pule, Itua'u ma Alataua, Aiga i le Tai ma le Vaa o Fonoti, ae tainane foi le paia o le la itu o le atunuu, Sua ma Vaifanua, Fofu ma Aitulagi, Tootoo o le Manuatele Saole ma Saleaamua ma le

mamalu o le Launiu na saelua, paia o Taitia o Ekalesia e fia ia Samoa e lua, Samoa i Sasae ma Samoa i Sisifo.

A foi mai i lenei Maota i lau Susuga i le Failautusi, Ulu o Matagaluega o loo tatou auai faatasi.

Lau Afioga i le Fofoga Fetalai, o paia ia o le atunuu, o paia faale-Atua ma paia faale-aganuu, ae ao foi oan ou paia lou Itumalo o loo taputapu mai. Ou te faatalofa atu isi ou Itumalo pele, ou te faamalo foi ona o le avanoa ua tuuina mai ua ou tulia atu ai i totonu o lenei Maota, ae tapuai maia o le a se upu o le a ou mafai e talitonu a le taofi o lou Itumalo e te le fia faafogafoga lauga, fai mai le upu a le isi tamaloa, e auma le lauga ae le lelei le lafo, ao le mea sili a pe pala le ta lauga vaeane le Maota ae a fai o ta vai ma o ta ala-galue o le lauga sili lena.

Lau Afioga i le Fofoga Fetalai, o lenei taeao o se taeao e taua ia te au nei ma lenei Itumalo. O se taeao e maua luga, afai e tuu fesili ma taumate ane poo le a le uiga o lea upu, a lenei ua ou tulai atu, o le Nofoa e le i maua gofie. Ua alu tausaga ua alu foi aso, ao lenei ua maua. Ona ou faapea ai lea, e ao ona molimoli so matou agaga faafetai e fai ai au ma sui o le Itumalo o Salega e tusa ma lenei faaeaea maua luga ua mafai ona avea ai au ma latou sui ou te tauaveina lenei faaaloalo maua luga e pei ona matou i ai. O le mea lea le paia o lena itu o le malu, lau Afioga i le Taitai ma le Sui Taitai, paia lasilasi o lena itu o Upufai faa-Malo ua taua o le SNDP, eetai ia ma alaalatai, mai e sau se itula ona ou liliu atu lea, molimoli atu so matou agaga faafetai aua foi la outou pitolaau sa tauave i le taumafaiga o lenei sui ua matou maua nei, ae sei ou liliu muamua i le Malo.

Lau Afioga i le Sui Taitai ua le o faatasi le Afioga i le Palemia, le paia o le Kapeneta, le mamalu i Afioga i sui usufono o le Palemene, ua taua o le itu Faaupufai o Faigamalo o le HRPP. O lenei faaaloalo maua luga o se matupalapala ua toina mai ma ua faatietie ai le Itumalo lenei i le maa salafa. E i ai la lenei aso e avea ai lou leo e fai ma sui e molimoli atu le matou faafetai, leai ua loa aso o taumafai i lenei sui faaopoopo mo lenei Itumalo o Salega; o lenei ua taulau, taunuu ai le faamoemoe o le upu a le Tusi; "O le faamoemoe ua taunuu o le laau o le soifua". Ona matou faapea atu lea, ua uma a matou taumafaiga i mea na mafai ona matou tali atu ai i la outou faaaloalo maua luga. Ua matou o i uta o i tai i tulaga o le tino, o a palapala malo tulou na matou taumafai atu ai o le agaga moni lena. Sa taumafai e faatino lo matou agaga fiafia. O lenei aso ua taumafai foi sa matou faafetai i upu e pei ona ou taumafai atu nei. Afai e alu alu e le lava i la outou faafogafoga ia o le Atua e ona le manuia, lilima faaua to mai lau Afioga i le Sui Palemia ma le mamalu o Itu Faaupufai o le HRPP, ia manuia lo outou alofaiva.

Lau Afioga i le Taitai ole Itu Agai ma le Sui Taitai, o lo outou paia o lena itu, e leai o lenei Itumalo matou tele o faitau i se isi itu, pau lava le agaga maua luga o la outou pitolaau tauave o le tulaga na musuia ai le tofa e le Atua, na musuia foi lenei itu e le Atua, o le a la le tulaga na i ai? O le finagalo o le Atua, ia tali mai ia maua le sui faaopoopo o lenei Itumalo. Ao nisi tulaga e leai, matou



te faamalo faafetai o le mea sili ona taua o lenei ua tali mai. Ua mafai ona matou maua tulaga sa matou punonou ma tatalo ai ia faamalo faafetai.

Ona ou faagasolo mai ai lea i le aiga Minisita, lau Afioga a le Minisita o Siosiomaga, talu ai ona o le aso ananafi sa mamalu ma sa faapena ai ona faaalua sona faasea ona o nei sui mai Salafai, nofonofo i Upolu nei ae lauga i Salafai. E faia lenei saunoaga ua leva ona uma lau sauniuniga ma lau tapenapenaga mo le siosiomaga i Upolu nei. E faaleai sau lauga i Salafai mo le siosiomaga, aua e le tau lauga ia Salafai ua latou iloa lava o le itu foi e faapea i auali ua maualuluga i Salafai ae itiiti i Upolu nei, leai o mea lava na faia e lenei Maota, e le o ni mea na fai e Salafai lava latou. O mea lava na faia iinei ma faapena oan feliiuiai le tofa loloto, e le papau le tofa tulou na fuafua ai nei mea taua. Ae faapena foi le tulaga o mea ana se mea e alu alu ae tulai ai lenei Maota i Salafai, ia faapena foi ona afifio atu Upolu nei maualuluga o latou alauni ae laiti foi Salafai.

O se fesoasoani faufautua i le Minisita o Siosiomaga, i le tatou soifuaga ma le tulaga o loo i ai lo tatou atunuu, o tatou aiga tulou, e tofu ma le lumafale. O ia foi la lumafale e faapelepele e teuteu i ai o tatou aiga ma nuu. E i ai mea taua e tatau ona tuuian atu i lumafale, o laau toto e faamatagofie ai mea uma, e faapena la ona faatumutumu lena. Ona tatou oo mai lea i le tatou atunuu, e ui lava ia Salafai, Manono ma Apolima, e leai ua avea lava Upolu nei poo Apia nei e tapuvae tasi i ai le atunuu, ua avea lena ma o tatou lumafale i le atunuu i Apia nei. lau Afioga i le Fofoga Fetalai, e faufautua atu i lau Afioga i le Minisita ma le Matagaluega ia sagai ane e fai le tatou lumafale lena o Apia, aua e faapena ona tatou taumafai o le a le taulagi ma lo tatou naunau e faatosina mai tagata mai fafo, afai e tau mai iina e faapena ona le matagofie o le a faapena foi ona le tau le faamoemoe sili o loo naunau i ai tatou nei ma le tatou atunuu.

O le agai mai i le uafu i Matautu seia paia mai Mulinuu nei, o iina tonu la e tuu muamua i ai lau silasila lau Afioga i le Minisita ma le mamalu o le Matagaluega, sei silasila ane i mea e tatau ona foia vae, faavave ona faamatagofie. Faafetai o lea ua amata ona tuu i lalo isi laau ua amata ona mamago tulou. O lona uiga o lea faaupuga ua i ai fale ua mamago ua tatau ona tuu i lalo ae toto ni laau fou, fau ni fale fou i iamea e faamatagofie ai le tualuga. Afai foi o le a tau ia faamoemoe matagofie i uta ma tai, ao lea foi tatou te tatalia lupe o mau.

Lau Afioga i le Minisita o Galuega, o loo talitali nei poo le a le tulaga o lau faigamalaga lea na malaga ai i Hawaii, e saina le faamoemoe o le a faatina o auala uma i Apia. E pau lava o lea e ui ina e le o maua setonu, ao loo taoto nei le saunoaga a le Afioga i le Minisita o le a faafioai le mamalu o le atunuu i se auala ta matagofie ma malosi i le Kirisimasi. Ia talitali ai iina faamalo i le afioga i le Minisita, o atoatoaga la na o le matagofie o le siosiomaga ma le lumafale o le tatou atunuu i Apia nei.

Ona ou oo atu lea i le Minisita o Faamasinoga. Lau Afioga i le Minisita o Faamasinoga, e leai se mea o tupu,

na o ni faufautuaga e auala faafesili fofii. E i ai nai faafitauli o loo tauave nei ae ua maea ona matautia nisi o mea ua tutupu i nisi o si ou nuu. O le tulaga na oo i ai lenei mataupu ua loka se matai taua o loo nuu, o se matai foi o se tulafale taua, e lei oo a ia i nei mea o ni oka o ni faamasinoga, poo ni tulaga faapena. Ao le fesili muamua i lau Afioga i le Fofoga Fetalai, faasao mai au pea ou soli se Tualfono Tumau ona e fou le sui, e lei lava foi le saililiga i Tulafono Tumau. O le a ou faaogaina le Faamasino Sili pe talafeagai lena. E le o le tino o le Faamasino Sili ao le tofi faa-Faamasino Sili lea ou te fia taua. O le tulaga i le Faamasino Sili, o le fesili i lea tofiga poo ai o latou faufautuaina? Ona taatia ai lea faapea o le fesili. O le mea e sili ai o lea e faafofoga mai le Afioga i le Loia ia Misa. O le a oo atu lau tala o le tagata lea o le Falelatai.

O le mataupu ua molia mai e le Faletupe i le Faamasino Sili, o le autu o le moliaga e faapea, o le a sosola i fafo le ulugalii ao loo i ai le loan. Na tutu atu alii Leoleo i le afiafi atonu o loo auai mai le Komesina o Leoleo sei e faafogafoga mai o lau Matagaluega lea e tupu ai le mataupu lenei. Ua o atu Leoleo masalo poo se Satini ma isi Leoleo malolosi e toalua e faagaga mo le pueina o le pagota, e alu atu ai ma le tagata o le Faletupe. Ua oo atu i lou fale ma matou talanoa, o le latou mau lea ua oo atu poo fea o i ai le ulugalii lea o le a sosola i fafo, aua o la latou te silafia o i e faamautu mai ai lou nuu ma lou Itumalo i le mea o loo ou nofo ai. Ona ou fai atu lea poo le a le mafuaaga o le mea ua tupu ae tali mai ua aumai lo la tusi saisai mai le Faamasino Sili. ona ou fai atu lea poo le a le mafuaaga ae tali mai o le a sosola i fafo ao loo i ai le la aitalafu. Ona ou fai atu lea poo i ai se faamaoniga o ia mea, o le tali mai, leai pau lava le mea o le faataunuu o le latou tiute na faatonu mai ai latou e le Tusi Saisai lenei. Ona fesilisili mai lea poo fea o i ai le ulugalii? Ua ou tali lava i ai i le tali sao, o loo malaga asiati atu i Falelatai i le afioga o Misa, o loo i ai lo latou aiga a foi mai ona toe foi lea i Savaii i le matou nuu. Ona o loa lea o Leoleo ma i latou uma, e lei umi ae ou vaai atu ua foi mai ma le pagota leni, ua ou taua o le pagota ona o ia tulaga. Ona alu alu lea o le matou talanoaga, leai ua faaauau pea le latou mau e faataunuu pea la latou tiute ua faatonuina ai latou. Ua loka le tamaloa tulou ona faagasolo ai lea o nei tulaga ona ou saililili maeaea lea i ai o le tali o lenei mataupu e le faamaonia, ua latou saili uma alii Leoleo ia passport, o mea uma faapena. E leai se visa ua faia, leai se tulaga e faamaonia ai o le a malaga i fafo i lea tulaga. O loo faapena la ona aoto ai le mataupu, ae ua alu loa le matai lea e saili sona laveai i le faaeleleaina o lona igoa. O itu e fia faataunaina lau Afioga i le Fofoga Fetalai, ua fesilisili i Matagaluega ua atu i le isi Matagaluega i le matafaioi a le isi Matagaluega, silasila i le matafaioi a Leoleo, o lea ua laa atu loka le tagata ao la e nonofo mai le Immigration, sei oo atu pepa i ai pe ua i ai se kilia, a taunuu iina e leai se kilia o i faatoa tapa ai Leoleo. Ao le mea lea ua tupu nei ua laa leoleo ae le i taitai le mataupu. O le mea lea ua ou fesili ai i le Afioga i le Minisita o

Faamasinoga sei silasila totoa ane i lenei mea, soia le soona faia le atunuu. O le mea foi lea i le Faamasino Sili, e le omai i latou e soona fai i le tulaga le mautinoa, e tatau ona aumai le lipoti vaai poo se molimau a le Faletupe lea e mafua ai le mataupu ona silasila lea i ai pe i ai ni faamaoniaga o le a sosola. Ia avatu la le vaivai o le Faamasino Sili tulou i Leoleo, vaivai ai foi ma latou.

O lea e faafogafoga mai le Minisita o Leoleo ma Falepuipui, lau Afioga i le Sui Palemia, ua tatau ona silasilatoota i Leoleo pe i ai se faamaoniaga a le Faletupe poo mau a le Faamasino Sili. O mau ia e talau atu e leagae faigata, o mea foi nei o luma o nuu, o luma o matai, o luma o aiga, ia o lea la ua faalumaina lenei matai. O le isi foi ua o atu a Leoleo o lea ua taua moliaga o le a sosola i fafo ae o atu lava o le pikiapu tulou o loo omai ai, ae ana faapea o se vaalele poo se vaa a lalo o loo tulioso i ai ona molia lea iina, ao le pikiapu e le mafai ona sosola ai nisi i fafo. O le mea lea e faaali atu ai i le Afioga i le Minisita o vaaia Leoleo ma Falepuipui, atonu foi o faafogafoga mai le Komesina o Leoleo, o tulaga na e faapena ona faatulai mai i totonu o le atunuu, soona fesiliai. Afai foi o lea ua tatau foi ona fesiligia lenei Ofisa o le Immigration, atonu ua le faamaoni foi i latou ua le faatuatuaaina e Leoleo, ua mafua ai ona laa Leoleo e fai le latou galuega aua e siligia loa ma latou e o atu loa i le faitotoa e le taofia e le Immigration.

O le tasi itu lau Afioga i le Minisita o Faamasinoga, faafetai mo itu uma e pei ona faataatia mai nei i au polokalame taua, i le tulaga i le puipuia o le toe tolo i tua o faamasinoga i fanua ma suafa. E taua tele lea tulaga, ae ona pau lava le itu e talosagaina atu ai i lau Afioga pe ono mafai se isi avanoa, fai Au ma faataitaiga pe a faapea e fai sa matou itu, ua uma ona tapena uma itu uma ia ua maea foi ona faaulu la matou talosaga ma loma le faamasinoga, ae emo ane ua fai le suiga poo Au lava ua ou le manatu matou te galulue faatasi ma e foi matou te faatasi ua fia fai la sau talosaga fou ae talu ai ona ua tuai ua tapunia le faaulu o talosaga fou. O i la e talosaga atu ai poo le a se finagalo a lau Afioga pe toe mafai ona toe silasila i ai lau Afioga i lea Matagaluega i nai mea itiiti faapea, o mea ua fetau ma ua tatau pe a tusa ai ma lo outou finagalo ae vagana ai nisi tulaga e afaatasi e aua le toe faagaioia.

Ona ou oo mai lea i le Minisita o Aoga, faamalo lava i lau Afioga i le Minisita, ua anoanoai lava agaga faamalo atu a le Maota ma le agaga faafetai i galuega taua ua faafeagai ai. Ae talu ai ona o loo i ai le Male lea sa taua e le uso ia Leilua i le matou Itumalo. E leai sou malamalama tele i lea malae, poo se malae faava-o-Malo, poo se malae lava o Sagone, e pei o itu ia ole a le vave atu ai. E naunau i ai i tulaga faapena, ae i ai foi si ou faaeteetega e tatau foi ona fesiligia lo matou Itumalo aemaise lava lo matou nuu i nei lava mea o taaloga. Faafetai lava i le Manu Samoa ua lagaia uma finagalo o le atunuu ona o le taua o le tulaga o i ai le Manu Samoa ma le faaeaina o le tatou atunuu aemaise o le itu tau i taaloga. Atonu o faapnea foi lo matou nuu i nei aso ona o le Manu Samoa, ao aso la sa ou faalogologo i toeaiina

o le latou talitonuga e le fiafia i nei mea o lakapi ona o tulaga nei aua o le latou upu tulou, ia e o o e lakapi omai ai le lakapi. Atonu o le maualuga o le faaeaina e le Manu Samoa atonu au sui ai. O le mea lea o le a le vave atu sau tali i lau Afioga i le Minisita e tusa ai ma le malae taalo lea sei ou fesili i le maotu nuu poo ua fia lakapi i nei onapo faapea foi lo matou Itumalo. Ia sei ou malamalama lelei poo se malae taalo lea e i Sagone o se malae faitele a le Itumalo poo se malae faava-o-Malo, ina nei ou naunau atu e talosaga lau Afioga ae fai le Malae uma ane ua faapea mai Sagone e leai o le malae lava o Sagone. O le tulaga lea e momoli atu ai le agaga faafetai.

Ua ou oo mai i le Minisita o vaa. E faafetai lava i galuega taua, e leai lava se Minisita e vale se galuega, afai foi o i ai ni galuega e faaletonu i le maitau a leatunuu ma lenei Maota, e faapena lava aga o le soifuaga. O le tulaga o i ai le itu ou te fia taua muamua lau Afioga i le Minisita o Vaa, o le Lady Samoa lava. Afai lava e tele ni lauga i se mataupu ona o le taua tele, o lenei vaa o le Lady Samoa o le talitonuga lea ia taua tele, o lenei vaa o le Lady Samoa o le talitonuga lea ia Salafai atoa i lou lea lagona. Afai e toa ono lota aigae toafitu i le Lady Saamoa ona o le taua tele o lenei vaa i lana fesoasoani, i lana tautua ma le faamalieina o Salafai. E tatau foi ona faamalie Upolu nei, vagana ai le itulagi lea e mamao tele atu e faaleo i Salafai, ae oo lava ina taua i se taimi pea fia alu i Salafai. O le mea lea lau Afioga i le Minisita o lea sa tatou talatalanoa faasamasamanoa i se isi taimi ae faatoa uma ona afaina le Lady Samoa. Sa fesiligia lava i le fia malamalama i le naunau lava i lenei vaa ia vave ona faaleleia. Faafetai o lea ua faalogologo atu ua faaleleia ae pei o lena taimi sa tau tuu fesili foi i lau Afioga o loo alu se sailiga poo fea na lavea ai le vaa. Ona ou saili lea o le tali a se tasi o tama matua sa i ai i luga o le pasese i lea vaa o lana tali mai na lavea i Mulifanua. O le solomuli atu a lea vaa i tua e fia faasaga i Salafai ae taia ai tua i le mea o loo afaina. o le fesili o loo tupu mai i le mafaufau lau Afioga i le Minisita, faafetai o lena ua tea le kapeteni, tulou ua tatau le ta i le tua o le vale tulou. Afai o le uiga lea o ituaiga faapena ua tatau. O lea foi sa ou matau i le saunoaga a se isi sui o le kapeteni e ona faalausosoo lava ia o le a faapefea ona avatu e kapeteni ae afe ma afe selau tagata o loo femalagaai ai ae faataga ai kapeteni onana. Ae a maua a sina ave taavale na o ia i le taavale a maliu ai a na o ia ae ave e molia. O le mea la lea i le tulaga ua iai o se tasi itu lau Afioga e silasila totoa ane.

Faafetai atu lau Afioga i le Fofoga Fetalai, e taua foi le faauilavea, pau le mea ona o le avanoa ma le faaaloalo ua tuu mai ia te au, ae le teena ai lou tagata i faauilavea. E taua foi lea e iloa ai le taua o le lauga pea tele faauilavea. Faafetai lava, e le o toe umi foi lau Afioga i le Fofoga Fetalai male paia o le Maota, e lagona lava le faageetia o lou tagata i le matau atu i lo outou finagalo maualuga. Faafetai, o loo i ai pea i le Minisita o Vaa. O le a ou le toe taua ia tulaga, afai e le ona ae foliga ona, ou te iloa foi o le Afioga Amiatu e ona le saunoaga ona

faagata ai lea iina Vaa, pau lava le fautuaga e avatu i le Afioga i le Minisita sei silasila ane lelei poo ni Isaraelu moni na tagata faigaluega.

O le Minisita o Vaa o loo afaina ai foi ma le Minisita o Faatoaga, masalo o le tulaga lea o loo aafia ai foi faatoaga. O sina fautuaga i lau Afioga i le Minisita o Faatoaga, o niu tulou. O lenei foi vaitau o loo i ai lava le talitonuga ua feagai nai ma le atunuu ua tai 6 masina ma afa, ae i ai le fautuaga poo le a se tofa i lau Afioga ma le Matagaluega ae soia ona toe totoina niu uumi. A silasila ane i niu maualalo e fai ai ni atiina ae niu faapena, e faigofie ona ta ma ono alofia pea tutupu mai ni afa tetele ona faapena lea ona alu le afa i niu uumi ae faapena ona saogalemu niu pupuu e pei o le fautuaga lena i lea itu. A leai se taofiga e tau faamuta la outou galuega poo le tulaga i faatoaga, e leai e i ai lva le taofi oa ni faafitauli o faafegai ma la outou afioga ma le Matagaluega ma le atunuu e foliga ua faigata ona toe atiina ae le tulaga o faatoaga, saili se isi faiga. Oa nisi faiga, e le mataone le Atua, afai lava tou te tatalo i le Atua e faasino mai auala mai i lau afioga ma le Matagaluega se tulaga manuia e mafai ai ona manuia lo tatou atunuu.

O le tasi tulaga e lagona ai le fia fautua atu i lau Afioga i le Minisita o Faatoaga, o mea nei o ponesi, ua taua pea foi e lenei Maota. Ou te faamaonia le tulaga faaletonu o i ai le Ponesi, ponesi Ava, ponesi koko, e tau pea i le matou itumalo poo lo matou nuu. E leai la ou te le faapea atu ua leai ni togaava poo ni toga koko o nisi, ae ona o le faiga o le tou ponesi, o le tagata etele le koko ua laitiiti le tupe ao le tagata ua laitiiti le togakoko ua tele le tupe. Ou te le malamalama poo ni faale-aiga, poo ni faapolokiki ua mafua ai lena itu. E ono tutupu ai foi fevaevaeai i totonu o nuu i tulaga faapena, aua foi o le o loo toaga ma tele ae faapena ona avatu faamanuiaga ae faapena oan tele i le laitiiti lana galuega.

O le Minisita o Galuega, e faafetai atu i lau Afioga i le Minisita o Galuega i le tulaga o loo faafae ai vaega eseese o le atunuu, ae pau lava le mea, o le a tulituliloa atu loa lau pitolaau. O le tele lava o nisi o finagalo o loo faalauaitele atu lava i le lautele o le atunuu ae amata atu i totonu o fale. Sa ta feiloai ma lau Afioga e leai o fale nei, ma ua e saunoa mai e tasi le ta feiloaiga na e saunoa fiafia ma tali mai lau talosaga atu. O lau talosaga atu ua matua pagatia le matou nuu i le vai, pagatia i ala galue. o lau tali mai ua lelei, tasi, lua vaiaso o le a faataunuu. Ona ou malaga loa lea i Savaii alu atu faamaopoopo le matou nuu, pulenuu uma, semanu le le faamaopoopoa uma le itumalo ae ua na o pulenuu sei logologo atu i ai le tala manuia ma faamanuiaga ua saunoa mai le Afioga i le Minisi o Galuega o le a faapena ona faataunuu lo tatou faamoemoe ini nai aso o muamua o lata mai. Lau Afioga ua tau lagona foi le matamuli o le mea sili o lena ua faafofoga mai lo matou itumalo nei faapea o le fealuai i Apia alu atu ma se tala faatupu. Ae faafetai o lea ua matau atu nei ua amata ona faatulaga polokalama o ala galue ma tulaga o vai. E fautua atu i lau Afioga o se agaga e manatu e faigofie ona foia ai le tele o faafitauli i vai i totonu o le matou itumalo. O loo i ai le pamu vai i

le isi pitonuu lea i uta, o lena pamu e le umi le taimi ma faaletonu ona faapena foi lea ona faaletonu ona maua e le mamalu o le nuu poo le itumalo ni vai taumafa. O se fautuaga i lau Afioga pea tusa ai ma lou fiangalo, faafetai i lou faalogo o taua i lau saunoaga faatoa mavae atu mea nei o tane vai, o le agaga moni lena o loo i ai, o le a ou le tautala faalauaitele i le atunuu ona e eseese finagalo. Ao le agaga moni lena o loo i ai lo matou itumalo, o loo i ai le faamoemoe pea tusa ai ma le finagalo ia fausia se tanevai tele lava, e mafai ona fesoasonai i le malo o le pamu vai pea oo ina tumu ona faapena lea ona faamalolo le pamuvai ae faagaoioi pea le tanevai lenei. O le a le mafai lava ona i ai se tulaga e toe pagatia ai le nuu ma le itumalo. A oo foi ina gau le afi ao loo gaoioi pea le tane vai e toe faagasolo pea le vai e oo lava ina toe mafai ona foia ni faaletonu, o loo faapena lava ona gasolosolo le suavai i lea taimi ma lea taimi.

O se tasi itu lau Afioga o loo talitonu i le tulaga o loo i ai le afi o pamu i lenei taimi, o loo faigofie ona le amiotonu ai tagata tulou, ae i ai le manatu pea tusa ai ina ia faaalu i le uila, faaalu i le uila ae tuu afi nei o loo faaaoga i ai le suauu, aua lau Afioga o le tele o taimi e alu alu nofo le vai ona saili atu lea ae faapea mai le tali ua uma le suauu. E saili atu i Salelologa i le mea e aumai ai le suauu ae tali mai e le i oo i le taimi e toe avatu ai le isi kalone suauu ua matua vave tele la outou faaaoga. O lona uiga e i ai se isi auala e le tusa ai o loo agai i ai le suauu lenei. O tiu la ia e talosaga atu ai pea tusa ai ma le finagalo o lau Afioga ma le Matagaluega o itu ia e sili ona faigofie e foia ai itu faafitauli uma ia o loo feagai ma lo matou itumalo. O le isi nuu o loo i ai foi le pamuvai o le nuu lea o Fogasavaii, e felatai ma le uso ia Leilua, ae avatu pea sei silasila totoa ane i ai o loo mafatia uma na afioga, e faapea foi i le afioaga ia Leilua o Sagone ou te maitauina uma pea ou usu mai i le taeao poo fegasoloai le mamalu o le itumalo poo ia foi afioaga ma le tulaga o loo saili ni suavai. O le mea lea e talosaga atu ai o le soifua lava o tagata o loo fia liolio i ai lau Afioga.

O se tasi o fesili o loo fia malamalama ai lau afioga ou te le o malamalama poo lau afioga e fitoi tonu i ai le mataupu lea, o mea tau pamu penisini. O le mea sili ai o lou tautala i lenei mea ao loo ou afaina ai, ua uma ona ou afaina i le pamu penisini, ua uma ona ou afaina i vaa, o itu uma faapena o lea ou te talanoa atu ai ona ua maea ona ou afaina ai. O le a le mea ua le faia ai se pamu penisini i Salelologa o le fesili lea. O le a le mea ua le faia ai se pamu penisini i Salelologa o le fesili lea. O le faamatala atu foi lou afaina, na ou malaga mai Samata ou te malaga mai i Upolu nei, ua uma ona book lau taavale i le vaa o le isi foi lena faafitauli. E tele faafitauli e lavea ai le tagata i le taimi e tasi, o le faafitauli muamua o le tau mai i le vaa ua sui ua faapea mai e le toe avea ni tagata ma taavale ae nao loli suauu e ave ai. O le mea na totogi lau taavale i le alu ma le sau tau i ai le taimi ou te sau ai, ou te le malamalama i le taimi na fesui ai a latou tonu. E i ai le manatu i lena itu ia tuu se avanoa poo le vaiaso latou te iloa ai le aso e alu ai le suauu i luga o vaa. A le o nei e book ai lau taavale ou te

sau taeao ae oo atu i o ua toe sui faafuasei nanei. Lau Afioga i le Minisita o le isi lena o faafitauli o mea nei o loo malaga solo ai le atunuu, o le faafitauli lea sa ou taua muamua le penisini, o le aso la lena na tupu ai le faaletonu. Sa fua lava le penisini i lau taavale ou te toe oo mai ai i Upolu, aua o le taimi lea o loo malaga sao mai le vaa i Apia. Na ona taunuu a i Apia oso i luga maua le penisini e utu ai. Ua ou vaai atu eni e leai se aiga i Salelologa e toatele foi lau aumalaga o toeaia ma tina, e ao ona matou toe foi i lo matou nuu e usu lelei mai i le taeao ae matau atu foi i le penisini o le taavale e le oo foi i Samata. Ua taua ona e i ai le pamu i Lalomalaga na matou o atu ua tapuni toe foi mai ai lea, matou malaga ma le matou aiga, ona fai mai lea o le matou aiga, tatou o atu ia isi ou tama o Talamaivao pe maua ai se tatou penisini, ona matou o ane lea i ai na maua ai le matou 33 kalone. Faafetai ia Talamaivao Ulualofaiga ae tali mai taimi ia o loma le palota talu ai nei. Na tali mai ia malie ia ona pau lena o le fesoasoani i lau palota. E pei la o itu ia ua ou taua o faafitauli uma ia o loo tutupu i le atunuu, o le fesili autu aisea ua le faia ai se pamu penisini autu i Salelologa o iina o loo tapuvae tasi i ai Salafai. E leai sau pasi e leai se tulaga ae pau a le mea lea ou te popole au i ai ona o le omai lea ae faapena ona saili ma faaletonu ai i Salafai. Ou te fautuaina ai lau Afioga i le Minisita e fitoi tonu i ai lea mataupu ina ia alofagia ma outou alolofa e faataunuu uma mea e tatau ona tuu uma mea e faasaoloto ai leatunuu, o tulaga na ua ou tautau atu lena tulaga.

O le Soifua Maloloina, e i ai le itu sa ou fia taua i fale maliu. Sa ou faalogologo ua tele saunoaga e pei lava ona faaalua atu a tele lava ni manatu poo ni lauga i se mataupu e taumafai e faatino atu mafaapupula atu le moomia tele ina ia faataunuu. O ananafi na malaga mai ai le tasi foi o toeaia o lo matou nuu sa alu e aumai le ma uta talo tulou le Maota ma le faafofogaaga a le atunuu, ona sau loa lea i le vaa i le taeao e usu mai ai ona fetau lea ma fuafuaga o loo tauva i ai le atunuu i nei mea o talo e ave i fafo. Ona taunuu mai lea i le uafu ua gasolo loa taavale i totonu, o lana taavale a la o le taavale o loo tumu i le uta e mulimuli a i totonu. O le taimi o le a alu lana taavale ae sau loa le solo a taavale o le maliu. Faafetai ua maua mai le vaa e lei tea ese ma le ava ia semanu pe faapefea lenei maliu. Ona taumafai lea o le taavale lea e le i alu aua e leai se taavale e toe gaoioi mai fafo ae toe la o le taavale lea a le toeaia o le matou nuu olea e totoe i fafo. O le nuu nei e i ai le faamaulalo tele ma lagona le va fealoaloai ma le ava. O lea na faapea ai o le a nofo ia lau taavale ao le a avatu le taavale a le faifeau. O itu la ia lau Afioga i le Minisita, i se falemaluu aua o isi foi nei mea pea tulai mai ni pefea i nei maliu tulou e faaluma ai aiga, e faaluma ai nuu. O ituaiga itu uma faapena aemaise lava aiga, e faaluma ai nuu. O ituaiga itu uma faapena aemaise lava le afaina o tulaga lelei, o lea ua ou toe taua ai lena tulaga lau afioga i le Minisita nei pea mai ua uma ona avatu e le isi, ae toe fia tautala foi i ai le isi, leai, talu ai ona o le taua o ia tulaga faapenei.

O se tasi o faafitauli sa ta talatalanoa ai foi ma lau afioga i le Minisita i se tasi o taimi, sa ou fesiligia foi lau Afioga i lau malaga taamilo i Salafai, poo le a sau silasila ane i le Falemai o lenei itumalo. Ae peitai sa e saunoa o le falemai sili lea ona manaia i lenei taimi i Salafai ma le isi foi poo Lalomalava. E ioe lou taofi i le saunoaga i lau Afioga peitai o itumalo ua faatamaia. E pei la e faatusatusa i ai lau silasila ona o le la e tu, ae silasila lau afioga ua taunuu le upu foi lea e tu fua ae ua oia le tulaga o lina falemai ua le atoatoa le tulaga e tatau ona i ai. O le mea lea e talosaga atu ai, ia le gata ai lau silasila ma le Matagaluega i nei tulaga o loo tele lava le tulaga o loo fia faaleleia. Ae le gata i lea o le tulaga i se Fomai, aua silasila lau Afioga e mamao tele Tuasivi, ae afai o le a tulai se mai faafuasei ua tigaina o le a faapena ona mamao lava se tulaga e mafai ona foia vave ai lenei faaletonu. Lau Afioga i le Minisita o tulaga ia ua naunau i ai le taofi ina ia mafai ona foia i se taimi o lata mai pea tusa ai ma lou finagalo.

Lau Afioga i le Minisita o Telefoni, ou te taliotnu i le polokalame ua ou faalogologo atu nei i ai atonu e le o toe mamao ua faapnea ona sologa lelei ma sologa manuia le tulaga o taumafai nei i ai. Ae silasila lau Afioga masalo e le o maua mai le Lipotie au tama tulou o loo malaga atu i Salafai. O iina ia matou e leai se telefoni, o Taga o loo lipoti mai ai iina, o lau foi matau na amata mai i le afa e oo mai i lenei taimi e le o toe lelei lena telefoni ao mea ia e tua i ai i faalavelave faafuasei o telefoni, e mamao tele Salelologa, a taumafai la e tuli i ai le tulaga o le moomia o nei mea o telefoni ao Taga foi e ui lava ina mamao ae tau lata mai nai lo Salelologa. O le tasi itu lau Afioga o lena ua i ai le falemi, faafetai i Salailua ona ua latalata ai pea i lo matou faaitu le tulaga o se telefoni, e le matagofie foi lea tulaga o le fai o se falemeli ae leai sona telefoni, ae afai e fai se telefoni mo le falemeli o le a fesoasoani foi mo le mamalu o le atunuu. O le mea la lea lau Afioga i le Minisita o talosaga, o se tasi itu e fia faamanatu atu i lau Afioga o loo i ai nei le pou o loo tu i totonu o le matou nuu, masalo ua faalalo e le afa ona o le tu umi ae leai se aoga tulou. O lena pou na faia i le taimi toe a ina faoia, ao lea ou te iloa le mea na mafua ai ona le faoia, o taimi ia o le taufaoga o le manumalo o lenei Maota i lena taimi, e pei o Salega lea sa sue ai le manumalo foi o a outou faigamalo ou te lei i ai i lena taimi. O iina la na faosoto ai le mataupu lenei o le telefoni, o loo i ai foi le faaosoga na fai i Faiaai ina ia mafai ona lagolagoina, o le mea o loo moomia e latou ia faia telefoni. Na ona uma lava o le faiga Palota manumalo ma muta ai iina le faiga o telefoni. O le mea la lea ua ou talosaga atu ai i lua Afioga, masalo e le o lau Afioga na i ai i lena taimi ae talosaga atu e amataga, o mea nei e faalua ai tagata o nuu ma mea faapnea o loo tutu, faafetai i le afa ua faalalo ai ona ua mataga le tu o lea pou. Ae mo le lumanai lau Afioga, o ute talosaga faaauau lena tulaga matagofie na faia, aua nei faitauina ai la outou faiga Malo faapea seiloga o mea faapena ona fai lea. E leai o la outou faiga Malo o le faiga Malo amiotonu, e faapnea



ona faia mea moni ae le faalataina nisi, masalo ua maea atu le tele o mea sa moomia.

Ona pau lava le itu leni ou te fia avatu lau Afioga i le Minisita o Tupe, lau Afioga i le Sui Palemia e tusa ma tulaga o le faafeagai ai ma le galuega. E faamalo le galulue, malo le tofa, malo le mataala, malo le faatoatoa o tulaga e le faigofie. E tele fili ma mea o loo faafeagai ma lau Afioga o mea lava nei e ono afaina ai ma tupu ai foi le faavaivai. Faafetai atu e ui lava ina gaogaosa le Matagaluega ao loo faapena lava ona tu mai i tulaga faamalosiau i le atunuu ma leni Maota. Ona ou faapea atu lea i lau Afioga ma le aiga Minisita, tau atu ia faapnea i se tau taugofie, o nei mea uma o loo agai atu i ai le agaga naunau o afioga i faipule, e leai e le o ni upu e faafuaveta. O upu e tautino, o upu moni ona o le agaga lava o loo naunau i ai itumalo e ala mai i afioga i alii faipule. Afai la matou te lauina atu o matou moomoga ae tali mai e leai toe foi atu lea e fai sa outou filifiliga, saili ua filifilia lava outou tou te tutu i le foe sei tagi atu i ai lo tatou atunuu, ae le o lo matou tagi atu ae faapea mai ualeai ni tupe, a leai ni tupe saili e la outou afioga le ea e maua ai ni tupe, o le ala lea o le filifilia o outou ina ia saili mea e maua ai tupe a tagi atu le atunuu ae tali mai. O a matou upu ia i leni taimi o le a le faafualoa so matou leo, pau lava le agaga faafetai.

E faafetai atu i lau Afioga i le Fofoga Fetalai, faafetai foi i le paia o le Maota ona o le faaavanoina ona ua umi naunau sou taimi ua malieo foi lau talatalanoa atu i leni aso. Ia alofagia e le Atua ia maua pea lou malosi lau Afioga i le Fofoga Fetalai i le tino, ae silisili le agaga aua le feagai ai ma le galuega e le faigofie. Ia manuia foi le Afioga i le Sui Palemia ma le mamalu o le Kapeneta, faapea foi lena Itu lau Afioga i le Taitai o le Itu Agai ma le Sui Taitai ma le paia tele o le Palemene.

Ia alofagia foi e le Atua le lato i le ea ma le lato i le tai o le Taitai, ia alu se aso ma toe foi mai tatou toe feiloai ma le fiafia. Ia manuia le tapuaiga a le tatou atunuu, lau Afioga Mamalu O Le Ao o le Malo faapea ona tulaga faalupe ae tainane o le Auaigaluega Paia ma Ekalesia e fia i le atunuu, ua faamalo le tapuai.

E faapuupuu atu ai i leni taimi, ia manuia lo tatou Itumalo faapea foi le paia i Faatonu ma Faauluuluga o Matagaluega ua tatou faatasi i leni aso. Soifua.

### Afioga TUPUOLA SIMI TAFUNAI



#### **Itumalo Faaalaalafaga:**

*Vaimauga Sisifo*

#### **Filifilia:**

*20 Aokuso 1993*

#### **Faatauto:**

*30 Tesema 1993*

#### **Lauga Faataupou:**

*1 Tesema 1993*

E muamua ona momoli atu lau faafetai i lau Afioga i le Fofoga Fetalai i leni taeao mo le avanoa ua e tuuina mai, sei fai ai se upu a se tasi o sui o leni itumalo aua

lau faafogafoga mai i leni taeao. Ou te fia faatalofa atu Samoa i Sisifo ma Samoa i Sasae i leni taeao. Ou te manatu o le a ou le toe asaina le lavelave o le vaofilifili i ou paia ma ou mamalu sausaugata, aua o oe o le ia iviivia, o le tai foi e aua, tau ia ina ia ou faapoipoi faailamea ma ou faamatogi faalaaui tumanu lo ta aso aua la outou faafofogaaga.

Ae ou te lei faia se upu ae avea ia leni avanoa ou te faatalofa ma ou faafetai atu i lou itumalo o Vaimauga Sisifo, o le paia ia te oe Tuisamau, Samau ma Feagaimaalii, o le paia lava lea i Alosina, Toomalatai ma Seumanutafa, le paia i Aiga Salevalasi Tamaseu ma Faualo, o le paia lava lea i le Faletolu ma le Vainalepa. O le paia i le Matua o Onofiatele ma Faaolosa faapea le Usoalii, Tupuola, Faumuina ma Siligatusa, o le paia i Alo o Malietoa atoa ma le Fuaiupolu, le paia ia te oulua na tai o Tamapua ma Manogiamau, le nofo a ituaiga ia te oe Fuata, le paia i le Matua lau Afioga Tofaeono, o le paia i Aiga e tolu, Sa Tofaeono, Sa Asi ma Sa Patu, o le paia i le Usoalii, Luafau, Tuiono ma le Lupetaliaami, o le paia foi lea i Ataga ma le Launiu Saelua.

Ou te fia faafetai atu foi i auauna a le Atua i fata faitaulauga e fia aemaise o lou itumalo o loo latou nonoina manu o Samoa aemaise lava o faletua ma tausi, ana leai outou atonu ou te le tulia atu ma faafetai i totonu o leni Maota Fono. Faafetai i le malosi o le nuu ma le itumalo, o outou ua aulia le 21 tausaga, o la outou pule ma le outou faaeaea lea ua ou patipatia i lau uluai fono i le Fono faa-Palemene a le Malo o Samoa i Sisifo i le aso, ua sao, ua malie malo. O la outou tapuaiga i leni aso, ina tuu maia la outou faamanuiaga ae sei ou molimoliina sa tatou upu e auala atu i se tatou faafetai ma ni manaoga e tusa ai ma mea uatulai mai ile atunuu i leni vaitaimi. Lau Afioga i le Fofoga Fetalai, faafetai mo le avanoa e fia auala atu foi i lau Afioga sau faafetai mo le Failautusi o le Fono Aoaofaitulafono faapea le auaigaluega ona o le galuega fita sa faafeagai ma outou, ao alo atu le itumalo o Vaimauga Sisifo mo le filifilia poo le sailia o so latou sui i le Faiga Palota ia Aokuso 20 1993. Lau Susuga i le Failautusi Aoaofaitulafono, ia saga faatamaoigaina pea oe e le Atua i le potu ma le atamai auale tautuaina o leni Maota. Lau Afioga i le Palemia, ua fanae lupe o le la, ua atoa tino o le masina oso aua ua taunuu manuia i fanua le lato i le ea ma le lato i le tai. Sa nofo tapuai lou atunuu aemaise le Maota Fono nei, ina ua taua mai ua gasegase lau afioga i le Palemia i atunuu i fafo. Ia faafetai ua talii mai ma le manuia ma ua toe alo i faiva lau Afioga i le Palemia, tatou tuu pea le faafetai i le Atua o ia e ona mea uma lava.

O le avea foi leni itula ou te faafetai atu ai i le afioga i Lana Afioga Mamalu O Le Ao o le Malo, lau Susuga Malietoa Tanumafili II. Ua matou faalogo i tala i leni taeao ua taunuu ma le manuia i fanua le siiga-gasegase a lau Susuga i le Malietoa Tanumafili II. Ia alofa le Atua ia faafualoaina pea lou soifua ma toe oai nisi aso se tele e te tautua ai mo le Malo o Samoa.

O mataupu ou te fia tautala i ai mo lou itumalo, lau afioga i le Fofoga Fetalai e auala atu lea i auala, eletise, aemaise moli i luga o auala, taligalu, vai taumafa ma eleele.

Muamua o auala, e momoli atu lau faafetai i lau Afioga i le Minisita lau Tofa leafa le Minisita o Galuega, o loo matauina e oo mai i le aso o loo galulue pea le Matagaluega i le fausia o auala. O le tele lava o nei auala ua maea o se vaaiga aupito sili lea mo turisi o loo tafafao mai i totonu o le atunuu, e le gata i turisi ae faapea foi i soo se Samoa ma e ao ai lava ona tatou mitamita ma faafetai i nei taumafaiga a le Malo. O nisi mea taua ua foia ona ua lelei auala ona o le tulaga lea i le pefu, sa taumamafa ma gasegase e afaina ai le soifua maloloina o le atunuu. E le gata ina ia tuu faamamaina ai foi le pefu a ua faapea foi ona faafiafiaina ai i latou o e fai taavale ua laititi mea o le a faamaumauina ona ua faaumiumi ma lelei taavale aemaise o le aufaipisinisi. Atonu o loo faafogafoga mai le mamalu o le aufai pisinisi i lenei taeao, tatou tee tusa ai ma sau molimau ma sau lipoti ua tau leai se pefu i totonu e faaleagaina ai oloa aemaise mea taumafa e taumamafa ai le atunuu. O le isi foi lea vaega e mafai ai ona tuu ese ma faaitiitia ai ni mai o le a afaina ai lo outou soifua. Ae paga lea lau Afioga i le Minisita o Galuega, o loo i ai nisi auala i totonu o lou itumalo e pei e foliga mai ua pasi i ai le galuega mo le fia faalauleleia poo le tuuina i ai o le ta, o nofoaga nei e pei o Vaivase uta sei toe silasila ane lau Afioga i le Minisita i le auala lea e ui atu i Faatoia, Vini seia oo i Moataa. O le auala laupapa i Leone e tai le asa lava se tausaga ma malepe lenei auala laupapa pe a tafe le vai, ma ua faapea ona afaina ai femalagaiga a le atunuu. Ae silasila lau Afioga i le Minisita o Galuega a afaina le auala laupapa i Vaisigano e sulufai i ai le mamalu o le atunuu femalagaai mai le itu i Sasae o le auala laupapa i Leone. Na ona ou toe faamanatu atu i lau Afioga, e talitonu foi o le a le tali valeina le manao o le sui o lenei itumalo i lenei vaega.

O le isi mea ou te fia faatauina pea i le tulaga o le auala laupapa i Leone, ua afaina ai foi le mamalu o nisi o lou itumalo ia i latou o loo nofoia ituva'i uma e lua o Apia i Sisifo ma Leota i Sasae. A oo ina tetele tafega ua faapea ona aia autafa o le vaitafe ma ua faapea foi ona afaina aiga o loo i ai, ou te talitonu e manatuina foi e nisi o le mamalu o lenei Maota sa afaina foi le le faletalimalo o Aggie Grey i nisi tausaga ua tuanai ona ua faaletonu Minisita mo ni auala e toe faaleleia ai. E le aoaia e Laupua Tamafaiga ao loo i ai le tofamamao i lau afioga o loo i ai lava le auala e fai ai.

Ona ou see atu lea i le eletise aemaise lava moli i luga o le auala. O le a ou faataatiaina le anoano o le aoga o le eletise aemaise lava totonu o tatou aiga, ao le mataupu ou te fia faatauina o moli ua malamalama ai luga o auala tetele. Ua le gata i totonu o le taulaga ae faapea foi ona faasoaso malie atu i nuu i tua ua avea le mumu o moli i luga o auala tetele ma mea ua faaitiitia ai nisi solitulafono e pei o le fasi tagata, gaioi, togi taavale aemaise le toso teine i luga o auala. O le talosaga i lau

Afioga i le Minisita poo le a se tulaga ua i ai le malosi o le eletise ona ua maea Afulilo, ina ia toe faaopopo ai nisi moli i luga o alatetele mo lou Itumalo. O loo fia manaomia ni moli e agai atu i Papauta, Papaloloa, auala i Alaoa, Vaoala, Letava, Tiapapata ma Afiamalu. O le mea moni ua malosi tele le talepe fale ma le gaioi i nisi o nei nofoaga o le tasi lea auala e fautuaina ai moli i luga o auala.

O le a ou see atu i taligalu ae tatou ave le faamalo i lea foi atiina ae aua ua le po se lilo i le silasila a le atunuu i le sau mai lea i Mulinuu e agai atu i Vaiala. Faafetai i le Malo aua e moni lava o le Malo o Iapani e sau ai le faatupeina o le galuega ae ana le saili le Malo o Samoa tatou te le maua le faamanuiaga. Ua avea le tulai mai o le taligalu ma mea ua mama ai le taulaga i Apia i le vaavaai, ona pau lava lea lau Afioga i le Minisita manatua foi o Vaimauga Sisifo ua aofia ai Mulinuu, Sogi, Apia, Matautu-tai, Vaiala ma Moataa, ua toaititi lava oo i luga o le auala i Moataa i le sami. O le auala tele foi ua toaititi lava oso i totonu o nisi o aiga ao tua atu o nei aiga o loo taatia mai ai le togatogo. E lelei lava ona faataatia atu i ou tafatafa atonu e i ai se taimi manatua Afia isi ona vao.

O lona fa o vaitaumafa, atonu e foia nei le fili sa tulai mai i nisi o nuu ua le gata i Upolu ae faapea foi le motu tele i Savaii. o le fili sa tulai mai o le leai lea o ni vai mo le fofoga taumafa o nisi alaafaga, ae talu ai nei ona ua taunuu mai le taavale vilivai ma ua faapea ona faamanuiaina ma ua maua le suavai, alo ia ina ia faamaea le polokalame faapei ona i ai nei le taavale vilivai i le motu i Savaii, o se aso talii mai i Upolu ona talosagaina ai lea e lau Afioga i le Minisita pe mafai ona viliina le eleele i Afiamalu ina ia lava faasoa le vai i nisi o lou itumalo o loo nofo taulata atu i ai. Ae atonu ua avea le tele o fale fou faanei-onapo ua fausia i le agai atu lea i Vailima, Avele, Vaoala, Letava, Tiapapata ma Afiamalu ma mea ua utiuti ai le suavai i nei nofoaga i nisi aso. E le gata i le tele o gutu paipa o loo faaoga e nei aiga ae ua faapea foi ona fausia vaitaele aua ua avea lea ma mea ua tele ai lava le suavai o loo faaogaina e nei aiga ae utiuti ai le faasoa i nisi aiga o taulalata ane. O loo molimauina e lou nei tagata i nisi aso o fafine ma tamaiti e feoi ma paelo e saili mea o loo maua ai le suavai mo le faaogaina.

Lau Afioga i le Minisita o Eleele ma le Siosiomaga, ua afaina le mamalu o lenei Itumalo ona ua leai ni fanua e galulue ai. O eleele i Tiavi ma Afiamalu ua tele ina lisiina atu i tagata mai o ma o, e le o ni tagata o le itumalo, o nofoaga e pei o Vaoala, Letava ma Vailima o loo fia maua ni eleele e galulue ai. Sa i ai se vaitaimi sa faamatuu mai ai fanua i Tiavi ae omai Siumu faasa faapea mai o eleele ia e tau ia i latou. E talosagaina ai lau afioga i le Minisita o Eleele i nai fasi fanua i Afiamalu sei tufatufa atu i ai e galulue ai sei toto ai nai taamu, ulu, fai, tapioka ma kumala pe afai ua le toe ola le talo talu ona o le faamai o le lega. O eleele i Avele ma Vaea ua uma ona faatauina atu le tele o nei eleele i atunuu mai fafo e pei o Niu Sila, Ausetalia ma le Faalapotopotoga o

le SPREP, poo ni a fa lau afioga i sina fasi eleele i Avele o totoe sei fausia ai se Malae Taalo mo tupulaga o Vailima, Avele, Letava, Vaoala ma Tiapapata. E le gata i lea ua leva ona taatia foi i paga le talosaga a Tanuigamanono i eleele i Tiapapata mai le tausaga e 1917 seia oo mai i le tausaga e 1993. o loo le mapu ona tuitui pea ma faatauana lenei mataupu. Ua fesiligia i alii Loia aofia ai ma Loia Sili a le Malo, ofisa o Mavaega ae tainane foi le Ofisa o Eleele ma Siosiomaga ae leai lava se tali maoti ua faataatia mai. Ua fia talosagaina ai lau Afioga i le Minisita ma lou talitonuga o loo i lau Afioga le tali o lea mataupu. O le a ou see atu loa i le eleele i Moataa, o le faamoemoe sa i le Malo ia faaaogaina lea eleele ia fausia ai se Faletalimalo, ae peitai ua le o gatasi le futia ma le umele ua fulitua mai kamupani sa faalagolago i ai le Malo. O le talosaga la a alii ma faipule o Moataa, sei faamatuu atu lenei eleele sei fausia ai se malae taaalo e tua i ai alo ma fanau. Atonu o le a le gata i tama fanau a Moataa lava ia, ao le a faapea foi ona faaagaoina e le itumalo ma le atunuu i nisi taimi.

Lau Afioga i le Fofoga Fetalai, faafetai mo le avanoa ua tuuina mai ua tatou oo mai i le Tala o Tupe e pei ona faataia. E leai nisi manatu e toe faalia, faafetai i le Afioga i le Minisita o Tupe mo le Tala ua faataatia nei i lumamea. I lou lava sui ou te lagoalgoina le Tala o Tupe e mua foi lou taimi i totonu o lenei Maota faa-Palemene o le Malo o Samoa i Sisifo, atonu o loo i ai nisi Fonotaga o loo i luma o le a faalia ai ni ou manatu i lea tulaga. Ona pau a o lea lau Afioga i le Minisita o Tupe, ou te momoli le faafetai aua i lau vaai puupuu atu i le Tala o le Tupe e le o tutusa Matagaluega uma. O le fesili aisea? Ou te momoli le faafetai i Minisita ma Faatonu Sili o Matagaluega o loo tetele le foai ua tuuina atu e le Minisita o Tupe. Ou te faanoanoa i nisi o Minisita i nisi Matagaluega ua ou vaavaai atu e tele mea o loo faataatia o loo manaomia ai le Tala o Tupe ae le o lava lana tauanau i lau Afioga i le Minisita o Tupe. O se faataitaiga ou te fia tuuina atu i lenei taeao o le soifua maloloina. E tausaga ona faaitiitia pea vailaau aua le togafitiga o gasegase, poo i ai ea se vaifofo mo lea tulaga? E le gata i lea ua faaopoopo atu i ai le Ofisa o loo fai ai suesuega o gasegase poo le laboratory services. OU te le ma e tau atu le amiotonu o nisi o nei mea e sailiili ai gasegase e gata lava ona faia ia Novema i le 1992. E le o faaitiitia le upu moni lea o loo faateteleina le faaletonu. O le mea lea ou te fia fautuaina atu ai le Laulau e ala atu i le Afioga i le Minisita o le Soifua Maloloina e toe tagatagai i ai. O lou lava talitonuga a ola soifua maloloina se atunuu e faapea foi ona o le soifua maloloina le Palemene. Ae a mamai ma gasegase le atunuu e faapea foi ona mamai ma gasegase le Palemene. O nai upu ia ou te fia faatauaina ai le Tala o le Tupe i lenei itula.

Ae avea ia lenei itula lau Afioga i le Fofoga Fetalai atonu na o le pau lenei o le avanoa ua tuuina mai mo le sui o le itumalo o Vaimauga Sisifo ma o le Fono mulimuli foi lea o lenei tausaga. Ou te fia faamanuia atu ai i itumalo uma o Vaimauga siisfo, ia maua le soifua

maloloina i tama ma tina, o faletua ma tausua aemaise o le malosi o lou itumalo. Afai o i ai se upu o paopapa i la outou faafofogaaga i lenei taeao ia faamagalalo le auauna. Soifua.

### Afioga UNASA MESI



#### **Itumalo Faaalalafaga:**

*Faasaleleaga Nu.3*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*24 Iuni 1991*

Faafetai mo le avanoa. Faafetai i le alofa o le Atua ua maua lenei avanoa matagofie. Faafetai i lau Afioga i le Fofoga Fetalai mo le avanoa faapea Sui mamalu, Afioga i alii Minisita aemaise o le Kapeneta, mamalu eseese o le Palemene, aemaise o le mamalu ia Pule ma Tumua Ituau ma Alatua, Aiga i le Tai ma le Vaa o Fonoti. E faapea foi le mamalu i le afioga i le Ao Mamalu o le Malo.

E avea ia lenei avanoa e momoli atu ai se faafetai a lenei itumalo o Faasaleleaga Numera 3, i lo outou faaeaina o lou tagata, ua ou tulai mai ai ile tofi faipule. Ae tapuai maia ae o le a ou sauni e fai se sao o le tatou itumalo.

O lau mataupu muamua, o le Minisita lea o Vai. Ou te talanoa lava au i le matou itumalo, o Faasaleleaga Numera 3 lea ua leva ona i ai le matou vaipaipa. O lona uiga e oleole e le Malo lo matou itumalo. O le mea lea e tupu mai, e pei na ona avatu e faaaliali ae leai se aoga. O le mea la lea lau Afioga i le Minisita fai se fuafuaga ia fai se mea mautu, aua o ala nei ua ala ai ona faaleaogaina le manuia o le atunuu, o le le fai o se mea ma le faamaoni. Afai ua leiloa e le Matagaluega ona faagaioia le alofa, sue mai se tasi na te iloa fai nei mea. Ia faatumauina aua le ola i le fia aso o tausaga ao aso uma lava o le tausaga. Sa matou i Savaii i le vaiaso lea i le vaiaso na tea nei, sa matou asiasi atu ai lea iina i le Falemai, matua mafatia lo ta mafaufau i le leai o se vai i le falemai ua atoa le vaiaso tasi le tane vai e fealuai mai i Palauli e oo i Puapua. E mafua i se a? Tele le oleole, oleole e le Malo Savaii. Ua oo lava i le mea e i ai ia le tatou matua ma tatou fanau falemai ua le mafai ona fai o se togafiti e valu tane la, e lima e le aoga ae na o le tolu la e faaoga, o lea ua oleole foi. O lea la o fea o i ai tupe a le Malo lenei e avatu e fai ai mea ia? O lea ua aliali mai na o le faapaitau ae leai se uiga. O le mea lea lau Afioga i le Minisita se alofagia le talosaga mo vai o lou itumalo.

Lona lua o lau talsoaga o le Falemai. Lea foi sa taua i le lauga a le isi sui o Faasaleleaga i le taeao nei. O le falemai o i ai nei vae atu le mamalu o le atunuu e sili ai mea e momoe ai puua ao tatou matua ma fanau nei e autovaa atu i ai. Ailoga e i ai se isi o tatou ua taatia i le

falemai aua o le matua leaga lava o le tualga ua i ai. Talu mai lava na fai nei falemai e lei valiina, ao lea ua toulua faamalama a agi mai nei se afa tafefe. E le gata i lea sa ou asiasi foi i le falemai lea na fau e le Malo le falemai lea i Motoootua. O le mea moni lea e tau o le le alolofa i tagata. O le itu lea e i ai le Fale Talavai masalo na uma ona fau le fale sau se matagi e i ai le pu lea e i luga o le fale e oo mai i le aso. Lea ua sisina ai le suavai, ma ua le mafai ona savavali i le faasitepu ona o le limulimu aua ua fia tausaga o tutulu lava lenei fale. Masalo ua toeitiiti ona see ai lea o se toeaina po o se loomatua tupu ai se faalavelave.

Lau Afioga i le alii Minisita o Falemai, sei alofa i meaalofofa na aumai ma le faamaoni mo le tatou atunuu ia tatou faamaoni e tausi aua ua tatou maua ia tupe ma le filemu. Ia tatou alolofa e tausi aua a toe amata foi ia tailo ailoga a toe mafai ona fau se falemai.

O le Minisita o Telefoni. Lau Afioga i le alii Minisita, na o le lua lava telefoni o lo o i le Faasaleleaga i Savaii i le sau lea mai Puapua seia oo mai i fale o le Malo o i ai Ofisa e fa o le Malo ae tasi le telefoni, ae leai la se avanoa o matou nei i tua e alu ai e fai se telefoni. Sei vagana ua maua se avanoa i Salelologa e tusa e lua aso o e faatali ona faatoa maua lea o sau telefoni. Ae a faapea o se isi e mai, ia e sili ona fai muamua le pusa ao lei alu e te telefoni. E matua faigata tele ona savali mai le tagata i Puapua e fai le telefoni i Salelologa. Lau Afioga i le alii Minisita, a taunuu loa au laina na e faatali masalo e sili le pitonuu ma a latou telefoni, aua e faigata foi le tau o le olaga i pasese o pasi aua e le tofu taavale tagata uma.

Le Minisita lea o le MOT, talu mai lava le Ofa o lo o matua faaleagaina lava le matou itumalo. E le gata i le faleaoga, ao le gataifale foi ua oo i le apitagalu. Lau Afioga i le Minisita ou te soso atu mo se fesoasoani mo lo matou itumalo, aua o le matou nuu na tafefe i le afa. E tuu atu pea i lau afioga atonu e te fesoasoani mai i le matou talosaga.

O le isi mea o fale ia e tua i ai vae atu le mamalu o le Maota, fale mananaia na fai e Sapani mo tatou faamealofofa. Ae tatou toe vaai i ai ua le aoga, ua matua le aoga lava. Ae a pe a vaaia e se Komiti o se nuu aua na o tausi ma saoa e mafai ona latou faia le galuega ma le faamaoni. Ia totogi lelei ae latou tausia nei mea ua maua fua, aua e mamafa tele i lou loto nei mea ua maua fua e le tatou Malo ae le tausia lelei. Ina ia umi ona taotu faaagaina aemaise foi le toatele o tagata feoai i le tatou atunuu aua o le atunuu nei o le atunuu fia tagata. Ae a vaai la isi atunuu i mea ia e agai i ai tatou i mea faapea e le taitai ona talafeagai. O lea lau Afioga ia e alofa ia vaaia se Komiti e tausia lea vaega aua e faigata tele ona maua ni tagata e faia lea ituaiga galuega, ona e fiatagata uma lava tagata o le atunuu nei ae masalo sei vagana ai faletua ma tausi ma saoa ona latou faia lea o lea galuega aua e malolosi o latou fatu.

O le isi Matagaluega lea o Lafoga po o le Tax Department. O le atunuu sili lenei o le le fair lona tax mo ona tagata faigaluega. E 39% lea e tax ai tagata

faigaluega, e amata atu lava i le \$2,000, ia afai nei le 39% flat e ataata tele i ai le tagata faipisinisi, aua e matua faasaga lava ia e lau ana mea, ao nai tagata nei, o le ala le maua foi lea o ni tagata faigaluega lelei i le Malo ma le tumau ni galuega ona o le le lelei o le system o le tax. E fai o le le lelei ae o le maualuga o pasene o le lafoga. O lea lau Afioga i le Minisita o Lafoga ia e alofa fai se faatatau ia toe teuteuina lenei lafoga aua se lelei mo nai tagata faigaluega o le atunuu.

O le isi au mataupu lea o le mataupu tau oloa. O le feafaatauaiga o oloa mai le wholesale i le retail. O le mea lenei ua leva ona fai o le ala mauoloa foi lea o nisi ae matitiva nisi. O le mea ua tupu nei ua alu le fai oloa faatau mai oloa mai fafo faatau atu ua fai lava lana wholesale ma lana retail. O se mea ua le sao lea mea. Afai o oe o le wholesale ia tuu le avanoa i isi tagata o le atunuu e fai ai ni a latou pisinisi. Ae wholesale la toe retail ae o le a faapefea nisi o le atunuu? Lau Afioga i le Minisita fai se fuafuaga i lea vaega, aua e le mafai ona tauva nisi e na o le retail lana pisinisi ma se tagata o lo o wholesale toe retail.

O le Minisita o Aoga, ou te talosaga atu i lau Afioga ma le Palemia ina ia faatuina se aoga i Faasaleleaga i Savaii e pei o le Kolisi o Samoa i Upolu nei. Ia fai faatasi e tutusa faiaoga ina ia faaititia ai le gasolo mai o Savaii i Upolu ma faatumuina ai iinei ma le lava ai aoga i Upolu ma taugata ai foi aoga i Savaii aua o lea ua o mai iinei nonofo ai. O lea lau afioga ma le Kapeneta na o le tau atu ae taua i lou mafaufau mo aoga i le lumanai. Ina ia faia se Kolisi pei o le Kolisi o Samoa ina ia faigofie ai i le matou motu ona faaaooga alo ma fanau aua le lumanai o Samoa.

O le Minisita o Faatoaga ma Faigafaiva. Ou te faalogo soo lava i nei mea e faapea o le subsidise faatoaga. O le a lava le mea ua ese ai lenei Matagaluega mai isi Matagaluega? Ana faapea o maua atoa le aoga o faatoaga mo atunuu i fafo ou te alu ai foi au. Ao le mea ua i ai na o le fai o faatoaga ae leai se tupe tele o maua ai. O le mea ua i ai e amata lava i le fiafia ae e le faapea e uma ane le tausaga o le a faapea mai tupu ma tamalii e aofia ai, ao le mea ua ou iloa nei, o le tele o tagata e maua loa lava le komisi alu foi ae tiai le faatoaga. O mea tau vaa fagota, e tatau ona fai se fuafuaga mo ni a tatou vaa fagota ae aua le tuua o tatou ogasami e fagogota ai tagata mai isi atunuu. E tatau ona atiina ae lava e tatou lo tatou ogasami ona maua ai lea o galuega lelei a le atunuu.

Ou te talosaga atu i le paia ma le mamalu o le Kapeneta male Palemene o leelele o le matou itumalo na aveesea talu ai le sala a Lauaki Namulauulu le Safotulafai. O le toeaina lenei, na sala ona o lona fia fai Malo, e lei manao e pule papalagi i le Malo o Samoa, e manao lava ia ia pule Samoa ia Samoa. A o lona faasalaga lea na avea ai e le Malo leelele o le matou itumalo i lea vaitaimi. O lea e talosagaina ai le Fono a le Palemene ia outou alolofa mai. O lea ua omai o ma o ave i ai e le Malo leelele ae aunoa ma se Safotulafai po o se Faga o i ai i leelele nei. O lea ia outou alolofa ia toe faafoi mai



eleele o le matou itumalo. Ualeva ona tatau ona uma le sala a Lauaki. Na maliu lava si toeaina i atunuu i o ona o le sala lena ae saga umi ai lava eleele o si o matou itumalo. Ia aumaia, ua leai ni eleele e galulue ai lo matou itumalo.

Na o sina fesoasoani atu i le Ofisa o le Foreign Affairs. O le tasi lea Ofisa ua tele naunau tupe a le Malo e alu ai. E ese le Amapasa i Uosigitone ese i Niu Ioka, o le a le mea ua faapea ai? E le o tatou se Malo tele na o si tamai Malo lava. E leai ni tupe e support ai n ei mea, ma e faapena foi i Ueligitone ma Aukilani ae ua ou iloa e tai tutusa uma i atunuu o le lalolagi. Sei vagana ai lea i Brussels ae o le Ofisa sili lena ona taua. Olea ia outou Afioga i alii Minisita ia tou alolofa toe fai se filifiliga e mafai ona tipi nei tupe aua e le gafatia e le tatou Malo ae ua lava se tasi i Amerika faapena foi i Niu Sila. E moni lava e faigata feuiaga ae e le mafai ona tausia e le tatou Malo aua e tasi le Ofisa e tapuni ae uma ai ona fai o faleaoga e ono o Faasaleleaga.



E aioi atu ai foi ma le ava i le Ofisa lea o Leoleo. Tasi lea o Ofisa puapuagatia i le ao ma le po e leai ni ovataimi. Masalo o le fia fai Malo o nei tagata e ala ai ona fia Leoleo ae o totogi e pito leaga lava totogi o Leoleo i le Aupaigaluga uma, ae o le galuega foi fai mai e matautia tele.

E le taitai lava a tatou Leoleo aua i le matau atu i atunuu, o atunuu lava e le o lelei tulafono o atunuu ia e tupu ai faalavelave; ao atunuu o lelei tulafono ia o lo o sologa lelei lava. Afai la le faatau, ona silasila ane lea i Sigapoa, o se tamai nuu lava e pei o Savaii ae o le tulafono o i ai e matauita. E leai se tagata e le faigaluga i lea atunuu. O lea e aioi atu ai i lau Afioga i le Minisita o Leoleo ia faateleina nisi Leoleo ma ia faaopoopo o latou totogi. Na o le pau ia o mataupu na fia taua e lenei sui, ae ia manuia lava le Fono.

### **Afioga VUI VILIAMU**

#### **Itumalo Faaalalafaga:**

*Faasaleleaga Nu.4*

#### **Filifilia:**

*22 Aperila 1991*

#### **Faatauto:**

*7 Me 1991*

#### **Lauga Faataupou:**

*25 Iuni 1991*

Ia e avatu le faafetai i le Afioga i le Fofoga Fetalai, lau Afioga i le Palemia, faapea foi Afioga i le alii Minisita, faapea le paia ma le mamalu o sui i alii ma faipule o lo o eetai i lenei taeao i le tatou Maota. E muamua ona ou avatua le faatalofa i lo matou itumalo o Faasaleleaga Nu.4, e avatu le faamalo ia oe pule Sealiimalietoa, lau fetalaiaga Malaueulu, oe Samuliaga ma oe le aiga Sa Tuala, Tauso Matafeo, Peseta ma le matua Lemalu

faapea lau Afioga Vui, Susu mai Iiga outou le Maopu, Saoia ma le Nofoa, le paia ma le mamalu o ositaulaga o lo o i ai i lo matou itumalo. O faletula ma tausi ia o alo ma fanau o lo o tapuai mai i lenei taeao.

Lau Afioga i le Fofoga Fetalai, o lenei vaitaimi ua tatou oo mai i lenei faiga Malo, o se vaitaimi faigata. O le tausaga lenei o le 1991 e leai se aso e le misi le tatou faalogo i tala eseese o le lalolagi, i mea o lo o tutupu i le lalolagi. Ua tau uso ma uso, o mafuie ma afa, o e ua maliliu i aai, e faapea foi e oo lava i taitai o Malo ua faaumatia o latou ola, aua foi o nei aso o aso ua le iloa e le isi po o fea o le a tua i ai. O ai o tatou na valoia, ae oo mai i lenei taimi ua leai ni faiga Malo faakomenisi. Sei silasila lau Afioga, ua tusa e 40 tausaga o fai lenei faiga Malo, ona le tusa e ova 40% malo o le lalolagi sa talitonu i ia faiga Malo faakomenisi.

Ae ou te avatua le faafetai ina ua avatu le Talalelei, ua oo mai fai ina ua fai le tatou Malo ma ua faavae i le Atua le Malo o Samoa. Lau Afioga i le Fofoga Fetalai, na ou oo mai nei i le Maota Fono, ma ua leva foi lafolafoga. Tatou te o mai i le taeao fai le tatalo, ma o le tatalo i le Atua ia taitaina i tatou ia tatou lafolafoga ma o tatou manatu. A o la ou vaai i ai, ana ou vaai i ai ae fai lafolafoga, ou te talitonu e le i fai i le Atua. Ae a uma foi a tatou fonotaga, fai foi se isi tatalo, ia faamagalo tatou ona tatou taape ai lea, ae tuu le Maota Fono.

O le mea muamua i lenei itu lau Afioga nei loua le tatou faiga Malo e pei o le faigamalo ua oo i ai le komenisi. Aua le tatou o mai fai o tatou manatu ae ua galo le atunuu o lo o tapuai mai. Ae ou te le i oo atu i lauga faalauaitele, sei avatu foi i luma o le Itumalo, ma se lapataiga foi aua le Malo o lo o gaoioi nei mo le faagaioia o Galuega.

O le itumalo o Faasaleleaga Nu.4, e le tele, e tusa lava e tasi se nuu ae o le itumalo foi e siusiu lava o Faasaleleaga. O le mea ua ou matauina, e pei lava o le itumalo lea e galo pe a o mai faamanuiaga a le Malo, ona a oo atu a faamanuiaga, a oo atu i Faasaleleaga toetoe e leai se mea e toetoe, ua uma ona faasoa i isi itumalo ia e pito mai. Ua 30 tausaga ou te talitonu e le i oo atu lava se faamanuiaga i lo matou itumalo. O lea la le matou itumalo e, Faasaleleaga Nu.4, ou te talitonu ma ua tofia au e avea le tatou Nofoa, o le a ou taumafai pea e tuitui le Minisita nei faapea foi le Malo i ni galuega o lo o manaomia e faalelei ai lo tatou itumalo.

E muamua la lau tala i le Minisita o Falemeli, le tofa lea ia Toi. Ou te talitonu o le tasi lea Minisita alofa, tasi lea Minisita fai mea mafai. Ou te le masalosalo foi pe a tuu atu i ona luma se manaoga o lenei itumalo aua ou te talitonu e fai. O le mea muamua, e moni lava aua e leai lava se isi e le i lauga atu i le Faasaleleaga po o Savaii e le o manaomia ia itu Faamolemole lau Afioga se telefoni mo le matou itumalo. Ua matua mamao tele lo matou itumalo ma Salelologa. E le taitai e tusa e 23km e le taitai oo i ai, e i ai faalavelave e tutupu ia malaga i Salelologa, pe lua aso e faatali ai faatoa maua se telefoni. Ia faamolemole lau Afioga, ia taumafai pe i ai se telefoni e tuu atu i lo matou itumalo, e oo mai la i Faasaleleaga e

oo atu i Salelologa. I le tulaga o lo o i ai nei Falemeli e fai sina le manuia e pei foi ona saunoa atu ni sui o Faasaleleaga e matua i mamao tele ma le mea o i ai pasi. E ese le tuu o le mamalu o le atunuu o Faasaleleaga i le magatolu toe savali foi lea i le mea o i ai le Falemeli. Ou te iloa po o a fuafuaga sa i ai i le Falemeli i lena vaitaimi i le faiga Malo ua tuu atu. Afai la, e sili ona tuu mai ii i le mea e i ai le maketi o iina e tusa e fai ma mea e taunuu uma i ai faigamalaga, ma se fale e fai sina lapoa i le mea o lo o i ai nei. Ou te talitonu e le tele sina vaega tupe e alu ai i lea fuafuaga ae sei silasila foi lau Afioga i Tuasivi, le isi mea o lo o i ai nei le tatou Falemeli le mea o i ai foi le Laumua o le matou Motu i Savaii.

O lenei foi telefoni e na o le tasi lava i nei matagaluega e tele; ou te talitonu foi ua uma ona logo atu e nisi uso a faipule mai Faasaleleaga ae o le mea e pei a e sili le tele o leo e fesoasoani atu ai ina ia mama se avega. O nai manaoga laiti ia lau Afioga i le Minisita, ma ou te le masalosalo foi e pei ona ou fai atu pe a faatinoina ia galuega.

Ona ou oo mai lea i le Afioga ia Sala le Minisita o Falemai. O lenei mataupu o se mataupu faigata. E ootia lou loto ona o le tulaga ua oo i ai le falemai o lo o i ai nei i Tuasivi, e le na o Tuasivi ae ou te masalo e faapea uma falemai o lo o i Savaii. Aua a ou tilotilo i ai i nai tausaga ua mavae atu, e leai se galuega o faapea o faia e maintain ai le falemai. O mea uma o lo o i ai, ae ou te vaai i le tatou budget e tumu i le faaleleiga o fale o le Malo, e i ai le 2 miliona (2.2million) tala o lo o i ai i totonu o le faaleleiga o fale maintenance a le Malo. Ou te talitonu lau Afioga i le Fofoga Fetalai, o lenei vaega tupe tele a le Malo o lo o tusia i totonu o le Tala o le Tupe ia faaaoga tatau e toe fai ai fale o le Malo.

O lou manatu ia faaaoga lenei tupe aua o mea ia o maintenance o mea ia e pito sili ona mulimuli pe a tau leai ni tupe; faapea e tuu mo lea tausaga pe afai ua uma tupe. Ae ua faapea uma i tausaga uma, ua oo mai nei i tulaga e toe manaomia se tupe tele e toe faagaioioia ai lenei galuega. O lea lau Afioga i le Minisita o le Falemai sei e silasila i le matou falemai. Na maligi ou loimata ina ua alu atu le matou asiasiga, i se tina o lo o i ai e tautau le IV ona e palapala tele le falemai. Ou te le iloa po o tagata o lo o faigaluega ai ua le mafai lava ona faataunuu le faamamaina o falemai. Ona o le vaai atu e leai ni faamalama, leai, e le o ola ili e le o ola moli, leai ni vai, ona ou faapa ai la lea, e pei foi ona lauga se isi sui mai Faasaleleaga e leai o ita ua leva ona ola i Niu Sila. E sili atu a fale o lo o tuu ai manu i Niu Sila i le mea le la e i ai nei ia Falemai i Salafai. Ou te talosaga atu lau Afioga sei e silasila i lea itu, aua e tele galuega e fia fai i ai. Ua atili lenei tele o galuega ona o le leai o ni maintenance foi lea e faia. O au foi e fai sina malamalama laititi i ituaiga galuega faapea, e le tele, na o sina vali fai ni faamalama fou, o le fale latou o la e lelei, ae pei o nai galuega laiti ia e fia faatinoina.

Ona ou oo mai ai lea i lau Afioga Leafa le Minisita o Galuega o le isi Minisita alofa, ou te talitonu o le isi Minisita fai mea mafai. E avatu ai le faafetai foi i le

Malo ona o le auala foi lea o le a fai atu i Salelologa e tau atu i Puapua. E momoli atu ai le faafetai ona ua amata nei ona galuega lea galuega tele. Ia o lenei galuega ou te talitonu o se galuega tatau, ua leva ona ai pefu le nuu mei o Faasaleleaga aemaise foi le matou itumalo.

Ae o le mea la ou te faatagi atu ai lau Afioga aua o la ua faagaioioi galuega, pe a pe a fai ni footpath mea foi lea e savali ai, i le matou itumalo na ona faafetai, aua e le tele se tupe e alu ai. A o fai le auala e mafai ona fai lena galuega, ni footpath, aua foi a uma nei le galuega, o le saosaoa o taavale o le a oo atu foi i lena itu e malaga atu i le Itu o Tane, ae ou te talitonu e le tele se tupe e faatino ai lea galuega. Ou te le i vaai foi i ata o le auala, pe i ai ni auala laupapa e tatau ona i ai i le va o Lano ma Asaga i le vai lena e i ai. Se tuu ia lea mataupu sei ou vaai i le ata pe i ai se auala laupapa i lea itu.

E i ai la sina mea ua galo ae ua ou tulai ese la mai le Afioga i le Minisita o Falemai, o le leai lea o ni fomai i Tuasivi, e pei foi ona saunoa ai le Afioga ia Vaai ma isi foi sui ua uma ona saunoa. E matua faanoanoa lava lou sui i lea itu ma ou te talitonu foi i le tau suega o ni fomai; e faigata i le Malo o le mea foi lea ua leai ai ni fomai. O lou manatu ua oo nei ina tatau ona fai se auala e le Malo e toe sue mai ni fomai. Ua tele tatou fomai la ua taape, i isi nuu sa faaaoga ma faasikolasipi ma ua tele foi tupe a Samoa ua alu ai. Ae paga lea lau Afioga i le Fofoga Fetalai, ua selesele e isi Malo ia galuega a le tatou Malo sa faia mo o tatou lava tagata i le faaaoga o fomai nei. Ae ou te le tuuaia foi fomai ona e leaga totogi. Sa tatau lava ona fai se polokalame a le Malo e toe taumafai ai e toe aumai nei fomai. Ia fai se incentive foi la lea pe a le siia le totogi, ia maua fua ni o laotu fale, pei ona maua fua taavale, o soo se mea lava e filifilia e le Malo, ae toe aumai nei fomai e fesoasoani i le atunuu ua pologa.

E faapefea i le Motu atoa i Savaii ae na o le tasi le fomai? Ia ma se fomai pisikoa ma lona faletua o lo o galulue nei. E faigata ia latou ona faafoe lea galuega i le leai o se taimi ma e galulue ai ma suesuea gasegase i le mamalu o le atunuu o lo o i ai i Salafai.

O lea la o le a ou toe foi i le Minisita o Galuega, ona ua uma ona faatagi atu foi i auala. Ia o le mea lava e tasi i Vai i le matou itumalo. O le matou itumalo o lo o i ai le vai foi lea e eli, o lo o i ai foi le pamu. Ae o lona pona o le leai o se tiso e faagaioioi ai le pamu; e na o le ono itula e faaalu ai ia tape, ia ae o la e i ai le vai o lo matou itumalo. O isi foi taimi ua leai se maa e faaola ai le afi. Ia o mea na o mea faigofie lau Afioga i le Minisita e le ni mea e alu ai ni tupe. O lau fautuaga, e a pe a aveese ia lena afi tiso ae tuu i ai se afi e alu i le uila o la ua oo atu le paoa i ai. Ia sei faamoemoe i ai le matou itumalo e maua ai se vai aua o se mea faigata pe a leai se vai. E moni o paipa o lo o i ai e fai sina laiti e le lava le pressure o le pamu mai i o i Puapua iinei i Lano. O ou te talitonu a i ai ma se isi pamu i le va o Lano ma Puapua, laitiiti ane e toe pamu a le vai foi lea ona malosai ai lea o le pressure. E le se galuega faigata aua ou te iloina e

## Saunoaga Faataupou a Sui Usufono 1961-2011

mafai ona fai, o lea e faatagi atu i lau Afioga sei e silasila i lea foi mafatiaga o lenei itumalo.

Ona ou oo mai lea i Falesaleleaga lava i Tuasivi, i fale o le tatou Malo o lo o fai nei ma Laumua o Savaii. O lo o i ai uma Matagaluega o le tatou Malo, o Falemeli, o le Justice, o mea uma o le Ofisa o le Palemia, o le fale pau le tapulaa o lo o i ai nei ua ono vaiaso o fai mai e leai se moli, e leai se paoa. Ua ou oo foi ma ou tilotilo ua tutulu luga o le mea e i ai le meter o le fale ua leva ona tutulu, ua toeitiiti a mu le fale. Ia ae ana mu, ia e fia foi afe po o fea a tatou aumaia ai se tupe e faia ai lea fale. Ona o lou talitonu o le faatamala o Matagaluega i le faiga o maintenances foi ia. O mea o lo o faaletonu o mea faigofie lava ia te au latou aua o la ou te iloa e tatau ona fai, ae o le faatinoga la pe a oo mai i le Malo e fai sina faigata. Ou te le iloa po o le a le auala e faatino ai, ae ui o lea ou te talitonu i lau Afioga o le a e silasila totoa i ai i lea itu.

Ia ona ou oo mai lea i le Afioga i le Minisita o Fanua. Lau Afioga o tuamaota foi o le matou nuu i Lano e leai ni fanua ua ave, ua freehold ia fanua ou te le iloa pe na faapefea ona faia i na ona po. Ou te faatagi atu i lau Afioga sei fesoasoani nei toe maua nei fanua ua leai ni mea e o i ai lo maotu nuu. Ou te talitonu lava e i ai a auala e tatau ona uia ma mafai ai ona toe maua mai ia fanua sei galulue ai ia le matou tupulaga. Ou te talitonu foi o le a tuu atu i ou luma e fai i ai sau faatatau.

E avatu lau faafetai na ou vaai i le budget o lo o i ai se vaegatupe e tuu atu mo le faamoemoe foi lea o le a faia le mea toso vaa i Salelologa. Ua matua ou fiafia tele i lea itu ona ua amanaia foi lo matou motu i Salafai, e avatu ai sea fesoasoani aua o le tele o tagata e leai ni galuega. O lea ou te talosaga atu ai i lau Afioga i le Palemia, afai la ua amata ona tuu atu lea itu i Savaii, o le a le mea e taofi ai ae le fai loa se mea e tasi o le area i Savaii? E avatu ai ni fale faigaluega, e faaoga ai le tele o fanau ua leai ni galuega i Savaii. Ou te talitonu o le tele o idea manuia lea e faamanuia ai le Motu i Savaii. Aua a tatou taunuu mai nei tatou vaavaai i fanau ma alo foi i Samoa, o tausga uma lava pe ova atu i le afe tamaiti uma a latou aoga. E faigata ia te au ona ou mafaufau po o fea le mea e maua ai ni galuega o nei fanau ma alo o le tatou atunuu mo le lumanai. E feoloolo i tausaga ua mavae atu sa mafai ona malaga i Niu Sila faapea foi Ausetalia ma Amerika. Ia e le o po se lilo ia i tatou i le tulaga ua i ai nei Niu Sila, faapea foi Ausetalia ma nuu e i ai Amerika. I le tala o le Tupe ua faaletonu ua le mafai ai ona absorb tatou i tagata nei e o atu. O le tele foi o tatou tagata o lo o i ai i na atunuu ua le o toe faigaluega. O lou talitonuga lau Afioga o le taimi tonu lava lenei e tatau ai ia tatou ona mafai ona aumai ni kamupani fai oloa iinei i Samoa ina ia maua ai ni galuega a fanau, po o alo foi o lo o avatu nei i aoga.

Sa i ai foi manatu muamua i lenei foi vaega ae ou te vaai atu lava e lei faatino. Ou te talitonu o le taimi lenei e taumafai ona adjust mai mea o investment i Samoa. Ou te talitonu e tele foi kamupani e fia invest latou tupe ae o lona pona e muamua ona tilotilo po o

faapefea mai tatou poo sasao poo lelei faatoa o mai ai lea invest, aumai latou tupe e invest iinei. O le mea lea ua ou vaai atu nei i kamupani Sapani o lo o aumai o le a amata iinei. E avatu foi le faafetai aua ou te lagona lava e tele nisi galuega e maua mai ai. Ae o lona pona e le taitai lava; ia te au lava latou e le taitai lava. E tatau i le Malo ona toe faaopoopo se tupe ina ia faatele ai le invest le taumafai lava ona faatosina mai nisi kamupani mai fafo, ia maua ai le tamaoaiga o Samoa.

Ou te talitonu e faapena foi turisi; o le tele o tagata le faigaluega a le tatou atunuu e le lava le tupe o lo o faamoemoe mo le promotion o turisi. Aua e mafai ona fai e atunuu laiti e i ai Rarotonga, Fiti, Vanuatu, Solomana.

Ia o le itu lea i turisi, ou te talitonu o le tasi lena faamanuiaga a le tatou Malo o lo o maua mai ai. I atunuu tetele o le tasi lea vaega tupe i overseas fund e maua mai i Turisi, ma e o lea foi atiina ae o se atiina ae e le faigata e faigofie. E mafai ona maua mai tagata e invest e Samoa mo faiga o Faletalimalo ae tasi lava le faalavelave o i ai, o le taugata o pasese foi ia e o mai ai i iinei i Samoa. Na ou faitau nei i le pepa lea ananafi, e \$700.00 e alu atu i Ausetalia e alu i Hawaii, e \$1,000 e alu atu ai i Ausetalia i Sydney e alu i Amerika. Ae o le sau mai Sydney i iinei i Samoa e \$2,000. Ia o ai la se isi e fia oo mai iinei i Samoa pe afai e mafai ona malaga i Hawaii i le mamao i le \$760.00?

Lau Afioga a le Fofoga Fetalai, ua tatau nei ona fai sina faatautau a le Malo i nisi auala e faataugofie ai pasese e mafai ona o mai turisi i Samoa. E tusa lea aua foi e moi o lea o le Polenisia o le vaalele o Samoa, ou te le fia fai vaalele Samoa pe afai e le maua le tupe lea i le pasese e maua mai ai turisi. E sili ai ona aumai se isi kamupani e faia a tatou vaalele pe afai e pau pasese. Aua a fuafua atu i le mamao o nuu o lo o i ai nei e taugofie pasese ae oo mai i le va o Niu Sila ma Samoa na o sina tolu itula ma le afa ma nuu e valu itula e alu ai le vaalele e le taitai fetai lau Afioga.

Ia ae ui o lea o le a i ai se isi taimi o lumanai e avatu ai se manatu, ae e avatu ai le faafetai mo le avanoa, e avatu ai sina manaoga po o sina fautuaga foi i le Malo i lenei taimi. Ia manuia lau Afioga i le Fofoga Fetalai, faapea foi le Afioga i le alii Palemia, Minisita ia aemaise ia alii faipule o lo o tatou i ai nei i lenei taeao. Soifua.

\*\*\*\*\*